

宿雨清幾句


朝陽晨帝城

望奔人樂業

瓊上踏歌行



全唐詩 八



中华古典精华文库

全 唐 诗

(第八部)

第二百六十一卷

卷 261_1【寄李白】

任华

古来文章有能奔逸气，耸高格，清人心神，惊人魂魄。
我闻当今有李白，大猎赋，鸿猷文；嗤长卿，笑子云。
班张所作琐细不入耳，未知卿云得在嗤笑限。登庐山，
观瀑布，海风吹不断，江月照还空，余爱此两句；
登天台，望渤海，云垂大鹏飞，山压巨鳌背，
斯言亦好在。至于他作多不拘常律，振摆超腾，
既俊且逸。或醉中操纸，或兴来走笔。手下忽然片云飞，
眼前划见孤峰出。而我有时白日忽欲睡，
睡觉欻然起攘臂。任生知有君，君也知有任生未？
中间闻道在长安，及余戾止，君已江东访元丹，
邂逅不得见君面。每常把酒，向东望良久。
见说往年在翰林，胸中矛戟何森森。新诗传在宫人口，
佳句不离明主心。身骑天马多意气，目送飞鸿对豪贵。
承恩召入凡几回，待诏归来仍半醉。权臣妒盛名，
群犬多吠声。有敕放君却归隐沦处，高歌大笑出关去。
且向东山为外臣，诸侯交迓驰朱轮。白璧一双买交者，
黄金百镒相知人。平生傲岸其志不可测；数十年为客，

未尝一日低颜色。八咏楼中坦腹眠，五侯门下无心忆。
繁花越台上，细柳吴宫侧。绿水青山知有君，
白云明月偏相识，养高兼养闲，可望不可攀。
庄周万物外，范蠡五湖间。人传访道沧海上，
丁令王乔每往还。蓬莱径是曾到来，方丈岂唯方一丈。
伊余每欲乘兴往相寻，江湖拥隔劳寸心。
今朝忽遇东飞翼，寄此一章表胸臆。倘能报我一片言，
但访任华有人识。

卷 261_2【寄杜拾遗】

任华

杜拾遗，名甫第二才甚奇。任生与君别，别来已多时，
何尝一日不相思。杜拾遗，知不知？
昨日有人诵得数篇黄绢词，吾怪异奇特借问，
果然称是杜二之所为。势攫虎豹，气腾蛟螭，
沧海无风似鼓荡，华岳平地欲奔驰。曹刘俯仰惭大敌，
沈谢逡巡称小儿。昔在帝城中，盛名君一个。
诸人见所作，无不心胆破。郎官丛里作狂歌，
丞相阁中常醉卧。前年皇帝归长安，承恩阔步青云端。
积翠扈游花匱匝，披香寓直月团栾。英才特达承天眷，
公卿无不相钦羨。只缘汲黯好直言，遂使安仁却为掾。
如今避地锦城隅，幕下英僚每日相随提玉壶。
半醉起舞捋髭须，乍低乍昂傍若无。
古人制礼但为防俗士，岂得为君设之乎。

而我不飞不鸣亦何以，只待朝廷有知己。
已曾读却无限书，拙诗一句两句在人耳。
如今看之总无益，又不能崎岖傍朝市。且当事耕稼，
岂得便徒尔。南阳葛亮为友朋，东山谢安作邻里。
闲常把琴弄，闷即携樽起。莺啼二月三月时，
花发千山万山里。此时幽旷无人知，火急将书凭驿使，
为报杜拾遗。

卷 261_3 【怀素上人草书歌】

任华

吾尝好奇，古来草圣无不知。岂不知右军与献之，
虽有壮丽之骨，恨无狂逸之姿。中间张长史，
独放荡而不羁，以颠为名倾荡于当时。张老颠，
殊不颠于怀素。怀素颠，乃是颠。人谓尔从江南来，
我谓尔从天上来。负颠狂之墨妙，有墨狂之逸才。
狂僧前日动京华，朝骑王公大人马，暮宿王公大人家。
谁不造素屏？谁不涂粉壁？粉壁摇晴光，素屏凝晓霜，
待君挥洒兮不可弥忘。骏马迎来坐堂中，
金盆盛酒竹叶香。十杯五杯不解意，百杯已后始颠狂。
一颠一狂多意气，大叫一声起攘臂。挥毫倏忽千万字，
有时一字两字长丈二。翕若长鲸泼刺动海岛，
欻若长蛇戎律透深草。回环缭绕相拘连，
千变万化在眼前。飘风骤雨相击射，速禄飒拉动檐隙。
掷华山巨石以为点，掣衡山阵云以为画。兴不尽，

势转雄，恐天低而地窄，更有何处最可怜，
裹裹枯藤万丈悬。万丈悬，拂秋水，映秋天；或如丝，
或如发，风吹欲绝又不绝。锋芒利如欧冶剑，
劲直浑是并州铁。时复枯燥何褊裒，
忽觉阴山突兀横翠微。中有枯松错落一万丈，
倒挂绝壁蹙枯枝。千魑魅兮万魍魎，欲出不可何闪尸。
又如翰海日暮愁阴浓，忽然跃出千黑龙。夭矫偃蹇，
入乎苍穹。飞沙走石满穷塞，万里飐飐西北风。
狂僧有绝艺，非数仞高墙不足以逞其笔势。
或逢花笺与绢素，凝神执笔守恒度。别来筋骨多情趣，
霏霏微微点长露。三秋月照丹凤楼，二月花开上林树。
终恐绊骐驎之足，不得展千里之步。狂僧狂僧，
尔虽有绝艺，犹当假良媒。不因礼部张公将尔来，
如何得声名一旦喧九垓。

卷 261_4【金陵酬李翰林谪仙子】

魏万

君抱碧海珠，我怀蓝田玉。各称希代宝，万里遥相烛。
长卿慕蔺久，子猷意已深。平生风云人，暗合江海心。
去秋忽乘兴，命驾来东土。谪仙游梁园，爱子在邹鲁。
二处一不见，拂衣向江东。五两挂海月，扁舟随长风。
南游吴越遍，高揖二千石。雪上天台山，春逢翰林伯。
宣父敬项橐，林宗重黄生。一长复一少，相看如弟兄。
惕然意不尽，更逐西南去。同舟入秦淮，建业龙盘处。

楚歌对吴酒，借问承恩初。宫买长门赋，天迎驷马车。
才高世难容，道废可推命。安石重携妓，子房空谢病。
金陵百万户，六代帝王都。虎石据西江，钟山临北湖。
二山信为美，王屋人相待。应为歧路多，不知岁寒在。
君游早晚还，勿久风尘间。此别未远别，秋期到仙山。

卷 261_5【赠李十二白】

崔宗之

凉风八九月，白露满空庭。耿耿意不畅，捎捎风叶声。
思见雄俊士，共话今古情。李侯忽来仪，把袂苦不早。
清论既抵掌，玄谈又绝倒。分明楚汉事，历历王霸道。
担囊无俗物，访古千里馀。袖有匕首剑，怀中茂陵书。
双眸光照人，词赋凌子虚。酌酒弦素琴，霜气正凝洁。
平生心中事，今日为君说。我家有别业，寄在嵩之阳。
明月出高岑，清谿澄素光。云散窗户静，风吹松桂香。
子若同斯游，千载不相忘。

卷 261_6【赠李十二白】

崔成甫

我是潇湘放逐臣，君辞明主汉江滨。
天外常求太白老，金陵捉得酒仙人。

卷 261_7 【寄题杜拾遗锦江野亭】

严武

漫向江头把钓竿，懒眠沙草爱风湍。莫倚善题鹦鹉赋，
何须不著鵷鷺冠。腹中书籍幽时晒，肘后医方静处看。
兴发会能驰骏马，应须直到使君滩。

卷 261_8 【酬别杜二】

严武

独逢尧典日，再睹汉官时。未效风霜劲，空惭雨露私。
夜钟清万户，曙漏拂千旗。并向殊庭谒，俱承别馆追。
斗城怜旧路，涡水惜归期。峰树还相伴，江云更对垂。
试回沧海棹，莫妒敬亭诗。只是书应寄，无忘酒共持。
但令心事在，未肯鬓毛衰。最怅巴山里，清猿醒梦思。

卷 261_9 【题巴州光福寺楠木】

严武

楚江长流对楚寺，楠木幽生赤崖背。临谿插石盘老根，
苔色青苍山雨痕。高枝闹叶鸟不度，半掩白云朝与暮。

香殿萧条转密阴，花龕滴沥垂清露。闻道偏多越水头，
烟生霁敛使人愁。月明忽忆湘川夜，猿叫还思鄂渚秋。
看君幽霭几千丈，寂寞穷山今遇赏。亦知钟梵报黄昏，
犹卧禅床恋奇响。

卷 261_10 【班婕妤（一作严识玄诗）】

严武

贱妾如桃李，君王若岁时。秋风一已劲，摇落不胜悲。
寂寂苍苔满，沈沈绿草滋。繁华非此日，指辇竞何辞。

卷 261_11 【巴岭答杜二见忆】

严武

卧向巴山落月时，两乡千里梦相思。可但步兵偏爱酒，
也知光禄最能诗。江头赤叶枫愁客，篱外黄花菊对谁。
跂马望君非一度，冷猿秋雁不胜悲。

卷 261_12 【军城早秋】

严武

昨夜秋风入汉关，朔云边月满西山。
更催飞将追骄虏，莫遣沙场匹马还。

卷 261_13【潭州留别杜员外院长】

韦迢

江畔长沙驿，相逢缆客船。大名诗独步，小郡海西偏。
地湿愁飞鵬，天炎畏跼鸢。去留俱失意，把臂共潸然。

卷 261_14【早发湘潭寄杜员外院长】

韦迢

北风昨夜雨，江上早来凉。楚岫千峰翠，湘潭一叶黄。
故人湖外客，白首尚为郎。相忆无南雁，何时得报章。

卷 261_15【寄杜员外（员外垂示诗，因作此寄上）】

郭受

新诗海内流传久，旧德朝中属望劳。郡邑地卑饶雾雨，
江湖天阔足风涛。松花酒熟傍看醉，莲叶舟轻自学操。
春兴不知凡几首，衡阳纸价顿能高。

第二百六十二卷

卷 262_1 【晦日呈诸判官】

韩滉

晦日新晴春色娇，万家攀折渡长桥。
年年老向江城寺，不觉春风换柳条。

卷 262_2 【听乐怅然自述（一作病中遣妓，一作司空曙诗）】

韩滉

万事伤心对管弦，一身含泪向春烟。
黄金用尽教歌舞，留与他人乐少年。

卷 262_3 【题弟晁《述书赋》后】

窦蒙

受命别家乡，思归每断肠。季江留被在，子敬与琴亡。

吾弟当平昔，才名荷宠光。作诗通小雅，献赋掩长杨。
流转三千里，悲啼百万行。庭前紫荆树，何日再芬芳。

卷 262_4 【迎春东郊】

张濯

颢项时初谢，句芒令复陈。飞灰将应节，宾日已知春。
考历明三统，迎祥受万人。衣冠宵执玉，坛墀晓清尘。
肃穆来东道，回环拱北辰。仗前花待发，旂处柳疑新。
云敛黄山际，冰开素浚滨。圣朝多庆赏，希为荐沈沦。

卷 262_5 【题舜庙】

张濯

古都遗庙出河濱，万代千秋仰圣君。蒲坂城边长逝水，
苍梧野外不归云。寥寥象设魂应在，寂寂虞篇德已闻。
向晚风吹庭下柏，犹疑琴曲韵南薰。

卷 262_6 【迎春东郊】

王绰

玉管潜移律，东郊始报春。銮舆应宝运，天仗出佳辰。
睿泽光时辈，恩辉及物新。虬螭动旌旆，烟景入城闉。
御柳初含色，龙池渐启津。谁怜在阴者，得与蛰虫伸。

卷 262_7【邯郸少年行】

郑锡

霞鞍金口骝，豹袖紫貂裘。家住丛台近，门前漳水流。
唤人呈楚舞，借客试吴钩。见说秦兵至，甘心赴国仇。

卷 262_8【陇头别】

郑锡

秋尽初移幕，沾裳一送君。据鞍窥古堠，开灶爇寒云。
登陇人回首，临关马顾群。从来断肠处，皆向此中分。

卷 262_9【度关山】

郑锡

象弭插文犀，鱼肠莹鸂鶒。水声分陇咽，马色度关迷。
晓幕胡沙惨，危烽汉月低。仍闻数骑将，更欲出辽西。

卷 262_10 【出塞】

郑锡

关山落叶秋，掩泪望营州。辽海云沙暮，幽燕旌旆愁。
战馀能送阵，身老未封侯。去国三千里，归心红粉楼。

卷 262_11 【玉阶怨】

郑锡

长门寒水流，高殿晓风秋。昨夜鸳鸯梦，还陪豹尾游。
前鱼不解泣，共辇岂关羞。那及轻身燕，双飞上玉楼。

卷 262_12 【千里思】

郑锡

渭水通胡苑，轮台望汉关。帛书秋海断，锦字夜机闲。
旅梦虫催晓，边心雁带还。惟馀两乡思，一夕度关山。

卷 262_13 【襄阳乐】

郑锡

春生岷首东，先暖习池风。拂水初含绿，惊林未吐红。
渚边游汉女，桑下问庞公。磨灭怀中刺，曾将示孔融。

卷 262_14【送客之江西】

郑锡

乘轺奉紫泥，泽国渺天涯。九派春潮满，孤帆暮雨低。
草深莺断续，花落水东西。更有高唐处，知君路不迷。

卷 262_15【望月】

郑锡

高堂新月明，虚殿夕风清。素影纱窗霁，浮凉羽扇轻。
稍随微露滴，渐逐晓参横。遥忆云中咏，萧条空复情。

卷 262_16【出塞曲】

郑锡

校尉征兵出塞西，别营分骑过龙溪。沙平虏迹风吹尽，

雾失烽烟道易迷。玉靶半开鸿已落，金河欲渡马连嘶。
会当系取天骄入，不使军书夜刺闺。

卷 262_17【秦人谣】

古之奇

微生祖龙代，却思尧舜道。何人仕帝庭，拔杀指佞草。
奸臣弄民柄，天子恣衷抱。上下一相蒙，马鹿遂颠倒。
中国既板荡，骨肉安可保。人生贵年寿，吾恨死不早。

卷 262_18【阮客旧居】

李阳冰

阮客身何在，仙云洞口横。人间不到处，今日此中行。

第二百六十三卷

卷 263_1 【酬耿拾遗题赠】

严维

掩扉常自静，驿吏忽传呼。水巷惊驯鸟，藜床起病躯。
顾身悲欲老，戒子力为儒。明日公西去，烟霞复作徒。

卷 263_2 【酬王侍御西陵渡见寄】

严维

前年万里别，昨日一封书。郢曲西陵渡，秦官使者车。
柳塘薰昼日，花水溢春渠。若不嫌鸡黍，先令扫弊庐。

卷 263_3 【酬刘员外见寄】

严维

苏耽佐郡时，近出白云司。药补清羸疾，窗吟绝妙词。

柳塘春水慢，花坞夕阳迟。欲识怀君意，明朝访楫师。

卷 263_4【同韩员外宿云门寺】

严维

小岭路难近，仙郎此夕过。潭空观月定，涧静见云多。
竹翠烟深锁，松声雨点和。万缘俱不有，对境自垂萝。

卷 263_5【酬诸公宿镜水宅】

严维

幸免低头向府中，贵将藜藿与君同。阳雁叫霜来枕上，
寒山映月在湖中。诗书何德名夫子，草木推年长数公。
闻道汉家偏尚少，此身那此访芝翁。

卷 263_6【送薛尚书入蜀】

严维

卑情不敢论，拜首入辕门。列郡诸侯长，登朝八座尊。
凝笳临水发，行旆向风翻。几许遗黎泣，同怀父母恩。

卷 263_7 【送李秘书往儋州】

严维

魑魅曾为伍，蓬莱近拜郎。臣心瞻北阙，家事在南荒。
莎草山城小，毛洲海驿长。玄成知必大，宁是泛沧浪。

卷 263_8 【送人入金华（一作赠别东阳客）】

严维

明月双溪水，清风八咏楼。昔年为客处，今日送君游。

卷 263_9 【送崔峒使往睦州兼寄薛司户】

严维

如今相府用英髦，独往南州肯告劳，冰水近开渔浦出，
雪云初卷定山高，木奴花映桐庐县，青雀舟随白露涛。
使者应须访廉吏，府中惟有范功曹。

卷 263_10 【送房元直赴北京】

严维

犹道楼兰十万师，书生匹马去何之。临岐未断归家目，
望月空吟出塞诗。常欲激昂论上策，不应憔悴老明时。
遥知到日逢寒食，彩笔长裾会晋祠。

卷 263_11【荆溪馆呈丘义兴】

严维

失路荆溪上，依人忽暝投。长桥今夜月，阳羨古时州。
野烧明山郭，寒更出县楼。先生能馆我，无事五湖游。

卷 263_12【一公新泉（一作题灵一上人院新泉）】

严维

山下新泉出，泠泠北去源。落池才有响，喷石未成痕。
独映孤松色，殊分众鸟喧。唯当清夜月，观此启禅门。

卷 263_13【奉试水精环】

严维

王室符长庆，环中得水精。任圆循不极，见素质仍贞。
信是天然瑞，非因朴斫成。无瑕胜玉美，至洁过冰清。
未肯齐珉价，宁同杂佩声。能衔任黄雀，亦欲应时明。

卷 263_14【自云阳归晚泊陆澧宅】

严维

天阴行易晚，前路故人居。孤棹所思久，寒林相见初。
闲灯忘夜永，清漏任更疏。明发还须去，离家几岁除。

卷 263_15【九日陪崔郎中北山宴】

严维

上客南台至，重阳此会文。菊芳寒露洗，杯翠夕阳曛。
务简人同醉，溪闲鸟自群。府中官最小，唯有孟参军。

卷 263_16【留别邹绍刘长卿】

严维

中年从一尉，自笑此身非。道在甘微禄，时难耻息机。
晨趋本郡府，昼掩故山扉。待见干戈毕，何妨更采薇。

卷 263_17 【书情献相公】

严维

年来白发欲星星，误却生涯是一经。
魏阙望中何日见，商歌奏罢复谁听。
孤根独弃慚山木，弱质无成状水萍。
今日更须询哲匠，不应休去老岩扃。

卷 263_18 【赠送朱放】

严维

昔年居汉水，日醉习家池。
道胜迹常在，名高身不知。
欲依天目住，新自始宁移。
生事曾无长，惟将白接䟽。

卷 263_45 【剡中赠张卿侍御】

严维

辟疆年正少，公子贵初还。
早列月卿位，新参柱史班。
千夫驰驿道，驷马入家山。
深巷乌衣盛，高门画戟闲。
逶迤天乐下，照耀剡溪间。
自贱游章句，空为衰草颜。

卷 263_46【赠万经】

严维

万公长慢世，昨日又隳官。纵酒真彭泽，论诗得建安。
家山伯禹穴，别墅小长干。辄有时人至，窗前白眼看。

卷 263_47【书情上李苏州】

严维

东土苗人尚有残，皇皇亚相出朝端。手持国宪群僚畏，
口喻天慈百姓安。礼数自怜今日绝，风流空计往年欢。
误著青袍将十载，忍令渔浦却垂竿。

卷 263_48【馀姚祗役奉简鲍参军】

严维

童年献赋在皇州，方寸思量君与侯。万事无成新白首，
两春虚掷对沧流。歌诗盛赋文星动，箫管新亭晦日游。
知己欲依何水部，乡人今正贱东丘。

卷 263_49【奉和独孤中丞游云门寺】

严维

绝壑开花界，耶溪极上源。光辉三独坐，登陟五云门。
深木鸣驺驭，晴山曜武贲。乱泉观坐卧，疏磬发朝昏。
苍翠新秋色，莓苔积雨痕。上方看度鸟，后夜听吟猿。
异迹焚香对，新诗酌茗论。归来还抚俗，诸老莫攀辕。

卷 263_50【奉和皇甫大夫夏日游花严寺（时大夫昆季同行）】

严维

初第华严会，王家少长行。到宫龙节驻，礼塔雁行成。
莲界千峰静，梅天一雨清。禅庭未可恋，圣主寄苍生。

卷 263_51【宿法华寺】

严维

一夕雨沉沉，哀猿万木阴。天龙来护法，长老密看心。
鱼梵空山静，纱灯古殿深。无生久已学，白发浪相侵。

卷 263_52【题茅山李尊师所居（一作秦系诗）】

严维

天师百岁少如童，不到山中更不逢。洗药每临新瀑水，
步虚时绕最高峰。篱根五月留残雪，座右千年荫古松。
此去人寰知近远，回看路隔一重重。

卷 263_53【送薛居士和州读书】

严维

孤云独鹤共悠悠，万卷经书一叶舟，楚地巢城民舍少，
烟村社树鹭湖秋。蒿莱织妾晨炊黍，隅落耕童夕放牛。
年少不应辞苦节，诸生若遇亦封侯。

卷 263_54【送李端（一作卢纶诗）】

严维

故关衰草遍，离别正堪悲。路出寒云外，人归暮雪时。
少孤为客早，多难识君迟。掩泣空相向，风尘何所期。

卷 263_55 【宿天竺寺】

严维

方外主人名道林，怕将水月净身心。
居然对我说无我，寂历山深将夜深。

卷 263_56 【丹阳送韦参军】

严维

丹阳郭里送行舟，一别心知两地秋。
日晚江南望江北，寒鸦飞尽水悠悠。

卷 263_57 【入唐溪】

严维

啸终万籁起，吹去当溪云。环屿或明昧，远峰尚氛氲。
雨新翠叶发，夜早玄象分。金涧流不尽，入山深更闻。

卷 263_58 【送桃岩成上人归本寺】

严维

长老归缘起，桃花忆旧岩。清晨云抱石，深夜月笼杉。
道具门人捧，斋粮谷鸟衔。馀生愿依止，文字欲三缄。

卷 263_59【酬普选二上人期相会见寄】

严维

本意宿东林，因听子贱琴。遥知大小朗，已断去来心。
夜静溪声近，庭寒月色深。宁知尘外意，定后便成吟。

卷 263_60【相里使君宅听澄上人吹小管】

严维

秦僧吹竹闭秋城，早在梨园称主情。
今夕襄阳山太守，座中流泪听商声。

卷 263_61【赠别至弘上人】

严维

最称弘偃少，早岁草茅居。年老从僧律，生知解佛书。

沛艾如龙马，来从上苑中。棣华恩见赐，伯舅礼仍崇。
衲衣求坏帛，野饭拾春蔬。章句无求断，时中学有馀。

卷 263_62【奉和刘祭酒伤白马（此马敕赐宁王，转赠祭酒）】

严维

镜点黄金眼，花开白雪骰。性柔君子德，足逸大王风。
色照鸣珂静，声连喷玉雄。食场恩未尽，过隙命旋终。
练影依云没，银鞍向月空。仍闻乐府唱，犹念代劳功。

卷 263_63【哭灵一上人】

严维

一公何不住，空有远公名。共说岑山路，今时不可行。
旧房松更老，新塔草初生。经论传缙侣，文章遍墨卿。
禅林枝干折，法宇栋梁倾。谁复修僧史，应知传已成。

卷 263_64【题鲍行军小阁】

严维

宇下无留事，经营意独新。文房已得地，相阁是推轮。

]

席上招贤急，山阴对雪频。虚明先旦暮，启闭异冬春。
谈笑兵家法，逢迎幕府宾。还将负暄处，时借在阴人。

卷 263_65【陪皇甫大夫谒禹庙】

严维

竹使羞殷荐，松龛拜夏祠。为鱼歌德后，舞羽降神时。
文卫瞻如在，精灵信有期。夕阳陪醉止，塘上鸟咸迟。

卷 263_66【同王征君湘中有怀（一作张谓诗）】

严维

八月洞庭秋，潇湘水北流。还家万里梦，为客五更愁。
不用看书帙，偏宜上酒楼。故人京洛满，何日复同游。

卷 263_67【奉和皇甫大夫祈雨应时雨降】

严维

致和知必感，岁旱未书灾。伯禹明灵降，元戎祷请来。
九成陈夏乐，三献奉殷罍。掣曳旗交电，铿锵鼓应雷。
行云依盖转，飞雨逐车回。欲识皇天意，为霖贲在哉。

卷 263_68【赠别刘长卿时赴河南严中丞幕府】

严维

早见登郎署，同时迹下僚。几年江路永，今去国门遥。
文变骚人体，官移汉帝朝。望山吟度日，接枕话通宵。
万里趋公府，孤帆恨信潮。匡时知己老，圣代耻逃尧。

卷 263_69【晦日宴游】

严维

晦日湔裾俗，春楼致酒时。出山还已醉，谢客旧能诗。
溪柳薰晴浅，岩花待闰迟。为邦久无事，比屋自熙熙。

卷 263_70【夏日纳凉】

严维

山阴过野客，镜里接仙郎。盥漱临寒水，褰闱入夏堂。
杉松交日影，枕簟上湖光。袞袞承嘉话，清风纳晚凉。

卷 263_71【僧房避暑】

卷 263_72【九日登高】

严维

诗家九日怜芳菊，迟客高斋瞰浙江。汉浦浪花摇素壁，
西陵树色入秋窗。木奴向熟悬金实，桑落新开泻玉缸。
四子醉时争讲德，笑论黄霸屈为邦。

卷 263_73【九月十日即事】

严维

家贫惟种竹，时幸故人看。菊度重阳少，林经闰月寒。
宿醒犹落帽，华发强扶冠。美景良难得，今朝更尽欢。

卷 263_74【送丘为下第归苏州】

严维

沧江一身客，献赋空十年。明主岂能好，今人谁举贤。
国门税征驾，旅食谋归旋。噉日媚春水，绿蘋香客船。
无媒既不达，余亦思归田。

卷 263_75【送少微上人东南游】

严维

旧游多不见，师在翟公门。瘴海空山热，雷州白日昏。
片心应为法，万里独无言。人尽酬恩去，平生未感恩。

卷 263_76【赠送崔子向】

严维

旅食来江上，求名赴洛阳。新诗踪谢守，内学似支郎。
行怯秦为客，心依越是乡。何人作知己，送尔泪浪浪。

卷 263_77【答刘长卿七里濂重送】

严维

新安非欲枉帆过，海内如君有几何。
醉里别时秋水色，老人南望一狂歌。

卷 263_78【岁初喜皇甫侍御至】

严维

湖上新正逢故人，情深应不笑家贫。
明朝别后门还掩，修竹千竿一老身。

卷 263_79【送舍弟】

严维

疏懒吾成性，才华尔自强。早称眉最白，何事绶仍黄。
时暑嗟于迈，家贫念聚粮。只应宵梦里，诗兴属池塘。

卷 263_80【示外生】

严维

牵役非吾好，宽情尔在傍。经过悲井邑，起坐倦舟航。
相宅生应贵，逢时学可强。无轻吾未用，世事有行藏。

卷 263_81【咏孩子】

严维

嘉客会初筵，宜时魄再圆。众皆含笑戏，谁不点颐怜。

绣被花堪摘，罗绷色欲妍。将雏有旧曲，还入武城弦。

卷 263_82【酬谢侍御喜王宇及第见贺不遇之作】

严维

寂寞柴门掩，经过柱史荣。老夫宁有力，半子自成名。
柳映三桥发，花连上道明。缄书到别墅，郢曲果先成。

卷 263_83【秋日与诸公文会天□寺】

严维

相访从吾道，因缘会尔时。龙盘馀帝宅，花界古人祠。
明月虚空色，青林大小枝。还将经济学，来问道安师。

卷 263_84【答刘长卿蛇浦桥月下重送】

严维

月色今宵最明，庭闲夜久天清。寂寞多年老宦，
殷勤远别深情。溪临修竹烟色，风落高梧雨声。
耿耿相看不寐，遥闻晓柝山城。

卷 263_85 【发桐庐寄刘员外】

严维

处处云山无尽时，桐庐南望转参差。
舟人莫道新安近，欲上潺湲行自迟。

卷 263_86 【秋夜船行】

严维

扁舟时属暝，月上有馀辉。海燕秋还去，渔人夜不归。
中流何寂寂，孤棹也依依。一点前村火，谁家未掩扉。

卷 263_87 【游灊陵山】

严维

入山未尽意，胜迹聊独寻。方士去在昔，药堂留至今。
四隅白云闲，一路清溪深。芳秀惬春目，高闲宜远心。
潭分化丹水，路绕升仙林。此道人不悟，坐鸣松下琴。

卷 263_88 【重送新安刘员外】

严维

秋江渺渺水空波，越客孤舟欲榜歌。
手折衰杨悲老大，故人零落已无多。

卷 263_89【忆长安·五月（共十二咏，丘丹等同赋，各见本集）】

严维

忆长安，五月时，君王避暑华池。进膳甘瓜朱李，
续命芳兰彩丝。竞处高明台榭，槐阴柳色通逵。

卷 263_90【状江南·季春（共十二咏，丘丹等同赋，各见本集）】

严维

江南季春天，莼叶细如弦。池边草作径，湖上叶如船。

卷 263_91【句】

严维

五色惊彩凤，千里象骢威。（《张侍御孩子》）

三伏轩车动，尧心急谏官。名通内籍贵，
立近御床寒。（《送皇甫拾遗归朝》）

波从少海息，云自大风开。（代宗挽歌，并《诗式》）

第二百六十四卷

卷 264_1【琴歌】

顾况

琴调秋些，胡风绕雪，峡泉声咽，佳人愁些。

卷 264_2【上古之什补亡训传十三章·上古一章】

顾况

（上古，愍农也。）

遐哉上古，生弃与柱。句龙是生，乃有甫田。惟彼甫田，
有万斯年。开利之源。无乃塞源。一廛亦官，百廛亦官，
嗇夫孔艰。浸兮暎兮，申有蠹兮。惟馨祀是患，
岂止馁与寒。嗇夫咨咨，稊盛苗衰。耕之耰之，
袞褌锄犁，手胼足胝。水之蛭螾，吮喋我肌。
我姑自思，胡不奋飞。东人利百，西人利百。有匪我心，
胡为不易。河水活活，万人逐末。俾尔之愉悦兮。

卷 264_3【上古之什补亡训传十三章·左车二章】

顾况

（左车，凭险也。震为雷，兄长之。左，东方之师也。
凭险不已，君子忧心，而作是诗。）
左车有庆，万人犹病。曷可去之，于党孔盛。
敏尔之生，胡为波迸。

左车有赫，万人毒螫。曷可去之，于党孔硕。
敏尔之生，胡为草戚。

卷 264_4【上古之什补亡训传十三章·筑城二章】

顾况

（筑城，刺临戎也。寺人临戎，以墓砖为城壁。）
筑城登登，于以作固。咨尔寺兮，发郊外冢墓。
死而无知，犹或不可；若其有知，惟上帝是愬。

筑城奕奕，于以固敌。咨尔寺兮，发郊外冢髑。
死而无知，犹或不可。若其有知，惟上帝是谪。

卷 264_5【上古之什补亡训传十三章·持斧一章】

顾况

（持斧，启戎士也。戎士伐松柏为蒸薪。

孝子徘徊而作是诗。）

持斧持斧，无剪我松柏兮。

卷 264_6【上古之什补亡训传十三章·十月之郊一章】

顾况

（十月之郊，造公室也。君子居公室，当思布德行化焉。）

十月之郊，群木肇生。阳潜地中，舒达句萌。噫其蔚兮，

不可以游息。乃焮蒺藜，乃夷荆棘，乃繇彼曲直，

匠氏度思。登斧以时，泽梁蓁蓁。无或夭枝，有巨根蒂。

生混茫际，呼吸群籁。万人挥斤，坎坎有厉。陆迁水济，

百力殫弊。审方面势，姑博其制，作为公室。公室既成，

御燥湿风日。栋之斯厚，榱之斯密。如翼于飞，

如鳞栉比。缭以周墉。墉以崇阶。俯而望之，

矗与云齐。礧礧礧礧，藻井旋题。丹素之爆兮，

椒桂之馥兮。高阁高阁，珠缀结络。金铺烂若，

不集于鸟雀。绘事告毕，宾筵秩秩，乃命旨酒琴瑟。

琴瑟在堂，莫不静谧。周环掩辟，仰不漏日。冬日严凝。

言纳其阳，和风载升。夏日郁蒸，言用于阴，凉风飒兴。

有匪君子，自贤不已，乃梦乘舟，乃梦乘车。梦人占之，

更爽其居。炎炎则移，皎皎则亏。木实之繁兮，

明年息枝。爰处若思，胡宁不尔思。

卷 264_7【上古之什补亡训传十三章·燕于巢一章】

顾况

（燕于巢，审日辰也，燕不以甲乙衔泥。）
燕燕于巢，缀葺维戊。甲兮乙兮，不宜有谬。飞龙在天，
云掩于斗。曷日于雨，乃曰庚午。彼日之差，亦孔斯丑。
昔在羲和，湮淫不修。我筮我龟，莫我告繇。胤乃征之，
彝伦九畴。君子授律，是祢是禴。三五不备，
罔克攸遂。惠此蒸人，毋废尔事。尔莫我从，维来者是冀。

卷 264_8【上古之什补亡训传十三章·苏方一章】

顾况

（苏方，讽商胡舶舟运苏方，岁发扶南林邑，至齐国立尽）
苏方之赤，在胡之舶，其利乃博。我土旷兮，我居阒兮，
我衣不白兮。朱紫烂兮，传瑞晬兮。相唐虞之维百兮。

卷 264_9【上古之什补亡训传十三章·陵霜之华一章】

顾况

（陵霜之华，伤不实也。）

陵霜之华，我心忧嗟。阴之胜矣，而阳不加。块轧陶钧，
乃帝乃神，乃舒乃屯。烈烈严秋，熙熙阳春，职生有伦。
今华发非其辰，辰属东方之仁，遐想三五。黄帝登云，
尧年百馀。二仪分位，六气不渝。二景如璧，五星如珠。
陵霜之华兮，何不妄敷。

卷 264_10【上古之什补亡训传十三章·圉一章】

顾况

（圉，哀閼也。）

圉生閼方，閼吏得之，乃绝其阳。为臧为获，致金满屋。
为髡为钳，如视草木。天道无知，我罹其毒。神道无知。
彼受其福。郎罢别圉，吾悔生汝。及汝既生，人劝不举。
不从人言，果获是苦，圉别郎罢，心摧血下。隔地绝天，
乃至黄泉，不得在郎罢前。

卷 264_11【上古之什补亡训传十三章·我行自东一章】

顾况

（我行自东，不遑居也。）

我行自东，山海其空，旅棘有丛；我行自西，垒与云齐，
雨雪凄凄；我行自南，烈火满林，日中无禽，雾雨淫淫；
我行自北，烛龙寡色，何枉不直。我忧京京，何道不行兮？

卷 264_12【上古之什补亡训传十三章·采蜡一章】

顾况

（采蜡，怨奢也。荒岩之间，有以纆蒙其身。腰藤造险，
及有群蜂肆毒，哀呼不应，则上舍藤而下沈壑。）
采采者蜡，于泉谷兮。煌煌中堂，烈华烛兮。
新歌善舞，弦柱促兮；荒岩之人，自取其毒兮。

卷 264_13【弃妇词】

顾况

古人虽弃妇，弃妇有归处。今日妾辞君，辞君欲何去。
本家零落尽，恸哭来时路。忆昔未嫁君，闻君甚周旋。
及与同结发，值君适幽燕。孤魂托飞鸟，两眼如流泉。
流泉咽不燥，万里关山道。及至见君归，君归妾已老。
物情弃衰歇，新宠方妍好。拭泪出故房，伤心剧秋草。
妾以憔悴捐，羞将旧物还。馀生欲有寄，谁肯相留连。
空床对虚牖，不觉尘埃厚。寒水芙蓉花，秋风堕杨柳。

记得初嫁君，小姑始扶床。今日君弃妾，小姑如妾长。
回头语小姑，莫嫁如兄夫。

卷 264_14 【游子吟】

顾况

故枥思疲马，故巢思迷禽。浮云蔽我乡，踟躅游子吟。
游子悲久滞，浮云郁东岑。客堂无丝桐，落叶如秋霖。
艰哉远游子，所以悲滞淫。一为浮云词，愤塞谁能禁。
驰归百年内，唯愿展所钦。胡为不归欤，坐使年病侵。
未老霜绕鬓，非狂火烧心。太行何难哉，北斗不可斟。
夜静星河出，耿耿辰与参。佳人夔青天，尺素重于金。
沉寥群动异，眇默诸境森。苔衣上闲阶，蟋蟀催寒砧。
立身计几误，道险无容针。三年不还家，万里遗锦衾。
梦魂无重阻，离忧罔古今。胡为不归欤，辜负匣中琴。
腰下是何物，牵缠旷登寻。朝与名山期，夕宿楚水阴。
楚水殊演漾，名山窅岖嶔。客从洞庭来，婉变潇湘深。
橘柚在南国，鸿雁遗秋音。下有碧草洲，上有青橘林。
引烛窥洞穴，凌波睥天琛。蒲荷影参差，凫鹤雏淋浚。
浩歌惜芳杜，散发轻华簪。胡为不归欤，泪下沾衣襟。
鸢飞戾霄汉，蝼蚁制螾蟴。赫赫大圣朝，日月光照临。
圣主虽启迪，奇人分湮沈。层城登云韶，王府锵球琳。
鹿鸣志丰草，况复虞人箴。

卷 264_15 【拟古三首（第一首一作长安古意）】

顾况

龙剑昔藏影，送雄留其雌。人生阻欢会，神物亦别离。
碧树感秋落，佳人无还期。夜琴为君咽，浮云为君滋。
爱而伤不见，星汉徒参差。

幽居盼天造，胡息运行机。春葩妍既荣，秋叶瘁以飞。
滔滔川之逝，日没月光辉。所贵法乾健，于道悟入微。
任彼声势徒，得志方夸毗。

浮生果何慕，老去羡介推。陶令何足录，彭泽归已迟。
空负漉酒巾，乞食形诸诗。吾惟抱贞素，悠悠白云期。

卷 264_16【伤子】

顾况

老夫哭爱子，日暮千行血。声逐断猿悲，迹随飞鸟灭。
老夫已七十，不作多时别。

卷 264_17【春游曲二首】

顾况

游童苏合带，倡女蒲葵扇。初日映城时，相思忽相见。
褰裳踏露草，理鬓回花面。薄暮不同归，留情此芳甸。

柘弹连钱马，银钩妥堕鬟。采桑春陌上，踏草夕阳间。
意合词先露，心诚貌却闲。明朝若相忆，云雨出巫山。

卷 264_18【从军行二首】

顾况

弭节结徒侣，速征赴龙城。单于近突围，烽燧屡夜惊。
长弓挽满月，剑华霜雪明。远道百草殒，峭觉寒风生。
风寒欲砭肌，争奈裘袄轻。回首家不见，候雁空中鸣。
笳奏逌以哀，肃肃趣严程。寄语塞外胡，拥骑休横行。

少年胆气粗，好勇万人敌。仗剑出门去，三边正艰厄。
怒目时一呼，万骑皆辟易。杀人蓬麻轻，走马汗血滴。
丑虏何足清，天山坐宁谧。不有封侯相，徒负幽并客。

卷 264_19【塞上曲】

顾况

黠虏初南下，尘飞塞北境。汉将怀不平，雠扰当远屏。
金革卧不暖，起舞霜月冷。点军三十千，部伍严以整。
酣战祈成功，于焉罢边衅。

卷 264_20 【弋阳溪中望仙人城】

顾况

何草乏灵姿，无山不孤绝。我行虽云蹇，偶胜聊换节。
上界浮中流，光响洞明灭。晚禽曝霜羽，寒鱼依石发。
自有无还心，隔波望松雪。

卷 264_21 【严公钓台作】

顾况

灵芝产遐方，威凤家重霄。严生何耿洁，托志肩夷巢。
汉后虽则贵，子陵不知高。糠粃当世道，长揖夔龙朝。
扫门彼何人，升降不同朝。舍舟遂长往，山谷多清飙。

卷 264_22 【萧寺偃松】

顾况

凄凄百卉病，亭亭双松迥。直上古寺深，横拂秋殿冷。
轻响入龟目，片阴栖鹤顶。山中多好树，可怜无比并。

卷 264_23 【独游青龙寺】

顾况

春风入香刹，暇日独游衍。旷然莲花台，作礼月光面。
乘兹第八识，出彼超二见。摆落区中缘，无边广弘愿。
长廊朝雨毕，古木时禽啭。积翠暖遥原，杂英纷似霰。
凤城腾日窟，龙首横天堰。蚁步避危阶，蝇飞响深殿。
大通智胜佛，几劫道场现。

卷 264_24 【初秋莲塘归】

顾况

秋光净无迹，莲消锦云红。只有溪上山，还识扬舲翁。
如何白蘋花，幽渚笑凉风。

卷 264_25 【从江西至彭蠡入浙西淮南界道中寄齐相公】

顾况

大贤旧丞相，作镇江山雄。自镇江山来，何人得如公。
处士待徐孺，仙人期葛洪。一身控上游，八郡趋下风。
比屋除畏溺，林塘曳烟虹。生人罢虔刘，井税均且充。

大府肃无事，欢然接悲翁。心清百丈泉，目送孤飞鸿。
数年鄱阳掾，抱责栖微躬。首阳及汨罗，无乃徧其衷。
杨朱并阮籍，未免哀途穷。四贤虽得仁，此怨何匆匆。
老氏齐宠辱，於陵一穷通。本师留度门，平等冤亲同。
能依二谛法，了达三轮空。真境靡方所，出离内外中。
无边尽未来，定惠双修功。蹇步惭寸进，饰装随转蓬。
朝行楚水阴，夕宿吴洲东。吴洲复白云，楚水飘丹枫。
晚霞烧回潮，千里光瞳瞳。莫开海上影，桂吐淮南丛。
何当翼明庭，草木生春融。

卷 264_26 【寄上兵部韩侍郎奉呈李户部、卢刑部、杜三侍郎】

顾况

道路五千里，门阑三十年。当时携手人，今日无半全。
咏题官舍内，赋韵僧房前。公登略约桥，况榜龙船。
远寺吐朱阁，春潮浮绿烟。鸬鹚翔邓林，沙鸨飞吴田。
诸子纷出祖，中宵久留连。坐客三千人，皆称主人贤。
国土分如此，家臣亦依然。身在薜萝中，头刺文案边。
故吏已重叠，门生从联翩。得罪为何名，无阶问皇天。
出门多岐路，命驾无由缘。伏承诸侍郎，顾念犹迍邰。
圣代逢三宥，营魂空九迁。

卷 264_27 【长安窦明府后亭】

顾况

君为长安令，我美长安政。五日一朝天，南山对明镜。
鸟飞青苔院，水木相辉映。客至南云乡，丝桐展歌咏。
吏人何萧萧，终岁无喧竞。欲识明府贤，邑中多百姓。

卷 264_28 【谢王郎中见赠琴鹤】

顾况

此琴等焦尾，此鹤方胎生。赴节何徘徊，理感物自并。
独立江海上，一弹天地清。朱弦动瑶华，白羽飘玉京。
因想羡门辈，眇然四体轻。子乔翔邓林，王母游层城。
忽如启灵署，鸾凤相和鸣。何由玉女床，去食琅玕英。

卷 264_29 【和翰林吴舍人兄弟西斋】

顾况

君家诚易知，易知复难同。新裁尺一诏，早入明光宫。
西斋何其高，上与星汉通。永怀洞庭石，春色相玲珑。
久怀巴峡泉，夜落君丝桐。信是怡神所，迢迢蔑华嵩。
鸟飞晴云灭，叠嶂盘虚空。君家诚易知，易知意难穷。

卷 264_30 【望初月简于吏部】

顾况

沅寥中秋夜，坐见如钩月。始从西南升，又欲西南没。
全移河上影，暂透林间缺。纵待三五时，终为千里别。

卷 264_31 【上湖至破山赠文周萧元植】

顾况

一别二十年，依依过故辙。湖上非往态，梦想频虚结。
二子伴我行，我行感徂节。后人应不识，前事寒泉咽。
一别二十年，人堪几回别。

卷 264_32 【酬信州刘侍郎兄】

顾况

刘兄本知命，屈伸不介怀。南州管灵山，可惜旷土栖。
樵隐同一径，竹树薄西斋。鸟陵嶂合沓，月配波徘徊。
薄宦修礼数，长景谢谭谐。愿为南州民，输税事鉏犁。
胡为走不止，风雨惊邅回。

卷 264_33 【奉酬刘侍郎】

顾况

几回新秋影，璧满蟾又缺。镜破似倾台，轮斜同覆辙。
虽分上林桂，还照沧洲雪。暂伴憔悴人，归华耿不灭。

卷 264_34 【酬本部韦左司】

顾况

好鸟依佳树，飞雨洒高城。况与二三子，列坐分两楹。
文雅一何盛，林塘含馀清。府君未归朝，游子不待晴。
白云帝城远，沧江枫叶鸣。却略欲一言，零泪和酒倾。
寸心久摧折，别离重骨惊。安得凌风翰，肃肃宾天京。

卷 264_35 【酬房杭州】

顾况

郡楼何其旷，亭亭广而深。故人牧馀杭，留我披胸衿。
满筐阅新作，璧玉诞清音。流水入洞天，窅豁欲凌临。
辟险延北阜，薶道陟南岑。朝从山寺还，醒醉动笑吟。
荷花十馀里，月色攒湖林。父老惜使君，却欲速华簪。

卷 264_36 【酬漳州张九使君】

顾况

故人穷越徼，狂生起悲愁。山海万里别，草木十年秋。
鞭马广陵桥，出祖张漳州。促膝堕簪珥，辟幌戛琳球。
短题自兹简，华篇讵能酬。无阶承明庭，高步相追游。
南方荣桂枝，凌冬舍温裘。猿吟郡斋中，龙静檀栾流。
薜鹿莫徕洞，网鱼卢亭洲。心安处处安，处处思遐陬。

卷 264_37 【在滁苦雨归桃花崦伤亲友略尽】

顾况

废弃忝残生，后来亦先天。诗人感风雨，长夜何时晓。
去国宦情无，近乡归梦少。庇身绝中授，甘静忘外扰。
丽景变重阴，洞山空木表。灵潮若可通，寄谢西飞鸟。

卷 264_38 【苦雨（一本题下有思归桃花崦五字）】

顾况

朝与佳人期，碧树生红萼。暮与佳人期，飞雨洒清阁。
佳人窅何许，中夜心寂寞。试忆花正开，复惊叶初落。

行骑飞泉鹿，卧听双海鹤。嘉愿有所从，安得处其薄。

卷 264_39【赠别崔十三长官】

顾况

真玉烧不热，宝剑拗不折。欲别崔侠心，崔侠心如铁。
复如金刚锁，无有功不彻。仍于直道中，行事不诋讦。
崔侠两兄弟，垂范继芳烈。相识三十年，致书字不灭。
我来宣城郡，饮水仰清洁。蔼蔼北阜松，峨峨南山雪。
顾生归山去，知作几年别。

卷 264_40【哭从兄茔】

顾况

洞庭违鄂渚，袅袅秋风时。何人不客游，独与帝子期。
黄鹄铩飞翅，青云叹沈姿。身终一骑曹，高盖者为谁。
从驾至梁汉，金根复京师。皇恩溢九垓，不记屠沽儿。
立身有高节，满卷多好诗。赫赫承明庭，群公默无词。
草木正摇落，哭兄鄱水湄。共居云阳里，轳轳多别离。
人生倏忽间，旅衬飘若遗。稚子新学拜，枯杨生一枝。
人生倏忽间，精爽无不之。旧国数千里，家人由未知。
人生倏忽间，安用才士为。

卷 264_41 【华山西冈游赠隐玄叟】

顾况

群峰郁初霁，泼黛若鬟沐。失风鼓唢呀，摇撼千灌木。
木叶微堕黄，石泉净停绿。危磴萝薜牵，迥步入幽谷。
我心寄青霞，世事惭苍鹿。遂令巢许辈，于焉谢尘俗。
想是悠悠云，可契去留躅。

卷 264_42 【归阳萧寺有丁行者能修无生忍担水施僧况归命稽首作诗】

顾况

化佛示持帚，仲尼称执鞭。列生御风归，饲豕如人焉。
曹溪第六祖，踏碓逾三年。伊人自何方，长绶趋遥泉。
开土行何苦，双瓶胝两肩。萧寺百馀僧，东厨正扬烟。
露足沙石裂，外形巾褐穿。若其有此身，岂得安稳眠。
独出违顺境，不为寒暑还。大圣于其中，领我心之虔。
万法常空灭，无生因忍全。一国一释迦，一灯分百千。
永愿遗世知，现身弥勒前。潜容偏虚空，灵响不可传。
智慧舍利佛，神通自乾连。阿若憍陈如，迦叶迦旃延。
左右二菩萨，文殊并普贤。身披六铢衣，亿劫为大仙。
宝塔宝楼阁，重檐交梵天。譬如一明珠，共赞光白圆。
天魔波旬等，降伏金刚坚。野叉罗刹鬼，亦赦尘垢缠。

乃致金翅鸟，吞龙护洪渊。一十一众中，身意皆快然。
八河注大海，中有楞伽船。佛法付国王，平等无颇偏。
天子事端拱，大臣行其权。玉堂无蝇飞，五月冰凛筵。
尽力答明主，犹自招罪愆。九族无白身，百花动婵娟。
神圣恶如此，物华不能妍。禄山一微胡，驱马来自燕。
宛彼宫阙丽，如何犬羊膻。苦哉千万人，流血成丹川。
此辈之死后，镬汤所熬煎。业风吹其魂，猛火烧其烟。
独有丁行者，无忧树枝边。市头盲老人，长者乞一钱。
韬照多密用，为君吟此篇。

卷 264_43【大茅岭东新居忆亡子从真】

顾况

谷鸟犹呼儿，山人夕沾襟。怀哉隔生死，怅矣徒登临。
东门忧不入，西河遇亦深。古来失中道，偶向经中寻。
大象无停轮，倏忽成古今。其夭非不幸，炼形由太阴。
凡欲攀云阶，譬如火铸金。虚室留旧札，洞房掩闲琴。
泉源登方诸，上有空青林。仿佛通寤寐，萧寥邈微音。
软草被汀洲，鲜云略浮沈。赭景宣叠丽，绀波响飘淋。
石窟含云巢，迢迢耿南岑。悲恨自兹断，情尘讵能侵。
真静一时变，坐起唯从心。

第二百六十五卷

卷 265_1【乌啼曲二首】

顾况

玉房掣锁声翻叶，银箭添泉绕霜堞。毕逋拨刺月衔城，
八九雏飞其母惊。此是天上老鸦鸣，人间老鸦无此声。
摇风杂佩耿华烛，夜听羽人弹此曲。东方曈曈赤日旭。

月出江林西，江林寂寂城鸦啼。昔人何处为此曲，
今人何处听不足。城寒月晓驰思深，江上青草为谁绿。

卷 265_2【幽居弄】

顾况

苔衣生，花露滴，月入西林荡东壁。扣商占角两三声，
洞户谿窗一冥寂。独去沧洲无四邻，身婴世网此何身。
关情命曲寄惆怅，久别山南山里人。

卷 265_3 【公子行】

顾况

轻薄儿，面如玉，紫陌春风缠马足。双镫悬金缕鹊飞，
长衫刺雪生犀束。绿槐夹道阴初成，珊瑚几节敌流星。
红肌拂拂酒光狞，当街背拉金吾行。朝游冬冬鼓声发，
暮游冬冬鼓声绝。入门不肯自升堂，美人扶踏金阶月。

卷 265_4 【古离别】

顾况

西江上，风动麻姑嫁时浪。西山为水水为尘，
不是人间离别人。

卷 265_5 【长安道】

顾况

长安道，人无衣，马无草，何不归来山中老。

卷 265_6 【龙宫操】

顾况

龙宫月明光参差，精卫衔石东飞时。蛟人织绡采藕丝，
翻江倒海倾吴蜀。汉女江妃杳相续，龙王宫中水不足。

卷 265_7【梁广画花歌】

顾况

王母欲过刘彻家，飞琼夜入云輶车。紫书分付与青鸟，
却向人间求好花。上元夫人最小女，头面端正能言语。
手把梁生画花看，凝嚬掩笑心相许。心相许，
为白阿娘从嫁与。

卷 265_8【送别日晚歌】

顾况

日窸窣兮下山，望佳人兮不还。花落兮屋上，
草生兮阶间。日日兮春风，芳菲兮欲歇。
老不可兮更少，君何为兮轻别。

卷 265_9【行路难三首】

顾况

君不见担雪塞井空用力，炊砂作饭岂堪食。
一生肝胆向人尽，相识不如不相识。冬青树上挂凌霄，
岁晏花凋树不凋。凡物各自有根本，种禾终不生豆苗。
行路难，行路难，何处是平道。中心无事当富贵，
今日看君颜色好。

君不见少年头上如云发，少壮如云老如雪。
岂知灌顶有醍醐，能使清凉头不热。吕梁之水挂飞流，
鼋鼍蛟蜃不敢游。少年恃险若平地，独倚长剑凌清秋。
行路难，行路难。昔少年，今已老。前朝竹帛事皆空，
日暮牛羊占城草。

君不见古人烧水银，变作北邙山上尘。藕丝挂在虚空中，
欲落不落愁杀人。睢水英雄多血刃，建章宫阙成煨烬。
淮王身死桂树折，徐福一去音书绝。行路难，行路难，
生死皆由天。秦皇汉武遭不脱，汝独何人学神仙。

卷 265_10【悲歌一】

顾况

边城路，今人犁田昔人墓。岸上沙，昔日江水今人家。
今人昔人共长叹，四气相催节回换。明月皎皎入华池，
白云离离渡霄汉。

卷 265_11 【悲歌二（一作《悲歌》，一作《短歌行》）】

顾况

我欲升天天隔霄，我欲渡水水无桥。我欲上山山路险，
我欲汲井井泉遥。越人翠被今何夕，独立沙边江草碧。
紫燕西飞欲寄书，白云何处逢来客。

卷 265_12 【悲歌三（以下三首，一本合为一首，题作《远思曲》）】

顾况

新系青丝百尺绳，心在君家辘轳上。
我心皎洁君不知，辘轳一转一惆怅。

卷 265_13 【悲歌四】

顾况

何处春风吹晓幕，江南渌水通朱阁。
美人二八面如花，泣向春风畏花落。

卷 265_14 【悲歌五】

顾况

临春风，听春鸟；别时多，见时少。愁人夜永不得眠，
瑶井玉绳相对晓。

卷 265_15 【悲歌六（一作攀龙引）】

顾况

轩辕黄帝初得仙，鼎湖一去三千年。周流三十六洞天，
洞中日月星辰联。骑龙驾景游八极，轩辕弓剑无人识。
东海青童寄消息。

卷 265_16 【春草谣】

顾况

春草不解行，随人上东城。正月二月色绵绵，
千里万里伤人情。

卷 265_17 【苔藓山歌】

顾况

野人夜梦江南山，江南山深松桂闲。野人觉后长叹息，
帖藓粘苔作山色。闭门无事任盈虚，终日欹眠观四如。
一如白云飞出壁，二如飞雨岩前滴，三如腾虎欲咆哮，
四如懒龙遭霹雳。嶮峭嵌空潭洞寒，小儿两手扶栏干。

卷 265_18【同裴观察东湖望山歌】

顾况

浴鲜积翠栖灵异，石洞花宫横半空。夜光潭上明星启，
风雨坛边树如洗。水淹徐孺宅恒乾，绳坠洪崖井无底。
主人载酒东湖阴，遥望西山三四岑。

卷 265_19【八月五日歌】

顾况

四月八日明星出，摩耶夫人降前佛。八月五日佳气新，
昭成太后生圣人。开元九年燕公说，奉诏听置千秋节。
丹青庙里贮姚宋，花萼楼中宴岐薛。清乐灵香几处闻，
鸾歌凤吹动祥云。已于武库见灵鸟，仍向晋山逢老君。
率土普天无不乐，河清海晏穷寥廓。梨园弟子传法曲，
张果先生进仙药。玉座凄凉游帝京，悲翁回首望承明。

云韶九奏杳然远，唯有五陵松柏声。

卷 265_20 【露青竹杖歌】

顾况

鲜于仲通正当年，章仇兼琼在蜀川。约束蜀儿采马鞭，
蜀儿采鞭不敢眠。横截斜飞飞鸟边，绳桥夜上层崖颠。
头插白云跨飞泉，采得马鞭长且坚。浮沔丁子珠联联，
灰煮蜡楷光烂然。章仇兼琼持上天，上天雨露何其偏。
飞龙闲厩马数千，朝饮吴江夕秣燕。红尘扑辔汗湿鞯，
师子麒麟聊比肩。江面昆明洗刷牵，四蹄踏浪头杳天。
蛟龙稽颡河伯虔，拓羯胡雏脚手鲜。陈闳韩干丹青妍，
欲貌未貌眼欲穿。金鞍玉勒锦连乾，骑入桃花杨柳烟。
十二楼中奏管弦，楼中美人夺神仙。争爱大家把此鞭，
禄山入关关破年。忽见扬州北邙前，只有人还千一钱。
亭亭笔直无皴节，磨捩形相一条铁。市头格是无人别，
江海贱臣不拘绁。垂窗挂影西窗缺，稚子觅衣挑仰穴。
家童拾薪几拗折，玉润犹沾玉垒雪。碧鲜似染茱弘血，
蜀帝城边子规咽。相如桥上文君绝，往年策马降至尊，
七盘九折横剑门。穆王八骏超昆仑，安用冉冉孤生根。
圣人不贵难得货，金玉珊瑚谁买恩。

卷 265_21 【金珰玉珮歌】

顾况

赠君金珰太霄之玉珮，金锁禹步之流珠，五岳真君之秘箓，
九天丈人之宝书。东井沐浴辰巳毕，先进洞房上奔日。
借问君欲何处来，黄姑织女机边出。

卷 265_22【瑶草春】

顾况

瑶草春，杳容与，江南艳歌京西舞。执心轻子都，
信节冠秋胡。议以腰支嫁，时论自有夫。蝉鬓蛾眉明井底，
燕裙赵袂萦辘轳。李生闻之泪如绠。不忍回头看此井。
月中桂树落一枝，池上鵙鹑唼孤影。露桃秾李自成谿，
流水终天不向西。翠帐绿窗寒寂寂，锦茵罗荐夜凄凄。
瑶草春，丹井远，别后相思意深浅。

卷 265_23【萧郎草书歌】

顾况

萧子草书人不及，洞庭叶落秋风急。上林花开春露湿，
花枝濛濛向水垂，见君数行之洒落，石上之松松下鹤。
若把君书比仲将，不知谁在凌云阁。

卷 265_24 【范山人画山水歌】

顾况

山峥嵘，水泓澄。漫漫汗汗一笔耕，一草一木栖神明。
忽如空中有物，物中有声。复如远道望乡客，
梦绕山川身不行。

卷 265_25 【嵇山道芬上人画山水歌】

顾况

镜中真僧白道芬，不服朱审李将军。渌汗平铺洞庭水，
笔头点出苍梧云。且看八月十五夜，月下看山尽如画。

卷 265_26 【杜秀才画立走水牛歌】

顾况

昆仑儿，骑白象，时时锁著师子项。奚奴跨马不搭鞍，
立走水牛惊汉官。江村小儿好夸骋，脚踏牛头上牛领。
浅草平田擦过时，大虫著钝几落井。杜生知我恋沧洲，
画作一障张床头。八十老婆拍手笑，妒他织女嫁牵牛。

卷 265_27 【梁司马画马歌】

顾况

画精神，画筋骨，一团旋风瞥灭没。仰秣如上贺兰山，
低头欲饮长城窟。此马昂然独此群，阿爷是龙飞入云。
黄沙枯碛无寸草，一日行过千里道。展处把笔欲描时，
司马一騊赛倾倒。

卷 265_28 【丘小府小鼓歌】

顾况

地盘山鸡犹可像，坎坎砰砰随手长。
夜半高楼沈醉时，万里踏桥乱山响。

卷 265_29 【宜城放琴客歌（柳浑封宜城县伯）】

顾况

佳人玉立生此方，家住邯郸不是倡。头髻髻髻手爪长，
善抚琴瑟有文章。新妍笼裙云母光，朱弦绿水喧洞房。
忽闻斗酒初决绝，日暮浮云古离别。巴猿啾啾峡泉咽，
泪落罗衣颜色竭。不知谁家更张设，丝履墙偏钗股折。

南山阑干千丈雪，七十非人不暖热。人情厌薄古共然，
相公心在持事坚。上善若水任方圆，忆昨好之今弃捐。
服药不如独自眠，从他更嫁一少年。

卷 265_30【李供奉弹箜篌歌】

顾况

国府乐手弹箜篌，赤黄绦索金鍍头。早晨有敕鸳鸯殿，
夜静遂歌明月楼。起坐可怜能抱撮，大指调弦中指拨。
腕头花落舞制裂，手下鸟惊飞拨刺。珊瑚席，
一声一声鸣锡锡；罗绮屏，一弦一弦如撼铃。急弹好，
迟亦好；宜远听，宜近听。左手低，右手举，
易调移音天赐与。大弦似秋雁，联联度陇关；
小弦似春燕，喃喃向人语。手头疾，腕头软，
来来去去如风卷。声清泠泠鸣索索，垂珠碎玉空中落。
美女争窥玳瑁帘，圣人卷上真珠箔。大弦长，小弦短，
小弦紧快大弦缓。初调锵锵似鸳鸯水上弄新声，
入深似太清仙鹤游秘馆。李供奉，仪容质，
身才稍稍六尺一。在外不曾辄教人，内里声声不遣出。
指剥葱，腕削玉，饶盐饶酱五味足。弄调人间不识名，
弹尽天下崛奇曲。胡曲汉曲声皆好，弹著曲髓曲肝脑。
往往从空入户来，瞥瞥随风落春草。草头只觉风吹入，
风来草即随风立。草亦不知风到来，风亦不知声缓急。
蕙玉烛，点银灯；光照手，实可憎。只照箜篌弦上手，
不照箜篌声里能。驰凤阙，拜鸾殿，天子一日一回见。

王侯将相立马迎，巧声一日一回变。实可重，
不惜千金买一弄。银器胡瓶马上驮，瑞锦轻罗满车送。
此州好手非一国，一国东西尽南北。除却天上化下来，
若向人间实难得。

卷 265_31 【刘禅奴弹琵琶歌（感相国韩公梦）】

顾况

乐府只传横吹好，琵琶写出关山道。羈雁出塞绕黄云，
边马仰天嘶白草。明妃愁中汉使回，蔡琰愁处胡笳哀。
鬼神知妙欲收响，阴风切切四面来。李陵寄书别苏武，
自有生人无此苦。当时若值霍骠姚，灭尽乌孙夺公主。

卷 265_32 【李湖州孺人弹箏歌】

顾况

武帝升天留法曲，凄情掩抑弦柱促。上阳宫人怨青苔，
此夜想夫怜碧玉。思妇高楼刺壁窥，愁猿叫月鹦呼儿。
寸心十指有长短，妙入神处无人知。独把梁州凡几拍，
风沙对面胡秦隔。听中忘却前溪碧，醉后犹疑边草白。

卷 265_33 【郑女弹箏歌】

顾况

郑女八岁能弹箏，春风吹落天上声。一声雍门泪承睫，
两声赤鲤露髻鬣，三声白猿臂拓颊。郑女出参丈人时，
落花惹断游空丝。高楼不掩许声出，羞杀百舌黄莺儿。

卷 265_34 【谅公洞庭孤橘歌】

顾况

不种自生一株橘，谁教渠向阶前出，不羨江陵千木奴。
下生白蚊子，上生青雀雏。飞花檐卜旃檀香，
结实如缀摩尼珠。洞庭橘树笼烟碧，洞庭波月连沙白。
待取天公放恩赦，侬家定作湖中客。

卷 265_35 【送行歌】

顾况

送行人，歌一曲，何者为泥何者玉。年华已向秋草里，
春梦犹传故山绿。

卷 265_36 【险竿歌】

顾况

宛陵女儿擘飞手，长竿横空上下走。已能轻险若平地，
岂肯身为一家妇。宛陵将士天下雄，一下定却长稍弓。
翻身挂影恣腾蹋，反缩头髻盘旋风。盘旋风，撒飞鸟；
惊猿绕，树枝褭。头上打鼓不闻时，手蹉脚跌蜘蛛丝。
忽雷掣断流星尾，矐睒划破蚩尤旗。若不随仙作仙女，
即应嫁贼生贼儿。中丞方略通变化，外户不扃从女嫁。

卷 265_37【洛阳行送洛阳韦七明府】

顾况

始上龙门望洛川，洛阳桃李艳阳天。最好当年二三月，
上阳宫树千花发。疏家父子错挂冠，梁鸿夫妻虚适越。

卷 265_38【黄鹄楼歌送独孤助】

顾况

故人西去黄鹄楼，西江之水上天流，黄鹄杳杳江悠悠。
黄鹄徘徊故人别，离壶酒尽清丝绝。绿屿没馀烟，
白沙连晓月。

卷 265_39 【庐山瀑布歌送李顾】

顾况

飘白霓，挂丹梯。应从织女机边落，不遣浔阳湖向西。
火雷劈山珠喷日，五老峰前九江溢。九江悠悠万古情，
古人行尽今人行。老人也欲上山去，上个深山无姓名。

卷 265_40 【朝上清歌】

顾况

洁眼朝上清，绿景开紫霞。皇皇紫微君，左右皆灵娥。
曼声流睇，和清歌些；至阳无谖，其乐多些；旌盖飒沓，
箫鼓和些；金凤玉麟，郁骈罗些；反风名香，香气遐些；
琼田瑶草，寿无涯些；君著玉衣，升玉车些；欲降琼宫，
玉女家些；其桃千年，始著花些。萧寥天清而灭云，
目琼琼兮情感。珮随香兮夜闻，肃肃兮愔愔。
启天和兮洞灵心，和为丹兮云为马。
君乘之觴于瑶池之上兮，三光罗列而在下。

卷 265_41 【剡纸歌】

顾况

云门路上山阴雪，中有玉人持玉节。宛委山里禹馀粮，
石中黄子黄金屑。剡溪剡纸生剡藤，喷水捣后为蕉叶。
欲写金人金口经，寄与山阴山里僧。手把山中紫罗笔，
思量点画龙蛇出。政是垂头蹋翼时，不免向君求此物。

第二百六十六卷

卷 266_1【洛阳早春】

顾况

何地避春愁，终年忆旧游。一家千里外，百舌五更头。
客路偏逢雨，乡山不入楼。故园桃李月，伊水向东流。

卷 266_2【步虚词（太清宫作）】

顾况

迴步游三洞，清心礼七真。飞符超羽翼，焚火醮星辰。
残药沾鸡犬，灵香出凤麟。壶中无窄处，愿得一容身。

卷 266_3【鄱阳大云寺一公房】

顾况

尽日陪游处，斜阳竹院清。定中观有漏，言外证无生。

色界聊传法，空门不用情。欲知相去近，钟鼓两闻声。

卷 266_4 【送友失意南归】

顾况

衣挥京洛尘，完璞伴归人。故国青山遍，沧江白发新。
邻荒收酒幔，屋古布苔茵。不用通名姓，渔樵共主宾。

卷 266_5 【南归】

顾况

老病力难任，犹多镜雪侵。鲈鱼消宦况，鸥鸟识归心。
急雨江帆重，残更驿树深。乡关殊可望，渐渐入吴音。

卷 266_6 【闲居自述】

顾况

荣辱不关身，谁为疏与亲。有山堪结屋，无地可容尘。
白发偏添寿，黄花不笑贫。一樽朝暮醉，陶令果何人。

卷 266_7 【题歙山栖霞寺】

顾况

明征君旧宅，陈后主题诗。迹在人亡处，山空月满时。
宝瓶无破响，道树有低枝。已是伤离客，仍逢靳尚祠。

卷 266_8 【经废寺（前半首一本作五言绝句）】

顾况

不知何世界，有处似南朝。石路无人扫，松门被火烧。
断幡犹挂刹，故板尚支桥。数卷残经在，多年字欲销。

卷 266_9 【送李道士（一本题下有归桃花崦四字）】

顾况

人境年虚掷，仙源日未斜。羡君乘竹杖，辞我隐桃花。
鸟去宁知路，云飞似忆家。莫愁客鬓改，自有紫河车。

卷 266_10 【酬唐起居前后见寄二首】

顾况

愁人空望国，惊鸟不归林。莫话弹冠事，谁知结袜心。
霜凋树吹断，土蚀剑痕深。欲作怀沙赋，明时耻自沉。

何处吊灵均，江边一老人。汉仪君已接，楚奏我空频。
直道其如命，平生不负神。自伤庚子日，鵬鸟上承尘。

卷 266_11【奉酬茅山赠赐并简綦毋正字】

顾况

玉帝居金阙，灵山几处朝。简书犹有畏，神理讵能超。
鹤庙新家近，龙门旧国遥。离怀结不断，玉洞一吹箫。

卷 266_12【白蘋洲送客】

顾况

莫信梅花发，由来谩报春。不才充野客，扶病送朝臣。
阙下摇青珮，洲边采白蘋。临流不痛饮，鸥鸟也欺人。

卷 266_13【春鸟词送元秀才入京】

顾况

春来绣羽齐，暮向竹林栖。禁苑衔花出，河桥隔树啼。
寻声知去远，顾影念飞低。别有无巢燕，犹窥幕上泥。

卷 266_14【别江南】

顾况

江城吹晓角，愁杀远行人。汉将犹防虏，吴官欲向秦。
布帆轻白浪，锦带入红尘。将底求名宦，平生但任真。

卷 266_15【空梁落燕泥】

顾况

卷幕参差燕，常衔浊水泥。为黏珠履迹，未等画梁齐。
旧点痕犹浅，新巢缉尚低。不缘频上落，那得此飞栖。

卷 266_16【上元夜忆长安】

顾况

沧州老一年，老去忆秦川。处处逢珠翠，家家听管弦。
云车龙阙下，火树凤楼前。今夜沧州夜，沧州夜月圆。

卷 266_17【酬扬州白塔寺永上人】

顾况

塔上是何缘，香灯续细烟。松枝当麈尾，柳絮替蚕绵。
浮草经行遍，空花义趣圆。我来虽为法，暂借一床眠。

卷 266_18【送韦秀才赴举】

顾况

鄱阳中酒地，楚老独醒年。芳桂君应折，沈灰我不然。
洛桥浮逆水，关树接非烟。唯有残生梦，犹能到日边。

卷 266_19【送使君】

顾况

天中洛阳道，海上使君归。拂雾趋金殿，焚香入琐闱。
山亭倾别酒，野服间朝衣。他日思朱鹭，知从小苑飞。

卷 266_20 【历阳苦雨（一作夜雨）】

顾况

襄城秋雨晦，楚客不归心。亥市风烟接，隋宫草路深。
离忧翻独笑，用事感浮阴。夜夜空阶响，唯馀蚯蚓吟。

卷 266_21 【伤大理谢少卿】

顾况

旧馆绝逢迎，新诗何处呈。空留封禅草，已作岱宗行。
柳蠹风吹析，阶崩雪绕平。无因重来此，剩哭两三声。

卷 266_22 【经徐侍郎墓作】

顾况

不知山吏部，墓作石桥东。宅兆乡关异，平生翰墨空。
夜泉无晓日，枯树足悲风。更想幽冥事，唯应有梦同。

卷 266_23 【鄴公合祔挽歌】

顾况

草露前朝事，荆茅圣主封。空传馀竹帛，永绝旧歌钟。
清镜无双影，穷泉有几重。笳箫最悲处，风入九原松。

卷 266_24【相国晋公挽歌二首】

顾况

玉节朝天罢，洪炉造化新。中和方作圣，太素忽收神。
盛德横千古，高标出四邻。欲知言不尽，处处有遗尘。

凝笳催晓奠，丹旆向青山。夕照新茔近，秋风故吏还。
本朝光汉代，从此扫胡关。今日天难问，浮云满世间。

卷 266_25【晋公魏国夫人柳氏挽歌】

顾况

鱼轩海上遥，鸾影月中销。双剑来时合，孤桐去日凋。
夕阳迷陇隧，秋雨咽笳箫。画翣无留影，铭旌已度桥。

卷 266_26【义川公主挽词】

顾况

弄玉吹箫后，湘灵鼓瑟时。月边丹桂落，风底白杨悲。
杂珮分泉户，馀香出繡帷。夜台飞镜匣，偏共掩蛾眉。

卷 266_27【忆山中】

顾况

春还不得还，家在最深山。蕙圃泉浇湿，松窗月映闲。
薄田临谷口，小职向人间。去处但无事，重门深闭关。

卷 266_28【送大理张卿（一题作送张卫尉）】

顾况

春色依依惜解携，月卿今夜泊隋堤。白沙洲上江蓠长，
绿树村边谢豹啼。迁客比来无倚仗，故人相去隔云泥。
越禽唯有南枝分，目送孤鸿飞向西。

卷 266_29【宿湖边山寺】

顾况

群峰过雨涧淙淙，松下扉扃白鹤双。香透经窗笼桧柏，
云生梵宇湿幡幢。蒲团僧定风过席，苇岸渔歌月堕江。
谁悟此生同寂灭，老禅慧力得心降。

卷 266_30【湖南客中春望】

顾况

鸣雁嘹嘹北向频，渌波何处是通津。风尘海内怜双鬓，
涕泪天涯惨一身。故里音书应望绝，异乡景物又更新。
便抛印绶从归隐，吴渚香莼漫吐春。

卷 266_31【闲居怀旧】

顾况

日长鼓腹爱吾庐，洗竹浇花兴有馀。骚客空传成相赋，
晋人已负绝交书。贫居谪所谁推毂，仕向侯门耻曳裾。
今日思来总皆罔，汗青功业又何如。

卷 266_32【寄江南鹤林寺石冰上人】

顾况

山川重复出，心地暗相逢。忽忆秋江月，如闻古寺钟。
湖平南北岸，云抱两三峰。定力超香象，真言摄毒龙。
风中何处鹤，石上几年松。为报烟霞道，人间共不容。

卷 266_33【乐府】

顾况

暖谷春光至，宸游近甸荣。云随天仗转，风入御帘轻。
翠盖浮佳气，朱楼倚太清。朝臣冠剑退，宫女管弦迎。
细草承雕辇，繁花入幔城。文房开圣藻，武卫宿天营。
玉醴随觞至，铜壶逐漏行。五星含土德，万姓彻中声。
亲祀先崇典，躬推示劝耕。国风新正乐，农器近消兵。
道德关河固，刑章日月明。野人同鸟兽，率舞感升平。

卷 266_34【送从兄使新罗】

顾况

六气铜浑转，三光玉律调。河宫清奉赆，海岳晏来朝。
地绝提封入，天平赐贡饶。扬威轻破虏，柔服耻征辽。
曙色黄金阙，寒声白鹭潮。楼船非习战，骢马是嘉招。
帝女飞衔石，鲛人卖泪绡。管宁虽不偶，徐市尚相邀。
独岛缘空翠，孤霞上泐寥。蟾蜍同汉月，螭螭异秦桥。
水豹横吹浪，花鹰迴拂霄。晨装凌莽渺，夜泊记招摇。

几路通员峤，何山是沃焦。飓风晴汨起，阴火暝潜烧。
鬓发成新髻，人参长旧苗。扶桑衔日近，析木带津遥。
梦向愁中积，魂当别处销。临川思结网，见弹欲求鸇。
共散羲和历，谁差甲子朝。沧波伏忠信，译语辨讴谣。
叠鼓鲸鳞隐，阴帆鹧首飘。南溟垂大翼，西海饮文鳐。
指景寻灵草，排云听洞箫。封侯万里外，未肯后班超。

卷 266_35 【山居即事】

顾况

下泊降茅仙，萧闲隐洞天。杨君闲上法，司命驻流年。
崦合桃花水，窗分柳谷烟。抱孙堪种树，倚杖问耘田。
世事休相扰，浮名任一边。由来谢安石，不解饮灵泉。

卷 266_36 【题卢道士房】

顾况

秋砧响落木，共坐茅君家。唯见两童子，门外汲井花。
空坛静白日，神鼎飞丹砂。麈尾拂霜草，金铃摇雾霞。
上章尘世隔，看弈桐阴斜。稽首问仙要，黄精堪饵花。

第二百六十七卷

卷 267_1 【梦后吟】

顾况

醉中还有梦，身外已无心。明镜唯知老，青山何处深。

卷 267_2 【题灵山寺（战鸟）】

顾况

觉地本随身，灵山重结因。如何战鸟佛，不化捕鱼人。

卷 267_3 【题元阳观旧读书房赠李范】

顾况

此观十年游，此房千里宿。还来旧窗下，更取君书读。

卷 267_4 【永嘉】

顾况

东甌传旧俗，风日江边好。何处乐神声，夷歌出烟岛。

卷 267_5 【青弋江】

顾况

淒清回泊夜，沦波激石响。村边草市桥，月下罟师网。

卷 267_6 【听山鹧鸪】

顾况

谁家无春酒，何处无春鸟。夜宿桃花村，踏歌接天晓。

卷 267_7 【山径柳（以下十四首一作临平坞杂题）】

顾况

宛转若游丝，浅深栽绿隄。年年立春后，即被啼莺占。

卷 267_8 【石上藤】

顾况

空山无鸟迹，何物如人意。委曲结绳文，离披草书字。

卷 267_9 【薜荔庵】

顾况

薜荔作禅庵，重叠庵边树。空山径欲绝，也有人知处。

卷 267_10 【芙蓉树】

顾况

风摆莲衣干，月背鸟巢寒。文鱼翻乱叶，翠羽上危栏。

卷 267_11 【欹松漪】

顾况

湛湛碧涟漪，老松欹侧卧。悠扬绿萝影，下拂波纹破。

卷 267_12 【焙茶坞】

顾况

新茶已上焙，旧架忧生醭。旋旋续新烟，呼儿劈寒木。

卷 267_13 【弹琴谷】

顾况

谷中谁弹琴，琴响谷冥寂。因君扣商调，草虫惊暗壁。

卷 267_14 【白鹭汀】

顾况

霾靡汀草碧，淋森鹭毛白。夜起沙月中，思量捕鱼策。

卷 267_15 【千松岭】

顾况

终日吟天风，有时天籁止。问渠何旨意，恐落凡人耳。

卷 267_16 【黄菊湾】

顾况

时菊凝晓露，露华滴秋湾。仙人酿酒熟，醉里飞空山。

卷 267_17 【临平湖】

顾况

采藕平湖上，藕泥封藕节。船影入荷香，莫冲莲柄折。

卷 267_18 【山春洞】

顾况

引烛踏仙泥，时时乱乳燕。不知何道士，手把灵书卷。

卷 267_19 【石窦泉】

顾况

吹沙复喷石，曲折仍圆旋。野客漱流时，杯粘落花片。

卷 267_20 【古仙坛】

顾况

远山谁放烧，疑是坛边醺。仙人错下山，拍手坛边笑。

卷 267_21 【题山顶寺】

顾况

遥闻林下语，知是经行所。日暮香风时，诸天散花雨。

卷 267_22 【天宝题壁】

顾况

五十余年别，伶俜道不行。却来书处在，惆怅似前生。

卷 267_23 【哭李别驾】

顾况

故人行迹灭，秋草向南悲。不欲频回步，孀妻正哭时。

卷 267_24 【春雨不闻百舌】

顾况

百舌春来哑，愁人共待晴。不关秋水事，饮恨亦无声。

卷 267_25 【忆鄱阳旧游】

顾况

悠悠南国思，夜向江南泊。楚客断肠时，月明枫子落。

卷 267_26 【春怀】

顾况

园莺啼已倦，树树陨香红。不是春相背，当由己自翁。

卷 267_27 【洛阳陌二首】

顾况

莺声满御堤，堤柳拂丝齐。风送名花落，香红衬马蹄。

珂珮逐鸣驺，王孙结伴游。金丸落飞鸟，乘兴醉青楼。

卷 267_28【寄淮上柳十三】

顾况

苇萧中辟户，相映绿淮流。莫讶春潮阔，鸥边可泊舟。

卷 267_29【送李泌】

顾况

昔别吴堤雨，春帆去较迟。江波千里绿，□□□□□。

卷 267_30【山中夜宿】

顾况

凉月挂层峰，萝林落叶重。掩关深畏虎，风起撼长松。

卷 267_31【登楼】

顾况

高阁成长望，江流雁叫哀。凄凉故吴事，麋鹿走荒台。

卷 267_32【江上】

顾况

江清白鸟斜，荡桨冒蘋花。听唱菱歌晚，回塘月照沙。

卷 267_33【溪上】

顾况

采莲溪上女，舟小怯摇风。惊起鸳鸯宿，水云撩乱红。

卷 267_34【田家】

顾况

带水摘禾穗，夜捣具晨炊。县帖取社长，嗔怪见官迟。

卷 267_35【宿山中僧】

顾况

不爇香炉烟，蒲团坐如铁。尝想同夜禅，风堕松顶雪。

卷 267_36【梅湾】

顾况

白石盘盘磴，清香树树梅。山深不吟赏，辜负委苍苔。

卷 267_37【思归】

顾况

不能经纶大经，甘作草莽闲臣。
青琐应须长别，白云漫与相亲。

卷 267_38【归山作】

顾况

心事数茎白发，生涯一片青山。
空林有雪相待，古道无人独还。

卷 267_39【过山农家】

顾况

板桥人渡泉声，茅檐日午鸡鸣。
莫嗔焙茶烟暗，却喜晒谷天晴。

卷 267_40 【代佳人赠别】

顾况

万里行人欲渡溪，千行珠泪滴为泥。
已成残梦随君去，犹有惊乌半夜啼。

卷 267_41 【忆故园】

顾况

惆怅多山人复稀，杜鹃啼处泪沾衣。
故园此去千馀里，春梦犹能夜夜归。

卷 267_42 【题叶道士山房】

顾况

水边垂柳赤栏桥，洞里仙人碧玉箫。

近得麻姑音信否，浔阳江上不通潮。

卷 267_43【送李秀才入京】

顾况

五湖秋叶满行船，八月灵槎欲上天。
君向长安余适越，独登秦望望秦川。

卷 267_44【越中席上看弄老人】

顾况

不到山阴十二春，镜中相见白头新。
此生不复为年少，今日从他弄老人。

卷 267_45【听刘安唱歌】

顾况

子夜新声何处传，悲翁更忆太平年。
即今法曲无人唱，已逐霓裳飞上天。

卷 267_46 【樱桃曲】

顾况

百舌犹来上苑花，游人独自忆京华。
遥知寝庙尝新后，敕赐樱桃向几家。

卷 267_47 【山中（一作朱放诗，题作山中听子规）】

顾况

野人爱向山中宿，况在葛洪丹井西。
庭前有个长松树，夜半子规来上啼。

卷 267_48 【赠朱放】

顾况

野客归时无四邻，黔娄别久案常贫。
渔樵旧路不堪入，何处空山犹有人。

卷 267_49 【江村乱后】

顾况

江村日暮寻遗老，江水东流横浩浩。
竹里闲窗不见人，门前旧路生青草。

卷 267_50 【望简寂观】

顾况

青嶂青溪直复斜，白鸡白犬到人家。
仙人住在最高处，向晚春泉流白花。

卷 267_51 【五两歌送张夏】

顾况

竿头五两风褭褭，水上云帆逐飞鸟。
送君初出扬州时，霭霭曈曈江溢晓。

卷 267_52 【临海所居三首】

顾况

此是昔年征战处，曾经永日绝人行。

千家寂寂对流水，唯有汀洲春草生。

此去临溪不是遥，楼中望见赤城标。
不知叠嶂重霞里，更有何人度石桥。

家在双峰兰若边，一声秋磬发孤烟。
山连极浦鸟飞尽，月上青林人未眠。

卷 267_53【听角思归】

顾况

故园黄叶满青苔，梦后城头晓角哀。
此夜断肠人不见，起行残日影徘徊。

卷 267_54【酬柳相公】

顾况

天下如今已太平，相公何事唤狂生。
个身恰似笼中鹤，东望沧溟叫数声。

卷 267_55【题明霞台】

顾况

野人本自不求名，欲向山中过一生。
莫嫌憔悴无知己，别有烟霞似弟兄。

卷 267_56【哭绚法师】

顾况

楚客停桡欲问谁，白沙江草麴尘丝。
生公手种殿前树，唯有花开鶗鴂悲。

卷 267_57【送柳宜城葬】

顾况

鸣笳已逐春风咽，匹马犹依旧路嘶。
遥望柳家门外树，恐闻黄鸟向人啼。

卷 267_58【宫词五首】

顾况

禁柳烟中闻晓乌，风吹玉漏尽铜壶。

内官先向蓬莱殿，金合开香泻御炉。

玉楼天半起笙歌，风送宫嫔笑语和。
月殿影开闻夜漏，水精帘卷近银河。

玉阶容卫宿千官，风猎青旂晓仗寒。
侍女先来荐琼蕊，露浆新下九霄盘。

九重天乐降神仙，步舞分行踏锦筵。
嘈囋一声钟鼓歇，万人楼下拾金钱。

金吾持戟护新檐，天乐声传万姓瞻。
楼上美人相倚看，红妆透出水精帘。

卷 267_59【寻桃花岭潘三姑台】

顾况

桃花岭上觉天低，人上青山马隔溪。
行到三姑学仙处，还如刘阮二郎迷。

卷 267_60【夜中望仙观】

顾况

日暮衔花飞鸟还，月明溪上见青山。
遥知玉女窗前树，不是仙人不得攀。

卷 267_61【送李侍御往吴兴（一作送李侍郎从宣城取洞庭
路往吴兴）】

顾况

世间只有情难说，今夜应无不醉人。
若向洞庭山下过，暗知浇沥圣姑神。

卷 267_62【奉和韩晋公晦日呈诸判官】

顾况

江南无处不闻歌，晦日中军乐更多。
不是风光催柳色，却缘威令动阳和。

卷 267_63【子规】

顾况

杜宇冤亡积有时，年年啼血动人悲。
若教恨魄皆能化，何树何山著子规。

卷 267_64 【海鸥咏】

顾况

万里飞来为客鸟，曾蒙丹凤借枝柯。
一朝凤去梧桐死，满目鸱鸢奈尔何。

卷 267_65 【赠韦清将军】

顾况

身执金吾主禁兵，腰间宝剑重横行。
接輿亦是狂歌者，更就将军乞一声。

卷 267_66 【赠僧二首】

顾况

家住义兴东舍溪，溪边莎草雨无泥。
上人一向心入定，春鸟年年空自啼。

出头皆是新年少，何处能容老病翁。
更把浮荣喻生灭，世间无事不虚空。

卷 267_67 【登楼望水】

顾况

鸟啼花发柳含烟，
掷却风光忆少年。
更上高楼望江水，
故乡何处一归船。

卷 267_68 【湖中（一作洞庭秋日）】

顾况

青草湖边日色低，
黄茅嶂里鹧鸪啼。
丈夫飘荡今如此，
一曲长歌楚水西。

卷 267_69 【岁日作（一作岁日口号）】

顾况

不觉老将春共至，
更悲携手几人全。
还丹寂寞羞明镜，
手把屠苏让少年。

卷 267_70 【山中赠客】

顾况

山中好处无人别，涧梅伪作山中雪。
野客相逢夜不眠，山中童子烧松节。

卷 267_71【王郎中妓席五咏·筵篴】

顾况

玉作搔头金步摇，高张苦调响连宵。
欲知写尽相思梦，度水寻云不用桥。

卷 267_72【王郎中妓席五咏·舞】

顾况

汗浥新装画不成，丝催急节舞衣轻。
落花绕树疑无影，回雪从风暗有情。

卷 267_73【王郎中妓席五咏·歌（一作王郎中席歌妓）】

顾况

柳拂青楼花满衣，能歌宛转世应稀。

空中几处闻清响，欲绕行云不遣飞。

卷 267_74【王郎中妓席五咏·箏】

顾况

秦声楚调怨无穷，陇水胡笳咽复通。
莫遣黄莺花里啭，参差撩乱妒春风。

卷 267_75【王郎中妓席五咏·笙】

顾况

欲写人间离别心，须听鸣凤似龙吟。
江南曲尽归何处，洞水山云知浅深。

卷 267_76【送李山人还玉溪】

顾况

好鸟共鸣临水树，幽人独欠买山钱。
若为种得千竿竹，引取君家一眼泉。

卷 267_77【送少微上人还鹿门】

顾况

少微不向吴中隐，为个生缘在鹿门。
行入汉江秋月色，襄阳耆旧几人存。

卷 267_78【宿昭应】

顾况

武帝祈灵太乙坛，新丰树色绕千官。
那知今夜长生殿，独闭山门月影寒。

卷 267_79【题琅邪上方】

顾况

东晋王家在此溪，南朝树色隔窗低。
碑沈字灭昔人远，谷鸟犹向寒花啼。

卷 267_80【安仁港口望仙人城】

顾况

楼台采翠远分明，闻说仙家在此城。
欲上仙城无路上，水边花里有人声。

卷 267_81【寄秘书包监】

顾况

一别长安路几千，遥知旧日主人怜。
贾生只是三年谪，独自无才已四年。

卷 267_82【小孤山】

顾况

古庙枫林江水边，寒鸦接饭雁横天。
大孤山远小孤出，月照洞庭归客船。

卷 267_83【送李秀才游嵩山】

顾况

嵩山石壁挂飞流，无限神仙在上头。

采得新诗题石壁，老人惆怅不同游。

卷 267_84 【从剡溪至赤城】

顾况

灵溪宿处接灵山，窈映高楼向月闲。
夜半鹤声残梦里，犹疑琴曲洞房间。

卷 267_85 【叶上题诗从苑中流出】

顾况

花落深宫莺亦悲，上阳宫女断肠时。
君恩不闭东流水，叶上题诗寄与谁。

卷 267_86 【崦里桃花】

顾况

崦里桃花逢女冠，林间杏叶落仙坛。
老人方授上清箓，夜听步虚山月寒。

卷 267_87【听子规（一本题上有摄山二字）】

顾况

栖霞山中子规鸟，口边血出啼不了。
山僧后夜初出定，闻似不闻山月晓。

卷 267_88【竹枝曲】

顾况

帝子苍梧不复归，洞庭叶下荆云飞。
巴人夜唱竹枝后，肠断晓猿声渐稀。

卷 267_89【寻僧二首】

顾况

方丈玲珑花竹闲，已将心印出人间。
家家门外长安道，何处相逢是宝山。

弥天释子本高情，往往山中独自行。
莫怪狂人游楚国，莲花只在淤泥生。

卷 267_90 【桃花曲】

顾况

魏帝宫人舞凤楼，隋家天子泛龙舟。
君王夜醉春眠晏，不觉桃花逐水流。

卷 267_91 【赠远】

顾况

暂出河边思远道，却来窗下听新莺。
故人一别几时见，春草还从旧处生。

卷 267_92 【早春思归有唱竹枝歌者坐中下泪】

顾况

渺渺春生楚水波，楚人齐唱竹枝歌。
与君皆是思归客，拭泪看花奈老何。

卷 267_93 【送郭秀才】

顾况

故人曾任丹徒令，买得青山拟独耕。
不作草堂招远客，却将垂柳借啼莺。

卷 267_94 【宫词】

顾况

长乐宫连上苑春，玉楼金殿艳歌新。
君门一入无由出，唯有宫莺得见人。

卷 267_95 【悼稚】

顾况

稚子比来骑竹马，犹疑只在屋东西。
莫言道者无悲事，曾听巴猿向月啼。

卷 267_96 【山僧兰若】

顾况

绝顶茅庵老此生，寒云孤木伴经行。

世人那得知幽径，遥向青峰礼磬声。

卷 267_97 【句】

顾况

崦合桃花水，窗鸣柳谷泉。（题柳谷泉，见《应天府志》）

颓垣化为陂，陆地堪乘舟。（以下并见张为《主客图》）

汀洲渺渺江篱短，疑是疑非两断肠。

巫峡朝云暮不归，洞庭春水晴空满。

龙吟四泽欲兴雨，凤引九雏警宿乌。（七星管歌《通典》）

新妇矶边月明，女儿浦口潮平。（渔父词，《野客丛谈》）

第二百六十八卷

卷 268_1【发南康夜泊瀨石中】

耿漳

倦客乘归舟，春溪杳将暮。群林结暝色，孤泊有佳趣。
夜山转长江，赤月吐深树。飒飒松上吹，泛泛花间露。
险石俯潭涡，跳湍碍沿溯。岂唯垂堂戒，兼以临深惧。
稍出回雁峰，明登斩蛟柱。连云向重山，杳未见钟路。

卷 268_2【过王山人旧居】

耿漳

故宅春山中，来逢夕阳入。汲少井味变，开稀户枢涩。
树朽鸟不栖，阶闲云自湿。先生何处去，惆怅空独立。

卷 268_3【晚次昭应】

耿漳

落日向林路，东风吹麦陇。藤草蔓古渠，牛羊下荒冢。
骊宫户久闭，温谷泉长涌。为问全盛时，何人最荣宠。

卷 268_4 【听早蝉歌】

耿漳

蝉鸣兮夕曛，声和兮夏云。白日兮将短，秋意兮已满。
乍悲鸣兮欲长。犹嘶涩兮多断。风萧萧兮转清，
韵嘈嘈兮初成。依婆娑之古树，思辽落之荒城。
闲院支颐，深林倚策，犹惆怅而无语，鬓星星而已白。

卷 268_5 【芦花动】

耿漳

连素穗，翻秋气，细节疏茎任长吹。共作月中声，
孤舟发乡思。

卷 268_6 【赋得寒蛩】

耿漳

尔谁造，鸣何早，趯趯连声遍阶草。复与夜雨和，

游人听堪老。

卷 268_7【宣城逢张二南史】

耿漳

全家宛陵客，文雅世难逢。寄食年将老，干时计未从。
秋来句曲水，雨后敬亭峰。西北长安远，登临恨几重。

卷 268_8【题童子寺】

耿漳

半偈留何处，全身弃此中。雨馀沙塔坏，月满雪山空。
耸刹临回磴，朱楼间碧丛。朝朝日将暮，长对晋阳宫。

卷 268_9【夏日寄东溪隐者】

耿漳

日华浮野水，草色合遥空。处处山依旧，年年事不同。
闲田孤垒外，暑雨片云中。惆怅多尘累，无由访钓翁。

卷 268_10 【之江淮留别京中亲故】

耿漳

长云迷一雁，渐远向南声。已带千霜鬓，初为万里行。
繁虫满夜草，连雨暗秋城。前路诸侯贵，何人重客卿。

卷 268_11 【太原送许侍御出幕归东都】

耿漳

昔随刘越石，今日独归时。汾水风烟冷，并州花木迟。
荒庭增别梦，野雨失行期。莫向山阳过，邻人夜笛悲。

卷 268_12 【华州客舍奉和崔端公春城晓望】

耿漳

不语看芳径，悲春懒独行。向人微月在，报雨早霞生。
贫病催年齿，风尘掩姓名。赖逢骢马客，郢曲缓羁情。

卷 268_13 【题清萝翁双泉】

耿漳

侧弁向清漪，门中夕照移。异源生暗石，叠响落秋池。
叶拥沙痕没，流回草蔓随。泠泠无限意，不独远公知。

卷 268_14【酬李文（一作汶）】

耿漳

落照长杨苑，秋天渭水滨。初飞万木叶，又长一年人。
贫病仍为客，艰虞更问津。多惭惠然意，今日肯相亲。

卷 268_15【赠严维】

耿漳

许询清论重，寂寞住山阴。野路接寒寺，闲门当古林。
海田秋熟早，湖水夜渔深。世上穷通理，谁人奈此心。

卷 268_16【春日题苗发竹亭】

耿漳

春亭及策上，郎吏谢玄晖。闲咏疏篁近，高眠远岫微。

偏宜留野客，暂得解朝衣。犹忆东溪里，雷云掩故扉。

卷 268_17【题孝子陵】

耿漳

荒坟秋陌上，霜露正霏霏。松柏自成拱，苫庐长不归。
浮埃积蓬鬓，流血在麻衣。何必曾参传，千年至行稀。

卷 268_18【题庄上人房】

耿漳

不语焚香坐，心知道已成。流年衰此世，定力见他生。
暮雪馀春冷，寒灯续昼明。寻常五侯至，敢望下阶迎。

卷 268_19【宋中】

耿漳

日暮黄云合，年深白骨稀。旧村乔木在，秋草远人归。
废井莓苔厚，荒田路径微。唯馀近山色，相对似依依。

卷 268_20 【秋夜思归】

耿漳

来时犹暑服，今已露漫漫。多雨逢初霁，深秋生夜寒。
投人心似切，为客事皆难。何处无留滞，谁能暂问看。

卷 268_21 【送李端】

耿漳

世上许刘桢，洋洋风雅声。客来空改岁，归去未成名。
远近天初暮，关河雪半晴。空怀谏书在，回首恋承明。

卷 268_22 【送崔明府赴青城】

耿漳

清冬宾御出，蜀道翠微间。远雾开群壑，初阳照近关。
霜潭浮紫菜，雪栈绕青山。当似遗民去，柴桑政自闲。

卷 268_23 【送王将军出塞】

耿漳

汉家边事重，窦宪出临戎。绝漠秋山在，阳关旧路通。
列营依茂草，吹角向高风。更就燕然石，行看奏虏功。

卷 268_24【雨中留别】

耿漳

东西无定客，风雨未休时。悯默此中别，飘零何处期。
青山违旧隐，白发入新诗。岁岁迷津路，生涯渐可悲。

卷 268_25【送杨将军】

耿漳

一身良将后，万里讨乌孙。落日边陲静，秋风鼓角喧。
远山当碛路，茂草向营门。生死酬恩宠，功名岂敢论。

卷 268_26【送夏侯审游蜀】

耿漳

暮峰和玉垒，回望不通秦。更问蜀城路，但逢巴语人。

石林莺啭晓，板屋月明春。若访严夫子，无嫌卜肆贫。

卷 268_27【送张侍御赴郴州别驾】

耿漳

佐郡人难料，分襟日复斜。一帆随远水，百口过长沙。
明月江边夜，平陵梦里家。王孙对芳草，愁思杳无涯。

卷 268_28【送苗贠赴阳翟丞】

耿漳

夕阳秋草上，去马弟兄看。年少初辞阙，时危远效官。
山行独夜雨，旅宿二陵寒。诗兴生何处，嵩阳羽客坛。

卷 268_29【送绛州郭参军】

耿漳

远事诸侯出，青山古晋城。连行麹水阁，独入议中兵。
夜雨新田湿，春风曙角鸣。人传府公政，记室有参卿。

卷 268_30 【常州留别】

耿漳

万里南天外，求书禹穴间。往来成白首，旦暮见青山。
夜浦凉云过，秋塘好月闲。殷勤阳羨桂，别此几时攀。

卷 268_31 【关山月】

耿漳

月明边徼静，戍客望乡时。塞古柳衰尽，关寒榆发迟。
苍苍万里道，戚戚十年悲。今夜青楼上，还应照所思。

卷 268_32 【代宋州将淮上乞师】

耿漳

唇齿幸相依，危亡故远归。身轻百战出，家在数重围。
上将坚深垒，残兵斗落晖。常闻铁剑利，早晚借馀威。

卷 268_33 【秋晚卧疾寄司空拾遗曙卢少府纶】

耿漳

寒几坐空堂，疏髯似积霜。老医迷旧疾，朽药误新方。
晚果红低树，秋苔绿遍墙。惭非蒋生径，不敢望求羊。

卷 268_34 【赠海明上人（一作赠朗公）】

耿漳

来自西天竺，持经奉紫微。年深梵语变，行苦俗流归。
月上安禅久，苔生出院稀。梁间有驯鸽，不去复何依。

卷 268_35 【津亭有怀】

耿漳

津亭一望乡，淮海晚茫茫。草没栖洲鹭，天连映浦樯。
往来通楚越，旦暮易渔商。惆怅缄书毕，何人向洛阳。

卷 268_36 【晚投江泽浦即事呈柳兵曹泥】

耿漳

落日过重霞，轻烟上远沙。移舟冲荇蔓，转浦入芦花。

断岸迁来客，连波漾去槎。故乡何处在，更道向天涯。

卷 268_37【东郊别业】

耿漳

东皋占薄田，耕种过馀年。护药栽山刺，浇蔬引竹泉。
晚雷期稔岁，重雾报晴天。若问幽人意，思齐沮溺贤。

卷 268_38【早朝】

耿漳

钟鼓馀声里，千官向紫微。冒寒人语少，乘月烛来稀。
清漏闻驰道，轻霞映琐闱。犹看嘶马处，未启掖垣扉。

卷 268_39【屏居整屋】

耿漳

百年心不料，一卷日相知。乘兴偏难改，忧家是强为。
县城寒寂寞，峰树远参差。自笑无谋者，只应道在斯。

卷 268_40 【进秋隼】

耿漳

岂悟因罗者，迎霜献紫微。夕阳分素臆，秋色上花衣。
举翅云天近，回眸燕雀稀。应随明主意，百中有光辉。

卷 268_41 【咏宣州笔】

耿漳

寒竹惭虚受，纤毫任几重。影端缘守直，心劲懒藏锋。
落纸惊风起，摇空见露浓。丹青与文事，舍此复何从。

卷 268_42 【春日洪州即事】

耿漳

钟陵春日好，春水满南塘。竹宇分朱阁，桐花间绿杨。
蹉跎看鬓色，留滞惜年芳。欲问羁愁发，秦关道路长。

卷 268_43 【雪后宿王纯池州草堂】

耿漳

宿君湖上宅，琴韵静参差。夜雪入秋浦，孤城连贵池。
流年看共老，衔酒发中悲。良会应难再，晨鸡自有期。

卷 268_44【旅次汉故畤】

耿漳

我行过汉畤，寥落见孤城。邑里经多难，儿童识五兵。
广川桑遍绿，丛薄雉连鸣。惆怅萧关道，终军愿请缨。

卷 268_45【过三郊驿却寄杨评事时此子郭令公欲有表荐】

耿漳

冉冉青衫客，悠悠白发人。乱山孤驿暮，长路百花新。
终岁行他县，全家望此身。更思君去就，早晚问平津。

卷 268_46【陇西行】

耿漳

雪下阳关路，人稀陇戍头。封狐犹未剪，边将岂无羞。

白草三冬色，黄云万里愁。因思李都尉，毕竟不封侯。

卷 268_47【巴陵逢洛阳邻舍（一作书情逢故人）】

耿漳

因君知北事，流浪已忘机。客久多人识，年高众病归。
连云湖色远，度雪雁声稀。又说家林尽，凄伤泪满衣。

卷 268_48【哭张融】

耿漳

早岁能文客，中年与世违。有家孀妇少，无子吊人稀。
總帐尘空暗，铭旌雨不飞。依然旧乡路，寂寞几回归。

卷 268_49【送友贬岭南】

耿漳

暮年从远谪，落日别交亲。湖上北飞雁，天涯南去人。
梦成湘浦夜，泪尽桂阳春。岁月茫茫意，何时雨露新。

卷 268_50 【春日即事二首】

耿漳

诗书成志业，懒慢致蹉跎。圣代丹青远，明时白发多。
浅谋堪自笑，穷巷忆谁过。寂寞前山暮，归人樵采歌。

数亩东皋宅，青春独屏居。家贫僮仆慢，官罢友朋疏。
强饮沽来酒，羞看读了书。闲花开满地，惆怅复何如。

卷 268_51 【赠田家翁】

耿漳

老人迎客处，篱落稻畦间。蚕屋朝寒闭，田家昼雨闲。
门间新薤草，蹊径旧谿山。自道谁相及，邀予试往还。

卷 268_52 【赠韦山人】

耿漳

失意成逋客，终年独掩扉。无机狎鸥惯，多病见人稀。
流水知行药，孤云伴采薇。空斋莫闲笑，心事与时违。

卷 268_53 【濬公院怀旧】

耿漳

远公传教毕，身没向他方。吊客来何见，门人闭影堂。
纱灯临古砌，尘札在空床。寂寞疏钟后，秋天有夕阳。

卷 268_54 【雨中宿义兴寺】

耿漳

遥夜宿东林，虫声阶草深。高风初落叶，多雨未归心。
家国身犹负，星霜鬓已侵。沧洲纵不去，何处有知音。

卷 268_55 【送王秘书归江东】

耿漳

回首望知音，逶迤桑柘林。人归海郡远，路入雨天深。
万木经秋叶，孤舟向暮心。唯馀江畔草，应见白头吟。

卷 268_56 【渭上送李藏器移家东都】

耿漳

求名虽有据，学稼又无田。故国三千里，新春五十年。
移家还作客，避地莫知贤。洛浦今何处，风帆去渺然。

卷 268_57【春寻柳先生】

耿漳

言是商山老，尘心莫问年。白髯垂策短，乌帽据梧偏。
酒熟飞巴雨，丹成见海田。疏云披远水，景动石床前。

卷 268_58【题藏公院】

耿漳

古院林公住，疏篁近井桃。俗年人见少，禅地自知高。
药草诚多喻，沧溟在一毫。仍悲次宗辈，尘事日为劳。

卷 268_59【夏夜西亭即事寄钱员外】

耿漳

高亭宾客散，暑夜醉相和。细汗迎衣集，微凉待扇过。

风还池色定，月晚树阴多。遥想随行者，珊珊动晓珂。

卷 268_60【与清江上人及诸公宿李八昆季宅】

耿漳

汤公多外友，洛社自相依。远客还登会，秋怀欲忘归。
惊风林果少，骤雨砌虫稀。更过三张价，东游愧陆机。

卷 268_61【春日即事】

耿漳

邻里朝光遍，披衣夜醉醒。庖厨非旧火，林木发新青。
接果移天性，疏泉逐地形。清明来几日，戴胜已堪听。

卷 268_62【秋夜会宿李永宅忆江南旧游】

耿漳

偶宿俱南客，相看喜尽归。湖山话不极，岁月念空违。
子夜高梧冷，秋阴远漏微。那无此良会，惜在谢家稀。

卷 268_63【冬夜寻李永因书事赠之】

耿漳

栖遑偏降志，疵贱倍修身。近觉多衰鬓，深知独故人。
天垂五夜月，霜覆九衢尘。不待逢沮溺，而今恶问津。

卷 268_64【立春日宴高陵任明府宅】

耿漳

春灰今变候，密雪又霏霏。坐客同心满，流年此会稀。
风成空处乱，素积夜来飞。且共衔杯酒，陶潜不得归。

卷 268_65【春日游慈恩寺寄畅当】

耿漳

浮世今何事，空门此谛真。死生俱是梦，哀乐讵关身。
远草光连水，春篁色离尘。当从庾中庶，诗客更何人。

卷 268_66【晚秋过苏少府】

耿漳

九江迷去住，群吏且因依。高木秋垂露，寒城暮掩扉。
随云心自远，看草伴应稀。肯信同年友，相望青琐闱。

卷 268_67【登鹳雀楼】

耿漳

久客心常醉，高楼日渐低。黄河经海内，华岳镇关西。
去远千帆小，来迟独鸟迷。终年不得意，空觉负东溪。

卷 268_68【赋得沙上雁】

耿漳

衡阳多道里，弱羽复哀音。还塞知何日，惊弦乱此心。
夜阴前侣远，秋冷后湖深。独立汀洲意，宁知霜霰侵。

卷 268_69【夜寻卢处士】

耿漳

月高鸡犬静，门掩向寒塘。夜竹深茅宇，秋庭冷石床。

住山年已远，服药寿偏长。虚弃如吾者，逢君益自伤。

卷 268_70【邠州留别】

耿漳

终岁山川路，生涯总几何。艰难为客惯，贫贱受恩多。
暮角寒山色，秋风远水波。无人见惆怅，垂鞚入烟萝。

卷 268_71【赠张将军（一作开府）】

耿漳

寥落军城暮，重门返照间。鼓鼙经雨暗，士马过秋闲。
惯守临边郡，曾营近海山。关西旧业在，夜夜梦中还。

卷 268_72【赠隐公（一作赠隐上人）】

耿漳

世间无近远，定里遍曾过。东海经长在，南朝寺最多。
暮年聊化俗，初地即摧魔。今日忘尘虑，看心义若何。

卷 268_73 【赠别安邑韩少府】

耿漳

子真能自在，江海意何如。门掩疏尘吏，心闲阅道书。
古城寒欲雪，远客暮无车。杳杳思前路，谁堪千里馀。

卷 268_74 【送胡校书秩满归河中】

耿漳

古树汾阴道，悠悠东去长。位卑仍解印，身老又还乡。
河水平秋岸，关门向夕阳。音书须数附，莫学晋嵇康。

卷 268_75 【送河中张胄曹往太原计会回】

耿漳

北风长至远，四牡向幽并。衰木新田路，寒芜故绛城。
遥听边上信，远计朔南程。料变当临事，遥知外国情。

卷 268_76 【送郭正字归郢上】

耿漳

济江篇已出，书府俸犹贫。积雪商山道，全家楚塞人。
大堤逢落日，广汉望通津。却别渔潭下，惊鸥那可亲。

卷 268_77【题李孝廉书房】

耿漳

野情专易外，一室向青山。业就三编绝，心通万事闲。
莺稀春木上，草遍暮阶间。莫道归繻在，来时弃故关。

卷 268_78【酬畅当】

耿漳

同游漆沮后，已是十年馀。几度曾相梦，何时定得书。
月高城影尽，霜重柳条疏。且对尊中酒，千般想未如。

卷 268_79【留别解县韩明府（一作别解明府）】

耿漳

闲人州县厌，贱士友朋讥。朔雪逢初下，秦关独暮归。

寒茅下原浅，残雪过风微。一路何相慰，唯君能政稀。

卷 268_80【游钟山紫芝观】

耿漳

系舟仙宅下，清磬落春风。雨数芝田长，云开石路重。
古房清磴接，深殿紫烟浓。鹤驾何时去，游人自不逢。

卷 268_81【晚秋宿裴员外寺院（得逢字）】

耿漳

仲言多丽藻，晚水独芙蓉。梁苑仍秋过，仁祠又夜逢。
回林通暗竹，去雨带寒钟。原向空门里，修持比昼龙。

卷 268_82【秋夜喜卢司直严少府访宿】

耿漳

寂寂闭层城，悠悠此夜情。早凉过鬓发，秋思入柴荆。
严子多高趣，卢公有盛名。还如杜陵下，暂拂蒋元卿。

卷 268_83【下邳客舍喜叔孙主簿郑少府见过】

耿漳

良宵复杪秋，把酒说羁游。落木东西别，寒萍远近流。
萧条旅馆月，寂历曙更筹。不是仇梅至，何人问百忧。

卷 268_84【整屋客舍】

耿漳

寥寂荒垓下，客舍雨微微。门见苔生满，心惭吏到稀。
篱花看未发，海燕欲先归。无限堪惆怅，谁家复捣衣。

卷 268_85【宿韦员外宅】

耿漳

传经韦相后，赐笔汉家郎。幽阁诸生会，寒宵几刻长。
座中灯泛酒，檐外月如霜。人事多飘忽，邀欢讵可忘。

卷 268_86【登沃州山】

耿漳

沃州初望海，携手尽时髦。小暑开鹏翼，新莫长鹭涛。
月如芳草远，身比夕阳高。羊祜伤风景，谁云异我曹。

卷 268_87【宿岐山姜明府厅】

耿漳

暝色休群动，秋斋远客情。细风和雨气，寒竹度帘声。
日觉蹉跎近，天教懒慢成。谁能谒卿相，朝夕算浮荣。

卷 268_88【上巳日】

耿漳

共来修禊事，内顾一悲翁。玉鬓风尘下，花林丝管中。
故山离水石，旧侣失鹓鸿。不及游鱼乐，裴回莲叶东。

卷 268_89【登乐游原】

耿漳

园庙何年废，登临有故丘。孤村连日静，多雨及霖休。

常与秦山对，曾经汉主游。岂知千载后，万事水东流。

卷 268_90【题惟幹上人房】

耿漳

绳床茅屋下，独坐味闲安。苦行无童子，忘机避宰官。
是非齐已久，夏腊比应难。更悟真如性，尘心稍自宽。

卷 268_91【会凤翔张少尹南亭】

耿漳

远过张正见，诗兴自依依。西府军城暮，南庭吏事稀。
草檐宜日过，花圃任烟归。更料重关外，群僚候启扉。

卷 268_92【早春宴高陵滑少府（得升字）】

耿漳

且宽沈簿领，应赖酒如渑。春夜霜犹下，东城月未升。
清言饶醉客，乱舞避寒灯。名字书仙籍，诸生病未能。

卷 268_93【寒蜂采菊蕊】

耿漳

游颺下晴空，寻芳到菊丛。带声来蕊上，连影在香中。
去住沾馀雾，高低顺过风。终惭异蝴蝶，不与梦魂通。

卷 268_94【题杨著别业】

耿漳

柳巷向陂斜，回阳噪乱鸦。农桑子云业，书籍蔡邕家。
暮叶初翻砌，寒池转露沙。如何守儒行，寂寞过年华。

卷 268_95【送太仆寺李丞赴都到桃林塞】

耿漳

远过桃林塞，休年自昔闻。曲河随暮草，重阜接闲云。
造父为周御，詹嘉守晋军。应多怀古思，落叶又纷纷。

卷 268_96【宋中】

耿漳

百战无军食，孤城陷虏尘。为伤多易子，翻吊浅为臣。
漫漫东流水，悠悠南陌人。空思前事往，向晓泪沾巾。

卷 268_97【陪宴湖州公堂】

耿漳

谢公为楚郡，坐客是瑶林。文府重门奥，儒源积浪深。
壶觞邀薄醉，笙磬发高音。未至才仍短，难随白雪吟。

卷 268_98【寻觉公因寄李二端司空十四曙】

耿漳

少年尝味道，无事日悠悠。及至悟生死，寻僧已白头。
云回庐瀑雨，树落给园秋。为我谢宗许，尘中难久留。

卷 268_99【送郭秀才赴举】

耿漳

乡赋鹿鸣篇，君为贡士先。新经梦笔夜，才比弃繻年。

海雨沾隋柳，江潮赴楚船。相看南去雁，离恨倍潸然。

卷 268_100【送王闰】

耿漳

相送临汉水，怆然望故关。江芜连梦泽，楚雪入商山。
语我他年旧，看君此日还。因将自悲泪，一洒别离间。

卷 268_101【送蜀客还】

耿漳

万峰深积翠，路向此中难。欲暮多羁思，因高莫远看。
卓家人寂寞，扬子业荒残。唯见岷山水，悠悠带月寒。

卷 268_102【送海州卢录事】

耿漳

之官逢计吏，风土问如何。海口朝阳近，青州春气多。
郊原鹏影到，楼阁蜃云和。损益关从事，期听劳者歌。

卷 268_103【登钟山馆】

耿漳

匹马宜春路，萧条背馆心。涧花寒夕雨，潭水黑朝林。
野市鱼盐隘，江村竹苇深。子规何处发，青树满高岑。

卷 268_104【秋日（一作落照）】

耿漳

照耀天山外，飞鸦几共过。微红拂秋汉，片白透长波。
影促寒汀薄，光残古木多。金霞与云气，散漫复相和。

卷 268_105【赠苗员外】

耿漳

为郎日赋诗，小谢少年时。业继儒门后，心多道者期。
晚回长乐殿，新出夜明祠。行乐西园暮，春风动柳丝。

卷 268_106【诣顺公问道】

耿漳

此身知是妄，远远诣支公。何法住持后，能逃生死中。
秋苔经古径，薜叶满疏丛。方便如开诱，南宗与北宗。

卷 268_107【废庆宝寺（一作司空曙诗）】

耿漳

黄叶前朝寺，无僧寒殿开。池晴龟出暴，松暝鹤飞回。
古井碑横草，阴廊画杂苔。禅宫亦销歇，尘世转堪哀。

卷 268_108【赴许州留别洛中亲故】

耿漳

淳风今变俗，末学误为文。幸免投湘浦，那辞近汝坟。
山遮魏阙路，日隐洛阳云。谁念联翩翼，烟中独失群。

卷 268_109【送叶尊师归处州】

耿漳

风驭南行远，长山与夜江。群祆离分野，五岳拜旌幢。

· 全唐诗 ·

石髓调金鼎，云浆实玉缸。玃玃吠声晓，洞府有仙厖。

第二百六十九卷

卷 269_1【酬张少尹秋日凤翔西郊见寄】

耿漳

鼎气孕河汾，英英济旧勋。刘生曾任侠，张率自能文。
官佐征西府，名齐将上军。秋山遥出浦，野鹤暮离群。
远恨边笳起，劳歌骑吏闻。废关人不到，荒戍日空曛。
草木凉初变，阴晴景半分。叠蝉临积水，乱燕入过云。
丽藻终思我，衰髯亦为君。闲吟寡和曲，庭叶渐纷纷。

卷 269_2【春日书情寄元校书伯和相国元子】

耿漳

数岁平津邸，诸生出门时。羈孤力行早，疏贱托身迟。
芳草看无厌，青山到未期。贫居悲老大，春日上茅茨。
卫玠琼瑶色，玄成鼎鼐姿。友朋汉相府，兄弟谢家诗。
律合声虽应，劳歌调自悲。流年不可住，惆怅镜中丝。

卷 269_3 【奉送崔侍御和蕃】

耿漳

万里华戎隔，风沙道路秋。新恩明主启，旧好使臣修。
旌节随边草，关山见戍楼。俗殊人左衽，地远水西流。
日暮冰先合，春深雪未休。无论善长对，博望自封侯。

卷 269_4 【春日即事】

耿漳

芳菲那变易，年鬓自蹉跎。室与千峰对，门唯二仲过。
宦情知己少，生事托人多。草色微风长，莺声细雨和。
几时犹滞拙，终日望恩波。纵欲论相报，无如漂母何。

卷 269_5 【仙山行】

耿漳

深溪人不到，杖策独缘源。花落寻无径，鸡鸣觉近村。
数翁皆藉草，对弈复倾尊。看毕初为局，归逢几世孙。
云迷入洞处，水引出山门。惆怅归城郭，樵柯迹尚存。

卷 269_6 【得替后书怀上第五相公】

耿漳

谁语恓惶客，偏承顾盼私。应逾骨肉分，敢忘死生期。
山县唯荒垒，云屯尽老师。庖人宁自代，食檠谬相推。
黄绶名空罢，青春鬓又衰。还来扫门处，犹未报恩时。
独立花飞满，无言月下迟。不知丞相意，更欲遣何之。

卷 269_7 【入塞曲】

耿漳

将军带十围，重锦制戎衣。猿臂销弓力，虬须长剑威。
首登平乐宴，新破大宛归。楼上诛姬笑，门前问客稀。
暮烽玄兔急，秋草紫骝肥。未奉君王诏，高槐昼掩扉。

卷 269_8 【送姚校书因归河中】

耿漳

十年相见少，一岁又还乡。去住人惆怅，东西路渺茫。
古陂无茂草，高树有残阳。委弃秋来稻，雕疏采后桑。
月轮生舜庙，河水出关墙。明日过闾里，光辉芸阁郎。

卷 269_9 【题清源寺（即王右丞故宅）】

耿漳

儒墨兼宗道，云泉隐旧庐。孟城今寂寞，辋水自纡馀。
内学销多累，西林易故居。深房春竹老，细雨夜钟疏。
陈迹留金地，遗文在石渠。不知登座客，谁得蔡邕书。

卷 269_10 【奉送蒋尚书兼御史大夫东都留守】

耿漳

副相威名重，春卿礼乐崇。锡珪仍拜下，分命遂居东。
高旆翻秋日，清铙引细风。蝉稀金谷树，草遍德阳宫。
教用儒门俭，兵依武库雄。谁云千载后，周召独为公。

卷 269_11 【喜侯十七校书见访】

耿漳

东城独屏居，有客到吾庐。发廩因春黍，开畦复剪蔬。
许酣令乞酒，辞罢任无鱼。遍出新成句，更通未悟书。
藤丝秋不长，竹粉雨仍馀。谁为须张烛，凉空有望舒。

卷 269_12【晚春青门林亭燕集】

耿漳

都门连骑出，东野柳如丝。秦苑看山处，王孙逐草时。
欢游难再得，衰老是前期。林静莺啼远，春深日过迟。
落花今夕思，秉烛古人诗。对酒当为乐，双杯未可辞。

卷 269_13【晚秋东游寄猗氏第五明府解县韩明府】

耿漳

步出青门去，疏钟隔上林。四郊多难日，千里独归心。
暮鸟声偏苦，秋云色易阴。乱坟松柏少，野径草茅深。
灞浞袁安履，汾南宓贱琴。何由听白雪，只益泪沾襟。

卷 269_14【奉和元承杪秋忆终南旧居】

耿漳

白玉郎仍少，羊车上路平。秋风摇远草，旧业起高情。
乱树通秦苑，重原接杜城。溪云随暮淡，野水带寒清。
广树留峰翠，闲门响叶声。近樵应已烧，多稼又新成。
解佩从休沐，承家岂退耕。恭侯有遗躅，何事学泉明。

卷 269_15【晚夏即事临南居】

耿漳

何须学从宦，其奈本无机。蕙草芳菲歇，青山早晚归。
广庭馀落照，高枕对闲扉。树色迎秋老，蝉声过雨稀。
艰难逢事异，去就与时违。遥忆衡门外，苍苍三径微。

卷 269_16【省试骊珠诗】

耿漳

是日重泉下，言探径寸珠。龙鳞今不逆，鱼目也应殊。
掌上星初满，盘中月正孤。酬恩光莫及，照乘色难逾。
欲问投人否，先论按剑无。傥怜希代价，敢对此冰壶。

卷 269_17【元日早朝】

耿漳

九陌朝臣满，三朝候鼓鼙。远珂时接韵，攒炬偶成花。
紫贝为高阙，黄龙建大牙。参差万戟合，左右八貂斜。
羽扇纷朱槛，金炉隔翠华。微风传曙漏，晓日上春霞。
环珮声重叠，蛮夷服等差。乐和天易感，山固寿无涯。

渥泽千年圣，车书四海家。盛明多在位，谁得守蓬麻。

卷 269_18【送归中丞使新罗（一本题下有册立吊祭四字）】

耿漳

远国通王化，儒林得使臣。六君成典册，万里奉丝纶。
云水连孤棹，恩私在一身。悠悠龙节去，渺渺蜃楼新。
望里行还暮，波中岁又春。昏明看日御，灵怪问舟人。
城邑分华夏，衣裳拟缙绅。他时礼命毕，归路勿迷津。

卷 269_19【赠兴平郑明府】

耿漳

海内兵犹在，关西赋未均。仍劳持斧使，尚宰茂陵人。
遥夜重城掩，清宵片月新。绿琴听古调，白屋被深仁。
迹与儒生合，心惟静者亲。深情先结契，薄宦早趋尘。
贫病休何日，艰难过此身。悠悠行远道，冉冉过良辰。
明主知封事，长沮笑问津。栖遑忽相见，欲语泪沾巾。

卷 269_20【和王怀州观西营秋射（得寒字）】

耿漳

谢公亲校武，草碧露漫漫。落叶停高驾，空林满从官。
迎筹皆叠鼓，挥箭或移竿。名借三军勇，功推百中难。
主皮山郡晚，饮算柳营寒。明日开铃阁，新诗双玉盘。

卷 269_21【晚登虔州即事寄李侍御】

耿湔

章溪与贡水，何事会波澜。万里归人少，孤舟行路难。
春光浮曲浪，暮色隔连滩。花发从南早，江流向北宽。
故交参盛府，新角耸危冠。楚剑期终割，隋珠惜未弹。
酒醒愁转极，别远泪初干。愿保乔松质，青青过大寒。

卷 269_22【奉和第五相公登鄱阳郡城西楼】

耿湔

茂德为邦久，丰貂旧相尊。发生传雨露，均养助乾坤。
晓肆登楼目，春销恋阙魂。女墙分吏事，远道启津门。
湓浦潮声尽，钟陵暮色繁。夕阳移梦土，芳草接湘源。
封内群甿复，兵间百赋存。童牛耕废亩，壕木绕新村。
野步渔声溢，荒祠鼓舞喧。高斋成五字，远岫发孤猿。
一顾承英达，多荣及子孙。家贫仍受赐，身老未酬恩。
属和瑶华曲，堪将系组纁。

卷 269_23 【甘泉诗】

耿漳

异井甘如醴，深仁远未涯。气寒堪避暑，源净自蠲邪。
修绠悬冰甃，新桐荫玉沙。带星凝晓露，拂雾涌秋华。
绿溢涵千仞，清泠饮万家。何能葛洪宅，终日闭烟霞。

卷 269_24 【发绵津驿】

耿漳

孤舟北去暮心伤，细雨东风春草长。杳杳短亭分水陆，
隆隆远鼓集渔商。千丛野竹连湘浦，一派寒江下吉阳。
欲问长安今远近，初年塞雁有归行。

卷 269_25 【塞上曲】

耿漳

惯习干戈事鞍马，初从少小在边城。身微久属千夫长，
家远多亲五郡兵。懒说疆场曾大获，且悲年鬓老长征。
塞鸿过尽残阳里，楼上凄凄暮角声。

卷 269_26 【路旁老人】

耿漳

老人独坐倚官树，欲语潸然泪便垂。陌上归心无产业，
城边战骨有亲知。馀生尚在艰难日，长路多逢轻薄儿。
绿水青山虽似旧，如今贫后复何为。

卷 269_27 【赠别刘员外长卿】

耿漳

清如寒玉直如丝，世故多虞事莫期。建德津亭人别夜，
新安江水月明时。为文易老皆知苦，谪宦无名倍足悲。
不学朱云能折槛，空羞献纳在丹墀。

卷 269_28 【宿万固寺因寄严补阙】

耿漳

晓随樵客到青冥，因礼山僧宿化城。钟梵已休初入定。
有无皆离本难名。云开半夜千林静，月上中峰万壑明。
为报故人雷处士，尘心终日自劳生。

卷 269_29 【岐阳客舍呈张明府】

耿漳

逸妻稚子应沟壑，归路茫茫东去遥。凉叶下时心悄悄，
空斋梦里雨萧萧。星霜渐见侵华发，生长虚闻在圣朝。
知己只今何处有，故山无事别渔樵。

卷 269_30 【奉和李观察登河中白楼】

耿漳

城上高楼飞鸟齐，从公一遂蹑丹梯。黄河曲尽流天外，
白日轮轻落海西。玉树九重长在梦，云衢一望杳如迷。
何心更和阳春奏，况复秋风闻战鼙。

卷 269_31 【朝下寄韩舍人】

耿漳

侍臣鸣珮出西曹，鸾殿分阶翊彩旄。瑞气迴浮青玉案，
日华遥上赤霜袍。花间焰焰云旗合，鸟外亭亭露掌高。
肯念万年芳树里，随风一叶在蓬蒿。

卷 269_32 【贺李观察祷河神降雨】

耿漳

质明斋祭北风微，驺驭千群拥庙扉。玉帛才敷云淡淡，
笙镛未撤雨霏霏。路边五稼添膏长，河上双旌带湿归。
若出敬亭山下作，何人敢和谢玄晖。

卷 269_33 【上将行（一作上裴行军中丞）】

耿漳

萧关扫定犬羊群，闭阁层城白日曛。枥上骅骝嘶鼓角，
门前老将识风云。旌旗四面寒山映，丝管千家静夜闻。
谁道古来多简册，功臣唯有卫将军。

卷 269_34 【许下书情寄张韩二舍人】

耿漳

谪宦军城老更悲，近来频夜梦丹墀。银杯乍灭心中火，
金镊唯多鬓上丝。绕院绿苔闻雁处，满庭黄叶闭门时。
故人高步云衢上，肯念前程杳未期。

卷 269_35【九日】

耿漳

重阳寒寺满秋梧，客在南楼顾老夫。步蹇强登游藻井，
发稀那更插茱萸。横空过雨千峰出，大野新霜万叶枯。
更望尊中菊花酒，殷勤能得几回沽。

卷 269_36【送大谷高少府】

耿漳

县属并州北近胡，悠悠此别宦仍孤。应知史笔思循吏，
莫料辕门笑鲁儒。古塞草青宜牧马，春城月暗好啼乌。
雕残贵有亲仁术，梅福何须去隐吴。

卷 269_37【同李端春望】

耿漳

二毛羈旅尚迷津，万井莺花雨后春。宫阙参差当晚日，
山河迢迢静纤尘。和风醉里承恩客，芳草归时失意人。
南北东西各自去，年年依旧物华新。

卷 269_38 【岳祠送薛近贬官】

耿漳

枯松老柏仙山下，白帝祠堂枕古逵。迁客无辜祝史告，
神明有喜女巫知。遥思桂浦人空去，远过衡阳雁不随。
度岭梅花翻向北，回看不见树南枝。

卷 269_39 【送友人游江南】

耿漳

远别悠悠白发新，江潭何处是通津，潮声偏惧初来客，
海味唯甘久住人。漠漠烟光前浦晚，青青草色定山春。
汀洲更有南回雁，乱起联翩北向秦。

卷 269_40 【长门怨】

耿漳

闻道昭阳宴，嚬蛾落叶中。清歌逐寒月，遥夜入深宫。

卷 269_41 【秋日】

耿漳

反照入闾巷，忧来与谁语。古道无人行，秋风动禾黍。

卷 269_42 【秋夜】

耿漳

高秋夜分后，远客雁来时。寂寞重门掩，无人问所思。

卷 269_43 【慈恩寺残春】

耿漳

双林花已尽，叶色占残芳。若问同游客，高年最断肠。

卷 269_44 【早次眉县界】

耿漳

匹马晓路归，悠悠渭川道。晴山向孤城，秋日满白草。

卷 269_45 【路傍墓】

耿漳

石马双双当古树，不知何代公侯墓。
墓前靡靡春草深，唯有行人看碑路。

卷 269_46【代园中老人】

耿漳

佣赁难堪一老身，皤皤力役在青春。
林园手种唯吾事，桃李成阴归别人。

卷 269_47【古意】

耿漳

虽言千骑上头居，一世生离恨有馀。
叶下绮窗银烛冷，含啼自草锦中书。

卷 269_48【凉州词】

耿漳

国使翻翻随旆旌，陇西岐路足荒城。

毡裘牧马胡雏小，日暮蕃歌三两声。

卷 269_49【安邑王校书居】

耿漳

秋来池馆清，夜闻宫漏声。迢递玉山迥，泛滟银河倾。
琴上松风至，窗里竹烟生。多君不家食，孰云事岩耕。

卷 269_50【登总持寺阁】

耿漳

今日登高阁，三休忽自悲。因知筋力减，不及往年时。
草树还如旧，山河亦在兹。龙钟兼老病，更有重来期。

卷 269_51【寄钱起（一作司空曙诗）】

耿漳

草长花落树，羸病强寻春。无复少年意，空馀华发新。
青原高见水，白社静逢人。寄谢南宫客，轩车不见亲。

卷 269_52 【宿青龙寺故昙上人院】

耿漳

年深宫院在，闲客自相逢。闭户临寒竹，无人有夜钟。
降龙今已去，巢鹤竟何从。坐见繁星晓，凄凉识旧峰。

卷 269_53 【新蝉（一作司空曙诗）】

耿漳

今朝蝉忽鸣，迁客若为情。便觉一年谢，能令万感生。
微风方满树，落日稍沈城。为问同怀者，凄凉听几声。

卷 269_54 【秋中雨田园即事】

耿漳

漠漠重云暗，萧萧密雨垂。为霖淹古道，积日满荒陂。
五稼何时获，孤村几户炊。乱流发通圃，腐叶著秋枝。
暮爨新樵湿，晨渔旧浦移。空馀去年菊，花发在东篱。

卷 269_55 【拜新月（一作李端诗）】

耿漳

开帘见新月，便即下阶拜。细语人不闻，北风吹裙带。

卷 269_56【客行赠人】

耿漳

旅行虽别路，日暮各思归。欲下今朝泪，知君亦湿衣。

卷 269_57【赠山老人】

耿漳

白首独一身，青山为四邻。虽行故乡陌，不见故乡人。

卷 269_58【赠胡居士】

耿漳

孔融过五十，海内故人稀。相府恩犹在，知君未拂衣。

卷 269_59【荐福寺送元伟】

耿漳

送客攀花后，寻僧坐竹时。明朝莫回望，青草马行迟。

卷 269_60【观邻老栽松】

耿漳

虽过老人宅，不解老人心。何事斜阳里，栽松欲待阴。

卷 269_61【哭鞠象（一作司空曙诗）】

耿漳

忆昨秋风起，君曾叹逐臣。何言芳草日，自作九泉人。

卷 269_62【哭苗垂】

耿漳

旧友无由见，孤坟草欲长。月斜邻笛尽，车马出山阳。

卷 269_63【题云际寺故僧院】

耿漳

白发匆匆色，青山草草心。远公仍下世，从此别东林。

卷 269_64【句】

耿漳

高树多凉吹，疏蝉足断声。（见《海录碎事》）。

第二百七十卷

卷 270_1【塞下曲】

戎昱

惨惨寒日没，北风卷蓬根。将军领疲兵，却入古塞门。
回头指阴山，杀气成黄云。

上山望胡兵，胡马驰骤速。黄河冰已合，意又向南牧。
嫖姚夜出军，霜雪割人肉。

塞北无草木，乌鸢巢僵尸。泱泱沙漠空，终日胡风吹。
战卒多苦辛，苦辛无四时。

晚渡西海西，向东看日没。傍岸砂砾堆，半和战兵骨。
单于竟未灭，阴气常勃勃。

城上画角哀，即知兵心苦。试问左右人，无言泪如雨。
何意休明时，终年事鼙鼓。

北风凋白草，胡马日骎骎。夜后戍楼月，秋来边将心。
铁衣霜露重，战马岁年深。自有卢龙塞，烟尘飞至今。

卷 270_2 【苦哉行五首（宝应中过滑州洛阳后同王季友作）】

戎昱

彼鼠侵我厨，纵狸授粱肉。鼠虽为君却，狸食自须足。
冀雪大国耻，翻是大国辱。膾腥逼绮罗，砖瓦杂珠玉。
登楼非骋望，目笑是心哭。何意天乐中，至今奏胡曲。

官军收洛阳，家住洛阳里。夫婿与兄弟，目前见伤死。
吞声不许哭，还遣衣罗绮。上马随匈奴，数秋黄尘里。
生为名家女，死作塞垣鬼。乡国无还期，天津哭流水。

登楼望天衢，目极泪盈睫。强笑无笑容，须收旧花靥。
昔年买奴婢，奴婢来碎叶。岂意未死间，自为匈奴妾。
一生忽至此，万事痛苦业。得出塞垣飞，不如彼蜂蝶。

妾家清河边，七叶承貂蝉。身为最小女，偏得浑家怜。
亲戚不相识，幽闺十五年。有时最远出，只到中门前。
前年狂胡来，惧死翻生全。今秋官军至，岂意遭戈鋌。
匈奴为先锋，长鼻黄发拳。弯弓猎生人，百步牛羊膻。
脱身落虎口，不及归黄泉。苦哉难重陈，暗哭苍苍天。

可汗奉亲诏，今月归燕山。忽如乱刀剑，搅妾心肠间。
出户望北荒，迢迢玉门关。生人为死别，有去无时还。
汉月割妾心，胡风凋妾颜。去去断绝魂，叫天天不闻。

卷 270_3【苦辛行】

戎昱

且莫奏短歌，听余苦辛词。如今刀笔士，不及屠沽儿。
少年无事学诗赋，岂意文章复相误。东西南北少知音，
终年竟岁悲行路。仰面诉天天不闻，低头告地地不言。
天地生我尚如此，陌上他人何足论。谁谓西江深，
涉之固无忧；谁谓南山高，可以登之游。
险巖唯有世间路，一晌令人堪白头。贵人立意不可测，
等闲桃李成荆棘。风尘之士深可亲，心如鸡犬能依人。
悲来却忆汉天子，不弃相如家旧贫。劝君且饮酒，
酒能散羁愁。谁家有酒判一醉，万事从他江水流。

卷 270_4【长安秋夕（一作中秋感怀）】

戎昱

八月更漏长，愁人起常早。闭门寂无事，满院生秋草。
昨宵西窗梦，梦入荆南道。远客归去来，在家贫亦好。

卷 270_5【罗江客舍】

戎昱

山县秋云暗，茅亭暮雨寒。自伤庭叶下，谁问客衣单。
有兴时添酒，无聊懒整冠。近来乡国梦，夜夜到长安。

卷 270_6 【赠岑郎中】

戎昱

童年未解读书时，诵得郎中数首诗。四海烟尘犹隔阔，
十年魂梦每相随。虽披云雾逢迎疾，已恨趋风拜德迟。
天下无人鉴诗句，不寻诗伯重寻谁。

卷 270_7 【闻笛（一作李益诗）】

戎昱

入夜思归切，笛声清更哀。愁人不愿听，自到枕前来。
风起塞云断，夜深关月开。平明独惆怅，飞尽一庭梅。

卷 270_8 【汉上题韦氏庄】

戎昱

结茅同楚客，卜筑汉江边。日落数归鸟，夜深闻扣舷。
水痕侵岸柳，山翠借厨烟。调笑提筐妇，春来蚕几眠。

卷 270_9 【闺情】

戎昱

侧听宫官说，知君宠尚存。未能开笑颊，先欲换愁魂。
宝镜窥妆影，红衫裛泪痕。昭阳今再入，宁敢恨长门。

卷 270_10 【衡阳春日游僧院】

戎昱

曾共刘谿议，同时事道林。与君相掩泪，来客岂知心。
阶雪凌春积，炉烟向暝深。依然旧童子，相送出花林。

卷 270_11 【玉台体题湖上亭】

戎昱

湖入县西边，湖头胜事偏。绿竿初长笋，红颗未开莲。
蔽日高高树，迎人小小船。清风长入坐，夏月似秋天。

卷 270_12 【早梅】

戎昱

一树寒梅白玉条，迥临村路傍溪桥。
应缘近水花先发，疑是经春雪未销。

卷 270_13【移家别湖上亭】

戎昱

好是春风湖上亭，柳条藤蔓系离情。
黄莺久住浑相识，欲别频啼四五声。

卷 270_14【客堂秋夕】

戎昱

隔窗萤影灭复流，北风微雨虚堂秋。虫声竟夜引乡泪，
蟋蟀何自知人愁。四时不得一日乐，以此方悲客游恶。
寂寂江城无所闻，梧桐叶上偏萧索。

卷 270_15【湖南雪中留别】

戎昱

草草还草草，湖东别离早。何处愁杀人，归鞍雪中道。
出门迷辙迹，云水白浩浩。明日武陵西，相思鬓堪老。

卷 270_16【赠别张驸马】

戎昱

上元年中长安陌，见君朝下欲归宅。飞龙骑马三十匹，
玉勒雕鞍照初日。数里衣香遥扑人，长衢雨歇无纤尘。
从奴斜抱敕赐锦，双双蹙出金麒麟。天子爱婿皇后弟，
独步明时负权势。一身扈跸承殊泽，甲第朱门耸高戟。
凤凰楼上伴吹箫，鹦鹉杯中醉留客。泰去否来何足论，
宫中晏驾人事翻。一朝负谴辞丹阙，五年待罪湘江源。
冠冕凄凉几迁改，眼看桑田变成海。华堂金屋别赐人，
细眼黄头总何在。渚宫相见寸心悲，懒欲今时问昔时。
看君风骨殊未歇，不用愁来双泪垂。

卷 270_17【泾州观元戎出师】

戎昱

寒日征西将，萧萧万马丛。吹笳覆楼雪，祝纛满旗风。
遮虏黄云断，烧羌白草空。金铙肃天外，玉帐静霜中。
朔野长城闭，河源旧路通。卫青师自老，魏绛赏何功。
枪垒依沙迥，辕门压塞雄。燕然如可勒，万里愿从公。

卷 270_18【从军行】

戎昱

昔从李都尉，双鞬照马蹄。擒生黑山北，杀敌黄云西。
太白沈虏地，边草复萋萋。归来邯郸市，百尺青楼梯。
感激然诺重，平生胆力齐。芳筵暮歌发，艳粉轻鬟低。
半酣秋风起，铁骑门前嘶。远戍报烽火，孤城严鼓鼙。
挥鞭望尘去，少妇莫含啼。

卷 270_19【古意】

戎昱

女伴朝来说，知君欲弃捐。懒梳明镜下，羞到画堂前。
有泪沾脂粉，无情理管弦。不知将巧笑，更遣向谁怜。

卷 270_20【听杜山人弹胡笳】

戎昱

绿琴胡笳谁妙弹，山人杜陵名庭兰。杜君少与山人友，
山人没来今已久。当时海内求知音，嘱付胡笳入君手。
杜陵攻琴四十年，琴声在音不在弦。座中为我奏此曲，

满堂萧瑟如穷边。第一第二拍，泪尽蛾眉没蕃客。
更闻出塞入塞声，穹庐毡帐难为情。胡天雨雪四时下，
五月不曾芳草生。须臾促轸变宫徵，一声悲兮一声喜。
南看汉月双眼明，却顾胡儿寸心死。回鹘数年收洛阳，
洛阳士女皆驱将。岂无父母与兄弟，闻此哀情皆断肠。
杜陵先生证此道，沈家祝家皆绝倒。如今世上雅风衰，
若个深知此声好。世上爱筝不爱琴，则明此调难知音。
今朝促轸为君奏，不向俗流传此心。

卷 270_21【咏史（一作和蕃）】

戎昱

汉家青史上，计拙是和亲。社稷依明主，安危托妇人。
岂能将玉貌，便拟静胡尘。地下千年骨，谁为辅佐臣。

卷 270_22【桂州腊夜】

戎昱

坐到三更尽，归仍万里赊。雪声偏傍竹，寒梦不离家。
晓角分残漏，孤灯落碎花。二年随骠骑，辛苦向天涯。

卷 270_23【再赴桂州先寄李大夫】

戎昱

玷玉甘长弃，朱门喜再游。过因谗后重，恩合死前酬。
养骥须怜瘦，栽松莫厌秋。今朝两行泪，一半血和流。

卷 270_24【题招提寺】

戎昱

招提精舍好，石壁向江开。山影水中尽，鸟声天上来。
一灯传岁月，深院长莓苔。日暮双林磬，泠泠送客回。

卷 270_25【谪官辰州冬至日有怀】

戎昱

去年长至在长安，策杖曾簪獬豸冠。此岁长安逢至日，
下阶遥想雪霜寒。梦随行伍朝天去，身寄穷荒报国难。
北望南郊消息断，江头唯有泪阑干。

卷 270_26【赠韦况征君】

戎昱

身欲逃名名自随，凤衔丹诏降茅茨。苦节难违天子命，
贞心唯有老松知。回看药灶封题密，强入蒲轮引步迟。
今日巢由旧冠带，圣朝风化胜尧时。

卷 270_27 【送吉州阎使君入道二首】

戎昱

闻道桃源去，尘心忽自悲。余当从宦日，君是弃官时。
金汞封仙骨，灵津咽玉池。受传三箬备，起坐五云随。
洞里花常发，人间鬓易衰。他年会相访，莫作烂柯棋。

庐陵太守近隳官，霞帔初朝五帝坛。风过鬼神延受箓，
夜深龙虎卫烧丹。冰容入镜纤埃静，玉液添瓶漱齿寒。
莫遣桃花迷客路，千山万水访君难。

卷 270_28 【入剑门】

戎昱

剑门兵革后，万事尽堪悲。鸟鼠无巢穴，儿童话别离。
山川同昔日，荆棘是今时。征战何年定，家家有画旗。

卷 270_29 【过商山】

戎昱

雨暗商山过客稀，路傍孤店闭柴扉。
卸鞍良久茅檐下，待得巴人樵采归。

卷 270_30 【闰春宴花溪严侍御庄】

戎昱

一团青翠色，云是子陵家。山带新晴雨，溪留闰月花。
瓶开巾漉酒，地坼笋抽芽。彩缬承颜面，朝朝赋白华。

卷 270_31 【岁暮客怀】

戎昱

异乡三十口，亲老复家贫。无事乾坤内，虚为翰墨人。
岁华南去后，愁梦北来频。惆怅江边柳，依依又欲春。

卷 270_32 【秋望兴庆宫】

戎昱

先皇歌舞地，今日未游巡。幽咽龙池水，凄凉御榻尘。

随风秋树叶，对月老宫人。万事如桑海，悲来欲恸神。

卷 270_33【送郑炼师贬辰州】

戎昱

辰州万里外，想得逐臣心。谪去刑名枉，人间痛惜深。
误将瑕指玉，遂使谗消金。计日西归在，休为泽畔吟。

卷 270_34【云梦故城秋望】

戎昱

故国遗墟在，登临想旧游。一朝人事变，千载水空流。
梦渚鸿声晚，荆门树色秋。片云凝不散，遥挂望乡愁。

卷 270_35【秋日感怀】

戎昱

洛阳岐路信悠悠，无事辞家两度秋。日下未驰千里足，
天涯徒泛五湖舟。荷衣半浸缘乡泪，玉貌潜销是客愁。
说向长安亲与故，谁怜岁晚尚淹留。

卷 270_36 【送王明府入道】

戎昱

何事陶彭泽，明时又挂冠。为耽泉石趣，不惮薜萝寒。
轻雪笼纱帽，孤猿傍醺坛。悬悬老松下，金灶夜烧丹。

卷 270_37 【秋月（一作江城秋夜）】

戎昱

江干入夜杵声秋，百尺疏桐挂斗牛。
思苦自看明月苦，人愁不是月华愁。

卷 270_38 【赋得铁马鞭】

戎昱

成器虽因匠，怀刚本自天。为怜持寸节，长拟静三边。
未入英髦用，空存铁石坚。希君剖腹取，还解抱龙泉。

卷 270_39 【闻颜尚书陷贼中】

戎昱

闻说征南没，那堪故吏闻。能持苏武节，不受马超勋。
国破无家信，天秋有雁群。同荣不同辱，今日负将军。

卷 270_40【送苏参军】

戎昱

忆昨青襟醉里分，酒醒回首怆离群。舟移极浦城初掩，
山束长江日早曛。客来有恨空思德，别后谁人更议文。
常叹苏生官太屈，应缘才似鲍参军。

卷 270_41【成都元十八侍御】

戎昱

不见元生已数朝，浣花溪路去非遥。客舍早知浑寂寞，
交情岂谓更萧条。空有寸心思会面，恨无单酌遣相邀。
骅骝幸自能驰骤，何惜挥鞭过柞桥。

卷 270_42【观卫尚书九日对中使射破的】

戎昱

盛宴倾黄菊，殊私降紫泥。月营开射圃，霜旆拂晴霓。
出将三朝贵，弯弓五善齐。腕回金镞满，的破绿弦低。
勇气干牛斗，欢声震鼓鼙。忠臣思报国，更欲取关西。

卷 270_43【辰州闻大驾还宫】

戎昱

闻道銮舆归魏阙，望云西拜喜成悲。宁知陇水烟销日，
再有园林秋荐时。渭水战添亡虏血，秦人生睹旧朝仪。
自惭出守辰州畔，不得亲随日月旗。

卷 270_44【辰州建中四年多怀】

戎昱

荒徼辰阳远，穷秋瘴雨深。主恩堪洒血，边宦更何心。
海上红旗满，生前白发侵。竹寒宁改节，隼静早因禽。
务退门多掩，愁来酒独斟。无涯忧国泪，无日不沾襟。

卷 270_45【上桂州李大夫】

戎昱

今日辞门馆，情将众别殊。感深翻有泪，仁过曲怜愚。
晚镜伤秋鬓，晴寒切病躯。烟霞万里阔，宇宙一身孤。
倚马才宁有，登龙意岂无。唯于方寸内，暗贮报恩珠。

卷 270_46【江城秋霁】

戎昱

霁后江城风景凉，岂堪登眺只堪伤。远天螭螭收残雨，
映水鸬鹚近夕阳。万事无成空过日，十年多难不还乡。
不知何处销兹恨，转觉愁随夜夜长。

卷 270_47【上李常侍】

戎昱

旌旗晓过大江西，七校前驱万队齐。千里政声人共喜，
三军令肃马前嘶。恩沾境内风初变，春入城阴柳渐低。
桃李不须令更种，早知门下旧成蹊。

卷 270_48【上湖南崔中丞】

戎昱

山上青松陌上尘，云泥岂合得相亲。举世尽嫌良马瘦，
唯君不弃卧龙贫。千金未必能移性，一诺从来许杀身。
莫道书生无感激，寸心还是报恩人。

卷 270_49【早春雪中】

戎昱

阴云万里昼漫漫，愁坐关心事几般。
为报春风休下雪，柳条初放不禁寒。

卷 270_50【云安阻雨】

戎昱

日长巴峡雨濛濛，又说归舟路未通。
游人不及西江水，先得东流到渚宫。

卷 270_51【湖南春日二首】

戎昱

自怜春日客长沙，江上无人转忆家。
光景却添乡思苦，檐前数片落梅花。

三湘漂寓若流萍，万里湘乡隔洞庭。
羁客春来心欲碎，东风莫遣柳条青。

卷 270_52【送陆秀才归觐省】

戎昱

武陵何处住，南指楚云阴。花萼连枝近，桃源去路深。
啼莺徒寂寂，征马已骎骎。堤上千年柳，条条挂我心。

卷 270_53【戏题秋月】

戎昱

秋宵月色胜春宵，万里天涯静寂寥。
近来数夜飞霜重，只畏娑婆树叶凋。

卷 270_54【宿湘江】

戎昱

九月湘江水漫流，沙边唯览月华秋。
金风浦上吹黄叶，一夜纷纷满客舟。

卷 270_55【戏赠张使君】

戎昱

数载蹉跎罢搢绅，五湖乘兴转迷津。
如今野客无家第，醉处寻常是主人。

卷 270_56【别公安贾明府】

戎昱

叶县门前江水深，浅于羁客报恩心。
把君诗卷西归去，一度相思一度吟。

卷 270_57【霁雪（一作韩舍人书窗残雪）】

戎昱

风卷寒云暮雪晴，江烟洗尽柳条轻。
檐前数片无人扫，又得书窗一夜明。

卷 270_58【汉阴吊崔员外坟】

戎昱

远别望有归，叶落望春晖。所痛泉路人，一去无还期。
荒坟遗汉阴，坟树啼子规。存没抱冤滞，孤魂意何依。
岂无骨肉亲，岂无深相知。曝露不复问，高名亦何为。
相携恸君罢，春日空迟迟。

卷 270_59【题槿花】

戎昱

自用金钱买槿栽，二年方始得花开。
鲜红未许佳人见，蝴蝶争知早到来。

卷 270_60【题宋玉亭】

戎昱

宋玉亭前悲暮秋，阳台路上雨初收。
应缘此处人多别，松竹萧萧也带愁。

卷 270_61【过东平军】

戎昱

画角初鸣残照微，营营鞍马往来稀。
相逢士卒皆垂泪，八座朝天何日归。

卷 270_62 【送辰州郑使君】

戎昱

谁人不谪谪，君去独堪伤。长子家无弟，慈亲老在堂。
惊魂随驿吏，冒暑向炎方。未到猿啼处，参差已断肠。

卷 270_63 【江上柳送人】

戎昱

江柳断肠色，黄丝垂未齐。人看几重恨，鸟入一枝低。
乡泪正堪落，与君又解携。相思万里道，春去夕阳西。

卷 270_64 【湘南曲】

戎昱

虞帝南游不复还，翠蛾幽怨水云间。
昨夜月明湘浦宿，闺中珂珮度空山。

卷 270_65 【桂州西山登高上陆大夫】

戎昱

登高上山上，高处更堪愁。野菊他乡酒，芦花满眼秋。
风烟连楚郡，兄弟客荆州。早晚朝天去，亲随定远侯。

卷 270_66 【寄郑炼师】

戎昱

平生金石友，沦落向辰州。已是二年客，那堪终日愁。
尺书浑不寄，两鬓计应秋。今夜相思月，情人南海头。

卷 270_67 【八月十五日】

戎昱

忆昔千秋节，欢娱万国同。今来六亲远，此日一悲风。
年少逢胡乱，时平似梦中。梨园几人在，应是涕无穷。

卷 270_68 【征人归乡】

戎昱

三月江城柳絮飞，五年游客送人归。
故将别泪和乡泪，今日阑干湿汝衣。

卷 270_69【骆家亭子纳凉】

戎昱

江湖思渺然，不离国门前。折苇鱼沈藻，攀藤鸟出烟。
生衣宜水竹，小酒入诗篇。莫怪侵星坐，神清不欲眠。

卷 270_70【逢陇西故人忆关中舍弟】

戎昱

莫话边庭事，心摧不欲闻。数年家陇地，舍弟殁胡军。
每念支离苦，常嗟骨肉分。急难何日见，遥哭陇西云。

卷 270_71【秋夜梁十三厅事】

戎昱

今来秋已暮，还恐未成归。梦里家仍远，愁中叶又飞。

竹声风度急，灯影月来微。得见梁夫子，心源有所依。

卷 270_72【成都暮雨秋（一作秋雨）】

戎昱

九月龟城暮，愁人闭草堂。地卑多雨润，天暖少秋霜。
纵欲倾新酒，其如忆故乡。不知更漏意，惟向客边长。

卷 270_73【酬梁二十】

戎昱

渚宫无限客，相见独相亲。长路皆同病，无言似一身。
岁寒唯爱竹，憔悴不堪春。细与知音说，攻文恐误人。

卷 270_74【花下宴送郑炼师】

戎昱

愁里惜春深，闻幽即共寻。贵看花柳色，图放别离心。
客醉花能笑，诗成花伴吟。为君调绿绮，先奏凤归林。

卷 270_75【秋馆雨后得弟兄书即事呈李明府】

戎昱

弟兄书忽到，一夜喜兼愁。空馆复闻雨，贫家怯到秋。
坐中孤烛暗，窗外数萤流。试以他乡事，明朝问子游。

卷 270_76【寄梁淑】

戎昱

长忆江头执别时，论文未有不相思。雁过经秋无尺素，
人来终日见新诗。心思食檠何由展，家似流萍任所之。
悔学秦人南避地，武陵原上又征师。

卷 270_77【送张秀才之长沙】

戎昱

君向长沙去，长沙仆旧谙。虽之桂岭北，终是洞庭南。
山霭生朝雨，江烟作夕岚。松醪能醉客，慎勿滞湘潭。

卷 270_78【塞下曲】

戎昱

汉将归来虏塞空，旌旗初下玉关东。
高蹄战马三千匹，落日平原秋草中。

卷 270_79【送僧法和（一作送亮法师）】

戎昱

达士心无滞，他乡总是家。问经翻贝叶，论法指莲花。
欲契真空义，先开智慧芽。不知飞锡后，何外是恒沙。

卷 270_80【送严十五郎之长安】

戎昱

送客身为客，思家怆别家。暂收双眼泪，遥想五陵花。
路远征车迥，山回剑阁斜。长安君到日，春色未应赊。

卷 270_81【冬夜宴梁十三厅】

戎昱

故人能爱客，秉烛会吾曹。家为朋徒罄，心缘翰墨劳。

夜寒销腊酒，霜冷重终袍。醉卧西窗下，时闻雁响高。

卷 270_82【收襄阳城二首】

戎昱

悲风惨惨雨修修，岷北山低草木愁。
暗发前军连夜战，平明旌旆入襄州。

五营飞将拥霜戈，百里僵尸满浐河。
日暮归来看剑血，将军却恨杀人多。

卷 270_83【出军】

戎昱

龙绕旌竿兽满旗，翻营乍似雪中移。
中军一队三千骑，尽是并州游侠儿。

卷 270_84【和李尹种葛】

戎昱

弱质人皆弃，唯君手自栽。藟含霜后竹，香惹腊前梅。

拟托凌云势，须凭接引材。清阴如可惜，黄鸟定飞来。

卷 270_85【送零陵妓（一作送妓赴于公召）】

戎昱

宝钿香蛾翡翠裙，装成掩泣欲行云。
殷勤好取襄王意，莫向阳台梦使君。

卷 270_86【采莲曲二首】

戎昱

虽听采莲曲，讵识采莲心。漾楫爱花远，回船愁浪深。
烟生极浦色，日落半江阴。同侣怜波静，看妆堕玉簪。

涔阳女儿花满头，毵毵同泛木兰舟。
秋风日暮南湖里，争唱菱歌不肯休。

卷 270_87【塞上曲】

戎昱

胡风略地烧连山，碎叶孤城未下关。

山头烽子声声叫，知是将军夜猎还。

卷 270_88【寂上人禅房】

戎昱

俗尘浮垢闭禅关，百岁身心几日闲。
安得此生同草木，无营长在四时间。

卷 270_89【桂州口号】

戎昱

画角三声动客愁，晓霜如雪覆江楼。
谁道桂林风景暖，到来重著皂貂裘。

卷 270_90【红槿花】

戎昱

花是深红叶麝尘，不将桃李共争春。
今日惊秋自怜客，折来持赠少年人。

卷 270_91【哭黔中薛大夫】

戎昱

亚相何年镇百蛮，生涯万事瘴云间。
夜郎城外谁人哭，昨日空馀旌节还。

卷 270_92【感春】

戎昱

看花泪尽知春尽，魂断看花只恨春。
名位未沾身欲老，诗书宁救眼前贫。

卷 270_93【途中寄李二（一作李益诗）】

戎昱

杨柳烟含灞岸春，年年攀折为行人。
好风若借低枝便，莫遣青丝扫路尘。

卷 270_94【寄许炼师（一作李益诗）】

戎昱

扫石焚香礼碧空，露华偏湿蕊珠宫。
如何说得天坛上，万里无云月正中。

卷 270_95【下第留辞顾侍郎】

戎昱

绮陌彤彤花照尘，王门侯邸尽朱轮。
城南旧有山村路，欲向云霞觅主人。

卷 270_96【题云公山房（一作权德舆诗，又作杨巨源诗）】

戎昱

云公兰若深山里，月明松殿微风起。
试问空门清净心，莲花不著秋潭水。

卷 270_97【别离作（一作戴叔伦诗）】

戎昱

手把杏花枝，未曾经别离。黄昏掩门后，寂寞自心知。

卷 270_98【九日贾明府见访】

戎昱

独掩衡门秋景闲，洛阳才子访柴关。莫嫌浊酒君须醉，
虽是贫家菊也斑。同人愿得长携手，久客深思一破颜。
却笑孟嘉吹帽落，登高何必上龙山。

卷 270_99【开元观陪杜大夫中元日观乐】

戎昱

今朝欢称玉京天，况值关东俗理年。舞态疑回紫阳女，
歌声似遏彩云仙。盘空双鹤惊几剑，洒砌三花度管弦。
落日香尘拥归骑，□风油幕动高烟。

卷 270_100【中秋夜登楼望月寄人】

戎昱

西楼见月似江城，脉脉悠悠倚槛情。万里此情同皎洁，
一年今日最分明。初惊桂子从天落，稍误芦花带雪平。
知称玉人临水见，可怜光彩有馀清。

卷 270_101【赠宜阳张使君】

戎昱

暂作宜阳客，深知太守贤。政移千里俗，人戴两重天。
旧郭多新室，闲坡尽辟田。倘令黄霸在，今日耻同年。

卷 270_102【移家别树】

戎昱

千种庭前树，人移树不移。看花愁作别，不及未栽时。

卷 270_103【成都送严十五之江东】

戎昱

江东万里外，别后几凄凄。峡路花应发，津亭柳正齐。
酒倾迟日暮，川阔远天低。心系征帆上，随君到剡溪。

卷 270_104【送李参军】

戎昱

好住好住王司户，珍重珍重李参军。一东一西如别鹤，
一南一北似浮云。月照疏林千片影，风吹寒水万里纹。
别易会难今古事，非是余今独与君。

卷 270_105【题严氏竹亭】

戎昱

子陵栖遁处，堪系野人心。溪水浸山影，岚烟向竹阴。
忘机看白日，留客醉瑶琴。爱此多诗兴，归来步步吟。

卷 270_106【送王端公之太原归覲相公】

戎昱

柱史今何适，西行咏陟冈。也知人惜别，终美雁成行。
春雨桃花静，离尊竹叶香。到时丞相阁，应喜棣华芳。

卷 270_107【旅次寄湖南张郎中】

戎昱

寒江近户漫流声，竹影临窗乱月明。
归梦不知湖水阔，夜来还到洛阳城。

卷 270_108 【晚次荆江】

戎昱

孤舟大江水，水涉无昏曙。雨暗迷津时，云生望乡处。
渔翁闲自乐，樵客纷多虑。秋色湖上山，归心日边树。
徒称竹箭美，未得枫林趣。向夕垂钓还，吾从落潮去。

卷 270_109 【同辛兖州巢父虚副端岳相思献酬...兼呈辛魏二院长杨长宁】

戎昱

暮角发高城，情人坐中起。临觞不及醉，分散秋风里。
虽有明月期，离心若千里。前欢反惆怅，后会还如此。
焉得夜淹留，一回终宴喜。羁游复牵役，馆至重湖水。
早晚泛归舟，吾从数君子。

卷 270_110 【抚州处士湖泛舟送北回两指此南昌县查溪兰若别】

戎昱

移樽铺山曲，祖帐查溪阴。铺山即远道，查溪非故林。

凄然诵新诗，落泪沾素襟。郡政我何有，别情君独深。
禅庭古树秋，宿雨清沈沈。挥袂故里远，悲伤去住心。

卷 270_111 【耒阳谿夜行（为伤杜甫作）】

戎昱

乘夕棹归舟，缘源二转幽。月明看岭树，风静听溪流。
岚气船间入，霜华衣上浮。猿声虽此夜，不是别家愁。

卷 270_112 【桂城早秋】

戎昱

远客惊秋早，江天夜露新。满庭惟有月，空馆更何人。
卜命知身贱，伤寒舞剑频。猿啼曾下泪，可是为忧贫。

卷 270_113 【桂州岁暮】

戎昱

岁暮天涯客，寒窗欲晓时。君恩空自感，乡思梦先知。
重谊人愁别，惊栖鹊恋枝。不堪楼上角，南向海风吹。

卷 270_114 【宿桂州江亭呈康端公】

戎昱

独向东亭坐，三更待月开。
萤光入竹去，水影过江来。
露滴千家静，年流一叶催。
龙钟万里客，正合故人哀。

第二百七十一卷

卷 271_1【寒食日恩赐火】

窦叔向

恩光及小臣，华烛忽惊春。电影随中使，星辉拂路人。
幸因榆柳暖，一照草茅贫。

卷 271_2【端午日恩赐百索】

窦叔向

仙宫长命缕，端午降殊私。事盛蛟龙见，恩深犬马知。
馀生倘可续，终冀答明时。

卷 271_3【贞懿皇后挽歌三首（今存二首）】

窦叔向

二陵恭妇道，六寝盛皇情。礼逊生前贵，恩追歿后荣。

幼王亲捧土，爱女复边茝。东望长如在，谁云向玉京。

后庭攀画柳，上陌咽清笳。命妇羞蘋叶，都人插柰花。
寿宫星月异，仙路往来赊。纵有迎仙术，终悲隔绛纱。

卷 271_4【秋砧送邑大夫】

窦叔向

断续长门下，清泠逆旅秋。征夫应待信，寒女不胜愁。
带月飞城上，因风散陌头。离居偏入听，况复送归舟。

卷 271_5【过担石湖】

窦叔向

晓发渔门戍，晴看担石湖。日衔高浪出，天入四空无。
尺寸分洲岛，纤毫指舳舻。渺然从此去，谁念客帆孤。

卷 271_6【春日早朝应制】

窦叔向

紫殿俯千官，春松应合欢。御炉香焰暖，驰道玉声寒。

乳燕翻珠缀，祥乌集露盘。宫花一万树，不敢举头看。

卷 271_7 【酬李袁州嘉祐】

窦叔向

少年轻会复轻离，老大关心总是悲。强说前程聊自慰，
未知携手定何时。公才屈指登黄阁，匪服胡颜上赤墀。
想到长安诵佳句，满朝谁不念琼枝。

卷 271_8 【夏夜宿表兄话旧】

窦叔向

夜合花开香满庭，夜深微雨醉初醒。远书珍重何曾达，
旧事凄凉不可听。去日儿童皆长大，昔年亲友半凋零。
明朝又是孤舟别，愁见河桥酒幔青。

卷 271_9 【句】

窦叔向

禁兵环素帟，宫女哭寒云。
(《哀挽》第三首，止存二句。见《联珠集叙》)。

卷 271_10 【晚次方山精舍却寄张荐员外】

窦常

楚腊还无雪，江春又足风。马羸三径外，人病四愁中。
西塞波涛阔，南朝寺舍空。犹衔步兵酒，宿醉在除东。

卷 271_11 【和裴端公枢芜城秋夕简远近亲知】

窦常

岁积登朝恋，秋加陋巷贫。宿醒因夜歇，佳句得愁新。
尽日凭幽几，何时上软轮。汉廷风宪在，应念匪躬人。

卷 271_12 【项亭怀古】

窦常

力取诚多难，天亡路亦穷。有心裁帐下，无面到江东。
命厄留骓处，年销逐鹿中。汉家神器在，须废拔山功。

卷 271_13 【奉使西还早发小涧馆寄卢滁州迈】

窦常

野棠花覆地，山馆夜来阴。马迹穿云去，鸡声出涧深。
清风时偃草，久旱或为霖。试与惺惺话，犹坚借寇心。

卷 271_14【早发金钩店寄奚十唐大二茂才】

窦常

出门山未曙，风叶暗萧萧。月影临荒栅，泉声近废桥。
岁经秋后役，程在洛中遥。寄谢金门侣，弓旌误见招。

卷 271_15【途中立春寄杨郇伯】

窦常

浪迹终年客，惊心此地春。风前独去马，泽畔耦耕人。
老大交情重，悲凉外物亲。子云今在宅，应见柳条新。

卷 271_16【故秘监丹阳郡公延陵包公挽歌词】

窦常

卓绝明时第，孤贞贵后贫。郤诜为胄子，季札是乡人。

笔下调金石，花开领搢绅。那堪归葬日，哭渡柳杨津。

卷 271_17【凉国惠康公主挽歌】

窦常

玉立分尧绪，笄年下相门。早加于氏对，偏占馆陶恩。
泪有潜成血，香无却返魂。共知何驸马，垂白抱天孙。

卷 271_18【哭张仓曹南史】

窦常

万事竟蹉跎，重泉恨若何。官临环卫小，身逐转蓬多。
丽藻尝专席，闲情欲烂柯。春风宛陵路，丹旌在沧波。

卷 271_19【北固晚眺】

窦常

水国芒种后，梅天风雨凉。露蚕开晚簇，江燕绕危樯。
山趾北来固，潮头西去长。年年此登眺，人事几销亡。

卷 271_20 【谒三闾庙】

窦常

君非三谏寤，礼许一身逃。自树终天戚，何裨事主劳。
众鱼应饵骨，多士尽餽糟。有客椒浆奠，文衰不继骚。

卷 271_21 【茅山赠梁尊师】

窦常

云屋何年客，青山白日长。种花春扫雪，看箬夜焚香。
上象壶中阔，平生醉里忙。幸承仙籍后，乞取大还方。

卷 271_22 【谒诸葛武侯庙】

窦常

永安宫外有祠堂，鱼水恩深祚不长。角立一方初退舍，
拟称三汉更图王。人同过隙无留影，石在穷沙尚启行。
归蜀降吴竟何事，为陵为谷共苍苍。

卷 271_23 【奉贺太保岐公承恩致政】

窦常

君为宫保及清时，冠盖初闲拜武迟。五色诏中宣九德，
百僚班外置三师。山泉遂性休称疾，子弟能官各受词。
不学铸金思范蠡，乞言犹许上丹墀。

卷 271_24 【之任武陵，寒食日途次松滋渡，先寄刘员外禹锡】

窦常

杏花榆荚晓风前，云际离离上峡船。江转数程淹驿骑，
楚曾三户少人烟。看春又过清明节，算老重经癸巳年。
幸得柱山当郡舍，在朝长咏卜居篇。

卷 271_25 【奉寄辰州房使君郎中】

窦常

汉代文明今盛明，犹将贾傅暂专城。何妨密旨先符竹，
莫是除书误姓名。蜗舍喜时春梦去，隼旌行处瘴江清。
新年只可三十二，却笑潘郎白发生。

卷 271_26 【立春后言怀招汴州李匡衡推】

窦常

闲斋夜击唾壶歌，试望夷门奈远何。每听寒笳离梦断，
时窥清鉴旅愁多。初惊宵漏丁丁促，已觉春风习习和。
海内故人君最老，花开鞭马更相过。

卷 271_27 【奉送职方崔员外摄中丞新罗册使】

窦常

帝命海东使，人行天一涯。辨方知木德，开国有金家。
册拜申恩重，留欢作限赊。顺风鲸浪热，初日锦帆斜。
夜色潜然火，秋期独往槎。慰安皆喻旨，忠信自无瑕。
发美童年髻，簪香子月花。便随琛赆入，正朔在中华。

卷 271_28 【酬舍弟牟秋日洛阳官舍寄怀十韵】

窦常

幼为逃难者，才省用兵初。去国三苗外，全生四纪馀。
老头亲帝里，归处失吾庐。逝水犹呜咽，祥云自卷舒。
正郎曾首拜，亚尹未平除。几变陶家柳，空传魏阙书。
思凌天际鹤，言甚辙中鱼。玉立知求己，金声乍起予。
在朝鱼水分，多病雪霜居。忽报阳春曲，纵横恨不如。

卷 271_29【求自试】

窦常

仙禁祥云合，高梧彩凤游。沈冥求自试，通鉴果蒙收。
文墨悲无位，诗书误白头。陈王抗表日，毛遂请行秋。
双剑曾埋狱，司空问斗牛。希垂拂拭惠，感激愿相投。

卷 271_30【花发上林】

窦常

上苑晓沈沈，花枝乱缀阴。色浮双阙近，春入九门深。
向暖风初扇，馀寒雪尚侵。艳回秦女目，愁处越人心。
绕绕时萦蝶，关关乍引禽。宁知幽谷羽，一举欲依林。

卷 271_31【过宋氏五女旧居（宋氏女姊五人，贞元中同入宫）】

窦常

谢庭风韵婕妤才，天纵斯文去不回。
一宅柳花今似雪，乡人拟筑望仙台。

卷 271_32 【还京乐歌词】

窦常

百战初休十万师，国人西望翠华时。
家家尽唱升平曲，帝幸梨园亲制词。

卷 271_33 【商山祠堂即事】

窦常

夺嫡心萌事可忧，四贤西笑暂安刘。
后王不敢论珪组，土偶人前枳树秋。

卷 271_34 【七夕（一本有寄怀二字）】

窦常

露盘花水望三星，仿佛虚无为降灵。
斜汉没时人不寐，几条蛛网下风庭。

卷 271_35 【杏山馆听子规】

窦常

楚塞馀春听渐稀，断猿今夕让沾衣。
云埋老树空山里，仿佛千声一度飞。

卷 271_36【史馆候别蒋拾遗不遇】

窦牟

千门万户迷，伫立月华西。画戟晨光动，春松宿露低。
主文亲玉宸，通籍入金闺。肯念从戎去，风沙事鼓鼙。

卷 271_37【早赴临台立马待漏口号寄弟群】

窦牟

上陌行初尽，严城立未开。人疑早朝去，客是远方来。
伏奏徒将命，周行自引才。可怜霄汉曙，鸳鹭正徘徊。

卷 271_38【缙氏拜陵回道中呈李舍人少尹】

窦牟

忽忝诸卿位，仍陪长者车。礼容皆若旧，名籍自凭虚。

上路花偏早，空山云甚馀。却愁新咏发，酬和不相如。

卷 271_39 【陪韩院长韦河南同寻刘师不遇（三字分韵，牟得同字）】

窦牟

仙客诚难访，吾人岂易同。独游应驻景，相顾且吟风。
药畹琼枝秀，斋轩粉壁空。不题三五字，何以达壶公。

卷 271_40 【送东光吕少府之官连帅奏授】

窦牟

远爱东光县，平临若木津。一城先见日，百里早惊春。
德礼邀才重，恩辉拜命新。几时裁尺素，沧海有枯鳞。

卷 271_41 【送刘公达判官赴天德军幕】

窦牟

特建青油幕，量分紫禁师。自然知召子，不用问从谁。
文武轻车少，腥膻左衽衰。北风如有寄，画取受降时。

卷 271_42 【故秘监丹阳郡公延陵包公挽歌】

窦牟

台鼎尝虚位，夔龙莫致尧。德音冥秘府，风韵散清朝。
天上文星落，林端玉树凋。有吴君子墓，返葬故山遥。

卷 271_43 【望终南】

窦牟

日爱南山好，时逢夏景残。白云兼似雪，清昼乍生寒。
九陌峰如坠，千门翠可团。欲知形胜尽，都在紫宸看。

卷 271_44 【秋夕闲居对雨赠别卢七侍御坦】

窦牟

燕燕辞巢蝉蜕枝，穷居积雨坏藩篱。夜长檐霤寒无寝，
日晏厨烟湿未炊。悟主一言那可学，从军五首竟徒为。
故人骢马朝天使，洛下秋声恐要知。

卷 271_45 【晚过敷水驿却寄华州使院张郑二侍御】

窦牟

春雨如烟又若丝，晓来昏处晚晴时。仙人掌上芙蓉沼，
柱史关西松柏祠。几许岁华销道路，无穷王事系戎师。
回瞻二妙非吾侣，日对三峰自有期。

卷 271_46【洛下闲居夜晴观雪寄四远诸兄弟】

窦牟

雪月相辉云四开，终风助冻不扬埃。万重琼树宫中接，
一直银河天上来。荆楚岁时知染翰，湘吴醇酎忆衔杯。
强题缣素无颜色，鸿雁南飞早晚回。

卷 271_47【天津晓望因寄呈分司一二省郎】

窦牟

万乘西都去，千门正位虚。凿龙横碧落，提象出华胥。
望幸宫嫔老，迎春海燕初。保厘才半仗，容卫尽空庐。
要自词难拟，繇来画不如。散郎无所属，聊事穆清居。

卷 271_48【早入朝书事】

窦牟

紫陌纷如画，彤庭郁未晨。列星沈骑火，残月暗车尘。
隐轸排霄翰，差池跨海鳞。玉声繁似乐，香泽散成春。
叹息驱羸马，分明识故人。一生三不遇，今作老郎身。

卷 271_49【元日喜闻大礼寄上翰林四学士中书六舍人二十韵】

窦牟

有事郊坛毕，无私日月临。岁华春更早，天瑞雪犹深。
玉辇回时令，金门降德音。翰飞鸳别侣，丛植桂为林。
粉泽资鸿笔，薰和本素琴。礼成戎器下，恩彻鬼方沈。
麟爵来称纪，官师退绝箴。道风黄阁静，祥景紫垣阴。
寿酒朝时献，农书夜直寻。国香煴翠幄，庭燎赭红衾。
汉魏文章盛，尧汤雨露霑。密辞投水石，精义出沙金。
宸宸亲唯敬，钧衡近匪侵。疾驱千里骏，清唳九霄禽。
庆赐迎新服，斋庄弃旧簪。忽思班女怨，遥听越人吟。
末路甘贫病，流年苦滞淫。梦中青琐闥，归处碧山岑。
窃抃闻韶濩，观光想秣任。大哉环海晏，不算子牟心。

卷 271_50【奉使至邢州赠李八使君】

窦牟

独占龙冈部，深持虎节居。尽心敷吏术，含笑掩兵书。
礼饰华缨重，才牵雅制馀。茂阴延驿路，温液逗官渠。
南亩行春罢，西楼待客初。瓮头开绿蚁，砧下落红鱼。
牧伯风流足，輶轩若涩虚。今宵铃阁内，醉舞复何如。

卷 271_51 【秋日洛阳官舍寄上水部家兄】

窦牟

洛阳归老日，此县忽为君。白发兄仍见，丹诚帝岂闻。
九衢横逝水，二室散浮云。屈指豪家尽，伤心要地分。
禁中周几鼎，源上汉诸坟。貔虎今无半，狐狸宿有群。
威声惭北部，仁化乐南薰。野檠饥来食，天香静处焚。
壮年唯喜酒，幼学便词文。及尔空衰暮，离忧讵可闻。

卷 271_52 【李舍人少尹惠家酝一小榼立书绝句】

窦牟

禁琐天浆嫩，虞行夜月寒。一瓢那可醉，应遣试尝看。

卷 271_53 【酬舍弟庠罢举从州辟书】

窦牟

之荆且愿依刘表，折桂终惭见郤诜。
舍弟未应丝作鬓，园公不用印随身。

卷 271_54 【奉酬杨侍郎十兄见赠之作】

窦牟

翠羽雕虫日日新，翰林工部欲何神。
自悲由瑟无弹处，今作关西门下人。

卷 271_55 【杏园渡】

窦牟

卫郊多垒少人家，南渡天寒日又斜。
君子素风悲已矣，杏园无复一枝花。

卷 271_56 【奉诚园闻笛（园，马侍中故宅）】

窦牟

曾绝朱缨吐锦茵，欲披荒草访遗尘。
秋风忽洒西园泪，满目山阳笛里人。

卷 271_57【雪中遇直】

窦群

寒光凝雪彩，限直居粉闱。恍疑白云上，乍觉金印非。
树色霭虚空，琴声谐素徽。明晨阻通籍，独卧挂朝衣。

卷 271_58【东山月下怀友人】

窦群

东山多乔木，月午始苍苍。虽殊碧海状，爱此青苔光。
高下灭华烛，参差启洞房。佳人梦馀思，宝瑟愁应商。
皎洁殊未已，沈吟限一方。宦情晒鸡口，世路倦羊肠。
彼美金石分，眷言兰桂芳。清晖讵同夕，耿耿但相望。

卷 271_59【时兴】

窦群

夙心旷何许，日暮依林薄。流水不待人，孤云时映鹤。
濛濛千万花，曷为神仙药。不遇烂柯叟，报非旧城郭。

卷 271_60 【题剑】

窦群

丈夫得宝剑，束发曾书绅。嗟吁一朝遇，愿言千载邻。
心许留家树，辞直断佞臣。焉能为绕指，拂拭试时人。

卷 271_61 【黔中书事】

窦群

万事非京国，千山拥丽谯。佩刀看日晒，赐马傍江调。
言语多重译，壶觞每独谣。沿流如著翅，不敢问归桡。

卷 271_62 【冬日晓思寄杨二十七炼师】

窦群

雨霜地如雪，松桂青参差。鹤警晨光上，步出南轩时。
所遇各有适，我怀亦自怡。愿言絺素封，昨夜梦琼枝。

卷 271_63 【贞元末东院尝接事今西川武相公于兹...夏日即事因寄四韵】

窦群

重轩深似谷，列柏镇含烟。境绝苍蝇到，风生白雪前。
弹冠惊迹近，专席感恩偏。霄汉朝来下，油幢路几千。

卷 271_64【北地（一作容州）】

窦群

何事到容州，临池照白头。兴随年已往，愁与水长流。
龟勉思逋客，辛勤悔饭牛。诗人亦何意，树草欲忘忧。

卷 271_65【雨后月下寄怀羊二十七资州】

窦群

夕霁凉飙至，翛然心赏谐。清光松上月，虚白郡中斋。
置酒平生在，开衿愿见乖。殷勤寄双鲤，梦想入君怀。

卷 271_66【奉酬西川武相公晨兴赠友见示之作】

窦群

碧树分晓色，宿雨弄清光。犹闻子规啼，独念一声长。

眷眷轸芳思，依依寄远方。情同如兰臭，惠比返魂香。
新什惊变雅，古瑟代沈湘。殷勤见知己，掩抑绕中肠。
隙驷不我待，路人易相忘。孤老空许国，幽报期苍苍。

卷 271_67【晨游昌师院】

窦群

深庭芳草浓，晓井山泉溢。林馥乱沈烟，石润侵经室。
幽岩鸟飞静，晴岭云归密。壁藓凝苍华，竹阴满晴日。
生期半宵梦，忧绪仍非一。若无高世心，安能此终毕。

卷 271_68【同王晦伯朱遐景宿慧山寺】

窦群

共访青山寺，曾隐南朝人。问古松桂老，开襟言笑新。
步移月亦出，水映石磷磷。予洗肠中酒，君濯缨上尘。
皓彩入幽抱，清气逼苍旻。信此澹忘归，淹留冰玉邻。

卷 271_69【草堂夜坐】

窦群

匣中三尺剑，天上少微星。勿谓相去远，壮心曾不停。

卷 271_70【经潼关赠宇文十】

窦群

古有弓旌礼，今征草泽臣。方同白衣见，不是弃繻人。

卷 271_71【观画鹤】

窦群

华亭不相识，卫国复谁知。怅望冲天羽，甘心任画师。

卷 271_72【晚自台中归永宁里南望山色怅然有怀呈上右司十一兄】

窦群

白发侵侵生有涯，青襟曾爱紫河车。
自怜悟主难归去，马上看山恐到家。

卷 271_73【中牟县经鲁公庙（尝修名臣略，系司徒公）】

窦群

青史编名在篋中，故林遗庙揖仁风。
还将文字如颜色，暂下蒲车为鲁公。

卷 271_74【初入谏司喜家室至】

窦群

一旦悲欢见孟光，十年辛苦伴沧浪。
不知笔砚缘封事，犹问佣书日几行。

卷 271_75【春雨】

窦群

昨日偷闲看花了，今朝多雨奈人何。
人间尽似逢花雨，莫爱芳菲湿绮罗。

卷 271_76【送内弟袁德师】

窦群

南渡登舟即水仙，西垣有客思悠然。

因君相问为官意，不卖毗陵负郭田。

卷 271_77【赠刘大兄院长】

窦群

万年枝下昔同趋，三事行中半已无。
路自长沙忽相见，共惊双鬓别来殊。

卷 271_78【假日寻花】

窦群

武陵缘源不可到，河阳带县讵堪夸。
枝枝如雪南关外，一日休闲尽属花。

卷 271_79【自京将赴黔南】

窦群

风雨荆州二月天，问人初雇峡中船。
西南一望云和水，犹道黔南有四千。

卷 271_80 【留守府酬皇甫曙侍御弹琴之什】

窦庠

青琐昼无尘，碧梧阴似水。高张朱弦琴，静举白玉指。
洞箫又奏繁，寒磬一声起。鹤警风露中，泉飞雪云里。
泠泠分雅郑，析析谐宫徵。座客无俗心，巢禽亦倾耳。
卫国知有人，齐竽偶相齿。有时趋绛纱，尽日随朱履。
那令杂繁手，出假求焦尾。几载遗正音，今朝自君始。

卷 271_81 【金山行（润州金山寺，寺在江心）】

窦庠

西江中鼉波四截，涌出一峰青堞堞。外如削成中断裂，
阳气发生阴气结。是时炎天五六月，上有火云下冰雪。
夜色晨光相荡沃，积翠流霞满坑谷。龙泓彻底沙布金，
鸟道插云梯磬玉。架险凌虚随指顾，榱桷玲珑皆固护。
斡流倒景不可窥，万仞千崖生跬步。日华重重上金榜，
丹楹碧砌真珠网。此时天海风浪清，吴楚万家皆在掌。
琼楼菌阁纷明媚，曲槛回轩深且邃。海鸟夜上珊瑚枝，
江花晓落琉璃地。有时倒影沈江底，万状分明光似洗。
不知水上有楼台，却就波中看闭启。舟人忘却江水深，
水神误到人间世。欻然风生波出没，濯濯晶莹无定物。
居人相顾非人间，如到日宫经月窟。信知灵境长有灵，

住者不得无仙骨。三神山上蓬莱宫，徒有丹青人未逢。
何如此处灵山宅，清凉不与嚣尘隔。曾到金山处处行，
梦魂长羡金山客。

卷 271_82【于阗钟歌送灵彻上人归越（钟在越灵嘉寺，从
天竺飞来）】

窦庠

海中有国倾神功，烹金化成九乳钟。精气激射声冲融，
护持海底诸鱼龙。声有感，神无方，连天云水无津梁。
不知飞在灵嘉寺，一国之人皆若狂。东南之美天下传，
环文万象无雕镌。有灵飞动不敢悬，锁在危楼五百年。
有时清秋日正中，繁霜满地天无风。一声洞彻八音尽，
万籁悄然星汉空。徒言凡质千钧重，一夫之力能振动。
大鸣小鸣须在君，不击不考终不闻。高僧访古稽山曲，
终日当之言不足。手提文锋百炼成，恐剗此钟无一声。

卷 271_83【太原送穆质南游】

窦庠

今朝天景清，秋入晋阳城。露叶离披处，风蝉三数声。
那言苦行役，值此远徂征。莫话心中事，相看气不平。

卷 271_84 【四皓驿听琴送王师简归湖南使幕】

窦庠

朱弦韵正调，清夜似闻韶。山馆月犹在，松枝雪未消。
城笳三奏晓，别鹤一声遥。明日思君处，春泉翻寂寥。

卷 271_85 【夜行古战场】

窦庠

山断塞初平，人言古战庭。泉冰声更咽，阴火焰偏青。
月落云沙黑，风回草木腥。不知秦与汉，徒欲吊英灵。

卷 271_86 【奉和王侍郎春日喜李侍郎崔给谏张舍人...因命觞观乐之什】

窦庠

华馆迟嘉宾，逢迎淑景新。锦筵开绛帐，玉佩下朱轮。
曲里三仙会，风前百啭春。欲知忘味处，共仰在齐人。

卷 271_87 【酬谢韦卿二十五兄俯赠辄敢书情】

窦庠

大贤持赠一明珰，蓬荜初惊满室光。埋没剑中生紫气，
尘埃瑟上动清商。荆山璞在终应识，楚国人知不是狂。
莫恨伏辕身未老，会将筋力是王良。

卷 271_88【奉酬侍御家兄东洛闲居夜晴观雪之什】

窦庠

洛阳宫观与天齐，雪净云消月未西。清浅乍分银汉近，
辉光渐觉玉绳低。绿醪乍熟堪聊酌，黄竹篇成好命题。
应念武关山断处，空愁簿领候晨鸡。

卷 271_89【敕目至家兄蒙淮南仆射杜公奏授秘校兼节度参谋同书寄上】

窦庠

朝市三千里，园庐二十春。步兵终日饮，原宪四时贫。
桂树留人久，蓬山入梦新。鹤书承处重，鹄语喜时频。
草奏才偏委，嘉谋事最亲。榻因徐孺解，醴为穆生陈。
卫国今多士，荆州好寄身。烟霄定从此，非假问陶钧。

卷 271_90 【酬韩愈侍郎登岳阳楼见赠（时予权知岳州事）】

窦庠

巨浸连空阔，危楼在杳冥。稍分巴子国，欲近老人星。
昏旦呈新候，川原按旧经。地图封七泽，天限锁重扃。
万象皆归掌，三光岂遁形。月车才碾浪，日御已翻溟。
落照金成柱，馀霞翠拥屏。夜光疑汉曲，寒韵辨湘灵。
山晚云常碧，湖春草遍青。轩黄曾举乐，范蠡几扬舲。
有客初留鹄，贪程尚数蓂。自当徐孺榻，不是谢公亭。
雅论冰生水，雄材刃发硎。座中琼玉润，名下茝兰馨。
假手诚知拙，斋心匪暂宁。每惭公府粟，却忆故山苓。
苦调当三叹，知音愿一听。自悲由也瑟，敢坠孔惺铭。
野杏初成雪，松醪正满瓶。莫辞今日醉，长恨古人醒。

卷 271_91 【东都嘉量亭献留守韩仆射】

窦庠

卜筑三川上，仪刑万井中。度材垂后俭，选胜掩前功。
云构中央起，烟波四面通。乍疑游汗漫，稍似入崆峒。
廛閤高低尽，山河表里穷。峰峦从地碧，宫观倚天红。
灵槛如朝幄，飞桥状晚虹。曙霞晴错落，夕霭湿葱茏。
庾亮楼何厄，陈蕃榻更崇。有时闲讲德，永日静观风。
玉笋飞无算，金铙奏未终。重筵开玳瑁，上客集鸛鸿。

接武空惭蹇，修文敢并雄。岂须登岷首，然后奉羊公。

卷 271_92【段都尉别业】

窦庠

曾识将军段匹磾，几场花下醉如泥。
春来欲问林园主，桃李无言鸟自啼。

卷 271_93【灵台镇赠丘岑中丞】

窦庠

晓日天山雪半晴，红旗遥识汉家营。
近来胡骑休南牧，羊马城边春草生。

卷 271_94【赠道芬上人（善画松石）】

窦庠

云湿烟封不可窥，画时唯有鬼神知。
几回逢著天台客，认得岩西最老枝。

卷 271_95【金山寺】

窦庠

一点青螺白浪中，全依水府与天通。
晴江万里云飞尽，鳌背参差日气红。

卷 271_96【冬夜寓怀寄王翰林（一作翰林王补阙）】

窦庠

满地霜芜叶下枝，几回吟断四愁诗。
汉家若欲论封禅，须及相如未病时。

卷 271_97【醉中赠符载】

窦庠

白社会中尝共醉，青云路上未相逢。
时人莫小池中水，浅处无妨有卧龙。

卷 271_98【龙门看花】

窦庠

无叶无枝不见空，连天扑地径才通。
山莺惊起酒醒处，火焰烧人雪喷风。

卷 271_99 【陪留守韩仆射巡内至上阳宫感兴二首】

窦庠

翠辇西归七十春，玉堂珠缀俨埃尘。
武皇弓剑埋何处，泣问上阳宫里人。

愁云漠漠草离离，太乙句陈处处疑。
薄暮毁垣春雨里，残花犹发万年枝。

卷 271_100 【老将行（一作吟）】

窦巩

烽烟犹未尽，年鬓暗相催。轻敌心空在，弯弓手不开。
马依秋草病，柳傍故营摧。唯有酬恩客，时听说剑来。

卷 271_101 【赠萧都官】

窦巩

萧郎自小贤，爱客不言钱。有酒轻寒夜，无愁倚少年。
闲寻织锦字，醉上看花船。好是关身事，从人道性偏。

卷 271_102 【忝职武昌，初至夏口，书事献府主相公】

窦巩

白发放囊鞬，梁王爱旧全。竹篱江畔宅，梅雨病中天。
时奉登楼宴，闲修上水船。邑人兴谤易，莫遣鹤支钱。

卷 271_103 【早秋江行】

窦巩

回望湓城远，西风吹荻花。暮潮江势阔，秋雨雁行斜。
多醉浑无梦，频愁欲到家。渐惊云树转，数点是晨鸦。

卷 271_104 【题任处士幽居】

窦巩

红叶江村夕，孤烟草舍贫。水清鱼识钓，林静犬随人。

采掇山无主，扶持药有神。客来唯劝酒，蝴蝶是前身。

卷 271_105【汉阴驿与宇文十相遇，旋归西川，因以赠别】

窦巩

吴蜀何年别，相逢汉水头。望乡心共醉，握手泪先流。
宿雾千山晓，春霖一夜愁。离情方浩荡，莫说去刀州。

卷 271_106【早春松江野望】

窦巩

江村风雪霁，晓望忽惊春。耕地人来早，营巢鹊语频。
带花移树小，插槿作篱新。何事胜无事，穷通任此身。

卷 271_107【少妇词】

窦巩

坐惜年光变，辽阳信未通。燕迷新画屋，春识旧花丛。
梦绕天山外，愁翻锦字中。昨来谁是伴，鹦鹉在帘栊。

卷 271_108 【岁晚喜远兄弟至书情】

窦巩

几年沧海别，相见竟多违。鬓发缘愁白，音书为懒稀。
新诗徒有赠，故国未同归。人事那堪问，无言是与非。

卷 271_109 【登玉钩亭奉献淮南李相公】

窦巩

西南城上高高处，望月分明似玉钩。朱槛入云看鸟灭，
绿杨如荠绕江流。定知有客嫌陈榻，从此无人上庾楼。
今日卷帘天气好，不劳骑马看扬州。

卷 271_110 【南阳道中作】

窦巩

东风雨洗顺阳川，蜀锦花开绿草田。彩雉斗时频驻马，
酒旗翻处亦留钱。新晴日照山头雪，薄暮人争渡口船。
早晚到家春欲尽，今年寒食月初圆。

卷 271_111 【哭吕衡州八郎中】

窦巩

今朝血泪问苍苍，不分先悲旅馆丧。人送剑来归陇上，
雁飞书去叫衡阳。还家路远儿童小，埋玉泉深昼夜长。
望尽素车秋草外，欲将身赎返魂香。

卷 271_112 【江陵遇元九李六二侍御纪事书情呈十二韵】

窦巩

自见人相爱，如君爱我稀。好闲容问道，攻短每言非。
梦想何曾间，追欢未省违。看花怜后到，避酒许先归。
柳寺春堤远，津桥曙月微。渔翁随去处，禅客共因依。
蓬阁初疑义，霜台晚畏威。学深通古字，心直触危机。
肯滞荆州掾，犹香柏署衣。山连巫峡秀，田傍渚宫肥。
美玉方齐价，迁莺尚怯飞。伫看霄汉上，连步侍彤闱。

卷 271_113 【游仙词】

窦巩

海上神山绿，溪边杏树红。不知何处去，月照玉楼空。

卷 271_114 【赠阿史那都尉】

窦巩

较猎燕山经几春，雕弓白羽不离身。
年来马上浑无力，望见飞鸿指似人。

卷 271_115 【陕府宾堂览房杜二公仁寿年中题纪手迹】

窦巩

仁寿元和二百年，濛笼水墨淡如烟。
当时憔悴题名日，汉祖龙潜未上天。

卷 271_116 【早春送宇文十归吴】

窦巩

春迟不省似今年，二月无花雪满天。
村店闭门何处宿，夜深遥唤渡江船。

卷 271_117 【经窦车骑故城】

窦巩

荒陂古堞欲千年，名振图书剑在泉。
今日诸孙拜坟树，愧无文字续燕然。

卷 271_118【赠王氏小儿】

窦巩

竹林会里偏怜小，淮水清时最觉贤。
莫倚儿童轻岁月，丈人曾共尔同年。

卷 271_119【唐州东途作】

窦巩

绿林兵起结愁云，白羽飞书未解纷。
天子欲开三面网，莫将弓箭射官军。

卷 271_120【新罗进白鹰】

窦巩

御马新骑禁苑秋，白鹰来自海东头。

汉皇无事须游猎，雪乱争飞锦臂鞲。

卷 271_121【秋夕】

窦巩

护霜云映月朦胧，乌鹊争飞井上桐。
夜半酒醒人不觉，满池荷叶动秋风。

卷 271_122【襄阳寒食寄宇文籍】

窦巩

烟水初销见万家，东风吹柳万条斜。
大堤欲上谁相伴，马踏春泥半是花。

卷 271_123【奉使蓟门】

窦巩

自从身属富人侯，蝉噪槐花已四秋。
今日一茎新白发，懒骑官马到幽州。

卷 271_124 【送刘禹锡】

窦巩

十年憔悴武陵溪，鹤病深林玉在泥。
今日太行平似砥，九霄初倚入云梯。

卷 271_125 【送元稹西归】

窦巩

南州风土滞龙媒，黄纸初飞敕字来。
二月曲江连旧宅，阿婆情熟牡丹开。

卷 271_126 【过骊山】

窦巩

翠辇红旗去不回，苍苍宫树锁青苔。
有人说得当时事，曾见长生玉殿开。

卷 271_127 【洛中即事】

窦巩

高梧叶尽鸟巢空，洛水潺湲夕照中。
寂寂天桥车马绝，寒鸦飞入上阳宫。

卷 271_128 【寻道者所隐不遇（一作于鹄诗，题作访隐者不遇）】

窦巩

篱外涓涓涧水流，槿花半点夕阳收。
欲题名字知相访，又恐芭蕉不奈秋。

卷 271_129 【寄南游兄弟】

窦巩

书来未报几时还，知在三湘五岭间。
独立衡门秋水阔，寒鸦飞去日衔山。

卷 271_130 【宫人斜】

窦巩

离宫路远北原斜，生死恩深不到家。
云雨今归何处去，黄鹂飞上野棠花。

卷 271_131 【代邻叟】

窦巩

年来七十罢耕桑，就暖支羸强下床。
满眼儿孙身外事，闲梳白发对残阳。

卷 271_132 【新营别墅寄家兄】

窦巩

懒性如今成野人，行藏由兴不由身。
莫惊此度归来晚，买得西山正值春。

卷 271_133 【南游感兴】

窦巩

伤心欲问前朝事，惟见江流去不回。
日暮东风春草绿，鹧鸪飞上越王台。

卷 271_134 【题剑津】

窦巩

风前推折千年剑，岩下澄空万古潭。
双剑变成龙化去，两溪相并水归南。

卷 271_135 【放鱼（武昌作）】

窦巩

金钱赎得免刀痕，闻道禽鱼亦感恩。
好去长江千万里，不须辛苦上龙门。

卷 271_136 【永宁小园寄接近校书（一作羊士谔诗）】

窦巩

故里心期奈别何，手栽芳树忆庭柯。
东皋黍熟君应醉，梨叶初红白露多。

卷 271_137 【从军别家】

窦巩

自笑儒生著战袍，书斋壁上挂弓刀。
如今便是征人妇，好织回文寄窦滔。

卷 271_138【悼妓东东】

窦巩

芳菲美艳不禁风，未到春残已坠红。
惟有侧轮车上铎，耳边长似叫东东。

第二百七十二卷

卷 272_1【木兰歌】

韦元甫

木兰抱杼嗟，借问复为谁。欲闻所戚戚，感激强其颜。
老父隶兵籍，气力日衰耗。岂足万里行，有子复尚少。
胡沙没马足，朔风裂人肤。老父旧羸病，何以强自扶。
木兰代父去，秣马备戎行。易却纨绮裳，洗却铅粉妆。
驰马赴军幕，慷慨携干将。朝屯雪山下，暮宿青海傍。
夜袭燕支虏，更携于阗羌。将军得胜归，士卒还故乡。
父母见木兰，喜极成悲伤。木兰能承父母颜，
却卸巾鞵理丝簧。昔为烈士雄，今为娇子容。
亲戚持酒贺父母，始知生女与男同。门前旧军都，
十年共崎岖。本结弟兄交，死战誓不渝。今者见木兰，
言声虽是颜貌殊。惊愕不敢前，叹息徒嘻吁。世有臣子心，
能如木兰节。忠孝两不渝，千古之名焉可灭。

卷 272_2【登越王楼见乔公诗偶题】

王铎

云架重楼出郡城，虹梁雅韵仲宣情。越王空置千年迹，
丞相兼扬万古名。过鸟时时冲客会，闲风往往弄江声。
谬将蹇步寻高躅，鱼目骊珠岂继明。

卷 272_3【清如玉壶冰】

潘炎

琰玉性惟坚，成壶体更圆。虚心含景象，应物受寒泉。
温润资天质，清贞禀自然。日融光乍散，雪照色逾鲜。
至鉴功宁宰，无私照岂偏。明将冰镜对，白与粉花连。
拂拭终为美，提携伫见传。勿令毫发累，遗恨鲍公篇。

卷 272_4【长至上公献寿】

张叔良

凤阙晴钟动，鸡人晓漏长。九重初启钥，三事正称觞。
日至龙颜近，天旋圣历昌。休光连雪净，瑞气杂炉香。
化被君臣洽，恩沾士庶康。不因稽旧典，谁得纪朝章。

卷 272_5【泾渭扬清浊】

吕牧

泾渭横秦野，逶迤近帝城。二渠通作润，万户映皆清。
明晦看殊色，潺湲听一声。岸虚深草掩，波动晓烟轻。
御猎思投钓，渔歌好濯缨。合流知禹力，同共到沧瀛。

卷 272_6 【别张贾】

韦夏卿

束简下高阁，买符驱短辕。故人惜分袂，结念醉芳樽。
切切别思缠，萧萧征骑烦。临归无限意，相视却忘言。

卷 272_7 【送顾况归茅山】

韦夏卿

圣代为迁客，虚皇作近臣。法尊称大洞，学浅忝初真。
鸾凤文章丽，烟霞翰墨新。羨君寻句曲，白鹄是三神。

卷 272_8 【和丘员外题湛长史旧居】

韦夏卿

道胜物能齐，累轻身易退。苟安一丘上，何必三山外。
云霞长若绮，松石常如黛。徒有昔王过，竟遗青史载。
诗因野寺咏，酒向山椒酌。异时逢尔知，兹辰驻余旆。

卷 272_9 【同韦夏卿送顾况归茅山】

綦毋诚

谪宦闻尝赋，游仙便作诗。白银双阙恋，青竹一龙骑。
先入茅君洞，旋过葛稚陂。无然列御寇，五日有还期。

卷 272_10 【感秋】

姚伦

试向疏林望，方知节候殊。乱声千叶下，寒影一巢孤。
不蔽秋天雁，惊飞夜月乌。霜风与春日，几度遣荣枯。

卷 272_11 【过章秀才洛阳客舍】

姚伦

达人心自适，旅舍当闲居。不出来时径，重看读了书。
晚山岚色近，斜日树阴疏。尽是忘言客，听君诵子虚。

卷 272_12 【赋得生刍一束】

于结

比玉人应重，为刍物自轻。向风倾弱叶，裊露示纤茎。
蓂莢宜春景，芊绵对雨情。每惭蘋藻用，多谢茝兰荣。
孺子才虽远，公孙策未行。谘询如不弃，终冀及微生。

卷 272_13【赋得生刍一束】

郑孺华

孙弘期射策，长倩赠生刍。至洁心将比，忘忧道不孤。
芝兰方入室，萧艾莫同途。馥馥香犹在，青青色更殊。
芳宁九春歇，薰岂十年无。葑菲如堪采，山苗自可逾。

卷 272_14【空灵岸】

张叔卿

寒尽鸿先去，江回客未归。早知名是幻，不敢绣为衣。
雾积川原暗，山多郡县稀。今朝下湘岸，更逐鹧鸪飞。

卷 272_15【流桂州】

张叔卿

莫问苍梧远，而今世路难。胡尘不到处，即是小长安。

卷 272_16【酬窦大闲居见寄】

房孺复

来自三湘到五溪，青枫无树不猿啼。名惭竹使宦情少，
路隔桃源归思迷。鵬鸟赋成知性命，鲤鱼书至恨睽携。
烦君强著潘年比，骑省风流讵可齐。

卷 272_17【送妓人出家】

杨郾伯

尽出花钿与四邻，云鬟剪落厌残春。暂惊风烛难留世，
便是莲花不染身。贝叶欲翻迷锦字，梵声初学误梁尘。
从今艳色归空后，湘浦应无解珮人。

卷 272_18【宿北乐馆】

陈润

欲眠不眠夜深浅，越鸟一声空山远。庭木萧萧落叶时，
溪声雨声听不辨。溪流潺潺雨习习，灯影山光满窗入。

栋里不知浑是云，晓来但觉衣裳湿。

卷 272_19【东都所居寒食下作】

陈润

江南寒食早，二月杜鹃鸣。日暖山初绿，春寒雨欲晴。
浴蚕当社日，改火待清明。更喜瓜田好，令人忆邵平。

卷 272_20【登西灵塔】

陈润

塔庙出招提，登临碧海西。不知人意远，渐觉鸟飞低。
稍与云霞近，如将日月齐。迁乔未得意，徒欲蹑云梯。

卷 272_21【送骆征君】

陈润

野人膺辟命，溪上掩柴扉。黄卷犹将去，青山岂更归。
马留苔藓迹，人脱薜萝衣。他日相思处，天边望少微。

卷 272_22 【赋得浦外虹送人】

陈润

日影化为虹，弯弯出浦东。一条微雨后，五色片云中。
轮势随天度，桥形跨海通。还将饮水处，持送使车雄。

卷 272_23 【赋得秋河曙耿耿】

陈润

晚望秋高夜，微明欲曙河。桥成鹊已去，机罢女应过。
月上殊开练，云行类动波。寻源不可到，耿耿复如何。

卷 272_24 【赋得池塘生春草（一作陈陶诗）】

陈润

谢公遗咏处，池水夹通津。古往人何在，年来草自春。
色宜波际绿，香爱雨中新。今日青青意，空悲行路人。

卷 272_25 【阙题】

陈润

丈夫不感恩，感恩宁有泪。心头感恩血，一滴染天地。

卷 272_26【哭长孙侍郎（一作杜甫诗）】

杜诵

道为诗书重，名因赋颂雄。礼闈曾擢桂，宪府既乘骢。
流水生涯尽，浮云世事空。唯馀旧台柏，萧瑟九原中。

卷 272_27【明皇帝挽歌】

郑丹

律历千年会，车书万里同。固期常戴日，岂意厌观风。
地惨新疆理，城摧旧战功。山河万古壮，今夕尽归空。

卷 272_28【肃宗挽歌】

郑丹

国以重明受，天从谅闇移。诸侯方北面，白日忽西驰。
龙影当泉落，鸿名向庙垂。永言青史上，还见戴无为。

卷 272_29 【落花】

郑昉

早春见花枝，朝朝恨发迟。直看花落尽，却意未开时。
以此方人世，弥令感盛衰。始知山简绕，频向习家池。

卷 272_30 【宿新安江深渡馆寄郑州王使君】

朱长文

霜飞十月中，摇落众山空。孤馆闭寒木，大江生夜风。
赋诗忙有意，沈约在关东。

卷 272_31 【春眺扬州西上岗寄徐员外】

朱长文

芜城西眺极苍流，漠漠春烟间曙楼。瓜步早潮吞建业，
蒜山晴雪照扬州。隋家故事不能问，鹤在仙池期我游。

卷 272_32 【送李司直归浙东幕兼寄鲍将军（一作朱湾诗）】

朱长文

翩翩书记早曾闻，二十年来愿见君。今日相逢悲白发，
同时几许在青云。人从北固山边去，水到西陵渡口分。
会作王门曳裾客，为余前谢鲍将军。

卷 272_33【望中有怀】

朱长文

龙向洞中衔雨出，鸟从花里带香飞。
白云断处见明月，黄叶落时闻捣衣。

卷 272_34【题虎丘山西寺】

朱长文

王氏家山昔在兹，陆机为赋陆云诗。
青莲香匝东西宇，日月与僧无尽时。

卷 272_35【吴兴送梁补阙归朝赋得荻花】

朱长文

柳家汀洲孟冬月，云寒水清荻花发。
一枝持赠朝天人，愿比蓬莱殿前雪。

卷 272_36【句】

朱长文

夜静忽疑身是梦，更闻寒雨滴芭蕉。
(《宿僧房》，见《诗式》)。

第二百七十三卷

卷 273_1 【独不见】

戴叔伦

前宫路非远，旧苑春将遍。玉户看早梅，雕梁数飞燕。
身轻逐舞袖，香暖传歌扇。自和秋风词，长侍昭阳殿。
谁信后庭人，年年独不见。

卷 273_2 【去妇怨】

戴叔伦

出户不敢啼，风悲日凄凄。心知恩义绝，谁忍分明别。
下坂车辘辘，畏逢乡里亲。空持床前幔，却寄家中人。
忽辞王吉去，为是秋胡死。若比今日情，烦冤不相似。

卷 273_3 【古意】

戴叔伦

悠悠南山云，濯濯东流水。念我平生欢，托居在东里。
失既不足忧，得亦不为喜。安贫固其然，处贱宁独耻。
云闲虚我心，水清澹吾味。云水俱无心，斯可长伉俪。

卷 273_4【南野】

戴叔伦

治田长山下，引流坦溪曲。东山有遗茔，南野起新筑。
家世素业儒，子孙鄙食禄。披云朝出耕，带月夜归读。
身勤竟亡疲，团团欣在目。野芳绿可采，泉美清可掬。
茂树延晚凉，早田候秋熟。茶烹松火红，酒吸荷杯绿。
解佩临清池，抚琴看修竹。此怀谁与同，此乐君所独。

卷 273_5【曾游】

戴叔伦

泊舟古城下，高阁快登眺。大江会彭蠡，群峰豁玄峤。
清影涵空明，黛色凝远照。碑留太史书，词刻长公调。
绝粒感楚囚，丹衷犹照耀。怀哉不可招，凭阑一悲啸。

卷 273_6【江行】

戴叔伦

漾舟晴川里，挂席候风生。临泛何容与，爱此江水清。
芦洲隐遥嶂，露日映孤城。自顾疏野性，屡忘鸥鸟情。
聊复于时顾，暂欲解尘缨。驱驰非吾愿，虚怀浩已盈。

卷 273_7【孤鸿篇】

戴叔伦

江上双飞鸿，饮啄行相随。翔风一何厉，中道伤其雌。
顾影明月下，哀鸣声正悲。已无矰缴患，岂乏稻粱资。
啾啾慕俦匹，远集清江湄。中有孤文鹇，翩翩好容仪。
共欣相知遇，毕志同栖迟。野田鸱鸢鸟，相妒复相疑。
鸿志不汝较，奋翼起高飞。焉随腐鼠欲，负此云霄期。

卷 273_8【感怀二首】

戴叔伦

尺帛无长裁，浅水无长流。水浅易成枯，帛短谁人收。
人生取舍间，趋竞固非优。旧交迹虽疏，中心自云稠。
新交意虽密，中道生怨尤。踟蹰复踟蹰，世路今悠悠。

主人饮君酒，劝君弗相违。但当尽弘量，觴至无复辞。

人生百年中，会合能几时。不见枝上花，昨满今渐稀。
花落还再开，人老无少期。古来贤达士，饮酒不复疑。

卷 273_9【喜雨】

戴叔伦

闲居倦时燠，开轩俯平林。雷声殷遥空，云气布层阴。
川上风雨来，洒然涤烦襟。田家共欢笑，沟洫亦已深。
团团聚邻曲，斗酒相与斟。樵歌野田中，渔钓沧江浔。
苍天暨有念，悠悠终我心。

卷 273_10【叹葵花】

戴叔伦

今日见花落，明日见花开。花开能向日，花落委苍苔。
自不同凡卉，看时几日回。

卷 273_11【从军行】

戴叔伦

丈夫四方志，结发事远游。远游历燕蓟，独戍边城陬。

西风垄水寒，明月关山悠。酬恩仗孤剑，十年弊貂裘。
封侯属何人，蹉跎雪盈头。老马思故枥，穷鳞忆深流。
弹铗动深慨，浩歌气横秋。报国期努力，功名良见收。

卷 273_12【九日与敬处士左学士同赋采菊上东山便为首句】

戴叔伦

采菊上东山，山高路非远。江湖乍辽夐，城郭亦在眼。
昼日市井喧，闰年禾稼晚。开尊会佳客，长啸临绝巘。
戏鹤唳且闲，断云轻不卷。乡心各万里，醉话时一展。
乔木列遥天，残阳贯平坂。徒忧征车重，自笑谋虑浅。
却顾郡斋中，寄傲与君同。

卷 273_13【奉天酬别郑谏议云逵、卢拾遗景亮见别之作】

戴叔伦

巨孽盗都城，传闻天下惊。陪臣九江畔，走马来赴难。
伏奏见龙颜，旋持手诏还。单车不可驻，朱槛未遑攀。
故人出相饯，共悲行路难。临岐荷赠言，对酒独伤魂。
世故山川险，忧多思虑昏。重阴蔽芳月，叠岭明旧雪。
泥积辙更深，木冰花不发。郑君间世贤，忠孝乃双全。
大义弃妻子，至淳易生死。知心三四人，越境千馀里。
骏马帐前发，惊尘路傍起。楼头俯首看，莫敢相留止。

拜阙奏良图，留中沃圣谟。洗兵救卫郡，诱敌讨幽都。
名亚典属国，良选谏大夫。从容九霄上，谈笑授阴符。
卢生富才术，特立居近密。采掇献吾君，朝廷视听新。
宽饶狂自比，汲黯直为邻。就列继三事，主文当七人。
可怜长守道，不觉五逢春。昔去城南陌，各为天际客。
关河烟雾深，寸步音尘隔。羁旅忽相遇，别离又兹夕。
前悲涕未干，后喜心已戚。而我方老大，颇为风眩迫。
夫君并少年，何尔鬓须白。惆怅语不尽，裴回情转剧。
一尊自共持，以慰长相忆。

卷 273_14【梧桐】

戴叔伦

亭亭南轩外，贞干修且直。广叶结青阴，繁花连素色。
天资韶雅性，不愧知音识。

卷 273_15【孤石】

戴叔伦

迥若千仞峰，孤危不盈尺。早晚他山来，犹带烟雨迹。
贞坚自有分，不乱和氏璧。

卷 273_16【花】

戴叔伦

花发炎景中，芳春独能久。因风任开落，向日无先后。
若待秋霜来，兰荪共何有。

卷 273_17【竹】

戴叔伦

卷箴正离披，新枝复蒙密。脩脩月下闻，裊裊林际出。
岂独对芳菲，终年色如一。

卷 273_18【怀素上人草书歌】

戴叔伦

楚僧怀素工草书，古法尽能新有馀。神清骨竦意真率，
醉来为我挥健笔。始从破体变风姿，一一花开春景迟。
忽为壮丽就枯涩，龙蛇腾盘兽屹立。驰毫骤墨剧奔駉，
满坐失声看不及。心手相师势转奇，诡形怪状翻合宜。
人人细问此中妙，怀素自言初不知。

卷 273_19【女耕田行】

戴叔伦

乳燕入巢笋成竹，谁家二女种新谷。无人无牛不及犁，
持刀斫地翻作泥。自言家贫母年老，长兄从军未娶嫂。
去年灾疫牛囤空，截绢买刀都市中。头巾掩面畏人识，
以刀代牛谁与同。姊妹相携心正苦，不见路人唯见土。
疏通畦陇防乱苗，整顿沟塍待时雨。日正南冈下饷归，
可怜朝雉扰惊飞。东邻西舍花发尽，共惜馀芳泪满衣。

卷 273_20【柳花歌送客往桂阳】

戴叔伦

沧浪渡头柳花发，断续因风飞不绝。摇烟拂水积翠间，
缀雪含霜谁忍攀。夹岸纷纷送君去，鸣棹孤寻到何处。
移家深入桂水源，种柳新成花更繁。定知别后消散尽，
却忆今朝伤旅魂。

卷 273_21【边城曲】

戴叔伦

人生莫作远行客，远行莫戍黄沙碛。黄沙碛下八月时，
霜风裂肤百草衰。尘沙晴天迷道路，河水悠悠向东去。
胡笳听彻双泪流，羁魂惨惨生边愁。原头猎火夜相向，
马蹄蹴蹋层冰上。不似京华侠少年，清歌妙舞落花前。

卷 273_22 【屯田词】

戴叔伦

春来耕田遍沙碛，老稚欣欣种禾麦。麦苗渐长天苦晴，
土干确确锄不得。新禾未熟飞蝗至，青苗食尽馀枯茎。
捕蝗归来守空屋，囊无寸帛瓶无粟。十月移屯来向城，
官教去伐南山木。驱牛驾车入山去，霜重草枯牛冻死。
艰辛历尽谁得知，望断天南泪如雨。

卷 273_23 【巫山高】

戴叔伦

巫山峨峨高插天，危峰十二凌紫烟。瞿塘嘈嘈急如弦，
洄流势逆将覆船。云梯岂可进，百丈那能牵？
陆行巉岩水不前。洒泪向流水，泪归东海边。含愁对明月，
明月空自圆。故乡回首思绵绵，侧身天地心茫然。

卷 273_24 【早春曲】

戴叔伦

青楼昨夜东风转，锦帐凝寒觉春浅。垂杨摇丝莺乱啼，
袅袅烟光不堪翦。博山吹云龙脑香，铜壶滴愁更漏长。
玉颊啼红梦初醒，羞见青鸾镜中影。侬家少年爱游逸，
万里轮蹄去无迹。朱颜未衰消息稀，肠断天涯草空碧。

卷 273_25 【白苎词】

戴叔伦

馆娃宫中露华冷，月落啼鸦散金井。吴王扶头酒初醒，
秉烛张筵乐清景。美人不眠怜夜永，起舞亭亭乱花影。
新裁白苎胜红绡，玉佩珠缨金步摇。回鸾转凤意自娇，
银筝锦瑟声相调。君恩如水流不断，但愿年年此同宵。
东风吹花落庭树，春色催人等闲去。大家为欢莫延伫，
顷刻铜龙报天曙。

卷 273_26 【行路难】

戴叔伦

出门行路难，富贵安可期。淮阴不免恶少辱，
阮生亦作穷途悲。颠倒英雄古来有，封侯却属屠沽儿。
长安车马随轻肥，青云宾从纷交驰。白眼向人多意气，
宰牛烹羊如折葵。宴乐宁知白日短，时时醉拥双蛾眉。
扬雄闭门空读书，门前碧草春离离。不如拂衣且归去，
世上浮名徒尔为。

卷 273_27 【相思曲】

戴叔伦

高楼重重闭明月，肠断仙郎隔年别。紫箫横笛寂无声，
独向瑶窗坐愁绝。鱼沈雁杳天涯路，始信人间别离苦。
恨满牙床翡翠衾，怨折金钗凤凰股。井深辘轳嗟绠短，
衣带相思日应缓。将刀斫水水复连，挥刃割情情不断。
落红乱逐东流水，一点芳心为君死。妾身愿作巫山云，
飞入仙郎梦魂里。

卷 273_28 【送别钱起】

戴叔伦

阳关多古调，无奈醉中闻。归梦吴山远，离情楚水分。
孤舟经暮雨，征路入秋云。后夜同明月，山窗定忆君。

卷 273_29 【送张南史】

戴叔伦

陋巷无车辙，烟萝总是春。贾生独未达，原宪竟忘贫。
草座留山月，荷衣远洛尘。最怜知己在，林下访闲人。

卷 273_30 【春日早朝应制】

戴叔伦

仙仗肃朝官，承平圣主欢。月沈宫漏静，雨湿禁花寒。
丹荔来金阙，朱樱贡玉盘。六龙扶御日，只许近臣看。

卷 273_31 【早行寄朱山人放】

戴叔伦

山晓旅人去，天高秋气悲。明河川上没，芳草露中衰。
此别又千里，少年能几时。心知剡溪路，聊且寄前期。

卷 273_32 【除夜宿石头驿（一作石桥馆）】

戴叔伦

旅馆谁相问，寒灯独可亲。一年将尽夜，万里未归人。
寥落悲前事，支离笑此身。愁颜与衰鬓，明日又逢春。

卷 273_33【吴明府自远而来留宿（一作卢新吴航忽远至留宿弊居）】

戴叔伦

出门逢故友，衣服满尘埃。岁月不可问，山川何处来。
绮城容弊宅，散职寄灵台。自此留君醉，相欢得几回。

卷 273_34【客夜与故人偶集（一作江乡故人偶集客舍）】

戴叔伦

天秋月又满，城阙夜千重。还作江南会，翻疑梦里逢。
风枝惊暗鹊，露草覆寒蛩。羁旅长堪醉，相留畏晓钟。

卷 273_35【送友人东归（一作方干诗，题云送卢评事东归）】

戴叔伦

万里杨柳色，出关送故人。轻烟拂流水，落日照行尘。
积梦江湖阔，忆家兄弟贫。裴回灞亭上，不语自伤春。

卷 273_36 【江上别张欢（一作劝）】

戴叔伦

年年五湖上，厌见五湖春。长醉非关酒，多愁不为贫。
山川迷道路，伊洛困风尘。今日扁舟别，俱为沧海人。

卷 273_37 【广陵送赵主簿自蜀归绛州宁觐】

戴叔伦

将归汾水上，远省锦城来。已泛西江尽，仍随北雁回。
暮云征马速，晓月故关开。渐向庭闱近，留君醉一杯。

卷 273_38 【别友人（一作汝南逢董校书，又作别董校书）】

戴叔伦

扰扰倦行役，相逢陈蔡间。如何百年内，不见一人闲。
对酒惜馀景，问程愁乱山。秋风万里道，又出穆陵关。

卷 273_39【宿城南盛本道怀皇甫冉】

戴叔伦

暑夜宿南城，怀人梦不成。高楼邀落月，叠鼓送残更。
隔浦云林近，满川风露清。东碕不可见，矫首若为情。

卷 273_40【晖上人独坐亭】

戴叔伦

萧条心境外，兀坐独参禅。萝月明盘石，松风落涧泉。
性空长入定，心悟自通玄。去住浑无迹，青山谢世缘。

卷 273_41【送崔融】

戴叔伦

王者应无敌，天兵动远征。建牙连朔漠，飞骑入胡城。
夜月边尘影，秋风陇水声。陈琳能草檄，含笑出长平。

卷 273_42【游少林寺】

戴叔伦

步入招提路，因之访道林。石龛苔藓积，香径白云深。
双树含秋色，孤峰起夕阴。屣廊行欲遍，回首一长吟。

卷 273_43【崇德道中】

戴叔伦

暖日菜心稠，晴烟麦穗抽。客心双去翼，归梦一扁舟。
废塔巢双鹤，长波漾白鸥。关山明月到，怆恻十年游。

卷 273_44【雨】

戴叔伦

历历愁心乱，迢迢独夜长。春帆江上雨，晓镜鬓边霜。
啼鸟云山静，落花溪水香。家人亦念我，与汝黯相忘。

卷 273_45【过贾谊宅】

戴叔伦

一谪长沙地，三年叹逐臣。上书忧汉室，作赋吊灵均。

旧宅秋荒草，西风客荐蘋。凄凉回首处，不见洛阳人。

卷 273_46【冬日有怀李贺长吉】

戴叔伦

岁晚斋居寂，情人动我思。每因一尊酒，重和百篇诗。
月冷猿啼惨，天高雁去迟。夜郎流落久，何日是归期。

卷 273_47【送郎士元】

戴叔伦

白发金陵客，怀归不暂留。交情分两地，行色载孤舟。
黄叶蝉吟晚，沧江雁送秋。何年重会此，诗酒复追游。

卷 273_48【春江独钓】

戴叔伦

独钓春江上，春江引趣长。断烟栖草碧，流水带花香。
心事同沙鸟，浮生寄野航。荷衣尘不染，何用濯沧浪。

卷 273_49 【山居即事】

戴叔伦

岩云掩竹扉，去鸟带馀晖。地僻生涯薄，山深俗事稀。
养花分宿雨，剪叶补秋衣。野渡逢渔子，同舟荡月归。

卷 273_50 【赋得长亭柳】

戴叔伦

濯濯长亭柳，阴连灞水流。雨搓金缕细，烟裹翠丝柔。
送客添新恨，听莺忆旧游。赠行多折取，那得到深秋。

卷 273_51 【客中言怀】

戴叔伦

白发照乌纱，逢人只自嗟。官闲如致仕，客久似无家。
夜雨孤灯梦，春风几度花。故园归有日，诗酒老生涯。

卷 273_52 【山行】

戴叔伦

山行分曙色，一路见人稀。野鸟啼还歇，林花堕不飞。
云迷栖鹤寺，水涩钓鱼矶。回首天将暝，逢僧话未归。

卷 273_53【春日访山人】

戴叔伦

远访山中客，分泉谩煮茶。相携林下坐，共惜鬓边华。
归路逢残雨，沿溪见落花。候门童子问，游乐到谁家。

卷 273_54【卧病】

戴叔伦

门掩青山卧，莓苔积雨深。病多知药性，客久见人心。
众鸟趋林健，孤蝉抱叶吟。沧洲诗社散，无梦盍朋簪。

卷 273_55【赠月溪羽士】

戴叔伦

月明溪水上，谁识步虚声。夜静金波冷，风微玉练平。

自知尘梦远，一洗道心清。更弄瑶笙罢，秋空鹤又鸣。

卷 273_56【赠行脚僧】

戴叔伦

补衲随缘住，难违尘外踪。木杯能渡水，铁钵肯降龙。
到处栖云榻，何年卧雪峰。知师归日近，应偃旧房松。

卷 273_57【重游长真寺】

戴叔伦

同到长真寺，青山四面同。鸟啼花竹暗，人散户庭空。
蒲润千年雨，松门午夜风。旧游悲往日，回首各西东。

卷 273_58【晚望】

戴叔伦

山气碧氤氲，深林带夕曛。人归孤嶂晚，犬吠隔溪云。
杉竹何年种，烟尘此地分。桃源宁异此，犹恐世间闻。

卷 273_59【寄赠翠岩奉上人】

戴叔伦

兰若倚西冈，年深松桂长。似闻葛洪井，还近赞公房。
挂衲云林净，翻经石榻凉。下方一回首，烟露日苍苍。

卷 273_60【过龙湾五王阁访友人不遇】

戴叔伦

野桥秋水落，江阁暝烟微。白日又欲午，高人犹未归。
青林依古塔，虚馆静柴扉。坐久思题字，翻怜柿叶稀。

卷 273_61【与友人过山寺】

戴叔伦

共有春山兴，幽寻此日同。谈诗访灵彻，入社愧陶公。
竹暗闲房雨，茶香别院风。谁知尘境外，路与白云通。

卷 273_62【赋得古井送王明府】

戴叔伦

古井庇幽亭，涓涓一窦明。仙源通海水，灵液孕山精。
久旱宁同涸，长年只自清。欲彰贞白操，酌献使君行。

卷 273_63【送耿十三漳复往辽海】

戴叔伦

仗剑万里去，孤城辽海东。旌旗愁落日，鼓角壮悲风。
野迥边尘息，烽消戍垒空。辕门正休暇，投策拜元戎。

卷 273_64【寄禅师寺华上人次韵三首】

戴叔伦

百年浑是客，白发总盈颠。佛国三秋别，云台五色连。
朝盘香积饭，夜瓮落花泉。遥忆谈玄地，月高人未眠。

禅心如落叶，不逐晓风颠。猊坐翻萧瑟，皋比喜接连。
芙蓉开紫雾，湘玉映清泉。白昼谈经罢，闲从石上眠。

德士名难避，风流学济颠。礼罗加璧至，荐鹗与云连。
尘世休飞锡，松林且枕泉。近闻离讲席，听雨半山眠。

卷 273_65 【独坐】

戴叔伦

白发怀闽峤，丹心恋蓟门。官闲胜道院，宅远类荒村。
二月霜花薄，群山雨气昏。东菑春事及，好向野人论。

卷 273_66 【李大夫见赠因之有呈】

戴叔伦

何言访衰疾，旌旆重淹留。谢礼诚难答，裁诗岂易酬。
江清寒照动，山迥野云秋。一醉龙沙上，终欢胜旧游。

卷 273_67 【长沙送梁副端归京】

戴叔伦

奏书归阙下，祖帐出湘东。满座他乡别，何年此会同。
藉芳怜岸草，闻笛怨江风。且莫乘流去，心期在醉中。

卷 273_68 【和尉迟侍郎夏杪闻蝉】

戴叔伦

楚人方苦热，柱史独闻蝉。晴日暮江上，惊风一叶前。
荡摇清管杂，幽咽野风传。旅舍闻君听，无由更昼眠。

卷 273_69【和李相公勉晦日蓬池游宴（同字）】

戴叔伦

高会吹台中，新年月桂空。貂蝉临野水，旌旆引春风。
细草萦斜岸，纤条出故丛。微文复看猎，宁与解神同。

卷 273_70【彭婆馆逢韦判官使还】

戴叔伦

受辞分路远，会府见君稀。雨雪经年去，轩车此日归。
暮春愁见别，久客顺相依。寂寞伊川上，杨花空自飞。

卷 273_71【酬别刘九郎评事传经同泉字】

戴叔伦

举袂掩离弦，枉君愁思篇。忽惊池上鹭，下咽陇头泉。

对牖墙阴满，临扉日影圆。赖闻黄太守，章句此中传。

卷 273_72【汉南遇方评事（一作襄州遇房评事由）】

戴叔伦

移家住汉阴，不复问华簪。貰酒宜城近，烧田梦泽深。
暮山逢鸟入，寒水见鱼沈。与物皆无累，终年惬本心。

卷 273_73【湘中怀古】

戴叔伦

昔人从逝水，有客吊秋风。何意千年隔，论心一日同。
楚亭方作乱，汉律正酬功。倏忽桑田变，谗言亦已空。

卷 273_74【京口怀古】

戴叔伦

大江横万里，古渡渺千秋。浩浩波声险，苍苍天色愁。
三方归汉鼎，一水限吴州。霸国今何在，清泉长自流。

卷 273_75【逢友生言怀】

戴叔伦

安亲非避地，羁旅十馀年。道长时流许，家贫故旧怜。
相逢今岁暮，远别一方偏。去住俱难说，江湖正渺然。

卷 273_76【长门怨】

戴叔伦

自忆专房宠，曾居第一流。移恩向他处，暂妒不容收。
夜静管弦绝，月明宫殿秋。空将旧时意，长望凤凰楼。

卷 273_77【郊园即事寄萧侍郎（一作呈萧常州复）】

戴叔伦

衰鬓辞馀秩，秋风入故园。结茅成暖室，汲井及清源。
邻里桑麻接，儿童笑语喧。终朝非役役，聊寄远人言。

卷 273_78【赠韦评事儋】

戴叔伦

与道共浮沈，人间岁月深。是非园吏梦，忧喜塞翁心。
细草谁开径，芳条自结阴。由来居物外，无事可抽簪。

卷 273_79【送少微上人入蜀】

戴叔伦

十方俱是梦，一念偶寻山。望刹经巴寺，持瓶向蜀关。
乱猿心本定，流水性长闲。世俗多离别，王城几日还。

卷 273_80【送道虔上人游方（一作方干诗）】

戴叔伦

律仪通外学，诗思入禅关。烟景随缘到，风姿与道闲。
贯花留静室，咒水度空山。谁识浮云意，悠悠天地间。

卷 273_81【送嵩律师头陀寺】

戴叔伦

相传五部学，更有一人成。此日灵山去，何方半座迎。

麻衣逢雪暖，草履蹑云轻。若见中林石，应知第四生。

卷 273_82【舟中见雨】

戴叔伦

今夜初听雨，江南杜若青。功名何卤莽，兄弟总凋零。
梦远愁蝴蝶，情深愧鶺鴒。抚孤终日意，身世尚流萍。

卷 273_83【送僧南归】

戴叔伦

兵尘犹瀕洞，僧舍亦征求。师向江南去，予方穀下留。
风霜两足白，宇宙一身浮。归及梅花发，题诗寄陇头。

卷 273_84【江干】

戴叔伦

江干望不极，楼阁影缤纷。水气多为雨，人烟远是云。
予生何濩落，客路转辛勤。杨柳牵愁思，和春上翠裙。

卷 273_85 【过友人隐居】

戴叔伦

潇洒绝尘喧，清溪流绕门。水声鸣石濑，萝影到林轩。
地静留眠鹿，庭虚下饮猿。春花正夹岸，何必问桃源。

卷 273_86 【宿天竺寺晓发罗源】

戴叔伦

黄昏投古寺，深院一灯明。水砌长杉列，风廊败叶鸣。
山云留别偈，王事速归程。迢递罗源路，轻舆候晓行。

卷 273_87 【留宿罗源西峰寺示辉上人】

戴叔伦

一宿西峰寺，尘烦暂觉清。远林生夕籁，高阁起钟声。
山寂僧初定，廊深火自明。虽云殊出处，聊与说无生。

卷 273_88 【题横山寺】

戴叔伦

偶入横山寺，湖山景最幽。露涵松翠湿，风涌浪花浮。
老衲供茶碗，斜阳送客舟。自缘归思促，不得更迟留。

卷 273_89【泛舟】

戴叔伦

风软扁舟稳，行依绿水堤。孤尊秋露滑，短棹晚烟迷。
夜静月初上，江空天更低。飘飘信流去，误过子猷溪。

卷 273_90【宿灵岩寺】

戴叔伦

马疲盘道峻，投宿入招提。雨急山溪涨，云迷岭树低。
凉风来殿角，赤日下天西。偃腹虚檐外，林空鸟恣啼。

卷 273_91【江上别刘驾】

戴叔伦

天涯芳草遍，江路又逢春。海月留人醉，山花笑客贫。

离杯倾祖帐，征骑逐行尘。回首风流地，登临少一人。

卷 273_92【南轩】

戴叔伦

野居何处是，轩外一横塘。座纳薰风细，帘垂白日长。
面山如对画，临水坐流觴。更爱闲花木，欣欣得向阳。

卷 273_93【泊雁】

戴叔伦

泊雁鸣深渚，收霞落晚川。柝随风敛阵，楼映月低弦。
漠漠汀帆转，幽幽岸火然。壑危通细路，沟曲绕平田。

卷 273_94【巡诸州渐次空灵戍】

戴叔伦

寒尽鸿先至，春回客未归。蚤知名是病，不敢绣为衣。
雾积川原暗，山多郡县稀。明朝下湘岸，更逐鹧鸪飞。

卷 273_95【潭州使院书情寄江夏贺兰副端】

戴叔伦

云雨一萧散，悠悠关复河。俱从泛舟役，近隔洞庭波。
楚水去不尽，秋风今又过。无因得相见，却恨寄书多。

卷 273_96【过柳州】

戴叔伦

地尽江南戍，山分桂北林。火云三月合，石路九疑深。
暗谷随风过，危桥共鸟寻。羁魂愁似绝，不复待猿吟。

卷 273_97【经巴东岭】

戴叔伦

巴山不可上，徒驭亦裴回。旧栈歌难度，朝云湿未开。
瀑泉飞雪雨，惊兽走风雷。此去无停候，征人几日回。

卷 273_98【过申州】

戴叔伦

万人曾战死，几处见休兵。井邑初安堵，儿童未长成。
凉风吹古木，野火入残营。牢落千馀里，山空水复清。

卷 273_99【次下牢韵】

戴叔伦

独立荒亭上，萧萧对晚风。天高吴塞阔，日落楚山空。
猿叫三声断，江流一水通。前程千万里，一夕宿巴东。

卷 273_100【潘处士宅会别】

戴叔伦

相邀寒影晚，惜别故山空。邻里疏林在，池塘野水通。
十年难遇后，一醉几人同。复此悲行子，萧萧逐转蓬。

卷 273_101【暮春沐发晦日书怀寄韦功曹沅李录事从训王少府纯】

戴叔伦

朝沐敞南闱，盘跚待日晞。持梳发更落，览镜意多违。
吾友见尝少，春风去不归。登高取一醉，犹可及芳菲。

卷 273_102 【长安早春赠万评事】

戴叔伦

春风归戚里，晓日上花枝。清管新莺发，重门细柳垂。
经过千骑客，调笑五陵儿。何事灵台客，狂歌自不知。

卷 273_103 【留别宋处士】

戴叔伦

留欢方继烛，此会岂他人。乡里游从旧，儿童内外亲。
夜深愁不醉，老去别何频。莫折园中柳，相看惜暮春。

卷 273_104 【留别道州李使君圻】

戴叔伦

泂路下丹徼，邮童挥画桡。山回千骑隐，云断两乡遥。
渔沪拥寒溜，畚田落远烧。维舟更相忆，惆怅坐空宵。

卷 273_105 【将游东都留别包谏议】

戴叔伦

衰客惭墨绶，素舸逐秋风。云雨恩难报，江湖意已终。
县当仙洞口，路出故园东。唯有新离恨，长留梦寐中。

卷 273_106 【灞岸别友】

戴叔伦

车马去迟迟，离言未尽时。看花一醉别，会面几年期。
樵路高山馆，渔洲楚帝祠。南登回首处，犹得望京师。

卷 273_107 【临川从事还别崔法曹】

戴叔伦

谬官辞获免，滥狱会平反。远与故人别，龙钟望所言。
阴天寒不雨，古木夜多猿。老病北归去，馀年学灌园。

卷 273_108 【海上别薛舟】

戴叔伦

行旅悲摇落，风波厌别离。客程秋草远，心事故人知。
暮鸟翻江岸，征徒起路岐。自应无定所，还似欲相随。

卷 273_109 【婺州路别录事】

戴叔伦

府中相见少，江上独行遥。会日起离恨，新年别旧僚。
春云犹伴雪，寒渚未通潮。回首群山暝，思君转寂寥。

卷 273_110 【建中癸亥岁奉天除夜宿武当山北茅平村】

戴叔伦

岁除日又暮，山险路仍新。驱传迷深谷，瞻星记北辰。
古亭聊假寐，中夜忽逢人。相问皆呜咽，伤心不待春。

卷 273_111 【京口送皇甫司马副端曾舒州辞满归去东都】

戴叔伦

潮水忽复过，云帆俨欲飞。故园双阙下，左宦十年归。

晚景照华发，凉风吹绣衣。淹留更一醉，老去莫相违。

卷 273_112【送李审之桂州谒中丞叔】

戴叔伦

知音不可遇，才子向天涯。远水下山急，孤舟上路赊。
乱云收暮雨，杂树落疏花。到日应文会，风流胜阮家。

卷 273_113【送王翁信及第归江东旧隐（作方干诗，送友及第归浙东）】

戴叔伦

南行无俗侣，秋雁与寒云。野趣自多惬，名香日总闻。
吴山中路断，浙水半江分。此地登临惯，含情一送君。

卷 273_114【送李明府之任】

戴叔伦

身为百里长，家宠五诸侯。含笑听猿狖，摇鞭望斗牛。
梅花堪比雪，芳草不知秋。别后南风起，相思梦岭头。

卷 273_115【送郭太祝中孚归江东】

戴叔伦

乡人去欲尽，北雁又南飞。京洛风尘久，江湖音信稀。
旧山知独往，一醉莫相违。未得辞羁旅，无劳问是非。

卷 273_116【新秋夜寄江右友人】

戴叔伦

遥夜独不寐，寂寥蓬户中。河明五陵上，月满九门东。
旧知亲友散，故园江海空。怀归正南望，此夕起秋风。

卷 273_117【清明日送邓芮二子还乡（一作方干诗）】

戴叔伦

钟鼓喧离日，车徒促夜装。晓厨新变火，轻柳暗翻霜。
传镜看华发，持杯话故乡。每嫌儿女泪，今日自沾裳。

卷 273_118【送谢夷甫宰馀姚县（馀姚，一作鄞县）】

戴叔伦

君去方为宰，干戈尚未销。邑中残老小，乱后少官僚。
廨宇经兵火，公田没海潮。到时应变俗，新政满馀姚。

卷 273_119【送柳道时余北还（一作送观察李判官巡郴州）】

戴叔伦

征役各异路，烟波同旅愁。轻桡上桂水，大艑下扬州。
何处成后会，今朝分旧游。离心比杨柳，萧飒不胜秋。

卷 273_120【送万户曹之任扬州便归旧隐】

戴叔伦

拟归云壑去，聊寄宦名中。俸禄资生事，文章实国风。
听潮回楚浪，看月照隋宫。傥有登楼望，还应伴庾公。

卷 273_121【送李长史纵之任常州】

戴叔伦

不与名利隔，且为江汉游。吴山本佳丽，谢客旧淹留。

狭道通陵口，贫家住蒋州。思归复怨别，寥落讵关秋。

卷 273_122【南宾送蔡侍御游蜀】

戴叔伦

巴江秋欲尽，远别更凄然。月照高唐峡，人随贾客船。
积云藏嶮路，流水促行年。不料相逢日，空悲尊酒前。

卷 273_123【送崔拾遗峒江淮访图书】

戴叔伦

九门思谏议，万里采风谣。关外逢秋月，天涯过晚潮。
雁来云杳杳，木落浦萧萧。空怨他乡别，回舟暮寂寥。

卷 273_124【九日送洛阳李丞之任】

戴叔伦

为文通绝境，从宦及良辰。洛下知名早，腰边结绶新。
且倾浮菊酒，聊拂染衣尘。独恨沧波侣，秋来别故人。

卷 273_125 【奉陪李大夫九日宴龙沙】

戴叔伦

邦君采菊地，近接旅人居。一命招衰疾，清光照里闾。
去官惭比谢，下榻贵同徐。莫怪沙边倒，偏沾杯酌馀。

卷 273_126 【送车参军江陵（一作送韦参军，一作释清江诗）】

戴叔伦

槐花落尽柳阴清，萧索凉天楚客情。海上旧山无的信，
东门归路不堪行。身随幻境劳多事，迹学禅心厌有名。
公子道存知不弃，欲依刘表住南荆。

卷 273_127 【游清溪兰若（兼隐者旧居）】

戴叔伦

西看叠嶂几千重，秀色孤标此一峰。丹灶久闲荒宿草，
碧潭深处有潜龙。灵仙已去空岩室，到客唯闻古寺钟。
远对白云幽隐在，年年不离旧杉松。

卷 273_128 【赠史开府】

戴叔伦

南天胡马独悲嘶，白首相逢话鼓鼙。野战频年沙朔外，
旌竿高与雪峰齐。扁舟远泛轻全楚，落日愁看旧紫泥。
早晚瑶阶归伏奏，独能画地取关西。

卷 273_129 【登楼望月寄凤翔李少尹】

戴叔伦

陌上凉风槐叶凋，夕阳清露湿寒条。登楼望月楚山迥，
月到南楼山独遥。心送情人趋凤阙，目随阳雁极烟霄。
轩辕不重无名客，此地还能访寂寥。

卷 273_130 【和汴州李相公勉人日喜春】

戴叔伦

年来日日春光好，今日春光好更新。独献菜羹怜应节，
遍传金胜喜逢人。烟添柳色看犹浅，鸟踏梅花落已频。
东閤此时闻一曲，翻令和者不胜春。

卷 273_131 【奉酬卢端公饮后赠诸公见示之作】

戴叔伦

佐幕临戎旌旆间，五营无事万家闲。风吹杨柳渐拂地，
日映楼台欲下山。绮席昼开留上客，朱门半掩拟重关。
当时不敢辞先醉，误逐群公倒载还。

卷 273_132 【赠司空拾遗】

戴叔伦

侍臣何事辞云陛，江上弹冠见雪花。望阙未承丹凤诏，
开门空对楚人家。陈琳草奏才还在，王粲登楼兴不赊。
高馆更容尘外客，仍令归去待琼华。

卷 273_133 【越溪村居】

戴叔伦

年来桡客寄禅扉，多话贫居在翠微。黄雀数声催柳变，
清溪一路踏花归。空林野寺经过少，落日深山伴侣稀。
负米到家春未尽，风萝闲扫钓鱼矶。

卷 273_134 【赠韩道士（一作张泌诗）】

戴叔伦

日暮秋风吹野花，上清归客意无涯。桃源寂寂烟霞闭，
天路悠悠星汉斜。还似世人生白发，定知仙骨变黄芽。
东城南陌频相见，应是壶中别有家。

卷 273_135 【寄万德躬故居】

戴叔伦

日暮山风吹女萝，故人舟楫定如何。吕仙祠下寒砧急，
帝子阁前秋水多。闽海风尘鸣戍鼓，江湖烟雨暗渔蓑。
何时醉把黄花酒，听尔南征长短歌。

卷 273_136 【寄司空曙】

戴叔伦

细雨柴门生远愁，向来诗句若为酬。林花落处频中酒，
海燕飞时独倚楼。北郭晚晴山更远，南塘春尽水争流。
可能相别还相忆，莫遣杨花笑白头。

卷 273_137 【过故人陈羽山居】

戴叔伦

向来携酒共追攀，此日看云独未还。不见山中人半载，
依然松下屋三间。峰攒仙境丹霞上，水绕渔矶绿玉湾。
却望夏洋怀二妙，满崖霜树晓斑斑。

卷 273_138 【吊畅当】

戴叔伦

万里江南一布衣，早将佳句动京畿。徒闻子敬遗琴在，
不见相如驷马归。朔雪恐迷新冢草，秋风愁老故山薇。
玉堂知己能铭述，犹得精魂慰所依。

卷 273_139 【寄刘禹锡】

戴叔伦

谢相园西石径斜，知君习隐暂为家。有时出郭行芳草，
长日临池看落花。春去能忘诗共赋，客来应是酒频赊。
五年不见西山色，怅望浮云隐落霞。

卷 273_140 【寄孟郊】

戴叔伦

乱馀城郭怕经过，到处闲门长薜萝。用世空悲闻道浅，
入山偏喜识僧多。醉归花径云生履，樵罢松岩雪满蓑。
石上幽期春又暮，何时载酒听高歌。

卷 273_141 【赠徐山人】

戴叔伦

乱馀山水半凋残，江上逢君春正阑。针自指南天杳杳，
星犹拱北夜漫漫。汉陵帝子黄金碗，晋代神仙白玉棺。
回首风尘千里外，故园烟雨五峰寒。

卷 273_142 【过贾谊旧居】

戴叔伦

楚乡卑湿叹殊方，鵬赋人非宅已荒。谩有长书忧汉室，
空将哀些吊沅湘。雨馀古井生秋草，叶尽疏林见夕阳。
过客不须频太息，咸阳宫殿亦凄凉。

卷 273_143 【宫词】

戴叔伦

紫禁迢迢宫漏鸣，夜深无语独含情。春风鸾镜愁中影，
明月羊车梦里声。尘暗玉阶綦迹断，香飘金屋篆烟清。
贞心一任蛾眉妒，买赋何须问马卿。

卷 273_144 【汉宫人入道】

戴叔伦

萧萧白发出宫门，羽服星冠道意存。霄汉九重辞凤阙，
云山何处访桃源。瑶池醉月劳仙梦，玉辇乘春却帝恩。
回首吹箫天上伴，上阳花落共谁言。

卷 273_145 【二灵寺守岁】

戴叔伦

守岁山房迥绝缘，灯光香炷共萧然。无人更献椒花颂，
有客同参柏子禅。已悟化城非乐界，不知今夕是何年。
忧心悄悄浑忘寐，坐待扶桑日丽天。

卷 273_146 【暮春感怀】

戴叔伦

杜宇声声唤客愁，故园何处此登楼。落花飞絮成春梦，
剩水残山异昔游。歌扇多情明月在，舞衣无意彩云收。
东皇去后韶华尽，老圃寒香别有秋。

四十无闻懒慢身，放情丘壑任天真。悠悠往事杯中物，
赫赫时名扇外尘。短策看云松寺晚，疏帘听雨草堂春。
山花水鸟皆知己，百遍相过不厌贫。

卷 273_147 【哭朱放】

戴叔伦

几年湖海挹馀芳，岂料兰摧一夜霜。人世空传名耿耿，
泉台杳隔路茫茫。碧窗月落琴声断，华表云深鹤梦长。
最是不堪回首处，九泉烟冷树苍苍。

卷 273_148 【酬盩厔耿少府湜见寄】

戴叔伦

方丈萧萧落叶中，暮天深巷起悲风。流年不尽人自老，
外事无端心已空。家近小山当海畔，身留环卫荫墙东。
遥闻相访频逢雪，一醉寒宵谁与同。

卷 273_149【赠慧上人】

戴叔伦

仙槎江口槎溪寺，几度停舟访未能。自恨频年为远客，
喜从异郡识高僧。云霞色酺禅房衲，星月光涵古殿灯。
何日却飞真锡返，故人丘木翳寒藤。

卷 273_150【渐至涪州先寄王员外使君纵】

戴叔伦

文教通夷俗，均输问火田。江分巴字水，树入夜郎烟。
毒瘴含秋气，阴崖蔽曙天。路难空计日，身老不由年。
将命宁知远，归心讵可传。星郎复何意，出守五溪边。

卷 273_151【和河南罗主簿送校书兄归江南】

戴叔伦

兄弟泣殊方，天涯指故乡。断云无定处，归雁不成行。
草莽人烟少，风波水驿长。上虞亲渤澥，东楚隔潇湘。
古戍阴传火，寒芜晓带霜。海门潮滟滟，沙岸荻苍苍。
京辇辞芸阁，衡芳忆草堂。知君始宁隐，还缉旧荷裳。

卷 273_152 【晓闻长乐钟声】

戴叔伦

汉苑钟声早，秦郊曙色分。霜凌万户彻，风散一城闻。
已启蓬莱殿，初朝鸳鹭群。虚心方应物，大扣欲干云。
近杂鸡人唱，新传鳧氏文。能令翰苑客，流听思氛氲。

卷 273_153 【听霜钟】

戴叔伦

渺渺飞霜夜，寥寥远岫钟。出云疑断续，入户乍春容。
度枕频惊梦，随风几韵松。悠扬来不已，杳霭去何从。
仿佛烟岚隔，依稀岩峤重。此时聊一听，馀响绕千峰。

卷 273_154 【同前】

戴叔伦

寥亮来丰岭，分明辨古钟。应霜如自击，中节每相从。
静听非闲扣，潜应蕴圣踪。风间时断续，云外更春容。
虚警和清籁，雄鸣隔乱峰。因知谕知己，感激更难逢。

第二百七十四卷

卷 274_1 【酬崔法曹遗剑】

戴叔伦

临风脱佩剑，相劝静胡尘。自料无筋力，何由答故人。

卷 274_2 【敬报孙常州二首】

戴叔伦

衰病苦奔走，未尝追旧游。何言问憔悴，此日驻方舟。

远道曳故屐，馀春会高斋。因言别离久，得尽平生怀。

卷 274_3 【将赴东阳留上包谏议】

戴叔伦

敝邑连山远，仙舟数刻同。多惭屡回首，前路在泥中。

卷 274_4 【答崔法曹】

戴叔伦

后会知不远，今欢亦愿留。江天梅雨散，况在月中楼。

卷 274_5 【问严居士易】

戴叔伦

自公来问易，不复待加年。更有垂帘会，遥知续草玄。

卷 274_6 【新年第二夜答处上人宿玉芝观见寄】

戴叔伦

阳春已三日，会友闻昨夜。可爱剡溪僧，独寻陶景舍。

卷 274_7 【赴抚州对酬崔法曹夜雨滴空阶五首】

戴叔伦

雨落湿孤客，心惊比栖鸟。空阶夜滴繁，相乱应到晓。

高会枣树宅，清言莲社僧。两乡同夜雨，旅馆又无灯。
谤议不自辨，亲朋那得知。雨中驱马去，非是独伤离。
离室雨初晦，客程云陡暗。方为对吏人，敢望邮童探。
纵酒常掷盏，狂歌时入室。离群怨雨声，幽抑方成疾。

卷 274_8【又酬晓灯离暗室五首】

戴叔伦

知疑奸叟谤，闲与情人话。犹是别时灯，不眠同此夜。
寒灯扬晓焰，重屋惊春雨。应想远行人，路逢泥泞阻。
灯光照虚屋，雨影悬空壁。一向檐下声，远来愁处滴。
楚僧话寂灭，俗虑比虚空。赖有残灯喻，相传昏暗中。
雨声乱灯影，明灭在空阶。并枉五言赠，知同万里怀。

卷 274_9【同赋龙沙墅】

戴叔伦

回转沙岸近，欹斜林岭重。因君访遗迹，此日见真龙。

卷 274_10【昭君词】

戴叔伦

汉宫若远近，路在寒沙上。到死不得归，何人共南望。

卷 274_11【劝陆三饮酒】

戴叔伦

寒郊好天气，劝酒莫辞频。扰扰钟陵市，无穷不醉人。

卷 274_12【关山月二首】

戴叔伦

月出照关山，秋风人未还。清光无远近，乡泪半书间。

一雁过连营，繁霜覆古城。胡笳在何处，半夜起边声。

卷 274_13【送王司直】

戴叔伦

西塞云山远，东风道路长。人心胜潮水，相送过浔阳。

卷 274_14【宿无可上人房】

戴叔伦

偶来人境外，何处染嚣尘。倘许栖林下，僧中老此身。

卷 274_15【山居】

戴叔伦

麋鹿自成群，何人到白云。山中无外事，终日醉醺醺。

卷 274_16【口号】

戴叔伦

白发千茎雪，寒窗懒著书。最怜吟苜蓿，不及向桑榆。

卷 274_17【夜坐】

戴叔伦

夜静河汉高，独坐庭前月。忽起故园思，动作经年别。

卷 274_18【堤上柳】

戴叔伦

垂柳万条丝，春来织别离。行人攀折处，闺妾断肠时。

卷 274_19【遣兴】

戴叔伦

明月临沧海，闲云恋故山。诗名满天下，终日掩柴关。

卷 274_20【赠张挥使】

戴叔伦

谪戍孤城小，思家万里遥。汉廷求卫霍，剑珮上青霄。

卷 274_21【偶成】

戴叔伦

野水连天碧，峰峦入海青。沧浪者谁子，一曲醉中听。

卷 274_22 【画蝉】

戴叔伦

饮露身何洁，吟风韵更长。斜阳千万树，无处避螳螂。

卷 274_23 【题天柱山图】

戴叔伦

拔翠五云中，擎天不计功。谁能凌绝顶，看取日升东。

卷 274_24 【松鹤】

戴叔伦

雨湿松阴凉，风落松花细。独鹤爱清幽，飞来不飞去。

卷 274_25 【草堂一上人】

戴叔伦

一公持一钵，相复度遥岑。地瘦无黄独，春来草更深。

卷 274_26 【题黄司直园】

戴叔伦

为忆去年梅，凌寒特地来。门前空腊尽，浑未有花开。

卷 274_27 【北山游亭】

戴叔伦

西崦水泠泠，沿冈有游亭。自从春草长，遥见只青青。

卷 274_28 【赠李唐山人（一作李山人唐）】

戴叔伦

此意无所欲，闭门风景迟。柳条将白发，相对共垂丝。

卷 274_29 【题秦隐君丽句亭】

戴叔伦

北人归欲尽，犹自住萧山。闭户不曾出，诗名满世间。

卷 274_30 【答孙常州见忆】

戴叔伦

画鹢春风里，迢遥去若飞。那能寄相忆，不并子猷归。

卷 274_31 【送裴明州（一本有郎中徵三字）效南朝体】

戴叔伦

沅水连湘水，千波万浪中。知郎未得去，惭愧石尤风。

卷 274_32 【戏留顾十一明府】

戴叔伦

江明雨初歇，山暗云犹湿。未可动归桡，前程风浪急。

卷 274_33 【答崔载华】

戴叔伦

文案日成堆，愁眉拽不开。偷归瓮间卧，逢个楚狂来。

卷 274_34【将赴行营劝客同醉】

戴叔伦

丝管霜天夜，烟尘淮水西。明朝上征去，相伴醉如泥。

卷 274_35【夏夜江楼会别】

戴叔伦

不作十日别，烦君此相留。雨馀江上月，好醉竹间楼。

卷 274_36【岁除日奉推事使牒追赴抚州辨...处士上人同赋人字口号】

戴叔伦

上国杳未到，流年忽复新。回车不自识，君定送何人。

卷 274_37 【江馆会别】

戴叔伦

离亭一会宿，能有几人同。莫以回车泣，前途不尽穷。

卷 274_38 【容州回逢陆三别】

戴叔伦

西南积水远，老病喜生归。此地故人别，空馀泪满衣。

卷 274_39 【古意寄呈王侍郎】

戴叔伦

夜光贮怀袖，待报一顾恩。日向江湖老，此心谁为论。

卷 274_40 【送李大夫渡口阻风】

戴叔伦

浪息定何时，龙门到恐迟。轻舟不敢渡，空立望旌旗。

卷 274_41 【过三闾庙】

戴叔伦

沅湘流不尽，屈宋怨何深。日暮秋烟起，萧萧枫树林。

卷 274_42 【泊湘口】

戴叔伦

湘山千岭树，桂水九秋波。露重猿声绝，风清月色多。

卷 274_43 【游道林寺】

戴叔伦

佳山路不远，俗侣到常稀。及此烟霞暮，相看复欲归。

卷 274_44 【后宫曲】

戴叔伦

初入长门宫，谓言君戏妾。宁知秋风至，吹尽庭前叶。

卷 274_45 【新别离（一作戎昱诗）】

戴叔伦

手把杏花枝，未曾经别离。黄昏掩闺后，寂寞心自知。

卷 274_46 【夏日登鹤岩偶成】

戴叔伦

天风吹我上层冈，露洒长松六月凉。
愿借老僧双白鹤，碧云深处共翱翔。

卷 274_47 【题净居寺】

戴叔伦

玉壶山下云居寺，六百年来选佛场。
满地白云关不住，石泉流出落花香。

卷 274_48 【昭君词】

戴叔伦

汉家宫阙梦中归，几度毡房泪湿衣。
惆怅不如边雁影，秋风犹得向南飞。

卷 274_49 【织女词】

戴叔伦

凤梭停织鹊无音，梦忆仙郎夜夜心。
难得相逢容易别，银河争似妾愁深。

卷 274_50 【塞上曲二首】

戴叔伦

军门频纳受降书，一剑横行万里馀。
汉祖谩夸娄敬策，却将公主嫁单于。

汉家旗帜满阴山，不遣胡儿匹马还。
愿得此身长报国，何须生入玉门关。

卷 274_51 【闺怨】

戴叔伦

看花无语泪如倾，多少春风怨别情。
不识玉门关外路，梦中昨夜到边城。

卷 274_52 【春怨】

戴叔伦

金鸭香消欲断魂，梨花春雨掩重门。
欲知别后相思意，回看罗衣积泪痕。

卷 274_53 【旅次寄湖南张郎中】

戴叔伦

闭门茅底偶为邻，北阮那怜南阮贫。
却是梅花无世态，隔墙分送一枝春。

卷 274_54 【题友人山居】

戴叔伦

四郭青山处处同，客怀无计答秋风。
数家茅屋清溪上，千树蝉声落日中。

卷 274_55【别郑谷】

戴叔伦

朝阳斋前桃李树，手栽清荫接比邻。
明年此地看花发，愁向东风忆故人。

卷 274_56【赠鹤林上人】

戴叔伦

日日涧边寻茯苓，岩扉常掩凤山青。
归来挂衲高林下，自剪芭蕉写佛经。

卷 274_57【题稚川山水】

戴叔伦

松下茅亭五月凉，汀沙云树晚苍苍。
行人无限秋风思，隔水青山似故乡。

卷 274_58【过柳溪道院】

戴叔伦

溪上谁家掩竹扉，鸟啼浑似惜春晖。
日斜深巷无人迹，时见梨花片片飞。

卷 274_59【荔枝】

戴叔伦

红颗真珠诚可爱，白须太守亦何痴。
十年结子知谁在，自向中庭种荔枝。

卷 274_60【忆原上人】

戴叔伦

一两棕鞋八尺藤，广陵行遍又金陵。
不知竹雨竹风夜，吟对秋山那寺灯。

卷 274_61【闲思】

戴叔伦

伯劳东去鹤西还，云总无心亦度山。

何似严陵滩上客，一竿长伴白鸥闲。

卷 274_62【兰溪棹歌】

戴叔伦

凉月如眉挂柳湾，越中山色镜中看。
兰溪三日桃花雨，半夜鲤鱼来上滩。

卷 274_63【苏溪亭】

戴叔伦

苏溪亭上草漫漫，谁倚东风十二阑。
燕子不归春事晚，一汀烟雨杏花寒。

卷 274_64【敬酬陆山人二首】

戴叔伦

党议连诛不可闻，直臣高士去纷纷。
当时漏夺无人问，出宰东阳笑杀君。

由来海畔逐樵渔，奉诏因乘使者车。

却掌山中子男印，自看犹是旧潜夫。

卷 274_65 【答崔法曹赋四雪】

戴叔伦

楚僧蹑雪来招隐，先访高人积雪中。
已别剡溪逢雪去，雪山修道与师同。

卷 274_66 【抚州被推昭雪答陆太祝三首】

戴叔伦

求理由来许便宜，汉朝龚遂不为疵。
如今谤起翻成累，唯有新人子细知。

贫交相爱果无疑，共向人间听直词。
从古以来何限枉，惭知暗室不曾欺。

春风旅馆长庭芜，俯首低眉一老夫。
已对铁冠穷事本，不知廷尉念冤无。

卷 274_67 【送独孤戔还京】

戴叔伦

举家相逐还乡去，不向秋风怨别时。
湖水两重山万里，定知行尽到京师。

卷 274_68 【临流送顾东阳】

戴叔伦

海上独归惭不及，邑中遗爱定无双。
兰桡起唱逐流去，却恨山溪通外江。

卷 274_69 【行营送马侍御】

戴叔伦

万里羽书来未绝，五关烽火昼仍传。
故人多病尽归去，唯有刘桢不得眠。

卷 274_70 【送秦系】

戴叔伦

五都来往无旧业，一代公卿尽故人。

不肯低头受羁束，远师溪上拂纓尘。

卷 274_71【送裴判官回湖南】

戴叔伦

莫怕南风且尽欢，湘山多雨夏中寒。
送君万里不觉远，此地曾为心铁官。

卷 274_72【再巡道永留别】

戴叔伦

鬓下初惊白发时，更逢离别助秋悲。
从今不学四方事，已共家人海上期。

卷 274_73【别崔法曹】

戴叔伦

欲作别离西入秦，芝田枣径往来频。
东湖此夕更留醉，逢著庐山学道人。

卷 274_74 【送萧二】

戴叔伦

拟向田间老此身，寒郊怨别甚於春。
又闻故里朋游尽，到日知逢何处人。

卷 274_75 【湘川野望】

戴叔伦

怀王独与佞人谋，闻道忠臣入乱流。
今日登高望不见，楚云湘水各悠悠。

卷 274_76 【将至道州寄李使君】

戴叔伦

九疑深路绕山回，木落天清猿昼哀。
犹隔箫韶一峰在，遥传五马向东来。

卷 274_77 【与虞沔州谒藏真上人】

戴叔伦

故侯将我到山中，更上西峰见远公。
共问置心何处好，主人挥手指虚空。

卷 274_78【题招隐寺】

戴叔伦

昨日临川谢病还，求田问舍独相关。
宋时有井如今在，却种胡麻不买山。

卷 274_79【过珥渚单老（一作宅）】

戴叔伦

毫末成围海变田，单家依旧住溪边。
比来已向人间老，今日相过却少年。

卷 274_80【族兄各年八十馀见招游洞】

戴叔伦

鹤发婆娑乡里亲，相邀共看往年春。

拟将儿女归来住，且是茅山见老人。

卷 274_81【登高回乘月寻僧】

戴叔伦

插鬓茱萸来未尽，共随明月上沙堆。
高缙寂寂不相问，醉客无端入定来。

卷 274_82【赠殷亮】

戴叔伦

日日河边见水流，伤春未已复悲秋。
山中旧宅无人住，来往风尘共白头。

卷 274_83【夜发袁江寄李颖川刘侍御】

戴叔伦

半夜回舟入楚乡，月明山水共苍苍。
孤猿更叫秋风里，不是愁人亦断肠。

卷 274_84 【对酒示申屠学士】

戴叔伦

三重江水万重山，山里春风度日闲。
且向白云求一醉，莫教愁梦到乡关。

卷 274_85 【对月答袁明府】

戴叔伦

山下孤城月上迟，相留一醉本无期。
明年此夕游何处，纵有清光知对谁。

卷 274_86 【送前上饶严明府摄玉山】

戴叔伦

家在故林吴楚间，冰为溪水玉为山。
更将旧政化邻邑，遥见逋人相逐还。

卷 274_87 【听歌回马上赠崔法曹】

戴叔伦

秋风里许杏花开，杏树傍边醉客来。
共待夜深听一曲，醒人骑马断肠回。

卷 274_88【酬骆侍御答诗】

戴叔伦

风传画阁空知晓，雨湿江城不见春。
堆案绕床君莫怪，已经愁思古时人。

卷 274_89【送孙直游郴州】

戴叔伦

孤舟上水过湘沅，桂岭南枝花正繁。
行客自知心有托，不闻惊浪与啼猿。

卷 274_90【麓山寺会送尹秀才】

戴叔伦

湖上逢君亦不闲，暂将离别到深山。

飘蓬惊鸟那自定，强欲相留云树间。

卷 274_91【送董颢】

戴叔伦

霜雁群飞下楚田，羈人掩泪望秦天。
君行江海无定所，别后相思何处边。

卷 274_92【别张员外】

戴叔伦

木叶纷纷湘水滨，此中何事往频频。
临风自笑归时晚，更送浮云逐故人。

卷 274_93【送张评事】

戴叔伦

城郭喧喧争送远，危梁袅袅渡东津。
杨花展转引征骑，莫怪山中多看人。

卷 274_94 【送吕少府】

戴叔伦

共醉流芳独归去，故园高士日相亲。
深山古路无杨柳，折取桐花寄远人。

卷 274_95 【送人游岭南】

戴叔伦

少别华阳万里游，近南风景不曾秋。
红芳绿笋是行路，纵有啼猿听却幽。

卷 274_96 【妻亡后别妻弟】

戴叔伦

杨柳青青满路垂，赠行惟折古松枝。
停舟一对湘江哭，哭罢无言君自知。

卷 274_97 【和崔法曹建溪闻猿】

戴叔伦

曾向巫山峡里行，羈猿一叫一回惊。
闻道建溪肠欲断，的知断著第三声。

卷 274_98 【湘南即事】

戴叔伦

卢橘花开枫叶衰，出门何处望京师。
沅湘日夜东流去，不为愁人住少时。

卷 274_99 【代书寄京洛旧游】

戴叔伦

今年十月温风起，湘水悠悠生白蘋。
欲寄远书还不敢，却愁惊动故乡人。

卷 274_100 【蕲州行营作】

戴叔伦

蕲水城西向北看，桃花落尽柳花残。

朱旗半卷山川小，白马连嘶草树寒。

卷 274_101 【题武当逸禅师兰若】

戴叔伦

我身本似远行客，况是乱时多病身。
经山涉水向何处，羞见竹林禅定人。

卷 274_102 【谷城逢杨评事】

戴叔伦

远自五陵独窜身，筑阳山中归路新。
横流夜长不得渡，驻马荒亭逢故人。

卷 274_103 【听韩使君美人歌】

戴叔伦

仙人此夜忽凌波，更唱瑶台一遍歌。
嫁与将军天上住，人间可得再相过。

卷 274_104 【转应词】

戴叔伦

边草，边草，边草尽来共老。山南山北雪晴，
千里万里月明。明月，明月，胡笳一声愁绝。

卷 274_105 【精舍对雨】

戴叔伦

空门寂寂澹吾身，溪雨微微洗客尘。
卧向白云晴未尽，任他黄鸟醉芳春。

卷 274_106 【宿灌阳滩】

戴叔伦

十月江边芦叶飞，灌阳滩冷上舟迟。
今朝未遇高风便，还与沙鸥宿水湄。

卷 274_107 【酬赠张众甫】

戴叔伦

野人无本意，散木任天材。分向空山老，何言上苑来。
迢遥千里道，依倚九层台。出处宁知命，轮辕岂自媒。
更惭张处士，相与别蒿莱。

卷 274_108【客舍秋怀呈骆正字士则】

戴叔伦

无言堪自喻，偶坐更相悲。木落惊年长，门闲惜草衰。
买山犹未得，谏猎又非时。设被浮名系，归休渐欲迟。

卷 274_109【寄中书李舍人纾】

戴叔伦

萍翻蓬自卷，不共本心期。复入重城里，频看百草滋。
水流归思远，花发长年悲。尽日春风起，无人见此时。

卷 274_110【赠康老人洽】

戴叔伦

酒泉布衣旧才子，少小知名帝城里。一篇飞入九重门，
乐府喧喧闻至尊。宫中美人皆唱得，七贵因之尽相识。
南邻北里日经过，处处淹留乐事多。不脱弊裘轻锦绮，
长吟佳句掩笙歌。贤王贵主於我厚，骏马苍头如己有。
暗将心事隔风尘，尽掷年光逐杯酒。青门几度见春归，
折柳寻花送落晖。杜陵往往逢秋暮，望月临风攀古树。
繁霜入鬓何足论，旧国连天不知处。尔来倏忽五十年，
却忆当时思眇然。多识故侯悲宿草，曾看流水没桑田。
百人会中一身在，被褐饮瓢终不改。陌头车马共营营，
不解如君任此生。

卷 274_111 【暮春游长沙东湖赠辛兖州巢父二首】

戴叔伦

湘流分曲浦，缭绕古城东。岸转千家合，林开一镜空。
人生无事少，心赏几回同。且复忘羁束，悠悠落照中。

回环路不尽，历览意弥新。古木畲田火，澄江荡桨人。
缓歌寻极浦，一醉送残春。莫恨长沙远，他年忆此辰。

卷 274_112 【同兖州张秀才过王侍御参谋宅赋十韵（柳字）】

戴叔伦

十年官不进，敛迹无怨咎。漂荡海内游，淹留楚乡久。
因参戎幕下，寄宅湘川口。翦竹开广庭，瞻山敞虚牖。
闲门早春至，陋巷新晴后。覆地落残梅，和风裊轻柳。
逢迎车马客，邀结风尘友。意惬时会文，夜长聊饮酒。
秉心转孤直，沈照随可否。岂学屈大夫，忧惭对渔叟。

卷 274_113 【同辛兖州巢父卢副端岳相思献酬...兼呈辛魏二院长杨长宁】

戴叔伦

暮角发高城，情人坐中起。临觴不及醉，分散秋风里。
虽有明日期，离心若千里。前欢反惆怅，后会还如此。
焉得夜淹留，一回终宴喜。羁游复牵役，皆去重湖水。
早晚泛归舟，吾从数君子。

卷 274_114 【酬袁太祝长卿小湖村山居书怀见寄】

戴叔伦

背江居隙地，辞职作遗人。耕凿资余力，樵渔逐四邻。
麦秋桑叶大，梅雨稻田新。篱落栽山果，池塘养海鳞。
放歌聊自足，幽思忽相亲。余亦归休者，依君老此身。

卷 274_115【送汶水王明府】

戴叔伦

何时别故乡，归去佩铜章。亲族移家尽，闾阎百战场。
背关馀古木，近塞足风霜。遗老应相贺，知君不下堂。

卷 274_116【奉同汴州李相公勉送郭布殿中出巡】

戴叔伦

轩车出东阁，都邑绕南河。马首先春至，人心比岁和。
省风传隐恤，持法去烦苛。却想埋轮者，论功此日多。

卷 274_117【送东阳顾明府罢归】

戴叔伦

祖帐临蛟室，黎人拥鹢舟。坐蓝高士去，继组鄙夫留。
白日落寒水，青枫绕曲洲。相看作离别，一倍不禁愁。

卷 274_118【抚州对事后送外生宋垓归饶州舘侍呈上姊夫】

戴叔伦

淮汴初丧乱，蒋山烽火起。与君随亲族，奔迸辞故里。
京口附商客，海门正狂风。忧心不敢住，夜发惊浪中。
云开方见日，潮尽炉峰出。石壁转棠阴，鄱阳寄茅室。
淹留三十年，分种越人田。骨肉无半在，乡园犹未旋。
尔家习文艺，旁究天人际。父子自相传，优游聊卒岁。
学成不求达，道胜那厌贫。时入闾巷醉，好是羲皇人。
顷因物役牵，偶逐簪组辈。谤书喧朝市，抚己惭浅昧。
世业大小礼，近通颜谢诗。念渠还领会，非敢独为师。

卷 274_119【永康孙明府颀秩满将归枉路访别】

戴叔伦

门前水流咽，城下乱山多。非是还家路，宁知枉骑过。
风烟复欲隔，悲笑屡相和。不学陶公醉，无因奈别何。

卷 274_120【将赴湖南留别东阳旧僚兼示吏人】

戴叔伦

智力苦不足，黎甿殊未安。忽从新命去，复隔旧僚欢。
晓路整车马，离亭会衣冠。冰坚细流咽，烧尽乱峰寒。
耆老相饯送，儿童亦悲酸。桐乡寄生怨，欲话此情难。

卷 274_121 【抚州处士胡泛见送北回两馆至南昌县界查溪兰若别】

戴叔伦

移樽铺山曲，祖帐查溪阴。铺山即远道，查溪非故林。
凄然诵新诗，落泪沾素襟。郡政我何有，别情君独深。
禅庭古树秋，宿雨清沈沈。挥袂千里远，悲伤去住心。

卷 274_122 【将巡郴永途中作】

戴叔伦

行役留三楚，思归又一春。自疑冠下发，聊此镜中人。
机息知名误，形衰恨道贫。空将旧泉石，长与梦相亲。

卷 274_123 【桂阳北岭偶过野人所居，聊书即事呈王永州邕李道州圻】

戴叔伦

犬吠空山响，林深一径存。隔云寻板屋，渡水到柴门。
日昼风烟静，花明草树繁。乍疑秦世客，渐识楚人言。
不记逃乡里，居然长子孙。种田烧险谷，汲井凿高原。

畦叶藏春雉，庭柯宿旅猿。岭阴无瘴疠，地隙有兰荪。
内户均皮席，枯瓢沃野餐。远心知自负，幽赏讵能论。
转步重崖合，瞻途落照昏。他时愿携手，莫比武陵源。

卷 274_124 【下鼻亭泷行八十里聊状艰险，寄青苗郑副端朔阳】

戴叔伦

泷水天际来，鼻山地中坼。盘涡几十处，叠溜皆千尺。
直写卷沈沙，惊翻冲绝壁。淙淙振崖谷，汹汹竞朝夕。
人语不自闻，日光乱相射。舫舟始摇漾，举棹旋奔激。
既下同建瓴，半空方避石。前危苦未尽，后险何其迫。
倏闪疾风雷，苍皇荡魂魄。因随伏流出，忽与跳波隔。
远想欲回轩，岂兹还泛鹢。云涯多候馆，努力勤登历。

卷 274_125 【少女生日感怀】

戴叔伦

五逢晬日今方见，置尔怀中自惘然。乍喜老身辞远役，
翻悲一笑隔重泉。欲教针线娇难解，暂弄琴书性已便。
还有蔡家残史籍，可能分与外人传。

卷 274_126 【张评事涉秦居士系见访郡斋，即同赋中字】

戴叔伦

轺车忽枉辙，郡府自生风。遣吏山禽在，开樽野客同。
古墙抽腊笋，乔木飏春鸿。能赋传幽思，清言尽至公。
城欹残照入，池曲大江通。此地人来少，相欢一醉中。

卷 274_127 【小雪】

戴叔伦

花雪随风不厌看，更多还肯失林峦。
愁人正在书窗下，一片飞来一片寒。

卷 274_128 【句】

戴叔伦

邻里龙沙北。（《临川六咏》）。

麦秋桑叶大，梅雨稻田新。篱落栽山果，池塘养锦鳞。

第二百七十五卷

卷 275_1【竞渡歌】

张建封

五月五日天晴明，杨花绕江啼晓莺。使君未出郡斋外，
江上早闻齐和声。使君出时皆有准，马前已被红旗引。
两岸罗衣破晕香，银钗照日如霜刃。鼓声三下红旗开，
两龙跃出浮水来。棹影斡波飞万剑，鼓声劈浪鸣千雷。
鼓声渐急标将近，两龙望标目如瞬。坡上人呼霹雳惊，
竿头彩挂虹蜺晕。前船抢水已得标，后船失势空挥桡。
疮眉血首争不定，输岸一朋心似烧。只将输赢分罚赏，
两岸十舟五来往。须臾戏罢各东西，竞脱文身请书上。
吾今细观竞渡儿，何殊当路权相持。不思得岸各休去，
会到摧车折楫时。

卷 275_2【酬韩校书愈打球歌】

张建封

仆本修文持笔者，今来帅领红旗下。不能无事习蛇矛，

闲就平场学使马。军中伎痒骁智材，竞驰骏逸随我来。
护军对引相向去，风呼月旋朋先开。俯身仰击复傍击，
难于古人左右射。齐观百步透短门，谁羨养由遥破的。
儒生疑我新发狂，武夫爱我生雄光。杖移鬢底拂尾后，
星从月下流中场。人不约，心自一。马不鞭，蹄自疾。
凡情莫辨捷中能，拙目翻惊巧时失。韩生讶我为斯艺，
劝我徐驱作安计。不知戎事竟何成，且愧吾人一言惠。

卷 275_3【春山夜月】

于良史

春山多胜事，赏玩夜忘归。掬水月在手，弄花香满衣。
兴来无远近，欲去惜芳菲。南望鸣钟处，楼台深翠微。

卷 275_4【宿蓝田山口奉寄沈员外】

于良史

山暝飞群鸟，川长泛四邻。烟归河畔草，月照渡头人。
朋友怀东道，乡关恋北辰。去留无所适，岐路独迷津。

卷 275_5【冬日野望寄李赞府】

于良史

地际朝阳满，天边宿雾收。风兼残雪起，河带断冰流。
北阙驰心极，南图尚旅游。登临思不已，何处得销愁。

卷 275_6【闲居寄薛华】

于良史

隐几读黄老，闲居耳目清。僻居人事少，多病道心生。
雨洗山林湿，鸦鸣池馆晴。晚来因废卷，行药至西城。

卷 275_7【江上送友人】

于良史

看尔动行棹，未收离别筵。千帆忽见及，乱却故人船。
纷泊雁群起，逶迤沙渚连。长亭十里外，应是少人烟。

卷 275_8【田家秋日送友】

于良史

苍茫日初宴，遥野云初收。残雨北山里，夕阳东渡头。

舟依渔濑合，水入田家流。何意君迷驾，山林应有秋。

卷 275_9【自吟】

于良史

出身三十年，发白衣犹碧。日暮倚朱门，从朱污袍赤。

卷 275_10【感兴】

崔膺

富贵难义合，困穷易感恩。古来忠烈士，多出贫贱门。
世上桃李树，但结繁华子。白屋抱关人，青云壮心死。
本以势利交，势尽交情已。如何失情后，始叹门易轨。

卷 275_11【别佳人（一作崔涯诗）】

崔膺

垄上流泉垄下分，断肠呜咽不堪闻。
嫦娥一入月中去，巫峡千秋空白云。

卷 275_12 【御沟新柳】

冯宿

夹道天渠远，垂丝御柳新。千条宜向日，万户共迎春。
轻翠含烟发，微音逐吹频。静看思渡口，回望忆江滨。
袅袅分游骑，依依驻旅人。阳和如可及，攀折在兹辰。

卷 275_13 【酬白乐天刘梦得（一作尹河南酬乐天梦得）】

冯宿

共称洛邑难其选，何幸天书用不才。遥约和风新草木，
且令新雪静尘埃。临岐有愧倾三省，别酌无辞醉百杯。
明岁杏园花下集，须知春色自东来。

卷 275_14 【乐府答孟东野戏赠】

陆长源

芙蓉初出水，菡萏露中花。几吹著枯木，无奈值空槎。

卷 275_15 【酬孟十二新居见寄】

陆长源

大道本夷旷，高情亦冲虚。因随白云意，偶逐青萝居。
青萝纷蒙密，四序无惨舒。馀清濯子襟，散彩还吾庐。
去岁登美第，策名在公车。将必继管萧，岂惟蹢应徐。
首夏尚清和，残芳遍丘墟。褰帟荫窗柳，汲井滋园蔬。
达者贵知心，古人不愿馀。爱君蒋生径，且著茂陵书。

卷 275_16 【答东野夷门雪（郊客于汴将归赋夷门雪赠别长源答此）】

陆长源

好丹与素道不同，失意得途事皆别。东邻少年乐未央，
南客思归肠欲绝。千里长河冰复冰，云鸿冥冥楚山雪。

卷 275_17 【句】

陆长源

忽然一曲称君心，破却中人百家产。
（《讽刺》。以下并《纪事》）。

城外平人驱欲尽，帐中犹打衮花球。

卷 275_18【寄兴国池鹤上刘相公】

张众甫

驯狎经时久，褰褰短翮存。不随淮海变，空愧稻粱恩。
独立秋天静，单栖夕露繁。欲飞还敛翼，讵敢望乘轩。

卷 275_19【送李司直使吴（得家花斜沙字，依次用）】

张众甫

使臣方拥传，王事远辞家。震泽逢残雨，新丰过落花。
水萍千叶散，风柳万条斜。何处看离恨，春江无限沙。

卷 275_20【送李观之宣州谒袁中丞赋得三州渡】

张众甫

古渡大江滨，西南距要津。自当舟楫路，应济往来人。
翻浪惊飞鸟，回风起绿苹。君看波上客，岁晚独垂纶。

卷 275_21【宿慧山寺】

王武陵

秋日游古寺，秋山正苍苍。泛舟次岩壑，稽首金仙堂。
下有寒泉流，上有珍禽翔。石门吐明月，竹木涵清光。
中夜河沈沈，但闻松桂香。旷然出尘境，忧虑澹已忘。

卷 275_22【秋暮登北楼】

王武陵

秋满空山悲客心，山楼晴望散幽襟。一川红树迎霜老，
数曲清溪绕寺深。寒气急催遥塞雁，夕风高送远城砧。
三年海上音书绝，乡国萧条惟梦寻。

卷 275_23【宿慧山寺】

朱宿

古寺隐秋山，登攀度林樾。悠然青莲界，此地尘境绝。
机闲任昼昏，虑澹知生灭。微吹递遥泉，疏松对残月。
庭虚露华缀，池净荷香发。心悟形未留，迟迟履归辙。

岁月人间促，烟霞此地多。殷勤竹林寺，更得几回过。

第二百七十六卷

卷 276_1【送惟良上人归江南（一作郢上人）】

卢纶

落日映危樯，归僧向岳阳。注瓶寒浪静，读律夜船香。
苦雾沈山影，阴霾发海光。群生一何负，多病礼医王。

卷 276_2【送韩都护还边】

卢纶

好勇知名早，争雄上将间。战多春入塞，猎惯夜登山。
阵合龙蛇动，军移草木闲。今来部曲尽，白首过萧关。

卷 276_3【送吉中孚校书归楚州旧山（中孚自仙官入仕）】

卢纶

青袍芸阁郎，谈笑挹侯王。旧篆藏云穴，新诗满帝乡。

名高闲不得，到处人争识。谁知冰雪颜，已杂风尘色。
此去复如何，东皋岐路多。藉芳临紫陌，回首忆沧波。
年来倦萧索，但说淮南乐。并楫湖上游，连櫓月中泊。
沿溜入阊门，千灯夜市喧。喜逢邻舍伴，遥语问乡园。
下淮风自急，树杪分郊邑。送客随岸行，离人出帆立。
渔村绕水田，澹澹隔晴烟。欲就林中醉，先期石上眠。
林昏天未曙，但向云边去。暗入无路山，心知有花处。
登高日转明，下望见春城。洞里草空长，冢边人自耕。
寥寥行异境，过尽千峰影。露色凝古坛，泉声落寒井。
仙成不可期，多别自堪悲。为问桃源客，何人见乱时。

卷 276_4 【送姨弟裴均尉诸暨（此子先君元相旧判官）】

卢纶

相悲得成长，同是外家恩。旧业废三亩，弱年成一门。
城开山日早，吏散渚禽喧。东阁谬容止，予心君冀言。

卷 276_5 【送邓州崔长史】

卢纶

出山车骑次诸侯，坐领图书见督邮。绕郭桑麻通淅口，
满川风景接襄州。高城鸟过方催夜，废垒蝉鸣不待秋。
闻说元规偏爱月，知君长得伴登楼。

卷 276_6 【送盐铁裴判官入蜀】

卢纶

传诏收方贡，登车著赐衣。榷商蛮客富，税地芋田肥。
云白风雷歇，林清洞穴稀。炎凉君莫问，见即在忘归。

卷 276_7 【送魏广下第归扬州】

卢纶

楚乡云水内，春日众山开。淮浪参差起，江帆次第来。
独归初失桂，共醉忽停杯。汉诏年年有，何愁掩上才。

卷 276_8 【送潘述应宏词下第归江南】

卢纶

愁与醉相和，昏昏竟若何。感年怀阙久，失意梦乡多。
雨里行青草，山前望白波。江楼覆棋好，谁引仲宣过。

卷 276_9 【送从舅成都县丞广归蜀】

卢纶

褒谷通岷岭，青冥此路深。晚程椒瘴热，野饭荔枝阴。
古郡三刀夜，春桥万里心。唯应对杨柳，暂醉卓家琴。

卷 276_10【送宋校书赴宣州幕】

卢纶

南想宣城郡，清江野戍闲。艤艫高映浦，睥睨曲随山。
名寄图书内，威生将吏间。春行板桥暮，应伴庾公还。

卷 276_11【送李纵别驾加员外郎却赴常州幕】

卢纶

霄汉正联飞，江湖又独归。暂欢同赐被，不待易朝衣。
山雨迎军晚，芦风候火微。还当宴铃阁，谢守亦光辉。

卷 276_12【送元赞府重任龙门县】

卢纶

二职亚陶公，归程与梦同。柳垂平泽雨，鱼跃大河风。

混迹威长在，孤清志自雄。应嗤向隅者，空寄路尘中。

卷 276_13【送黎燧尉阳翟】

卢纶

玉貌承严训，金声称上才。列筵青草偃，骤马绿杨开。
潘县花添发，梅家鹤暂来。谁知望恩者，空逐路人回。

卷 276_14【送丹阳赵少府（即给事中涓亲弟）】

卢纶

恭闻林下别，未至亦沾裳。荻岸雨声尽，江天虹影长。
佩韦宗懒慢，偷橘爱芳香。遥想从公后，称荣在上堂。

卷 276_15【送菊潭王明府】

卢纶

组绶掩衰颜，辉光里第间。晚凉经灞水，清昼入商山。
行境逢花发，弹琴见鹤还。唯应理农后，乡老贺君闲。

卷 276_16 【送陈明府赴萍县】

卢纶

素舸载陶公，南随万里风。梅花成雪岭，橘树当家僮。
祠掩荒山下，田开野荻中。岁终书善绩，应与古碑同。

卷 276_17 【送申屠正字往湖南迎亲兼谒赵和州...并戏简前
历阳李明府】

卢纶

晓月朣朦映水关，水边因到历阳山。千艘财货朱桥下，
一曲闾阎青荻间。坦腹定逢潘令醉，上楼应伴庾公闲。
欢馀若问南行计，知念天涯负米还。

卷 276_18 【送李尚书郎君昆季侍从归覲滑州】

卢纶

凤雏联翼美王孙，彩服戎装拟塞垣。金鼎对筵调野膳，
玉鞭齐骑引行轩。冰河一曲旌旗满，墨诏千封雨露繁。
更说务农将罢战，敢持歌颂庆晨昏。

卷 276_19【送张调参军侍从归觐荆南因寄长林司空十四曙
(得潜字)】

卢纶

玉勒侍行襜，郗超未有髯。守儒轻猎骑，承诲访沈潜。
云势将峰杂，江声与屿兼。还当见王粲，应念二毛添。

卷 276_20【送马尚书郎君侍从归觐太原】

卢纶

玉人垂玉鞭，百骑带囊鞬。从赏野邮静，献新秋果鲜。
塞屯丰雨雪，虏帐失山川。遥想称觞后，唯当共被眠。

卷 276_21【送张成季往江上赋得垂杨】

卢纶

垂杨真可怜，地胜觉春偏。一穗雨声里，千条池色前。
露繁光的皪，日丽影团圆。若到隋堤望，应逢花满船。

卷 276_22【送陕府王司法】

卢纶

东门雪覆尘，出送陕城人。粉郭朝喧市，朱桥夜掩津。
上寮应重学，小吏已甘贫。谢朓曾为掾，希君一比邻。

卷 276_23【送太常李主簿归觐省】

卢纶

粲粲美仍都，清闲一贵儒。定交分玉剑，发咏写冰壶。
风景随台位，河山入障图。上堂多庆乐，肯念谷中愚。

卷 276_24【送从叔程归西川幕】

卢纶

千山冰雪晴，山静锦花明。群鹤栖莲府，诸戎拜柳营。
浪依巴字息，风入蜀关清。岂念在贫巷，竹林鸣鸟声。

卷 276_25【送万巨】

卢纶

把酒留君听琴，难堪岁暮离心。霜叶无风自落，

秋云不雨空阴。人愁荒村路细，马怯寒溪水深。
望断青山独立，更知何处相寻。

卷 276_26【途中遇雨马上口号留别张刘二端公】

卢纶

阴雷慢转野云长，骏马双嘶爱雨凉。
应念龙钟在泥滓，欲摧肝胆事王章。

卷 276_27【送夔州班使君】

卢纶

晓日照楼船，三军拜峡前。白云随浪散，青壁与城连。
万岭岷峨雪，千家橘柚川。还知楚河内，天子许经年。

卷 276_28【送从舅成都丞广归蜀（一作李端诗）】

卢纶

巴字天边水，秦人去是归。栈长山雨响，溪乱火田稀。
俗富行应乐，官雄禄岂微。魏舒终有泪，还识宁家衣。

卷 276_29【无题】

卢纶

耻将名利托交亲，只向尊前乐此身。才大不应成滞客，
时危且喜是闲人。高歌犹爱思归引，醉语惟夸漉酒巾。
□□□□□□□，岂能偏遣老风尘。

卷 276_30【题念济寺】

卢纶

灵空闻偈夜清净，雨里花枝朝暮开。
故友九泉留语别，逐臣千里寄书来。

卷 276_31【河口逢江州朱道士因听琴】

卢纶

庐山道士夜携琴，映月相逢辨语音。
引坐霜中弹一弄，满船商客有归心。

卷 276_32【送夏侯校书归华阴别墅】

卢纶

山前白鹤村，竹雪覆柴门。候客定为黍，务农因燎原。
乳冰悬暗井，莲石照晴轩。赏酒邻里睦，曝衣场圃喧。
依然望君去，余性亦何昏。

卷 276_33【送绛州郭参军】

卢纶

炎天故绛路，千里麦花香。董泽雷声发，汾桥水气凉。
府趋随宓贱，野宴接王祥。送客今何幸，经宵醉玉堂。

卷 276_34【中书舍人李座上送颖阳徐少府】

卢纶

颍阳春色似河阳，一望繁花一县香。
今日送官君最恨，可怜才子白须长。

卷 276_35【与从弟瑾同下第后出关言别】

卢纶

同作金门献赋人，二年悲见故园春。
到阙不沾新雨露，还家空带旧风尘。

杂花飞尽柳阴阴，官路逶迤绿草深。
对酒已成千里客，望山空寄两乡心。

出关愁暮一沾裳，满野蓬生古战场。
孤村树色昏残雨，远寺钟声带夕阳。

谁怜苦志已三冬，却欲躬耕学老农。
流水白云寻不尽，期君何处得相逢。

卷 276_36 【赴虢州留别故人】

卢纶

世故相逢各未闲，百年多在别离间。
昨夜秋风今夜雨，不知何处入空山。

卷 276_37 【冬夜赠别友人】

卢纶

愁听千家流水声，相思独向月中行。侵阶暗草秋霜重，
遍郭寒山夜月明。连年客舍唯多病，数亩田园又废耕。

更送乘轺归上国，应怜贡禹未成名。

卷 276_38 【送顾秘书献书后归岳州】

卢纶

黄叶落不尽，苍苔随雨生。当轩置尊酒，送客归江城。
竹里闻机杼，舟中见弟兄。岳阳贤太守，应为改乡名。

卷 276_39 【送卫司法河中觐省（即故王吏部延昌外甥）】

卢纶

出身因强学，不以外家荣。年少无遗事，官闲有政声。
晓山临野渡，落日照军营。共赏高堂下，连行弟与兄。

卷 276_40 【送从叔牧永州】

卢纶

五侯轩盖行何疾，零陵太守登车日。零陵太守泪盈巾，
此日长安方欲春。虎府龙节照岐路，何苦愁为江海人。

彼方韶景无时节，山水诸花恣开发。客投津戍少闻猿，
雁过潇湘更逢雪。郡斋无事好闲眠，粳稻油油绿满川。
浪里争迎三蜀货，月中喧泊九江船。今朝小阮同夷老，
欲问明年借几年。

卷 276_41 【送赵真长归夏县旧山依阳征君读书】

卢纶

临杯忽泫然，非是恶离弦。尘陌望松雪，我衰君少年。
幽僧曝山果，寒鹿守冰泉。感物如有待，况依回也贤。

卷 276_42 【留别耿湋侯钊冯著】

卢纶

相识少相知，与君俱已衰。笙镛新宅第，岐路古山陂。
学道功难就，为儒事本迟。惟当与渔者，终老遂其私。

卷 276_43 【送浑炼归觐却赴阙庭】

卢纶

露幕拥簪裾，台庭饯伯鱼。彩衣人竞看，银诏帝亲书。

知子当元老，为臣饯二疏。执珪期已迫，捧膳步宁徐。
而我诚愚者，夫君岂病诸。探题多决胜，饌玉每分馀。
荣比成功后，恩同造化初。甌尘方欲合，笼翮或将舒。
榆莢钱难比，杨花雪不如。明朝古堤路，心断玉人车。

卷 276_44 【送崔邠拾遗】

卢纶

皎洁无瑕清玉壶，晓乘华幟向天衢。石建每闻宗谨孝，
刘歆不敢诤师儒。谏修郊庙开宸虑，议按休征浅瑞图。
今日攀车复何者，辕门垂白一愚夫。

卷 276_45 【送浑别驾赴舒州】

卢纶

江平芦荻齐，五两贴檣低。绕郭覆晴雪，满船闻曙鸡。
鱸鲙宜入贡，橘柚亦成蹊。还似海沂日，风清无鼓鼙。

卷 276_46 【送从叔士准赴任润州司士】

卢纶

云起山城暮，沈沈江上天。风吹建业雨，浪入广陵船。
久是吴门客，尝闻谢守贤。终悲去国远，泪尽竹林前。

卷 276_47【送尹枢令狐楚及第后归觐】

卢纶

佳人比香草，君子即芳兰。宝器金罍重，清音玉珮寒。
贡文齐受宠，献礼两承欢。鞍马并汾地，争迎陆与潘。

卷 276_48【东潭宴饯河南赵少府】

卢纶

十载奉戎轩，日闻君子言。方将贺荣爵，遽乃怆离尊。
岸转台阁丽，潭清弦管繁。松篁难晦节，雨露不私恩。
坐使吏相勉，居为儒所尊。可怜桃李树，先发信陵门。

卷 276_49【赋得馆娃宫送王山人游江东】

卢纶

苍苍枫树林，草合废宫深。越水风浪起，吴王歌管沈。
燕归巢已尽，鹤语冢难寻。旅泊彼何夜，希君抽玉琴。

卷 276_50 【送畅当还旧山】

卢纶

常逢明月马尘间，是夜照君归处山。
山中松桂花尽发，头白属君如等闲。

卷 276_51 【数颜鲁公送挺赟归翠微寺】

卢纶

挺赟惠学该儒释，袖有颜徐真草迹。一斋三请纪行诗，
诮我垂鞭弄鸣镝。寺悬金榜半山隅，石路荒凉松树枯。
虎迹印雪大如斗，闰月暮天过得无。

卷 276_52 【送契玄法师赴内道场】

卢纶

昏昏醉老夫，灌顶遇醍醐。嫔御呈心镜，君王赐髻珠。
降魔须战否，问疾敢行无。深契何相秘，儒宗本不殊。

卷 276_53 【送畅当赴山南幕】

卢纶

含情脱佩刀，持以佐贤豪。是月霜霰下，伊人行役劳。
事将名共易，文与行空高。去矣奉戎律，悲君为我曹。

卷 276_54【颜侍御厅丛篁咏送薛存诚】

卢纶

玉干百馀茎，生君此堂侧。拂帘寒雨响，拥砌深溪色。
何事凤凰雏，兹焉理归翼。

卷 276_55【秋晚河西县楼送浑中允赴朝阙】

卢纶

高楼吹玉箫，车马上河桥。岐路自奔隘，壶觞终寂寥。
芳兰生贵里，片玉立清朝。今日台庭望，心遥非地遥。

卷 276_56【达奚中丞东斋壁画山水...得树杪悬泉送长安赵元阳少府】

卢纶

素壁画飞泉，从云落树颠。练垂疑叶响，云并觉枝偏。
利物得双剑，为儒当一贤。应思洒尘陌，调膳亦芳鲜。

卷 276_57【送信州姚使君】

卢纶

朱幡徐转候群官，猿鸟无声郡宇宽。楚国上腴收赋重，
汉家良牧得人难。铜铅满穴山能富，鸿雁连群地亦寒。
几日政声闻户外，九江行旅得相欢。

卷 276_58【送畅当】

卢纶

四望无极路，千里流大河。秋风满离袂，唯老事唯多。

卷 276_59【送史兵曹判官赴楼烦】

卢纶

渥洼龙种散云时，千里繁花乍别离。中有重臣承霈泽，
外无轻虏犯旌旗。山川自与郊垌合，帐幕时因水草移。
敢谢亲贤得琼玉，仲宣能赋亦能诗。

卷 276_60 【送昙延法师讲罢赴上都】

卢纶

金缕袈裟国大师，能销坏宅火烧时。
复来拥膝说无住，知向人天何处期。

卷 276_61 【送道士郗彝素归内道场】

卢纶

病老正相仍，忽逢张道陵。羽衣风淅淅，仙貌玉棱棱。
叱我问中寿，教人祈上升。楼居五云里，几与武皇登。

卷 276_62 【赋得彭祖楼送杨德宗归徐州幕】

卢纶

四户八窗明，玲珑逼上清。外栏黄鹄下，中柱紫芝生。
每带云霞色，时闻箫管声。望君兼有月，幢盖俨层城。

卷 276_63 【送钱从叔辞丰州幕归嵩阳旧居】

卢纶

白须宗孙侍坐时，愿持寿酒前致词。鄙词何所拟，
请自边城始。边城贵者李将军，战鼓遥疑天上闻。
屯田布锦周千里，牧马攒花溢万群。白云本是乔松伴，
来绕青营复飞散。三声画角咽不通，万里蓬根一时断。
丰州闻说似凉州，沙塞晴明部落稠。行客已去依独戍，
主人犹自在高楼。梦亲旌旆何由见，每阻清风一回面。
洞里先生那怪迟，人天无路自无期。砂泉丹井非同味，
桂树榆林不并枝。吾翁致身殊得计，地仙亦是三千岁。
莫著戎衣期上清，东方曼倩逢人轻。

卷 276_64【送静居法师】

卢纶

五色香幢重复重，宝舆升座发神钟。薝卜名花飘不断，
醍醐法味洒何浓。九天论道当宸眷，七祖传心合圣踪。
愿比灵山前世别，多生还得此相逢。

卷 276_65【送刘判官赴丰州（一作赴天德军）】

卢纶

衔杯吹急管，满眼起风砂。大漠山沈雪，长城草发花。

策行须耻战，虏在莫言家。余亦祈勋者，如何别左车。

卷 276_66【将赴京留献令公】

卢纶

沙鹤惊鸣野雨收，大河风物飒然秋。
力微恩重谅难报，不是行人不解愁。

卷 276_67【落第后归山下旧居留别刘起居昆季】

卢纶

寂寞过朝昏，沈忧岂易论。有时空卜命，无事可酬恩。
寄食依邻里，成家望子孙。风尘知世路，衰贱到君门。
醉里因多感，愁中欲强言。花林逢废井，战地识荒园。
怅别临晴野，悲春上古原。鸟归山外树，人过水边村。
潘岳方称老，嵇康本厌喧。谁堪将落羽，回首仰飞翻。

卷 276_68【将赴阆乡灞上留别钱起员外】

卢纶

暖景登桥望，分明春色来。离心自惆怅，车马亦裴回。

远雪和霜积，高花占日开。从官竟何事，忧患已相催。

卷 276_69 【虢州逢侯钊同寻南观因赠别（时居停务）】

卢纶

相见翻惆怅，应怜责废官。过深惭禄在，识浅赖刑宽。
独失耕农业，同思弟侄欢。衰贫羞客过，卑束会君难。
放鹤登云壁，浇花绕石坛。兴还江海上，迹在是非端。
林密风声细，山高雨色寒。悠然此中别，宾仆亦阑干。

卷 276_70 【赴池州拜觐舅氏留上考功郎中舅（时舅氏初贬官池州）】

卢纶

孤贱易蹉跎，其如酷似何。衰荣同族少，生长外家多。
别国桑榆在，沾衣血泪和。应怜失行雁，霜霰寄烟波。

卷 276_71 【送从侄滁州觐省】

卢纶

爱尔似龙媒，翩翩千里回。书从外氏学，竹自晋时栽。

拥棹逢鸥舞，凭阑见雨来。上堂多庆乐，不醉莫停杯。

卷 276_72【奉和圣制麟德殿宴百僚】

卢纶

云辟御筵张，山呼圣寿长。玉栏丰瑞草，金陛立神羊。
台鼎资庖膳，天星奉酒浆。蛮夷陪作位，犀象舞成行。
网已祛三面，歌因守四方。千秋不可极，花发满宫香。

卷 276_73【和考功王员外杪秋忆终南旧居（一作岑参诗，或常袞诗）】

卢纶

静忆溪边宅，知君许谢公。晓霜凝未耜，初日照梧桐。
涧鼠喧藤蔓，山禽窜石丛。白云当岭雨，黄叶绕阶风。
野果垂桥上，高泉落水中。欢荣来自间，羸贱赏曾同。
月满珠藏海，天晴鹤在笼。馀阴如可寄，愿得隐墙东。

卷 276_74【酬畅当寻嵩岳麻道士见寄】

卢纶

闻逐樵夫闲看棋，忽逢人世是秦时。开云种玉嫌山浅，
渡海传书怪鹤迟，阴洞石床微有字，古坛松树半无枝。
烦君远示青囊篆，愿得相从一问师。

卷 276_75【酬李端长安寓居偶咏见寄】

卢纶

自别前峰隐，同为外累侵。几年亲酒会，此日有僧寻。
学稼功还弃，论边事亦沈。众欢徒满目，专爱久离心。
览鬓丝垂镜，弹琴泪洒襟。访田悲洛下，寄宅忆山阴。
薄溜漫青石，横云架碧林。坏檐藤障密，衰菜棘篱深。
流散俱多故，忧伤并在今。唯当俟高躅，归止共抽簪。

卷 276_76【和常舍人晚秋集贤院即事十二韵寄赠江南徐薛
二侍郎】

卢纶

纶阁九华前，森沈彩仗连。洞门开旭日，清禁肃秋天。
霜满朝容备，钟馀漏唱传。摇珰陪羽扇，端弁入炉烟。
麟笔删金篆，龙绡荐玉编。汲书荀勖定，汉史蔡邕专。
御竹潜通笋，宫池暗泻泉。乱丛萦弱蕙，坠叶洒枯莲。
列署齐游日，重江并谪年。登封思议草，侍讲忆同筵。
沧海风涛广，黜山瘴雨偏。唯应絺上宝，赠远一呈妍。

卷 276_77 【酬苗员外仲夏归郊居遇雨见寄】

卢纶

雷响风仍急，人归鸟亦还。乱云方至水，骤雨已喧山。
田鼠依林上，池鱼戏草间。因兹屏埃雾，一咏一开颜。

卷 276_78 【和太常王卿立秋日即事】

卢纶

嵩高云日明，潘岳赋初成。篱槿花无色，阶桐叶有声。
绡纱垂簟净，白羽拂衣轻。鸿雁悲天远，龟鱼觉水清。
别弦添楚思，牧马动边情。田雨农官问，林风苑吏惊。
松篁终茂盛，蓬艾自衰荣。遥仰凭轩夕，惟应喜宋生。

第二百七十七卷

卷 277_1【和李使君三郎早秋城北亭楼宴崔司士...关中弟张评事时遇】

卢纶

黄花古城路，上尽见青山。桑柘晴川口，牛羊落照间。
野情随卷幔，军士隔重关。道合偏多赏，官微独不闲。
鹤分琴久罢，书到雁应还。为谢登龙客，琼枝寄一攀。

卷 277_2【和赵端公九日登石亭上和州家兄】

卢纶

洛浦想江津，悲欢共此辰。采花湖岸菊，望国旧楼人。
雁别声偏苦，松寒色转新。传书问渔叟，借寇尔何因。

卷 277_3【酬赵少尹戏示诸侄元阳等因以见赠】

卢纶

八龙三虎俨成行，琼树花开鹤翼张。且请同观舞鸂鶒，
何须竞晒食槟榔。归时每爱怀朱橘，戏处常闻佩紫囊。
谬入阮家逢庆乐，竹林因得奉壶觞。

卷 277_4 【奉和卢曹叔夏夜寓直寄呈同曹诸公并见示】

卢纶

敛板捧清词，恭闻侍直时。暮尘归众骑，邃宇舍诸司。
华月先灯至，清风与簟随。乱萤光熠熠，行树影离离。
龙卧人宁识，鹏抟鷃岂知。便因当五夜，敢望竹林期。

卷 277_5 【和金吾裴将军使往河北宣慰...兼寄赵侍郎赵卿拜陵未回】

卢纶

飞轩不驻轮，感激汉儒臣。气慑千夫勇，恩传万里春。
古原收野燎，寒笛怨空邻。书此达良友，五陵风雨频。

卷 277_6 【和太常李主簿秋中山下别墅即事】

卢纶

清秋来几时，宋玉已先知。旷朗霞映竹，澄明山满池。
葺桥双鹤赴，收果众猿随。韶乐方今奏，云林徒蔽亏。

卷 277_7 【酬韦渚秋夜有怀见寄】

卢纶

萧条良夜永，秋草对衰颜。露下鸟初定，月明人自闲。
独悲无旧业，共喜出时艰。为问功成后，同游何处山。

卷 277_8 【同吉中孚梦桃源】

卢纶

春雨夜不散，梦中山亦阴。云中碧潭水，路暗红花林。
花水自深浅，无人知古今。

夜静春梦长，梦逐仙山客。园林满芝朮，鸡犬傍篱栅。
几处花下人，看予笑头白。

卷 277_9 【同柳侍郎题侯钊侍郎新昌里（一作酬候钊侍郎春日见寄）】

卢纶

清源君子居，左右尽图书。三径春自足，一瓢欢有馀。
庭莎成野席，阑药是家蔬。幽显岂殊迹，昔贤徒病诸。

卷 277_10 【酬孙侍御春日见寄】

卢纶

经过里巷春，同是谢家邻。顾我觉衰早，荷君留醉频。
松高犹覆草，鹤起暂萦尘。始悟达人志，患名非患贫。

卷 277_11 【和王员外冬夜寓直】

卢纶

高步长裾锦帐郎，居然自是汉贤良。潘岳叙年因鬓发，
扬雄托谏在文章。九天韶乐飘寒月，万户香尘裛晓霜。
坐见重门俨朝骑，可怜云路独翱翔。

卷 277_12 【酬金部王郎中省中春日见寄】

卢纶

南宫树色晓森森，虽有春光未有阴。鹤侣正疑芳景引，
玉人那为簿书沈。山含瑞气偏当日，莺逐轻风不在林。

更有阮郎迷路处，万株红树一溪深。

卷 277_13【奉和陕州十四翁中丞寄雷州二十翁司户】

卢纶

联飞独不前，迢落海南天。贾傅竟行矣，邵公唯泫然。
瘴开山更远，路极水无边。沈劣本多感，况闻原上篇。

卷 277_14【和李中丞酬万年房署少府过汾州景云观...李早年同居此观】

卢纶

显晦澹无迹，贤哉常晏如。如何警孤鹤，忽乃传双鱼。
叙以泉石旧，怅然风景馀。低回青油幕，梦寐白云居。
玉洞桂香满，雪坛松影疏。沈思矚仙侣，纾组正军书。
积学早成道，感恩难遂初。梅生谅多感，归止岂吾庐。

卷 277_15【酬陈翊郎中冬至携柳郎宴郎归河中旧居见寄】

卢纶

三旬一休沐，清景满林庐。南郭群儒从，东床两客居。

烧烟浮雪野，麦陇润冰渠。班白皆持酒，蓬茅尽有书。
终期买寒渚，同此利蒲鱼。

卷 277_16【酬李益端公夜宴见赠】

卢纶

戚戚一西东，十年今始同。可怜歌酒夜，相对两衰翁。

卷 277_17【和陈翊郎中拜本府少尹兼侍御史献上侍中因呈
同院诸公】

卢纶

金印垂鞍白马肥，不同疏广老方归。三千士里文章伯，
四十年来锦绣衣。节比青松当涧直，心随黄雀绕檐飞。
乡中贺者唯争路，不识传呼獬豸威。

卷 277_18【和王仓少尹暇日言怀】

卢纶

清秋多暇日，况乃是夫君。习静通仙事，书空阅篆文。
剑飞终上汉，鹤梦不离云。无限烟霄路，何嗟迹未分。

卷 277_19 【和崔侍郎游万固寺】

卢纶

闻说中方高树林，曙华先照啜春禽。风云才子冶游思，
蒲柳老人惆怅心。石路青苔花漫漫，雪檐垂溜玉森森。
贺君此去君方至，河水东流西日沉。

卷 277_20 【和裴延龄尚书寄题果州谢舍人仙居】

卢纶

飘然去谒八仙翁，自地从天香满空。紫盖迴标双鹤上，
语音犹在五云中。青溪不接渔樵路，丹井唯传草木风。
歌此因思捧金液，露盘长庆汉皇宫。

卷 277_21 【酬崔侍御早秋卧病书情见寄时君亦抱疾在假中】

卢纶

掷地金声信有之，莹然冰玉见清词。元凯癖成官始贵，
相如渴甚貌逾衰。荒园每觉虫鸣早，华馆常闻客散迟。
寂寞罢琴风满树，几多黄叶落蛛丝。

卷 277_22 【酬灵澈上人（一和口号戏赠灵澈上人时奉事入城）】

卢纶

军人奉役本无期，落叶花开总不知。
走马城中头雪白，若为将面见汤师。

卷 277_23 【敬酬大府二十四舅览诗卷因以见示】

卢纶

郃公怜戆亦怜愚，忽赐金盘径寸珠。彻底碧潭滋涸溜。
压枝红艳照枯株。九门洞启延高论，百辟联行挹大儒。
顾己文章非酷似，敢将幽劣俟洪炉。

卷 277_24 【雨中酬友人】

卢纶

看山独行归竹院，水绕前阶草生遍。
空林细雨暗无声，唯有愁心两相见。

卷 277_25 【酬人失题】

卢纶

孤鸾将鹤群，晴日丽春云。何幸晚飞者，清音长此闻。

卷 277_26 【哭司农苗主簿】

卢纶

原头殡御绕新茔，原下行人望哭声。
更想秋山连古木，唯应石上见君名。

卷 277_27 【得耿漳司法书因叙长安故友零落兵部...郑仓曹
畅参军昆季】

卢纶

鬓似衰蓬心似灰，惊悲相集老相催。故友九泉留语别，
逐臣千里寄书来。坐容带病何堪问，泪眼逢秋不喜开。
幸接野居宜屣步，冀君清夜一申哀。

卷 277_28 【同兵部李纾侍郎刑部包佶侍郎哭皇甫侍御曾】

卢纶

攀龙与泣麟，哀乐不同尘。九陌霄汉侣，一灯冥漠人。
舟沈惊海阔，兰折怨霜频。已矣复何见，故山应更春。

卷 277_29【纶与吉侍郎中孚司空郎中曙苗员外发崔补阙
峒...侯仓曹钊】

卢纶

禀命孤且贱，少为病所婴。八岁始读书，四方遂有兵。
童心幸不羁，此去负平生。是月胡入洛，明年天陨星。
夜行登灞陵，惆怅靡所征。云海一翻荡，鱼龙俱不宁。
因浮襄江流，远寄鄱阳城。鄱阳富学徒，诮我戆无营。
谕以诗礼义，勸随宾荐名。舟车更滞留，水陆互阴晴。
晓望怯云阵，夜愁惊鹤声。凄凄指宋郊，浩浩入秦京。
沴气既风散，皇威如日明。方逢粟比金，未识公与卿。
十上不可待，三年竟无成。偶为达者知，扬我于王廷。
素志且不立，青袍徒见萦。昏孱夙自保，静躁本殊形。
始趋甘棠阴，旋遇密人迎。考实绩无取，责能才固轻。
新丰古离宫，宫树锁云扃。中复莅兹邑，往惟曾所经。
繚垣何逶迤，水殿亦峥嵘。夜雨滴金砌，阴风吹玉楹。
官曹虽检率，国步日夷平。命蹇固安分，祸来非有萌。
因逢骇浪飘，几落无辜刑。巍巍登坛臣，独正天柱倾。
悄悄失途子，分将秋草并。百年甘守素，一顾乃拾青。
相逢十月交，众卉飘已零。感旧谅戚戚，问孤恳茕茕。

侍郎文章宗，杰出淮楚灵。掌赋若吹籁，司言如建瓴。
郎中善馀庆，雅韵与琴清。郁郁松带雪，萧萧鸿入冥。
员外真贵儒，弱冠被华缨。月香飘桂实，乳溜滴琼英。
补阙思冲融，巾拂艺亦精。彩蝶戏芳圃，瑞云凝翠屏。
拾遗兴难侔，逸调旷无程。九酝贮弥洁，三花寒转馨。
校书才智雄，举世一娉婷。赌墅鬼神变，属词鸾凤惊。
差肩曳长裾，总辔奉和铃。共赋瑶台雪，同观金谷筍。
倚天方比剑，沈井忽如瓶。神昧不可问，天高莫尔听。
君持玉盘珠，泻我怀袖盈。读罢涕交颐，愿言跻百龄。

卷 277_30 【酬李叔度秋夜喜相遇因伤关东僚友丧逝见赠】

卢纶

寒月照秋城，秋风泉涧鸣。过时见兰蕙，独夜感衰荣。
酒散同移疾，心悲似远行。以愚求作友，何德敢称兄。
谷变波长急，松枯药未成。恐看新鬓色，怯问故人名。
野泽云阴散，荒原日气生。羁飞本难定，非是恶弦惊。

卷 277_31 【同李益伤秋】

卢纶

岁去人头白，秋来树叶黄。搔头向黄叶，与尔共悲伤。

卷 277_32【白发叹】

卢纶

发白晓梳头，女惊妻泪流。不知丝色后，堪得几回秋。

卷 277_33【逢病军人】

卢纶

行多有病住无粮，万里还乡未到乡。
蓬鬓哀吟古城下，不堪秋气入金疮。

卷 277_34【村南逢病叟】

卢纶

双膝过颐顶在肩，四邻知姓不知年。
卧驱鸟雀惜禾黍，犹恐诸孙无社钱。

卷 277_35【七夕诗（同用秋字，一作他乡七夕）】

卢纶

祥光若可求，闺女夜登楼。月露浩方下，河云凝不流。
铅华潜警曙，机杼暗传秋。回想敛馀眷，人天俱是愁。

卷 277_36【七夕诗（同用期字）】

卢纶

凉风吹玉露，河汉有幽期。星彩光仍隐，云容掩复离。
良宵惊曙早，闰岁怨秋迟。何事金闺子，空传得网丝。

卷 277_37【长门怨】

卢纶

空空古廊殿，寒月落斜晖。卧听未央曲，满箱歌舞衣。

卷 277_38【妾薄命】

卢纶

妾年初二八，两度嫁狂夫。薄命今犹在，坚贞扫地无。

卷 277_39【伦开府席上赋得咏美人名解愁】

卢纶

不敢苦相留，明知不自由。
颦眉乍欲语，敛笑又低头。
舞态兼些醉，歌声似带羞。
今朝总见也，只不解人愁。

卷 277_40【王评事驸马花烛诗】

卢纶

万条银烛引天人，十月长安半夜春。
步障三千隘将断，几多珠翠落香尘。

一人女婿万人怜，一夜调疏抵百年。
为报司徒好将息，明珠解转又能圆。

人主人臣是亲家，千秋万岁保荣华。
几时曾向高天上，得见今宵月里花。

比翼和鸣双凤凰，欲栖金帐满城香。
平明却入天泉里，日气曈曈五色光。

卷 277_41【和赵给事白蝇拂歌】

卢纶

华堂多众珍，白拂称殊异。柄裁沈节香袭人，
上结为文下垂穗。霜缕霏微莹且柔，虎须乍细龙髯稠。
皎然素色不因染，淅尔凉风非为秋。群蝇青苍恣游息，
广庖万品无颜色。金屏成点玉成瑕，昼眠宛转空咨嗟。
此时满筵看一举，荻花忽旋杨花舞，害如寒隼惊暮禽，
飒若繁埃得轻雨。主人说是故人留，每诫如新比白头。
若将挥玩闲临水，愿接波中一白鸥。

卷 277_42【萧常侍瘦柏亭歌】

卢纶

柏之异者山中灵，何人断绝为君亭。云翻浪卷不可识，
鸟兽成形花倒植。莓苔旧点色尚青，霹雳残痕节犹黑。
金貂主人汉三老，构此穷年下朝早。心规目制不暂疲，
匠者受之无一词。清晨拂匣菱生镜，落日凭阑星满池。
攒甍斗拱无斤迹，根瘦联悬同素壁。数层乱泻云里峰，
万片争呈雪中石，重帘不动自飘香，似到瀛洲白玉堂。
水精如意刁金色，云母屏风透掩光。四阶绵绵被纤草，
草上依微众山道。松间汲井烟翠寒，洞里围棋天景好。
愚儒敢欲贺成功，鸾凤栖翔固不同。应念废材今接地，
一枝思寄户庭中。

卷 277_43【慈恩寺石磬歌】

卢纶

灵山石磬生海西，海涛平处与山齐。长眉老僧同佛力，
咒使鲛人往求得。珠穴沈成绿浪痕，天衣拂尽苍苔色。
星汉徘徊山有风，禅翁静扣月明中。群仙下云龙出水，
鸾鹤交飞半空里。山精木魅不可听，落叶秋砧一时起。
花宫杳杳响泠泠，无数沙门昏梦醒。古廊灯下见行道，
疏林池边闻诵经。徒壮洪钟秘高阁，万金费尽工雕凿。
岂如全质挂青松，数叶残云一片峰。吾师宝之寿中国，
愿同劫石无终极。

卷 277_44 【送张郎中还蜀歌】

卢纶

秦家御史汉家郎，亲专两印征殊方。功成走马朝天子，
伏槛论边若流水。晓离仙署趋紫微，夜接高儒读青史。
泸南五将望君还，愿以天书示百蛮。曲栈重江初过雨，
前旌后骑不同山。迎车拜舞多耆老，旧卒新营遍青草。
塞口云生火候迟，烟中鹤唳军行早。黄花川下水交横，
远映孤霞蜀国晴。邛竹笋长椒瘴起，荔枝发杜鹃鸣。
回首岷峨半天黑，传觞接膝何由得。空令豪士仰威名，
无复贫交恃颜色。垂杨不动雨纷纷，锦帐胡瓶争送君。
须臾醉起箫笳发，空见红旗入白云。

卷 277_45【宴席赋得姚美人拍箏歌（美人曾在禁中）】

卢纶

出帘仍有钿箏随，见罢翻令恨识迟。微收皓腕缠红袖，
深遏朱弦低翠眉。忽然高张应繁节，玉指回旋若飞雪。
凤箫韶管寂不喧，绣幕纱窗俨秋月。有时轻弄和郎歌，
慢处声迟情更多。已愁红脸能佯醉，又恐朱门难再过，
昭阳伴里最聪明，出到人间才长成。遥知禁曲难翻处，
犹是君王说小名。

卷 277_46【陈翊郎中北亭送侯钊侍御赋得带冰流歌】

卢纶

溪中鸟鸣春景旦，一派寒冰忽开散。璧方镜员流不断，
白云鳞鳞满河汉。叠处浅，旋处深。撒掬寒鱼上复沉，
群鹅鼓舞扬清音。主人有客簪白笔，玉壶贮水光如一。
持此赠君君饮之，圣君识君冰玉姿。

卷 277_47【栖岩寺隋文帝马脑盏歌】

卢纶

天宫宝器隋朝物，锁在金函比金骨。开函捧之光乃发，
阿修罗王掌中月。五云如拳轻复浓，昔曾噉酒今藏龙。
规形环影相透彻，乱雪繁花千万重。可怜贞质无今古，
可叹隋陵一抔土。宫中艳女满宫春，得亲此宝能几人。
一留寒殿殿将坏，唯有幽光通隙尘。山中老僧眉似雪，
忍死相传保扃鐏。

卷 277_48【难绾刀子歌】

卢纶

黄金鞘里青芦叶，丽若剪成钅且翼。轻冰薄玉状不分，
一尺寒光堪决云。吹毛可试不可触，似有虫搜阙裂文。
淬之几堕前池水，焉知不是蛟龙子。割鸡刺虎皆若空，
愿应君心逐君指。并州难绾竟何人，每成此物如有神。

卷 277_49【腊日观咸宁王部曲娑勒擒豹歌】

卢纶

山头曈曈日将出，山下猎围照初日。前林有兽未识名，
将军促骑无人声，潜形踞伏草不动，双雕旋转群鸦鸣。
阴方质子才三十，译语受词蕃语揖。舍鞍解甲疾如风，
人忽虎蹲兽人立。欻然扼颡批其颐，爪牙委地涎淋漓。
既苏复吼拗仍怒，果协英谋生致之。拖自深丛目如电，

万夫失容千马战。传呼贺拜声相连，杀气腾腾阴满川。
始知缚虎如缚鼠，败虏降羌生眼前。祝尔嘉词尔无苦，
献尔将随犀象舞。苑中流水禁中山，期尔攫搏开天颜。
非熊之兆庆无极，愿纪雄名传百蛮。

卷 277_50 【赋得白鸥歌送李伯康归使】

卢纶

积水深源，白鸥翻翻。倒影光素，于潭之间。
衔鱼鱼落乱惊鸣，争扑莲丛莲叶倾。
尔不见波中鸥鸟闲无营，何必汲汲劳其生。
柳花冥濛大堤口，悠扬相和乍无有。轻随去浪杳不分，
细舞清风亦何有。似君换得白鹅时，独凭阑干雪满池。
今日还同看鸥鸟，如何羽翮复参差。复参差，
海涛澜漫何由期。

卷 277_51 【皇帝感词】

卢纶

提剑风雷动，垂衣日月明。禁花呈瑞色，国老见星精。
发棹鱼先跃，窥巢鸟不惊。山呼一万岁，直入九重城。

天香五凤彩，御马六龙文。雨露清驰道，风雷翊上军。

高旂花外转，行漏乐前闻。时见金鞭举，空中指瑞云。

妙算干戈止，神谋宇宙清。两阶文物盛，七德武功成。
校猎长杨苑，屯军细柳营。归来献明主，歌舞溢春城。

天乐下天中，云輶俨在空。铅黄艳河汉，笑语合笙镛。
已见长随凤，仍闻不避熊。君王亲试舞，阊阖静无风。

第二百七十八卷

卷 278_1【天长久词】

卢纶

玉砌红花树，香风不敢吹。春光解天意，偏发殿南枝。

虹桥千步廊，半在水中央。天子方清暑，宫娃起夜妆。

辞辇复当熊，倾心奉六宫。君王若看貌，甘在众妃中。

云日呈祥礼物殊，彤庭生献五单于。

塞垣万里无飞鸟，可是边城用郅都。

台殿云深秋色微，君王初赐六宫衣。

楼船泛罢归犹早，行遣才人斗射飞。

卷 278_2【和张仆射塞下曲】

卢纶

鸢翎金仆姑，燕尾绣蝥弧。独立扬新令，千营共一呼。
林暗草惊风，将军夜引弓。平明寻白羽，没在石棱中。
月黑雁飞高，单于夜遁逃。欲将轻骑逐，大雪满弓刀。
野幕敞琼筵，羌戎贺劳旋。醉和金甲舞，雷鼓动山川。
调箭又呼鹰，俱闻出世能。奔狐将进雉，扫尽古丘陵。
亭亭七叶贵，荡荡一隅清。他日题麟阁，唯应独不名。

卷 278_3【古艳诗】

卢纶

残妆色浅髻鬟开，笑映朱帘颺客来。
推醉唯知弄花钿，潘郎不敢使人催。

自拈裙带结同心，暖处偏知香气深。
爱捉狂夫问闲事，不知歌舞用黄金。

卷 278_4【孤松吟酬浑赞善】

卢纶

深山荒松枝，雪压半离披。朱门青松树，万叶承清露。
露重色逾鲜，吟风似远泉。天寒香自发，日丽影常圆。
阴郊一夜雪，榆柳皆枯折。回首望君家，翠盖满琼花。
捧君青松曲，自顾同衰木。曲罢不相亲，深山头白人。

卷 278_5【从军行（一作李端诗，题云塞上）】

卢纶

二十在边城，军中得勇名。卷旗收败马，占磧拥残兵。
覆阵乌鸢起，烧山草木明。塞闲思远猎，师老厌分营。
雪岭无人迹，冰河足雁声。李陵甘此没，惆怅汉公卿。

卷 278_6【和马郎中画鹤赞】

卢纶

高高华亭，有鹤在屏。削玉点漆，乘轩姓丁。
暮云冥冥，双垂雪翎。晨光炯炯，一直朱顶。
含音俨容，绝粒遗影。君以为真，相期缙岭。

卷 278_7【送朝长史赴荆南旧幕】

卢纶

元瑜思旧幕，几夜梦旌旃。暑退蒹葭雨，秋生鼓角天。
月明三峡路，浪里九江船。□□□□□，□□□□□。

卷 278_8【送渭南崔少府归徐郎中幕】

卢纶

叶下山边路，行人见自悲。夜寒逢雪处，日暖到村时。
语少心长苦，愁深醉自迟。□□□□□，羨有幕中期。

卷 278_9【寄郑七纲】

卢纶

小来落托复迍迍，一辱君知二十年，舍去形骸容傲慢，
引随兄弟共团圆。羁游不定同云聚，薄宦相萦若网牵。
他日吴公如记问，愿将黄绶比青毡。

卷 278_10【逢南中使因寄岭外故人】

卢纶

见说南来处，苍梧接桂林。过秋天更暖，边海日长阴。
巴路缘云出，蛮乡入洞深。信回人自老，梦到月应沉。

碧水通春色，青山寄远心。炎方难久客，为尔一沾襟。

卷 278_11【代员将军罢战后归旧里赠朔北故人（一作常袞诗）】

卢纶

结发事疆场，全生俱到乡。连云防铁岭，同日破渔阳。
牧马胡天晚，移军碛路长。枕戈眠古戍，吹角立繁霜。
归老勋仍在，酬恩虏未亡。独行过邑里，多病对农桑。
雄剑依尘囊，阴符寄药囊。空馀麾下将，犹逐羽林郎。

卷 278_12【江北忆崔汶】

卢纶

夜问江西客，还知在楚乡。全身出部伍，尽室逐渔商。
晴日游瓜步，新年对汉阳。月昏惊浪白，瘴起觉云黄。
望岭家何处，登山泪几行。闽中传有雪，应且住南康。

卷 278_13【早春归盩厔旧居却寄耿拾遗漳李校书端】

卢纶

野日初晴麦垄分，竹园相接鹿成群。几家废井生青草，
一树繁花傍古坟。引水忽惊冰满涧，向田空见石和云。
可怜荒岁青山下，惟有松枝好寄君。

卷 278_14【春日山中忆崔峒吉中孚（一作寄李舍人）】

卢纶

延步爱清晨，空山日照春。蜜房那有主，石室自无邻。
泉急鱼依藻，花繁鸟近人。谁言失徒侣，唯与老相亲。

卷 278_15【客舍喜崔补阙司空拾遗访宿】

卢纶

步月访诸邻，蓬居宿近臣。乌裘先醉客，清镜早朝人。
坏壁烟垂网，香街火照尘。悲荣俱是分，吾亦乐吾贫。

卷 278_16【苦雨闻包谏议欲见访戏赠】

卢纶

草气厨烟咽不开，绕床连壁尽生苔。
常时多病因多雨，那敢烦君车马来。

卷 278_17【客舍苦雨即事寄钱起郎士元二员外】

卢纶

积雨暮凄凄，羁人状鸟栖。响空宫树接，覆水野云低。
穴蚁多随草，巢蜂半坠泥。绕池墙藓合，拥溜瓦松齐。
旧圃平如海，新沟曲似溪。坏阑留众蝶，欹栋止群鸡。
莠盛终无实，槎枯返有蕢。绿萍藏废井，黄叶隐危堤。
閤里欢将绝，朝昏望亦迷。不知霄汉侣，何路可相携。

卷 278_18【郊居对雨寄赵涓给事包佶郎中】

卢纶

暑雨青山里，随风到野居。乱沓浮曲砌，悬溜响前除。
尘镜愁多掩，蓬头懒更梳。夜窗凄枕席，阴壁润图书。
萧飒宜新竹，龙钟拾野蔬。石泉空自咽，药圃不堪锄。
浊水淙深辙，荒兰拥败渠。繁枝留宿鸟，碎浪出寒鱼。
桑屐时登望，荷衣自卷舒。应怜在泥滓，无路托高车。

卷 278_19【蓝溪期萧道士采药不至】

卢纶

春风生百药，几处术苗香。人远花空落，溪深日复长。
病多知药性，老近忆仙方。清节何由见，三山桂自芳。

卷 278_20 【雪谤后书事上皇甫大夫】

卢纶

盛德总群英，高标仰国桢。独安巡狩日，曾掩赵张名。
业就难辞宠，朝回更授兵。晓川分牧马，夜雪覆连营。
长策威殊俗，嘉谋翊圣明。画图规阵势，梦笔纪山行。
绶拂池中影，珂摇竹外声。赐欢征妓乐，陪醉问公卿。
却忆经前事，翻疑得此生。分深存没感，恩在子孙荣。
览镜愁将老，扪心喜复惊。岂言沈族重，但觉杀身轻。
有泪沾坟典，无家集弟兄。东西遭世难，流浪识交情。
阅古宗文举，推才慕正平。应怜守贫贱，又欲事躬耕。

卷 278_21 【春日忆司空文明】

卢纶

桃李风多日欲阴，百劳飞处落花深。
贫居静久难逢信，知隔春山不可寻。

卷 278_22 【卧病寓居龙兴观枉冯十七著作书知罢...寄冯生

并赠乔尊师】

卢纶

乞假依山宅，蹉跎属岁周。弱萸轻采拾，钝质称归休。
潘岳衰将至，刘桢病未瘳。步迟乘羽客，起晏滞书邮。
幸以编方验，终贻骨肉忧。灼龟炉气冷，曝药树阴稠。
语命心堪醉，伤离梦亦愁。羣羶居已绝，鸾鹤见无由。
世累如尘积，年光剧水流。蹶云知有路，济海岂无舟。
倚玉翻成难，投砖敢望酬。卑栖君就禄，羸惫我逢秋。
腐叶填荒辙，阴萤出古沟。依然在遐想，愿子励风猷。

卷 278_23【秋夜寄冯著作】

卢纶

河汉净无云，鸿声此夜闻。素心难比石，苍鬓欲如君。
露槿月中落，风萤池上分。何言千载友，同迹不同群。

卷 278_24【洛阳早春忆吉中孚校书、司空曙主簿因寄清江上人】

卢纶

值迴逢高驻马频，雪晴闲看洛阳春。莺声报远同芳信，
柳色邀欢似故人。酒貌昔将花共艳，鬓毛今与草争新。
年来百事皆无绪，唯与汤师结净因。

卷 278_25 【偶逢姚校书凭附书达河南郗推官因以戏赠】

卢纶

寄书常切到常迟，今日凭君君莫辞。
若问玉人殊易识，莲花府里最清羸。

卷 278_26 【夜中得循州赵司马侍郎书因寄回使】

卢纶

瘴海寄双鱼，中宵达我居。两行灯下泪，一纸岭南书。
地说炎蒸极，人称老病馀。殷勤报贾傅，莫共酒杯疏。

卷 278_27 【晚次新丰北野老家书事呈赠韩质明府】

卢纶

机鸣春响日皦皦，鸡犬相和汉古村。数派清泉黄菊盛，
一林寒露紫梨繁。衰翁正席矜新社，稚子齐襟读古论。

共说年来但无事，不知何者是君恩。

卷 278_28【书情上大尹十兄】

卢纶

紫陌绝纤埃，油幢千骑来。剖辞纷若雨，奔吏殷成雷。
圣泽初忧壅，群心本在台。海鳞方泼刺，云翼暂徘徊。
芳室芝兰茂，春溪桃李开。江湖馀派少，鸿雁远声哀。
命厌薏龟诱，年惊弟侄催。磨铅惭砥礪，挥策愧驽骀。
玉管能喧谷，金炉可变灰。应怜费思者，衔泪亦衔枚。

卷 278_29【春思贻李方陵】

卢纶

长安三月春，难别复难亲。不识冶游伴，多逢憔悴人。
渐知欢澹薄，转觉老殷勤。去矣尽如此，此辞悲未陈。

卷 278_30【驿中望山戏赠渭南陆贄主簿】

卢纶

官微多惧事多同，拙性偏无主驿功。

山在门前登不得，鬓毛衰尽路尘中。

卷 278_31【太白西峰偶宿车祝二尊师石室晨...寄呈凤翔齐员外张侍御】

卢纶

弱龄诚昧鄙，遇胜惟求止。如何羁滞中，得步青冥里。
青冥有桂丛，冰雪两仙翁。毛节未归海，丹梯闲倚空。
逍遥拟上清，洞府不知名。醺罢雨雷至，客辞山忽明。
山明鸟声乐，日气生岩壑。岩壑树修修，白云如水流。
白云消散尽，陇塞俨然秋。积阻关河固，绵联烽戍稠。
五营承庙略，四野失边愁。吁嗟系尘役，又负灵仙迹。
芝朮自芳香，泥沙几沉溺。书此欲沾衣，平生事每违。
烟霄不可仰，鸾鹤自追随。

卷 278_32【赠韩山人】

卢纶

见君何事不惭颜，白发生来未到山。
更叹无家又无药，往来唯在酒徒间。

卷 278_33【赠李果毅】

卢纶

向日磨金镞，当风著锦衣。上城邀贼语，走马截雕飞。

卷 278_34【春日书情赠别司空曙】

卢纶

壮志随年尽，谋身意未安。风尘交契阔，老大别离难。
腊近晴多暖，春迟夜却寒。谁堪少兄弟，三十又无官。

卷 278_35【冬晓呈邻里】

卢纶

终夜寝衣冷，开门思曙光。空阶一丛叶，华室四邻霜。
望阙觉天迥，忆山愁路荒。途中一留滞，双鬓飒然苍。

卷 278_36【首冬寄河东昭德里书事贻郑损仓曹】

卢纶

清冬和暖天，老钝昼多眠。日爱闾巷静，每闻官吏贤。
寒菹供家食，腐叶宿厨烟。且复执杯酒，无烦轻议边。

卷 278_37【浑赞善东斋戏赠陈归】

卢纶

长裾珠履飒轻尘，闲以琴书列上宾。
公子无讎可邀请，侯嬴此坐是何人。

卷 278_38【春日卧病示赵季黄（时陷在贼中）】

卢纶

病中饶泪眼常昏，闻说花开亦闭门。语少渐知琴思苦，
卧多唯觉鸟声喧。黄埃满市图书贱，黑雾连山虎豹尊。
今日支离顾形影，向君凡在几重恩。

卷 278_39【秋幕中夜独坐迟明因陪...谒上公因书即事兼呈
同院诸公】

卢纶

风凄露泫然，明月在山巅。独倚古庭树，仰看深夜天。
叶翻萤不定，虫思草无边。南舍机杼发，东方云景鲜。
簪裘肃已整，车骑俨将前。百雉拱双戟，万夫尊一贤。
琳琅多谋蕴，律吕更相宣。晓桂香浥露，新鸿晴满川。

熙熙造化功，穆穆唐尧年。顾己草同贱，誓心金匪坚。
蹇辞惭自寡，渴病老难痊。书此更何问，边韶唯昼眠。

卷 278_40 【寄赠库部王郎中（时充折采使）】

卢纶

谔谔汉名臣，从天令若春。叙辞皆诏旨，称宦即星辰。
草木承风偃，云雷施泽均。威惩治粟尉，恩洽让田人。
泉货方将散，京坻自此陈。五营俱益灶，千里不停轮。
未远金门籍，旋清玉塞尘。硕儒推庆重，良友颂公频。
鹤发逢新镜，龙门跃旧鳞。荷君偏有问，深感浩难申。

卷 278_41 【寄赠畅当山居】

卢纶

古村荒石路，岁晏独言归。山雪厚三尺，社榆粗十围。
虬龙宁守蛰，鸾鹤岂矜飞。君子固安分，毋听劳者讥。

卷 278_42 【偶宿山中忆畅当】

卢纶

深山夜雪晴，坐忆晓山明。读易罢三卷，弹琴当五更。
薜萝枯有影，岩壑冻无声。此夕一相望，君应知我诚。

卷 278_43【秋中野望寄舍弟绶兼令呈上西川尚书舅】

卢纶

忧来思远望，高处殊非惬。夜露湿苍山，秋陂满黄叶。
人随雁迢递，栈与云重叠。骨肉暂分离，形神遂疲沓。
红旗渭阳骑，几日劳登涉。蜀道蔼松筠，巴江盛舟楫。
小生即何限，简诲偏盈箧。旧恨尚填膺，新悲复萦睫。
因求种瓜利，自喜归耕捷。井臼赖依邻，儿童亦胜汲。
尘容不在照，雪鬓那堪镊。唯有餐霞心，知夫与天接。

卷 278_44【行药前轩呈董山人】

卢纶

不觉老将至，瘦来方自惊。朝昏多病色，起坐有劳声。
腠暖苦肌痒，藏虚唯耳鸣。桑公富灵术，一为保馀生。

卷 278_45【玩春因寄冯卫二补阙戏呈李益（时君与李新除侍御史）】

卢纶

掖垣春色自天来，红药当阶次第开。
萱草丛丛尔何物，等闲穿破绿莓苔。

卷 278_46【新移北厅因贻同院诸公兼呈畅博士】

卢纶

华轩迤台座，顾影忝时伦。弱质偃弥旷，清风来亦频。
恩辉坐凌迈，景物恣芳新。终乃愧吾友，无容私此身。

卷 278_47【与张擢对酌】

卢纶

张翁对卢叟，一榼山村酒。倾酒请予歌，忽蒙张翁呵。
呵予官非屈，曲有怨词多。歌罢谢张翁，所思殊不同。
予悲方为老，君责一何空。曾看乐官录，向是悲翁曲。
张老闻此词，汪汪泪盈目。卢叟醉言粗，一杯凡数呼。
回头顾张老，敢欲戏为儒。

卷 278_48【喜从弟激初至】

卢纶

儒服策羸车，惠然过我庐。叙年惭已长，称从意何疏。
作吏清无比，为文丽有馀。应嗤受恩者，头白读兵书。

卷 278_49【寻贾尊师】

卢纶

玉洞秦时客，焚香映绿萝。新传左慈诀，曾与右军鹅。
井臼阴苔遍，方书古字多。成都今日雨，应与酒相和。

卷 278_50【秋中过独孤郊居（即公主子）】

卢纶

开园过水到郊居，共引家童拾野蔬。高树夕阳连古巷，
菊花梨叶满荒渠。秋山近处行过寺，夜雨寒时起读书。
帝里诸亲别来久，岂知王粲爱樵渔。

卷 278_51【同耿拾遗春中题第四郎新修书院】

卢纶

得接西园会，多因野性同。引藤连树影，移石间花丛。
学就晨昏外，欢生礼乐中。春游随墨客，夜宿伴潜公。
散帙灯惊燕，开帘月带风。朝朝在门下，自与五侯通。

卷 278_52【春日题杜叟山下别业】

卢纶

白鸟群飞山半晴，渚田相接有泉声。园中晓露青丛合，
桥上春风绿野明。云影断来峰影出，林花落尽草花生。
今朝醉舞同君乐，始信幽人不爱荣。

卷 278_53【过终南柳处士】

卢纶

五老正相寻，围棋到煮金。石摧丹井闭，月过洞门深。
猿鸟三时下，藤萝十里阴。绿泉多草气，青壁少花林。
自愧非仙侣，何言见道心。悠哉宿山口，雷雨夜沈沈。

卷 278_54【宿澄上人院】

卢纶

竹窗闻远水，月出似溪中。香覆经年火，幡飘后夜风。
性昏知道晚，学浅喜言同。一悟归身处，何山路不通。

卷 278_55【题李沆林园】

卢纶

古巷牛羊出，重门接柳阴。闲看入竹路，自有向山心。
种药齐幽石，耕田到远林。愿同词赋客，得兴谢家深。

第二百七十九卷

卷 279_1【过司空曙村居】

卢纶

南北与山邻，蓬庵庇一身。繁霜疑有雪，枯草似无人。
遂性在耕稼，所交唯贱贫。何言张掾傲，每重德璋亲。

卷 279_2【题念济寺晕上人院】

卢纶

泉响竹潇潇，潜公居处遥。虚空闻偈夜，清净雨花朝。
放鹤临山阁，降龙步石桥。世尘徒委积，劫火定焚烧。
苔壁云难聚，风篁露易摇。浮生亦无著，况乃是芭蕉。

卷 279_3【题杨虢县竹亭】

卢纶

夜宿密公室，话馀将昼兴。绕阶三径雪，当户一池冰。
家训资风化，心源隐政能。明朝复何见，莱草古沟塍。

卷 279_4 【过楼观李尊师（一作过李尊师院）】

卢纶

城阙望烟霞，常悲仙路赊。宁知樵子径，得到葛洪家。
犬吠松间月，人行洞里花。留诗千岁鹤，送客五云车。
访世山空在，观棋日未斜。不知尘俗士，谁解种胡麻。

卷 279_5 【雪谤后逢李叔度】

卢纶

相逢空握手，往事不堪思。见少情难尽，愁深语自迟。
草生分路处，雨散出山时。强得宽离恨，唯当说后期。

卷 279_6 【春日过李侍御】

卢纶

高柳满春城，东园有鸟声。折花朝露滴，漱石野泉清。
心许陶家醉，诗逢谢客呈。应怜未行吏，曾是鲁诸生。

卷 279_7 【出山逢耿漳】

卢纶

云雪离披山万里，别来曾住最高峰。
暂到人间归不得，长安陌上又相逢。

卷 279_8 【题金吾郭将军石伏茅堂（一作常衮诗）】

卢纶

云戟曙沈沈，轩墀清且深。家传成栋美，尧宠结茅心。
玉佩多依石，油幢亦在林。炉香诸洞暖，殿影众山阴。
草奏风生笔，筵开雪满琴。客从龙阙至，僧自虎溪寻。
萧洒延清赏，风流会素襟。终朝息尘步，一醉间华簪。

卷 279_9 【题贾山人园林】

卢纶

竹影朦胧松影长，素琴清簟好风凉。连春诗会烟花满，
半夜酒醒兰蕙香。五字每将称玉友，一尊曾不顾金囊。
长沙流谪君非远，莫遣英名负洛阳。

卷 279_10 【秋夜同畅当宿藏公院】

卢纶

礼足一垂泪，医王知病由。风萤方喜夜，露槿已伤秋。
顾以儿童爱，每从仁者求。将祈竟何得，灭迹在缁流。

卷 279_11 【重同畅当樊公院闻琴】

卢纶

误以音声祈远公，请将徽轸付秋风。
漾漾硖流吹不尽，月华如在白波中。

卷 279_12 【同耿湓宿陆澧旅舍】

卢纶

当轩云月开，清夜故人杯。拥褐觉霜下，抱琴闻雁来。
迎风君顾步，临路我迟回。双鬓共如此，此欢非易陪。

卷 279_13 【题苗员外竹间亭】

卢纶

高髯绝行尘，开帘似有春。风倾竹上雪，山对酒边人。
步暖先逢日，书空远见邻。还同内斋暇，登赏及诸姻。

卷 279_14 【奉陪侍中登白楼（一作奉陪浑侍中五日登白鹤楼）】

卢纶

高楼倚玉梯，朱槛与云齐。顾盼亲霄汉，诙谐息鼓鼙。
洪河斜更直，野雨急仍低。今日陪尊俎，唯当醉似泥。

卷 279_15 【九日奉陪侍郎登白楼】

卢纶

碧霄孤鹤发清音，上宰因添望阙心。睥睨三层连步障，
茱萸一朵映华簪。红霞似绮河如带，白露团珠菊散金。
此日所从何所问，俨然冠剑拥成林。

卷 279_16 【春日喜雨奉和马侍中宴白楼】

卢纶

鹤鹤相呼绿野宽，鼎臣闲倚玉栏干。洪河拥沫流仍急，
苍岭和云色更寒。艳艳风光呈瑞岁，泠泠歌颂振雕盘。
今朝醉舞共乡老，不觉倾欹獬豸冠。

卷 279_17【奉陪侍中游石笋溪十二韵】

卢纶

朝日照灵山，山溪浩纷错。图书无旧记，鲛禹应新凿。
双壁泻天河，一峰吐莲萼。潭心乱雪卷，岩腹繁珠落。
彩蛤攒锦囊，芳萝袅花索。猿群曝阳岭，龙穴腥阴壑。
静得渔者言，闲闻洞仙博。欹松倚朱幰，广石屯油幕。
国泰事留侯，山春纵康乐。间关殊状鸟，烂熳无名药。
欲验少君方，还吟大隐作。旌幢不可驻，古塞新沙漠。

卷 279_18【九日奉陪侍中宴白楼】

卢纶

露白菊氛氲，西楼盛袭文。玉筵秋令节，金钺汉元勋。
说剑风生座，抽琴鹤绕云。謏儒无以答，愿得备前军。

卷 279_19【九日奉陪侍中宴后亭】

卢纶

玉壶倾菊酒，一顾得淹留。彩笔征枚叟，花筵舞莫愁。
管弦能驻景，松桂不停秋。为谢蓬蒿辈，如何霜霰稠。

卷 279_20【九日奉陪令公登白楼同咏菊】

卢纶

琼尊犹有菊，可以献留侯。愿比三花秀，非同百卉秋。
金英分蕊细，玉露结房稠。黄雀知恩在，衔飞亦上楼。

卷 279_21【奉陪浑侍中上巳日泛渭河】

卢纶

青舸锦帆开，浮天接上台。晚莺和玉笛，春浪动金罍。
舟楫方朝海，鲸鲵自曝腮。应怜似萍者，空逐榜人回。

卷 279_22【奉陪侍中春日过武安君庙】

卢纶

长裾间貔虎，遗庙盛攀登。白羽三千骑，红林一万层。

元臣达幽契，祝史告明征。抚坐悲今古，瞻容感废兴。
回风卷丛柏，骤雨湿诸陵。倏忽烟花霁，当营看月生。

卷 279_23【过玉真公主影殿】

卢纶

夕照临窗起暗尘，青松绕殿不知春。
君看白发诵经者，半是宫中歌舞人。

卷 279_24【题嘉祥殿南溪印禅师壁画影堂】

卢纶

双屐参差锡杖斜，衲衣交膝对天花。
瞻容悟问修持劫，似指前溪无数沙。

卷 279_25【题伯夷庙】

卢纶

中条山下黄礪石，垒作夷齐庙里神。
落叶满阶尘满座，不知浇酒为何人。

卷 279_26【早春游樊川野居却寄李端校书兼呈...司空曙
簿耿漳拾遗】

卢纶

白水遍沟塍，青山对杜陵。晴明人望鹤，旷野鹿随僧。
古柳连巢折，荒堤带草崩。阴桥全覆雪，瀑溜半垂冰。
斗鼠摇松影，游龟落石层。韶光偏不待，衰败巧相仍。
桂树曾争折，龙门几共登。琴师阮校尉，诗和柳吴兴。
舐笔求书扇，张屏看画蝇。卜邻空遂约，问卦独无征。
投足经危路，收才遇直绳。守农穷自固，行乐病何能。
掩帙蓬蒿晚，临川景气澄。飒然成一叟，谁更慕鸢腾。

卷 279_27【同钱郎中晚春过慈恩寺】

卢纶

不见僧中旧，仍逢雨后春。惜花将爱寺，俱是白头人。

卷 279_28【曲江春望】

卢纶

菖蒲翻叶柳交枝，暗上莲舟鸟不知。

更到无花最深处，玉楼金殿影参差。

翠黛红妆画鹢中，共惊云色带微风。
箫管曲长吹未尽，花南水北雨濛濛。

泉声遍野入芳洲，拥沫吹花草上流。
落日行人渐无路，巢乌乳燕满高楼。

卷 279_29【春日陪李庶子遵善寺东院晓望】

卢纶

映竹水田分，当山起雁群。阳峰高对寺，阴井下通云。
雪昼唯逢鹤，花时此见君。由来禅诵地，多有谢公文。

卷 279_30【华清宫】

卢纶

汉家天子好经过，白日青山宫殿多。
见说只今生草处，禁泉荒石已相和。

水气朦胧满画梁，一回开殿满山香。
宫娃几许经歌舞，白首翻令忆建章。

卷 279_31 【题兴善寺后池】

卢纶

隔窗栖白鹤，似与镜湖邻。月照何年树，花逢几遍人。
岸莎青有路，苔径绿无尘。永愿容依止，僧中老此身。

卷 279_32 【陪中书李纾舍人夜泛东池】

卢纶

看月复听琴，移舟出树阴。夜村机杼急，秋水菱荷深。
石静龟潜上，萍开果暗沈。何言奉杯酒，得见五湖心。

卷 279_33 【宴赵氏昆季书院因与会文并率尔投赠】

卢纶

诗礼挹馀波，相欢在琢磨。琴尊方会集，珠玉忽骈罗。
谢族风流盛，于门福庆多。花攒骐驎枥，锦绚凤凰窠。
咏雪因饶妹，书经为爱鹅。仍闻广练被，更有远儒过。

卷 279_34 【题天华观】

卢纶

峰嶂徘徊霞景新，一潭寒水绝纤鳞。朱字灵书千万轴，
苍髯道士两三人。芝童解说壶中事，玉管能留天上春。
眼见仙丹求不得，汉家簪绂在羸身。

卷 279_35【宿石瓮寺】

卢纶

殿有寒灯草有萤，千林万壑寂无声。烟凝积水龙蛇蛰，
露湿空山星汉明。昏霾雾中悲世界，曙霞光里见王城。
回瞻相好因垂泪，苦海波涛何日平。

卷 279_36【题悟真寺】

卢纶

万峰交掩一峰开，晓色常从天上来。
似到西方诸佛国，莲花影里数楼台。

卷 279_37【题云际寺上方】

卢纶

松高萝蔓轻，中有石床平。下界水长急，上方灯自明。
空门不易启，初地本无程。回步忽山尽，万缘从此生。

卷 279_38【九日同司直九叔崔侍御登宝鸡南楼】

卢纶

把菊叹将老，上楼悲未还。短长新白发，重叠旧青山。
霜气清襟袖，琴声引醉颜。竹林唯七友，何幸亦登攀。

卷 279_39【同王员外雨后登开元寺南楼因寄西岩警上人】

卢纶

过雨开楼看晚虹，白云相逐水相通。寒蝉噪暮野无日，
古树伤秋天有风。数穗远烟凝垄上，一枝繁果忆山中。
何言暂别东林友，惆怅人间事不同。

卷 279_40【同赵进马元阳春日登长春宫古城望河中因寄郑
损仓曹】

卢纶

城头春霭晓濛濛，指望关桥满袖风。云骑闲嘶宫柳外，

玉人愁立草花中。钟分寺路山光绿，河绕军州日气红。
迹忝已成方恋赏，此时离恨与君同。

卷 279_41 【同崔峒补阙慈恩寺避暑】

卢纶

寺凉高树合，卧石绿阴中。伴鹤惭仙侣，依僧学老翁。
鱼沉荷叶露，鸟散竹林风。始悟尘居者，应将火宅同。

卷 279_42 【春日登楼有怀】

卢纶

花正浓时人正愁，逢花却欲替花羞。
年来笑伴皆归去，今日晴明独上楼。

卷 279_43 【长安春望】

卢纶

东风吹雨过青山，却望千门草色闲。家在梦中何日到，
春生江上几人还。川原缭绕浮云外，宫阙参差落照间。
谁念为儒逢世难，独将衰鬓客秦关。

卷 279_44 【冬日登城楼有怀因赠程腾】

卢纶

生涯何事多羁束，赖此登临畅心目。郭南郭北无数山，
万井逶迤流水间。弹琴对酒不知暮，岸帻题诗身自闲。
风声肃肃雁飞绝，云色茫茫欲成雪。遥思海客天外归，
坐想征人两头别。世情多以风尘隔，泣尽无因画筹策。
谁知白首窗下人，不接朱门坐中客。贱亦不足叹，
贵亦不足陈。长卿未遇杨朱泣，蔡泽无媒原宪贫。
如今万乘方用武，国命天威借貔虎。穷达皆为身外名，
公侯可废刀头取。君不见汉家边将在边庭，
白羽三千出井陉。当风看猎拥珠翠，岂在终年穷一经。

卷 279_45 【过仙游寺】

卢纶

上方下方雪中路，白云流水如闲步。
数峰行尽犹未归，寂寞经声竹阴暮。

卷 279_46 【同路郎中韩侍御春日题野寺】

卢纶

寺前山远古陂宽，寺里人稀春草寒。
何事最堪悲色相，折花将与老僧看。

卷 279_47 【奉和李益游栖岩寺（一作登西岩寺，一作常袞诗）】

卢纶

林香雨气新，山寺绿无尘。遂结云外赏，共游天上春。
鹤鸣金阙丽，僧语竹房邻。待月水流急，惜花风起频。
何方非环境，此地有归人。回首空门路，幡然一幻身。

卷 279_48 【秋夜同畅当宿潭上西亭】

卢纶

圆月出山头，七贤林下游。稍稍寒叶坠，泔泔月波流。
鳬鹄共思晓，菰蒲相与秋。明当此中别，一为望汀洲。

卷 279_49 【山中一绝】

卢纶

饥食松花渴饮泉，偶从山后到山前。

阳坡软草厚如织，因与鹿麕相伴眠。

卷 279_50 【与畅当夜泛秋潭】

卢纶

萤火飏莲丛，水凉多夜风。离人将落叶，俱在一船中。

卷 279_51 【秋夜宴集陈翊郎中圃亭美校书郎张正元归乡】

卢纶

泉清兰菊稠，红果落城沟。保庆台榭古，感时琴瑟秋。
硕儒欢颇至，名士礼能周。为谢邑中少，无惊池上鸥。

卷 279_52 【春游东潭】

卢纶

移舟试望家，漾漾似天涯。日暮满潭雪，白鸥和柳花。

卷 279_53 【同薛存诚登栖岩寺】

卢纶

衰蹇步难前，上山如上天。尘泥来自晚，猿鹤到何先。
万壑应孤磬，百花通一泉。苍苍此明月，下界正沈眠。

卷 279_54【河中府崇福寺看花】

卢纶

闻道山花如火红，平明登寺已经风。
老僧无见亦无说，应与看人心不同。

卷 279_55【冬日宴郭监林亭】

卢纶

玉勒聚如云，森森鸾鹤群。据梧花闼接，沃盥石泉分。
华味惭初识，新声喜尽闻。此山招老贱，敢不谢夫君。

卷 279_56【奉和李舍人昆季咏玫瑰花寄赠徐侍郎（一作常袞诗）】

卢纶

独鹤寄烟霜，双鸾思晚芳。旧阴依谢宅，新艳出萧墙。
蝶散摇轻露，莺衔入夕阳。雨朝胜濯锦，风夜剧焚香。
断日千层艳，孤霞一片光。密来惊叶少，动处觉枝长。
布影期高赏，留春为远方。尝闻赠琼玖，叨和愧升堂。

卷 279_57【同耿漳、司空曙二拾遗题韦员外东斋花树】

卢纶

绿砌红花树，狂风独未吹。光中疑有焰，密处似无枝。
鸟动香轻发，人愁影屡移。今朝数片落，为报汉郎知。

卷 279_58【观袁修侍郎涨新池】

卢纶

引水香山近，穿云复绕林。才闻篱外响，已觉石边深。
满处侵苔色，澄来见柳阴。微风月明夜，知有五湖心。

卷 279_59【和徐法曹赠崔洛阳斑竹杖以诗见答】

卢纶

玉干一寻馀，苔花锦不如。劲堪和醉倚，轻好向空书。

采拂稽山曲，因依释氏居。方辰将独步，岂与此君疏。

卷 279_60【早秋望华清宫中树因以成咏（一作常袞诗）】

卢纶

可怜云木丛，满禁碧濛濛。色润灵泉近，阴清辇路通。
玉坛标八桂，金井识双桐。交映凝寒露，相和起夜风。
数枝盘石上，几叶落云中。燕拂宜秋霁，蝉鸣觉昼空。
翠屏更隐见，珠缀共玲珑。雷雨生成早，樵苏禁令雄。
野藤高助绿，仙果迥呈红。惆怅缭垣暮，兹山闻暗蛩。

卷 279_61【小鱼咏寄泾州杨侍郎】

卢纶

莲花影里暂相离，才出浮萍值罟师。
上得龙门还失浪，九江何处是归期。

卷 279_62【贼中与严越卿曲江看花】

卢纶

红枝欲折紫枝殷，隔水连宫不用攀。

会待长风吹落尽，始能开眼向青山。

卷 279_63【同畅当咏蒲团】

卢纶

团团锦花结，乃是前溪蒲。拥坐称儒褐，倚眠宜病夫。
唯当学禅寂，终老与之俱。

卷 279_64【焦篱店醉题（时看弄邵翁伯）】

卢纶

洛下渠头百卉新，满筵歌笑独伤春。
何须更弄邵翁伯，即我此身如此人。

卷 279_65【陈翊中丞东斋赋白玉簪】

卢纶

美矣新成太华峰，翠莲枝折叶重重。松阴满涧闲飞鹤，
潭影通云暗上龙。漠漠水香风颇馥，涓涓乳溜味何浓。
因声远报浮丘子，不奏登封时不容。

卷 279_66 【新茶咏寄上西川相公二十三舅大夫二十舅】

卢纶

三献蓬莱始一尝，日调金鼎阅芳香。
贮之玉合才半饼，寄与阿连题数行。

卷 279_67 【泊扬子江岸】

卢纶

山映南徐暮，千帆入古津。鱼惊出浦火，月照渡江人。
清镜催双鬓，沧波寄一身。空怜莎草色，长接故园春。

卷 279_68 【晚次鄂州（至德中作）】

卢纶

云开远见汉阳城，犹是孤帆一日程。估客昼眠知浪静，
舟人夜语觉潮生。三湘衰鬓逢秋色，万里归心对月明。
旧业已随征战尽，更堪江上鼓鼙声。

卷 279_69 【夜投丰德寺谒海上人（一作李端诗）】

卢纶

半夜中峰有磬声，偶逢樵者问山名。上方月晓闻僧语，
下路林疏见客行。野鹤巢边松最老，毒龙潜处水偏清。
愿得远公知姓字，焚香洗钵过浮生。

卷 279_70【江行次武昌县】

卢纶

家寄五湖间，扁舟往复还。年年生白发，处处上青山。
去国空知远，安身竟不闲。更悲江畔柳，长是北人攀。

卷 279_71【夜泊金陵】

卢纶

圆月出高城，苍苍照水营。江中正吹笛，楼上又无更。
洛下仍传箭，关西欲进兵。谁知五湖外，诸将但争名。

卷 279_72【渡浙江】

卢纶

前船后船未相及，五两头平北风急。
飞沙卷地日色昏，一半征帆浪花湿。

第二百八十卷

卷 280_1【李端公（一作严维诗，题作送李端）】

卢纶

故关衰草遍，离别自堪悲。路出寒云外，人归暮雪时。
少孤为客早，多难识君迟。掩泪空相向，风尘何处期。

卷 280_2【秋晚山中别业】

卢纶

树老野泉清，幽人好独行。去闲知路静，归晚喜山明。
兰茝通荒井，牛羊出古城。茂陵秋最冷，谁念一书生。

卷 280_3【关口逢徐迈】

卢纶

废寺连荒垒，那知见子真。关城夜有雪，冰渡晓无人。

酒里唯多病，山中愿作邻。常闻兄弟乐，谁肯信家贫。

卷 280_4 【山中咏古木】

卢纶

高木已萧索，夜雨复秋风。坠叶鸣丛竹，斜根拥断蓬。
半侵山色里，长在水声中。此地何人到，云门去亦通。

卷 280_5 【酬李端公野寺病居见寄】

卢纶

野寺钟昏山正阴，乱藤高竹水声深。田夫就饷还依草，
野雉惊飞不过林。斋沐暂思同静室，清羸已觉助禅心。
寂寞日长谁问疾，料君惟取古方寻。

卷 280_6 【送少微上人游蜀】

卢纶

瓶钵绕禅衣，连宵宿翠微。树开巴水远，山晓蜀星稀。
识遍中朝贵，多谙外学非。何当一传付，道侣愿知归。

卷 280_7 【送宁国夏侯丞】

卢纶

楚国青芜上，秋云似白波。五湖长路少，九派乱山多。
谢守通诗宴，陶公许醉过。恍然饯离阻，年鬓两蹉跎。

卷 280_8 【送袁傪】

卢纶

谏猎名空久，多因病与贫。买书行几市，带雨别何人。
客路山连水，军州日映尘。凄凉一分手，俱恨老相亲。

卷 280_9 【赠别李纷】

卢纶

头白乘驴悬布囊，一回言别泪千行。
儿孙满眼无归处，唯到尊前似故乡。

卷 280_10 【罪所送苗员外上都】

卢纶

谋身当议罪，宁遣友朋闻。祸近防难及，愁长事未分。
寂寥惊远语，幽闭望归云。亲戚如相见，唯应泣向君。

卷 280_11【送李校书赴东川幕】

卢纶

泥坂望青城，浮云与栈平。字形知国号，眉势识山名。
编简尘封阁，戈鋌雪照营。男儿须聘用，莫信笔堪耕。

卷 280_12【至德中赠内兄刘赞】

卢纶

时难访亲戚，相见喜还悲。好学年空在，从戎事已迟。
听琴泉落处，步履雪深时。惆怅多边信，青山共有期。

卷 280_13【春日灞亭同苗员外寄皇甫侍御（一作庾侍郎）】

卢纶

坐见春云暮，无因报所思。川平人去远，日暖雁飞迟。

对酒山长在，看花鬓自衰。谁堪登灞岸，还作旧乡悲。

卷 280_14 【送颜推官游银夏谒韩大夫】

卢纶

丛篁叫寒笛，满眼塞山青。才子尊前画，将军石上铭。
猎声云外响，战血雨中腥。苦乐从来事，因君一涕零。

卷 280_15 【咸阳送房济侍御归太原幕（昔尝与济同游此邑）】

卢纶

旧居无旧邻，似见故乡春。复对别离酒，欲成衰老人。
客衣频染泪，军旅亦多尘。握手重相勉，平生心所因。

卷 280_16 【宝泉寺送李益端公归邠宁幕】

卢纶

参差岩障东，云日晃龙宫。石净非因雨，松凉不为风。
恋泉将鹤并，偷果与猿同。眼界尘虽染，心源蔽已通。
莲花国何限，贝叶字无穷。早晚登麟阁，慈门欲付公。

卷 280_17【送何召下第后归蜀】

卢纶

褒斜行客过，栈道响危空。路湿云初上，山明日正中。
水程通海货，地利杂吴风。一别金门远，何人复荐雄。

卷 280_18【宿定陵寺（寺在陵内）】

卢纶

古塔荒台出禁墙，磬声初尽漏声长。云生紫殿幡花湿，
月照青山松柏香。禅室夜闻风过竹，奠筵朝启露沾裳。
谁悟威灵同寂灭，更堪砧杵发昭阳。

卷 280_19【送彭开府往云中觐使君兄】

卢纶

一门三代贵，非是主恩偏。破虏山铭在，承家剑艺全。
夺旗貂帐侧，射虎雪林前。雁塞逢兄弟，云州发管弦。
冻河光带日，枯草净无烟。儒者曾修武，因贻上将篇。

卷 280_20 【送李缙】

卢纶

旧国仍连五将营，儒衣何处谒公卿。波翻远水蒹葭动，
路入寒村机杼鸣。嵇康书论多归兴，谢氏家风有学名。
为问西来雨中客，空山几处是前程。

卷 280_21 【送内弟韦宗仁归信州觐省】

卢纶

常嗟外族弟兄稀，转觉心孤是送归。醉掩壶觞人有泪，
梦惊波浪日无辉。烹鱼绿岸烟浮草，摘橘青溪露湿衣。
闻说江楼长卷幔，几回风起望胡威。

卷 280_22 【长安疾后首秋夜即事（一作陈羽诗）】

卢纶

九重深锁禁城秋，月过南宫渐映楼。紫陌夜深槐露滴，
碧空云尽火星流。清风刻漏传三殿，甲第歌钟乐五侯。
楚客病来乡思苦，寂寥灯下不胜愁。

卷 280_23 【送崔琦赴宣州幕】

卢纶

五马临流待幕宾，羨君谈笑出风尘。身闲就养宁辞远，
世难移家莫厌贫。天际晓山三峡路，津头腊市九江人。
何处遥知最惆怅，满湖青草雁声春。

卷 280_24 【送杨皞东归】

卢纶

登楼掩泣话归期，楚树荆云发远思。日里扬帆闻戍鼓，
舟中酹酒见山祠。西江风浪何时尽，北客音书欲寄谁。
若说湓城杨司马，知君望国有新诗。

卷 280_25 【至德中途中书事却寄李儋】

卢纶

乱离无处不伤情，况复看碑对古城。路绕寒山人独去，
月临秋水雁空惊。颜衰重喜归乡国，身贱多惭问姓名。
今日主人还共醉，应怜世故一儒生。

卷 280_26 【奉和太常王卿酬中书李舍人中书寓直春夜对月见寄】

卢纶

露如轻雨月如霜，不见星河见雁行。虚晕入池波自泛，
满轮当苑桂多香。春台几望黄龙阙，云路宁分白玉郎。
是夜巴歌应金石，岂殊萤影对清光。

卷 280_27 【酬包佶郎中览拙卷后见寄】

卢纶

令伯支离晚读书，岂知词赋称相如。枉逢花木无新思，
拙就溪潭损旧居。禁路看山歌自缓，云司玩月漏应疏。
沉忧敢望金门召，空愧巴歊并子虚。

卷 280_28 【送史宥滑州谒贾仆射】

卢纶

朱门洞启俨行车，金鑕装囊半是书。
君向东州问徐胤，羊公何事灭吹鱼。

卷 280_29 【送鲍中丞赴太原】

卢纶

分路引鸣驺，喧喧似陇头。暂移西掖望，全解北门忧。
专幕临都护，分曹制督邮。积冰营不下，盛雪猎方休。
白草连胡帐，黄云拥戍楼。今朝送旌旆，一减鲁儒羞。

卷 280_30 【送耿拾遗漳充括图书使往江淮】

卢纶

传令收遗籍，诸儒喜饯君。孔家唯有地，禹穴但生云。
编简知还续，虫鱼亦自分。如逢北山隐，一为谢移文。

卷 280_31 【送郭判官赴振武】

卢纶

黄河九曲流，缭绕古边州。鸣雁飞初夜，羌胡正晚秋。
凄凉金管思，迢递玉人愁。七叶推多庆，须怀杀敌忧。

卷 280_32 【春江夕望】

卢纶

洞庭芳草遍，楚客莫思归。经难人空老，逢春雁自飞。
东西兄弟远，存没友朋稀。独立还垂泪，天南一布衣。

卷 280_33【送元昱尉义兴】

卢纶

欲成云海别，一夜梦天涯。白浪缘江雨，青山绕县花。
风标当剧部，冠带称儒家。去矣谢亲爱，知予发已华。

卷 280_34【送黎兵曹往陕府结亲（所昏即君从母女弟）】

卢纶

郎马两如龙，春朝上路逢。鸳鸯初集水，薜荔欲依松。
步帐歌声转，妆台烛影重。何言在阴者，得是戴侯宗。

卷 280_35【送乐平苗明府】

卢纶

累职比柴桑，清秋入楚乡。一船灯照浪，两岸树凝霜。

亭吏趋寒雾，山城敛曙光。无辞折腰久，仲德在鸳行。

卷 280_36【晚到盩厔老家】

卢纶

老翁曾旧识，相引出柴门。苦话别时事，因寻溪上村。
数年何处客，近日几家存。冒雨看禾黍，逢人忆子孙。
乱藤穿井口，流水到篱根。惆怅不堪住，空山月又昏。

卷 280_37【卧病书怀】

卢纶

苦心三十载，白首遇艰难。旧地成孤客，全家赖钓竿。
貌衰缘药尽，起晚为山寒。老病今如此，无人更问看。

卷 280_38【落第后归终南别业】

卢纶

久为名所误，春尽始归山。落羽羞言命，逢人强破颜。
交疏贫病里，身老是非间。不及东溪月，渔翁夜往还。

卷 280_39 【送朝邑张明府（此公善琴）】

卢纶

千室暮山西，浮云与树齐。剖辞云落纸，拥吏雪成泥。
野火芦千顷，河田水万畦。不知琴月夜，谁得听乌啼。

卷 280_40 【送李方东归（即故李校书端亲弟）】

卢纶

故交三四人，闻别共沾巾。举目是陈事，满城无至亲。
身从丧日病，家自俭年贫。此去何堪远，遗孤在旧邻。

卷 280_41 【秋晚霁后野望忆夏侯审】

卢纶

天晴禾黍平，畅目亦伤情。野店云日丽，孤庄砧杵鸣。
川原唯寂寞，岐路自纵横。前后无俦侣，此怀谁与呈。

卷 280_42 【送王尊师（一作道士）】

卢纶

梦别一仙人，霞衣满鹤身。旌幢天路晚，桃杏海山春。
种玉非求稔，烧金不为贫。自怜头白早，难与葛洪亲。

卷 280_43【送抚州周使君（即侍中之婿）】

卢纶

周郎三十馀，天子赐鱼书。龙节随云水，金铄动里闾。
松声三楚远，乡思百花初。若转弘农守，萧咸事不如。

卷 280_44【赠别司空曙】

卢纶

有月曾同赏，无秋不共悲。如何与君别，又是菊花时。

卷 280_45【送王录事赴任苏州（即舍人堂弟）】

卢纶

古堤迎拜路，万里一帆前。潮作浇田雨，云成煮海烟。
吏闲唯重法，俗富不忧边。西掖今宵咏，还应寄阿连。

卷 280_46 【大梵山寺院奉呈趣上人赵中丞】

卢纶

渐欲休人事，僧房学闭关。伴鱼浮水上，看鹤向林间。
寺古秋仍早，松深暮更闲。月中随道友，夜夜坐空山。

卷 280_47 【送恒操上人归江外覲省】

卢纶

依佛不违亲，高堂与寺邻。问安双树晓，求膳一僧贫。
持咒过龙庙，翻经化海人。还同惠休去，儒者亦沾巾。

卷 280_48 【上巳日陪齐相公花楼宴】

卢纶

钟陵暮春月，飞观延群英。晨霞耀中轩，满席罗金琼。
持杯凝远睇，触物结幽情。树色参差绿，湖光潋滟明。
礼卑瞻绛帐，恩浹厕华缨。徒记山阴兴，袷襖乃为荣。

卷 280_49 【寒食】

卢纶

孤客飘飘岁载华，况逢寒食倍思家。莺啼远墅多从柳，
人哭荒坟亦有花。浊水秦渠通渭急，黄埃京洛上原斜。
驱车西近长安好，宫观参差半隐霞。

卷 280_50【舟中寒食】

卢纶

寒食空江曲，孤舟渺水前。斗鸡沙鸟异，禁火岸花然。
日霁开愁望，波喧警醉眠。因看数茎鬓，倍欲惜芳年。

卷 280_51【元日早朝呈故省诸公】

卢纶

万戟凌霜布，森森瑞气间。垂衣当晓日，上寿对南山。
济济延多士，跼跼舞百蛮。小臣无事谏，空愧伴鸣环。

卷 280_52【元日朝回中夜书情，寄南宫二故人】

卢纶

鸣珮随鹓鹭，登阶见冕旒。无能裨圣代，何事别沧洲。
闲夜贫还醉，浮名老渐羞。凤城春欲晚，郎吏忆同游。

卷 280_53【裴给事宅白牡丹（一作裴潏诗）】

卢纶

长安豪贵惜春残，争玩街西紫牡丹。
别有玉盘承露冷，无人起就月中看。

卷 280_54【送韦判官得雨中山】

卢纶

前峰后岭碧濛濛，草拥惊泉树带风。
人语马嘶听不得，更堪长路在云中。

卷 280_55【送宛丘任少府】

卢纶

带绶别乡亲，东为千里人。俗讹唯竞祭，地古不留春。
野戍云藏火，军城树拥尘。少年何所重，才子又清贫。

卷 280_56【送永阳崔明府】

卢纶

鹤唳蒹葭晓，中流见楚城。浪清风乍息，山白月犹明。
废路开荒木，归人种古营。悬闻正讹俗，邴曼更知名。

卷 280_57【割飞二刀子歌】

卢纶

我家有剪刀，人云鬼国铁。裁罗裁绮无钝时，
用来三年一股折。南中匠人淳用钢，再令盘屈随手伤。
改锻割飞二刀子，色迎霁雪锋含霜。两条神物秋冰薄，
刃淬初蟾鞘金错。越戟吴钩不足夸，斩犀切玉应怀怍。
日试曾磨汉水边，掌中怙栗声冷然。神惊魄悸却收得，
刃头已吐微微烟。刀乎刀乎何烨烨，魑魅须藏怪须慑。
若非良工变尔形，只向裁缝委箱篋。

卷 280_58【送郎士元使君赴郢州】

卢纶

赐衣兼授节，行日郢中闻。花发登山庙，天晴阅水军。

渔商三楚接，郡邑九江分。高兴应难遂，元戎有大勋。

卷 280_59【春词】

卢纶

北苑罗裙带，尘衢锦绣鞋。醉眠芳树下，半被落花埋。

卷 280_60【清如玉壶冰】

卢纶

玉壶冰始结，循吏政初成。既有虚心鉴，还如照胆清。
瑶池惭洞澈，金镜让澄明。气若朝霜动，形随夜月盈。
临人能不蔽，待物本无情。怯对圆光里，妍蚩自此呈。

卷 280_61【山店（一作王建诗）】

卢纶

登登山路行时尽，泱泱溪泉到处闻。
风动叶声山犬吠，一家松火隔秋云。

第二百八十一卷

卷 281_1【长至日上公献寿】

崔琮

应律三阳首，朝天万国同。斗边看子月，台上候祥风。
五夜钟初动，千门日正融。玉阶文物盛，仙仗武貔雄。
率舞皆群辟，称觞即上公。南山为圣寿，长对未央宫。

卷 281_2【长至日上公献寿】

李竦

候晓金门辟，乘时玉历长。羽仪瞻上宰，云物丽初阳。
汉礼方传珮，尧年正捧觴。日行临观阙，帝锡洽珪璋。
盛美超三代，洪休降百祥。自怜朝末坐，空此咏无疆。

卷 281_3【赋得西戎献白玉环】

张惟俭

当时无外守，方物四夷通。列土金河北，朝天玉塞东。
自将荆璞比，不与郑环同。正朔虽传汉，衣冠尚带戎。
幸承提佩宠，多愧琢磨功。绝域知文教，争趋上国风。

卷 281_4 【新安江行】

章八元

江源南去永，野渡暂维梢。古戍悬鱼网，空林露鸟巢。
雪晴山脊见，沙浅浪痕交。自笑无媒者，逢人作解嘲。

卷 281_5 【酬刘员外月下见寄】

章八元

夜凉河汉白，卷箔出南轩。过月鸿争远，辞枝叶暗翻。
独谣闻丽曲，缓步接清言。宣室思前席，行看拜主恩。

卷 281_6 【寄都官刘员外】

章八元

旧宅平津邸，槐阴接汉宫。鸣驺驰道上，寒日直庐中。
白雪歌偏丽，青云宦早通。悠然一缝掖，千里限清风。

卷 281_7 【题慈恩寺塔】

章八元

十层突兀在虚空，四十门开面面风。却怪鸟飞平地上，
自惊人语半天中。回梯暗踏如穿洞，绝顶初攀似出笼。
落日凤城佳气合，满城春树雨濛濛。

卷 281_8 【归桐庐旧居寄严长史】

章八元

昨辞夫子棹归舟，家在桐庐忆旧丘。三月暖时花竞发，
两溪分处水争流。近闻江老传乡语，遥见家山减旅愁。
或在醉中逢夜雪，怀贤应向剡川游。

卷 281_9 【天台道中示同行】

章八元

八重岩崿叠晴空，九色烟霞绕洞宫。
仙道多因迷路得，莫将心事问樵翁。

卷 281_10 【元日望含元殿御扇开合（大历十三年吏部试）】

张莒

万国来朝岁，千年觐圣君。辇迎仙仗出，扇匝御香焚。
俯对朝容近，先知曙色分。冕旒开处见，钟磬合时闻。
影动承朝日，花攒似庆云。蒲葵那可比，徒用隔炎氛。

卷 281_11 【清明日赐百僚新火】

史延

上苑连侯第，清明及暮春。九天初改火，万井属良辰。
颁赐恩逾洽，承时庆自均。翠烟和柳嫩，红焰出花新。
宠命尊三老，祥光烛万人。太平当此日，空复荷陶甄。

卷 281_12 【清明日赐百僚新火】

韩璿

朱骑传红烛，天厨赐近臣。火随黄道见，烟绕白榆新。
荣耀分他日，恩光共此辰。更调金鼎膳，还暖玉堂人。
灼灼千门晓，辉辉万井春。应怜萤聚夜，瞻望及东邻。

卷 281_13【清明日赐百僚新火】

郑轅

改火清明后，优恩赐近臣。漏残丹禁晚，燧发白榆新。
瑞彩来双阙，神光焕四邻。气回侯第暖，烟散帝城春。
利用调羹鼎，馀辉烛缙绅。皇明如照隐，愿及聚萤人。

卷 281_14【清明日赐百僚新火】

王濯

御火传香殿，华光及侍臣。星流中使马，烛耀九衢人。
转影连金屋，分辉丽锦茵。焰迎红蕊发，烟染绿条春。
助律和风早，添炉暖气新。谁怜一寒士，犹望照东邻。

卷 281_15【投珠于泉】

独孤绶

至道归淳朴，明珠被弃捐。天真来照乘，成性却沈泉。
不是灵蛇吐，非缘合浦还。岸傍随月落，波底共星悬。
致远终无胫，怀贪遂息肩。欲知恭俭德，所宝在惟贤。

卷 281_16【秦镜】

仲子陵

万古秦时镜，从来抱至精。依台月自吐，在匣水常清。
灿灿金光发，澄澄物象生。云天皆洞鉴，表里尽虚明。
但见人窥胆，全胜响应声。妍媸定可识，何处更逃情。

卷 281_17【秦镜】

张佐

楼上秦时镜，千秋独有名。菱花寒不落，冰质夏长清。
龙在形难掩，人来胆易呈。升台宜远照，开匣乍藏明。
皎色新磨出，圆规旧铸成。愁容如可鉴，当欲拂尘缨。

卷 281_18【忆游天台寄道流】

张佐

忆昨天台到赤城，几朝仙籁耳中生。云龙出水风声急，
海鹤鸣皋日色清。石笋半山移步险，桂花当涧拂衣轻。
今来尽是人间梦，刘阮茫茫何处行。

卷 281_19【龟负图（东都试）】

丁泽

天意将垂象，神龟出负图。五方行有配，八卦义宁孤。
作瑞旌君德，披文协帝谟。乘流喜得路，逢圣幸存躯。
莲叶池通泛，桃花水自浮。还寻九江去，安肯曳泥途。

卷 281_20【上元日梦王母献白玉环】

丁泽

梦中朝上日，阙下拜天颜。仿佛瞻王母，分明献玉环。
灵姿趋甲帐，悟道契玄关。似见霜姿白，如看月彩弯。
霓裳归物外，凤历晓人寰。仙圣非相远，昭昭寤寐间。

卷 281_21【良田无晚岁】

丁泽

人功虽未及，地力信非常。不任耕耘早，偏宜黍稷良。
无年皆有获，后种亦先芳。隴隴盈千亩，青青保万箱。
何须祭田祖，讵要察农祥。况是春三月，和风日又长。

卷 281_22 【下第献座主张谓】

阎济美

謇谔王臣直，文明雅量全。望炉金自跃，应物镜何偏。
南国幽沉尽，东堂礼乐宣。转令游艺士，更惜至公年。
芳树欢新景，青云泣暮天。唯愁凤池拜，孤贱更谁怜。

卷 281_23 【天津桥望洛城残雪】

阎济美

新霁洛城端，千家积雪寒。未收清禁色，偏向上阳残。

卷 281_24 【尚书郎上直闻春漏】

张少博

建礼含香处，重城待漏辰。徐声传凤阙，晓唱辨鸡人。
银箭听将尽，铜壶滴更新。催筹当五夜，移刻及三春。
杳杳从天远，泠泠出禁频。直庐残响曙，肃穆对钩陈。

卷 281_25 【雪夜观象阙待漏】

张少博

残雪初晴后，鸣珂奉阙庭。九门传晓漏，五夜候晨扃。
北斗横斜汉，东方落曙星。烟氛初动色，簪珥未分形。
雪重犹垂白，山遥不辨青。鸡人更唱处，偏入此时听。

卷 281_26 【尚书郎上直闻春漏】

周彻

建礼通华省，含香直紫宸。静闻铜史漏，暗识桂宫春。
滴沥疑将绝，清泠发更新。寒声临雁沼，疏韵应鸡人。
迥入千门彻，行催五夜频。高台闲自听，非是驻征轮。

卷 281_27 【及第后赠试官】

高拯

公子求贤未识真，欲将毛遂比常伦。
当时不及三千客，今日何如十九人。

卷 281_28 【赋得花发上林（大历十四年侍郎潘炎试）】

王表

御苑春何早，繁花已绣林。笑迎明主仗，香拂美人簪。
地接楼台近，天垂雨露深。晴光来戏蝶，夕景动栖禽。
欲托凌云势，先开捧日心。方知桃李树，从此别成阴。

卷 281_29【清明日登城春望寄大夫使君】

王表

春城闲望爱晴天，何处风光不眼前。寒食花开千树雪，
清明日出万家烟。兴来促席唯同舍，醉后狂歌尽少年。
闻说莺啼却惆怅，诗成不见谢临川。

卷 281_30【成德乐】

王表

赵女乘春上画楼，一声歌发满城秋。
无端更唱关山曲，不是征人亦泪流。

卷 281_31【花发上林】

独孤授

上苑韶容早，芳菲正吐花。无言向春日，闲笑任年华。

润色笼轻霭，晴光艳晚霞。影连千户竹，香散万人家。
幸绕楼台近，仍怀雨露赊。愿君垂采摘，不使落风沙。

卷 281_32 【赋得花发上林】

王储

东陆和风至，先开上苑花。秾枝藏宿鸟，香蕊拂行车。
散白怜晴日，舒红爱晚霞。桃间留御马，梅处入胡笳。
城郭连增媚，楼台映转华。岂同幽谷草，春至发犹赊。

卷 281_33 【赋得花发上林】

周渭

灼灼花凝雪，春来发上林。向风初散蕊，垂叶欲成阴。
人过香随远，烟晴色自深。净时空结雾，疏处未藏禽。
葼茸何年值，间关几日吟。一枝如可冀，不负折芳心。

卷 281_34 【赠龙兴观主吴崇岳】

周渭

楮为冠子布为裳，吞得丹霞寿最长。混俗性灵常乐道，

· 全唐诗 ·

出尘风格早休粮。枕中经妙谁传与，肘后方新自写将。
百尺松梢几飞步，鹤栖板上礼虚皇。

第二百八十二卷

卷 282_1【从军有苦乐行（时从司空鱼公北征）】

李益

劳者且莫歌，我欲送君觞。从军有苦乐，此曲乐未央。
仆居在陇上，陇水断人肠。东过秦宫路，宫路入咸阳。
时逢汉帝出，谏猎至长杨。讵驰游侠窟，非结少年场。
一旦承嘉惠，轻身重恩光。秉笔参帷帟，从军至朔方。
边地多阴风，草木自凄凉。断绝海云去，出没胡沙长。
参差引雁翼，隐辚腾军装。剑文夜如水，马汗冻成霜。
侠气五都少，矜功六郡良。山河起目前，睚眦死路傍。
北逐驱獯虏，西临复旧疆。昔还赋馀资，今出乃赢粮。
一矢弢夏服，我弓不再张。寄语丈夫雄，若乐身自当。

卷 282_2【登长城（一题作塞下曲）】

李益

汉家今上郡，秦塞古长城。有日云长惨，无风沙自惊。
当今圣天子，不战四夷平。

卷 282_3【杂曲】

李益

妾本蚕家女，不识贵门仪。藁砧持玉斧，交结五陵儿。
十日或一见，九日在路岐。人生此夫婿，富贵欲何为。
杨柳徒可折，南山不可移。妇人贵结发，宁有再嫁资。
嫁女莫望高，女心愿所宜。宁从贱相守，不愿贵相离。
蓝叶郁重重，蓝花若榴色。少妇归少年，华光自相得。
谁言配君子，以奉百年身。有义即夫婿，无义还他人。
爱如寒炉火，弃若秋风扇。山岳起面前，相看不相见。
丈夫非小儿，何用强相知。不见朝生菌，易成还易衰。
征客欲临路，居人还出门。北风河梁上，四野愁云繁。
岂不恋我家，夫婿多感恩。前程有日月，勋绩在河源。
少妇马前立，请君听一言。春至草亦生，谁能无别情。
殷勤展心素，见新莫忘故。遥望孟门山，殷勤报君子。
既为随阳雁，勿学西流水。尝闻生别离，悲莫悲于此。
同器不同荣，堂下即千里。与君贫贱交，何异萍上水。
托身天使然，同生复同死。

卷 282_4【送辽阳使还军】

李益

征人歌且行，北上辽阳城。二月戎马息，悠悠边草生。

青山出塞断，代地入云平。昔者匈奴战，多闻杀汉兵。
平生报国愤，日夜角弓鸣。勉君万里去，勿使虏尘惊。

卷 282_5【赋得早燕送别】

李益

碧草缦如线，去来双飞燕。长门未有春，先入班姬殿。
梁空绕不息，檐寒窥欲遍。今至随红萼，昔还悲素扇。
一别与秋鸿，差池讵相见。

卷 282_6【秋晚溪中寄怀大理齐司直（时齐分司洛下，有东山之期）】

李益

凤翔属明代，羽翼文葳蕤。昆仑进琪树，飞舞下瑶池。
振仪自西眷，东夏复分釐。国典唯平法，伊人方在斯。
荒宁柰杨肃，芳辉兰玉滋。明质鹫高景，飘飘服纓綈。
天寒清洛苑，秋夕白云司。况复空岩侧，苍苍幽桂期。
岁寒坐流霰，山川犹别离。浩思凭尊酒，氛氲独含辞。

卷 282_7【溪中月下寄杨子尉封亮】

李益

蘅若夺幽色，衔思恍无惊。宵长霜雾多，岁晏淮海风。
团团山中月，三五离夕同。露凝朱弦绝，觞至兰玉空。
清光液流波，盛明难再逢。尝恐河汉远，坐窥烟景穷。
小人谅处阴，君子树大功。永愿厉高翼，慰我丹桂丛。

卷 282_8【春晚赋得馀花落（得起字）】

李益

留春春竟去，春去花如此。蝶舞绕应稀，鸟惊飞讵已。
衰红辞故萼，繁绿扶雕蕊。自委不胜愁，庭风那更起。

卷 282_9【闻亡友王七嘉禾寺得素琴】

李益

故人惜此去，留琴明月前。今来我访旧，泪洒白云天。
讵欲匣孤响，送君归夜泉。抚琴犹可绝，况此故无弦。
何必雍门奏，然后泪潺湲。

卷 282_10【校书郎杨凝往年以古镜贖别今追赠以诗】

李益

明镜出匣时，明如云间月。一别青春鉴，回光照华发。
美人昔自爱，髻带手中结。愿以三五期，经天无玷缺。

卷 282_11【置酒行】

李益

置酒命所欢，凭觴遂为戚。日往不再来，兹辰坐成昔。
百龄非久长，五十将半百。胡为劳我形，已须还复白。
西山鸾鹤群，矫矫烟雾翮。明霞发金丹，阴洞潜水碧。
安得凌风羽，崦嵫驻灵魄。无然坐衰老，惭叹东陵柏。

卷 282_12【长社窦明府宅夜送王屋道士常究子】

李益

旦随三鸟去，羽节凌霞光。暮与双凫宿，云车下紫阳。
天坛临月近，洞水出山长。海峤年年别，丘陵徒自伤。

卷 282_13【观回军三韵】

李益

行行上陇头，陇月暗悠悠。万里将军没，回旌陇戍秋。
谁令呜咽水，重入故营流。

卷 282_14 【华山南庙】

李益

阴山临古道，古庙闭山碧。落日春草中，攀芳荐瑶席。
明灵达精意，仿佛如不隔。岩雨神降时，回飙入松柏。
常闻坑儒后，此地返秦璧。自古害忠良，神其辅宗祏。

卷 282_15 【喜邢校书远至对雨同赋远晚饭阮返五韵】

李益

雀噪空城阴，木衰羈思远。已蔽青山望，徒悲白云晚。
别离千里风，雨中同一饭。开径说逢康，临觴方接阮。
旅宦竟何如，劳飞思自返。

卷 282_16 【城西竹园送裴佶王达】

李益

葳蕤凌风竹，寂寞离人觞。怆怀非外至，沉郁自中肠。

远行从此始，别袂重凄霜。

卷 282_17【月下喜邢校书至自洛】

李益

天河夜未央，漫漫复苍苍。重君远行至，及此明月光。
华星映衰柳，暗水入寒塘。客心定何似，馀欢方自长。

卷 282_18【北至太原】

李益

炎祚昔昏替，皇基此郁盘。玄命久已集，抚运良乃艰。
南厄羊肠险，北走雁门寒。始于一戎定，垂此亿世安。
唐风本忧思，王业实艰难。中历虽横溃，天纪未可干。
圣明所兴国，灵岳固不殫。咄咄薄游客，斯言殊不刊。

卷 282_19【入华山访隐者经仙人石坛】

李益

三考四岳下，官曹少休沐。久负青山诺，今还获所欲。
尝闻玉清洞，金简受玄箓。凤驾升天行，云游恣霞宿。

平明矫轻策，扪石入空曲。仙人古石坛，苔绕青瑶局。
阳桂凌烟紫，阴罗冒水绿。隔世闻丹经，悬泉注明玉。
前惊羽人会，白日天居肃。问我将致辞，笑之自相目。
竦身云遂起，仰见双白鹄。堕其一纸书，文字类鸟足。
视之了不识，三返又三复。归来问方士，举世莫解读。
何必若蜉蝣，然后为跼促。鄙哉宦游子，身志俱降辱。
再往不及期，劳歌叩山木。

卷 282_20【罢镜】

李益

手中青铜镜，照我少年时。衰飒一如此，清光难复持。
欲令孤月掩，从遣半心疑。纵使逢人见，犹胜自见悲。

卷 282_21【华阴东泉同张处士诣藏律师兼简县内同官因寄齐中书】

李益

苍崖抱寒泉，沦照洞金碧。潜鳞孕明晦，山灵閟幽赜。
前峰何其诡，万变穷日夕。松老风易悲，山秋云更白。
故人邑中吏，五里仙雾隔。美质简琼瑶，英声铿金石。
烦君竟相问，问我此何适。我因赞时理，书寄西飞翮。
哲匠熙百工，日月被光泽。大国本多士，荆岑无遗璧。

高网弥八纮，皇图明四辟。群材既兼畅，顾我在草泽。
贵无身外名，贱有区中役。忽忽百龄内，殷殷千虑迫。
人生已如寄，在寄复为客。旧国不得归，风尘满阡陌。

卷 282_22【答郭黄中孤云首章见赠】

李益

孤云生西北，从风东南飘。帝乡日已远，苍梧无还飙。
已矣玄凤叹，严霜集灵苕。君其勉我怀，岁暮孰不凋。

卷 282_23【合源溪期张计不至】

李益

霜露肃时序，缅然方独寻。暗溪迟仙侣，寒涧闻松禽。
寂历兹夜永，清明秋序深。微波澹澄夕，烟景含虚林。
素志久沦否，幽怀方自吟。

卷 282_24【竹溪】

李益

访竹越云崖，即林若溪绝。宁知修干下，漠漠秋苔洁。

清光溢空曲，茂色临幽澈。采摘愧芳鲜，奉君岁暮节。

卷 282_25【送诸暨王主簿之任】

李益

别愁已万绪，离曲方三奏。远宦一辞乡，南天异风候。
秦城岁芳老，越国春山秀。落日望寒涛，公门闭清昼。
何用慰相思，裁书寄关右。

卷 282_26【罢秩后入华山采茯苓逢道者】

李益

委绶来名山，观奇恣所停。山中若有闻，言此不死庭。
遂逢五老人，一谓西岳灵。或闻樵人语，飞去入昴星。
授我出云路，苍然凌石屏。视之有文字，乃古黄庭经。
左右长松列，动摇风露零。上蟠千年枝，阴虬负青冥。
下结九秋霏，流膏为茯苓。取之砂石间，异若龟鹤形。
况闻秦宫女，华发变已青。有如上帝心，与我千万龄。
始疑有仙骨，炼魂可永宁。何事逐豪游，饮啄以膾腥。
神物亦自閤，风雷护此扃。欲传山中宝，回策忽已暝。
乃悲世上人，求醒终不醒。

卷 282_27【自朔方还与郑式瞻崔称郑子周岑赞同会法云寺
三门避暑】

李益

予本疏放士，謁来非外矫。误落边尘中，爱山见山少。
始投清凉宇，门值烟岫表。参差互明灭，彩翠竟昏晓。
泠泠远风来，过此群木杪。英英二三彦，襟旷去烦扰。
游川出潜鱼，息阴倦飞鸟。徇物不可穷，唯于此心了。

卷 282_28【来从塞车骑行（自朔方行作）】

李益

束发逢世屯，怀恩抱明义。读书良有感，学剑惭非智。
遂别鲁诸生，来从塞车骑。追兵赴边急，络马黄金辔。
出入燕南陲，由来重意气。自经皋兰战，又破楼烦地。
西北护三边，东南留一尉。时过欵如云，参差不自意。
将军失恩泽，万事从此异。置酒高台上，薄暮秋风至。
长戟与我归，归来同弃置。自酌还自饮，非名又非利。
歌出易水寒，琴下雍门泪。出逢平乐旧，言在天阶侍。
问我从军苦，自陈少年贵。丈夫交四海，徒论身自致。
汉将不封侯，苏卿劳远使。今我终此曲，此曲诚不易。
贵人难识心，何由知忌讳。

卷 282_29【夜发军中】

李益

边马枥上惊，雄剑匣中鸣。半夜军书至，匈奴寇六城。
中坚分暗阵，太乙起神兵。出没风云合，苍黄豺虎争。
今日边庭战，缘赏不缘名。

卷 282_30【将赴朔方早发汉武泉】

李益

弭盖出故关，穷秋首边路。问我此何为，平生重一顾。
风吹山下草，系马河边树。奉役良有期，回瞻终未屡。
去乡幸未远，戎衣今已故。岂惟幽朔寒，念我机中素。
去矣勿复言，所酬知音遇。

卷 282_31【城傍少年（一作汉宫少年行）】

李益

生长边城傍，出身事弓马。少年有胆气，独猎阴山下。
偶与匈奴逢，曾擒射雕者。名悬壮士籍，请君少相假。

卷 282_32 【游子吟】

李益

女羞夫婿薄，客耻主人贱。遭遇同众流，低回愧相见。
君非青铜镜，何事空照面。莫以衣上尘，不谓心如练。
人生当荣盛，待士勿言倦。君看白日驰，何异弦上箭。

卷 282_33 【饮马歌】

李益

百马饮一泉，一马争上游。一马喷成泥，百马饮浊流。
上有沧浪客，对之空叹息。自顾纓上尘，裴回终日夕。
为问泉上翁，何时见沙石。

卷 282_34 【莲塘驿（在盱眙界）】

李益

五月渡淮水，南行绕山陂。江村远鸡应，竹里闻缲丝。
楚女肌发美，莲塘烟露滋。菱花覆碧渚，黄鸟双飞时。
渺渺溯洄远，凭风托微词。斜光动流睇，此意难自持。
女歌本轻艳，客行多怨思。女萝蒙幽蔓，拟上青桐枝。

卷 282_35【五城道中】

李益

金钅铙随玉节，落日河边路。沙鸣后骑来，雁起前军度。
五城鸣斥堠，三秦新召募。天寒白登道，塞浊阴山雾。
仍闻旧兵老，尚在乌兰戍。笳箫汉思繁，旌旗边色故。
寝兴倦弓甲，勤役伤风露。来远赏不行，锋交勋乃茂。
未知朔方道，何年罢兵赋。

卷 282_36【与王楚同登青龙寺上方】

李益

连冈出古寺，流睇移芳宴。鸟没汉诸陵，草平秦故殿。
摇光浅深树，拂木参差燕。春心断易迷，远目伤难遍。
壮日各轻年，暮年方自见。

卷 282_37【登夏州城观送行人赋得六州胡儿歌】

李益

六州胡儿六蕃语，十岁骑羊逐沙鼠。沙头牧马孤雁飞，
汉军游骑貂锦衣。云中征戍三千里，今日征行何岁归。

无定河边数株柳，共送行人一杯酒。胡儿起作和蕃歌，
齐唱呜呜尽垂手。心知旧国西州远，西向胡天望乡久。
回头忽作异方声，一声回尽征人首。蕃音虏曲一难分，
似说边情向塞云。故国关山无限路，风沙满眼堪断魂。
不见天边青作冢，古来愁杀汉昭君。

卷 282_38【从军夜次六胡北饮马磨剑石为祝殇辞】

李益

我行空碛，见沙之磷磷，与草之冪冪，半没胡儿磨剑石。
当时洗剑血成川，至今草与沙皆赤。我因扣石问以言，
水流呜咽幽草根，君宁独不怪阴磷？吹火荧荧又为碧，
有鸟自称蜀帝魂。南人伐竹湘山下，交根接叶满泪痕。
请君先问湘江水，然我此恨乃可论。秦亡汉绝三十国，
关山战死知何极。风飘雨洒水自流，此中有冤消不得。
为之弹剑作哀吟，风沙四起云沈沈。满营战马嘶欲尽，
毕昴不见胡天阴。东征曾吊长平苦，往往晴明独风雨。
年移代去感精魂，空山月暗闻鼙鼓。秦坑赵卒四十万，
未若格斗伤戎虏。圣君破胡为六州，六州又尽为胡丘。
韩公三城断胡路，汉甲百万屯边秋。乃分司空授朔土，
拥以玉节临诸侯，汉为一雪万世仇。我今抽刀勒剑石，
告尔万世为唐休。又闻招魂有美酒，为我浇酒祝东流。
殇为魂兮，可以归还故乡些；沙场地无人兮，
尔独不可以久留。

卷 282_39【登天坛夜见海】

李益

朝游碧峰三十六，夜上天坛月边宿。仙人携我攀玉英，
坛上夜半东方明。仙钟撞撞近海日，海中离离三山出。
霞梯赤城遥可分，霓旌绛节倚彤云。八鸾五凤纷在御，
王母欲上朝元君。群仙指此为我说，几见尘飞沧海竭。
竦身别我期丹宫，空山处处遗清风。九州下视杳未旦，
一半浮生皆梦中。始知武皇求不死，去逐瀛洲羡门子。

卷 282_40【大礼毕皇帝御丹凤门改元建中大赦】

李益

大明曈曈天地分，六龙负日升天门。凤凰飞来衔帝篆，
言我万代金皇孙。灵鸡鼓舞承天赦，高翔百尺垂朱幡。
宸居穆清受天历，建中甲子合上元。昊穹景命即已至，
王事乃可酬乾坤。升中告成答玄贶，泥金检玉昭鸿恩。
云亭之事略可记，七十二君宁独尊。小臣欲上封禅表，
久而未就归文园。

卷 282_41【轻薄篇】

李益

豪不必驰千骑，雄不在垂双鞬。天生俊气自相逐，
出与雕鹗同飞翻。朝行九衢不得意，下鞭走马城西原。
忽闻燕雁一声去，回鞍挟弹平陵园。归来青楼曲未半，
美人玉色当金尊。淮阴少年不相下，酒酣半笑倚市门。
安知我有不平色，白日欲落红尘昏。死生容易如反掌，
得意失意由一言。少年但饮莫相问，此中报仇亦报恩。

卷 282_42【野田行（一作于鹄诗）】

李益

日没出古城，野田何茫茫。寒狐啸青冢，鬼火烧白杨。
昔人未为泉下客，行到此中曾断肠。

卷 282_43【古别离】

李益

双剑欲别风凄然，雌沉水底雄上天。江回汉转两不见，
云交雨合知何年。古来万事皆由命，何用临岐苦涕涟。

卷 282_44【效古促促曲为河上思妇作】

李益

促促何促促，黄河九回曲。嫁与棹船郎，空床将影宿。
不道君心不如石，那教妾貌长如玉。

卷 282_45【汉宫少年行】

李益

君不见上宫警夜营八屯，冬冬街鼓朝朱轩。
玉阶霜仗拥未合，少年排入铜龙门。暗闻弦管九天上，
宫漏沈沈清吹繁。平明走马绝驰道，呼鹰挟弹通缭垣。
玉笼金锁养黄口，探雏取卵伴王孙。分曹陆博快一掷，
迎欢先意笑语喧。巧为柔媚学优孟，儒衣嬉戏冠沐猴。
晚来香街经柳市，行过倡舍宿桃根。相逢杯酒一言失，
回朱点白闻至尊。金张许史伺颜色，王侯将相莫敢论。
岂知人事无定势，朝欢暮戚如掌翻。椒房宠移子爱夺，
一夕秋风生戾园。徒用黄金将买赋，宁知白玉暗成痕。
持杯收水水已覆，徙薪避火火更燔。欲求四老张丞相，
南山如天不可上。

第二百八十三卷

卷 283_1【竹窗闻风寄苗发司空曙】

李益

微风惊暮坐，临牖思悠哉。开门复动竹，疑是故人来。
时滴枝上露，稍沾阶下苔。何当一入幌，为拂绿琴埃。

卷 283_2【赋得垣衣】

李益

漠漠复霏霏，为君垣上衣。昭阳辇下草，应笑此生非。
掩蔼青春去，苍茫白露稀。犹胜萍逐水，流浪不相依。

卷 283_3【送人流贬】

李益

汉章虽约法，秦律已除名。谤远人多惑，官微不自明。

霜风先独树，瘴雨失荒城。畴昔长沙事，三年召贾生。

卷 283_4 【送人南归】

李益

人言下江疾，君道下江迟。五月江路恶，南风惊浪时。
应知近家喜，还有异乡悲。无奈孤舟夕，山歌闻竹枝。

卷 283_5 【水亭夜坐赋得晓雾】

李益

月落寒雾起，沈思浩通川。宿禽嘒木散，山泽一苍然。
漠漠沙上路，沍沍洲外田。犹当依远树，断续欲穷天。

卷 283_6 【送常曾侍御使西蕃寄题西川】

李益

凉王宫殿尽，芜没陇云西。今日闻君使，雄心逐鼓鼙。
行当收汉垒，直可取蒲泥。旧国无由到，烦君下马题。

卷 283_7【入南山至全师兰若】

李益

木陨水归壑，寂然无念心。南行有真子，被褐息山阴。
石路瑶草散，松门寒景深。吾师亦何爱，自起定中吟。

卷 283_8【送韩将军还边】

李益

白马羽林儿，扬鞭薄暮时。独将轻骑出，暗与伏兵期。
雨雪移军远，旌旗上垄迟。圣心戎寄重，未许让恩私。

卷 283_9【晚春卧病喜振上人见访】

李益

卧床如旧日，窥户易伤春。灵寿扶衰力，芭蕉对病身。
道心空寂寞，时物自芳新。旦夕谁相访，唯当摄上人。

卷 283_10【春行】

李益

侍臣朝谒罢，戚里自相过。落日青丝骑，春风白纛歌。
恩承三殿近，猎向五陵多。归路南桥望，垂杨拂细波。

卷 283_11【洛阳河亭奉酬留守群公追送（一作李逸诗）】

李益

离亭饯落晖，腊酒减春衣。岁晚烟霞重，川寒云树微。
戎装千里至，旧路十年归。还似汀洲雁，相逢又背飞。

卷 283_12【寻纪道士偶会诸叟】

李益

山阴寻道士，映竹羽衣新。侍坐双童子，陪游五老人。
水花松下静，坛草雪中春。见说桃源洞，如今犹避秦。

卷 283_13【同萧炼师宿太乙庙】

李益

微月空山曙，春祠谒少君。落花坛上拂，流水洞中闻。

酒引芝童奠，香馀桂子焚。鹤飞将羽节，遥向赤城分。

卷 283_14【送同落第者东归】

李益

东门有行客，落日满前山。圣代谁知者，沧洲今独还。
片云归海暮，流水背城闲。余亦依嵩颖，松花深闭关。

卷 283_15【送柳判官赴振武】

李益

边庭汉仪重，旌甲似云中。虏地山川壮，单于鼓角雄。
关寒塞榆落，月白胡天风。君逐嫖姚将，麒麟有战功。

卷 283_16【述怀寄衡州令狐相公】

李益

调元方翼圣，轩盖忽言东。道以中枢密，心将外理同。
白头生远浪，丹叶下高枫。江上萧疏雨，何人对谢公。

卷 283_17【喜入兰陵望紫阁峰呈宣上人】

李益

薤草开三径，巢林喜一枝。地宽留种竹，泉浅欲开池。
紫阁当疏牖，青松入坏篱。从今安僻陋，萧相是吾师。

卷 283_18【喜见外弟又言别】

李益

十年离乱后，长大一相逢。问姓惊初见，称名忆旧容。
别来沧海事，语罢暮天钟。明日巴陵道，秋山又几重。

卷 283_19【立春日宁州行营因赋朔风吹飞雪】

李益

边声日夜合，朔风惊复来。龙山不可望，千里一裴回。
捐扇破谁执，素纨轻欲裁。非时妒桃李，自是舞阳台。

卷 283_20【献刘济】

李益

草绿古燕州，莺声引独游。雁归天北畔，春尽海西头。
向日花偏落，驰年水自流。感恩知有地，不上望京楼。

卷 283_21【哭柏岩禅师】

李益

遍与傍人别，临终尽不愁。影堂谁为扫，坐塔自看修。
白日钟边晚，青苔钵上秋。天涯禅弟子，空到柏岩游。

卷 283_22【赴邠宁留别】

李益

身承汉飞将，束发即言兵。侠少何相问，从来事不平。
黄云断朔吹，白雪拥沙城。幸应边书募，横戈会取名。

卷 283_23【紫骝马】

李益

争场看斗鸡，白鼻紫骝嘶。漳水春闺晚，丛台日向低。

歇鞍珠作汗，试剑玉如泥。为谢红梁燕，年年妾独栖。

卷 283_24【夜上受降城闻笛（一作戎昱诗）】

李益

入夜思归切，笛声清更哀。愁人不愿听，自到枕前来。
风起塞云断，夜深关月开。平明独惆怅，落尽一庭梅。

卷 283_25【同崔邠登鹳雀楼】

李益

鹳雀楼西百尺檣，汀洲云树共茫茫。汉家箫鼓空流水，
魏国山河半夕阳。事去千年犹恨速。愁来一日即为长。
风烟并起思归望，远目非春亦自伤。

卷 283_26【奉酬崔员外副使携琴宿使院见示】

李益

忽闻此夜携琴宿，遂叹常时尘吏喧。庭木已衰空月亮，
城砧自急对霜繁。犹持副节留军府，未荐高词直掖垣。
谁问南飞长绕树，官微同在谢公门。

卷 283_27 【送贾校书东归寄振上人（一作振上人院喜见贾弇兼酬别）】

李益

北风吹雁数声悲，况指前林是别时。秋草不堪频送远，
白云何处更相期。山随匹马行看暮，路入寒城独去迟。
为向东州故人道，江淹已拟惠休诗。

卷 283_28 【过马嵬二首（第二首一作李远诗）】

李益

路至墙垣问樵者，顾予云是太真宫。太真血染马蹄尽，
朱阁影随天际空。丹壑不闻歌吹夜，玉阶唯有薜萝风。
世人莫重霓裳曲，曾致干戈是此中。

金甲银旌尽已回，苍茫罗袖隔风埃。浓香犹自随鸾辂，
恨魄无由离马嵬。南内真人悲帐殿，东溟方士问蓬莱。
唯留坡畔弯环月，时送残辉入夜台。

卷 283_29 【盐州过胡儿饮马泉（一作过五原胡儿饮马泉）】

李益

绿杨著水草如烟，旧是胡儿饮马泉。几处吹笳明月夜，
何人倚剑白云天。从来冻合关山路，今日分流汉使前。
莫遣行人照容鬓，恐惊憔悴入新年。

卷 283_30【宿冯翊夜雨赠主人】

李益

危心惊夜雨，起望漫悠悠。气耿残灯暗，声繁高树秋。
凉轩辞夏扇，风幌揽轻裯。思绪蓬初断，归期燕暂留。
关山谩已失，脸泪迸难收。赖君时一笑，方能解四愁。

卷 283_31【送襄阳李尚书】

李益

天寒发梅柳，忆昔到襄州。树暖然红烛，江清展碧油。
风烟临岘首，云水接昭丘。俗尚春秋学，词称文选楼。
都门送旌节，符竹领诸侯。汉沔分戎寄，黎元减圣忧。
时追山简兴，本自习家流。莫废思康乐，诗情满沃洲。

卷 283_32【春日晋祠同声会集得疏字韵】

李益

风壤瞻唐本，山祠阅晋馀。水亭开帘幕，岩榭引簪裾。
地绿苔犹少，林黄柳尚疏。菱苕生皎镜，金碧照澄虚。
翰苑声何旧，宾筵醉止初。中州有辽雁，好为系边书。

卷 283_33【再赴渭北使府留别】

李益

结发逐鸣镳，连兵追谷蠡。山川搜伏虏，铠甲被重犀。
故府旌旗在，新军羽校齐。报恩身未死，识路马还嘶。
列嶂高峰举，当营太白低。平戎七尺剑，封检一丸泥。
截海取蒲类，跑泉饮鸕鹚。汉庭中选重，更事五原西。

卷 283_34【送归中丞使新罗册立吊祭（一作李端诗）】

李益

东望扶桑日，何年是到时。片帆通雨露，积水隔华夷。
浩渺风来远，虚明鸟去迟。长波静云月，孤岛宿旌旗。
别叶传秋意，回潮动客思。沧溟无旧路，何处问前期。

卷 283_35【赋得路傍一株柳送邢校书赴延州使府】

李益

路傍一株柳，此路向延州。延州在何处，此路起悠悠。

卷 283_36 【重赠邢校书】

李益

俱从四方事，共会九秋中。断蓬与落叶，相值各因风。

卷 283_37 【照镜】

李益

衰鬓朝临镜，将看却自疑。惭君明似月，照我白如丝。

卷 283_38 【书院无历日，以诗代书，问路侍御六月大小】

李益

野性迷尧历，松窗有道经。故人为柱史，为我数阶蓂。

卷 283_39 【闻鸡赠主人】

李益

胶胶司晨鸣，报尔东方旭。无事恋君轩，今君重帛鹄。

卷 283_40 【登白楼见白鸟席上命鹓鹄辞】

李益

一鸟如霜雪，飞向白楼前。问君何以至，天子太平年。

卷 283_41 【石楼山见月（一作宿青山石楼）】

李益

紫塞连年戍，黄沙碛路穷。故人今夜宿，见月石楼中。

卷 283_42 【惜春伤同幕故人孟郎中兼呈去年看花友】

李益

畏老身全老，逢春解惜春。今年看花伴，已少去年人。

卷 283_43 【嘉禾寺见亡友王七题壁】

李益

今日忆君处，忆君君岂知。空馀暗尘字，读罢泪仍垂。

卷 283_44 【听唱赤白桃李花】

李益

赤白桃李花，先皇在时曲。欲向西宫唱，西宫宫树绿。

卷 283_45 【江南词】

李益

嫁得瞿塘贾，朝朝误妾期。早知潮有信，嫁与弄潮儿。

卷 283_46 【赠内兄卢纶】

李益

世故中年别，馀生此会同。却将悲与病，来对朗陵翁。

卷 283_47 【答窦二曹长留酒还榼】

李益

榼小非由榼，星郎是酒星。解醒元有数，不用吓刘伶。

卷 283_48【答广宣供奉问兰陵居】

李益

居北有朝路，居南无住人。劳师问家第，山色是南邻。

卷 283_49【乞宽禅师瘿山罍呈宣供奉】

李益

石色凝秋藓，峰形若夏云。谁留秦苑地，好赠杏溪君。

卷 283_50【观骑射】

李益

边头射雕将，走马出中军。远见平原上，翻身向暮云。

卷 283_51【幽州赋诗见意时佐刘幕（一作题太原落漠驿西堠）】

李益

征戍在桑干，年年蓟水寒。殷勤驿西路，北去向长安。

卷 283_52【军次阳城烽舍北流泉】

李益

何地可潸然，阳城烽树边。今朝望乡客，不饮北流泉。

卷 283_53【金吾子】

李益

绣帐博山炉，银鞍冯子都。黄昏莫攀折，惊起欲栖乌。

卷 283_54【山鹧鸪词】

李益

湘江斑竹枝，锦翅鹧鸪飞。处处湘云合，郎从何处归。

卷 283_55【立秋前一日览镜】

李益

万事销身外，生涯在镜中。唯将满鬓雪，明日对秋风。

卷 283_56【代人乞花】

李益

绣户朝眠起，开帘满地花。春风解人意，欲落妾西家。

卷 283_57【上洛桥】

李益

金谷园中柳，春来似舞腰。何堪好风景，独上洛阳桥。

卷 283_58【扬州怀古】

李益

故国歌钟地，长桥车马尘。彭城阁边柳，偏似不胜春。

卷 283_59【水宿闻雁】

李益

早雁忽为双，惊秋风水窗。夜长人自起，星月满空江。

卷 283_60【扬州早雁】

李益

江上三千雁，年年过故宫。可怜江上月，偏照断根蓬。

卷 283_61【下楼】

李益

话旧全应老，逢春喜又悲。看花行拭泪，倍觉下楼迟。

卷 283_62【度破讷沙二首（一作塞北行次度破讷沙）】

李益

眼见风来沙旋移，经年不省草生时。
莫言塞北无春到，总有春来何处知。

破讷沙头雁正飞，鵕鹑泉上战初归。

平明日出东南地，满碛寒光生铁衣。

卷 283_63【拂云堆】

李益

汉将新从虏地来，旌旗半上拂云堆。
单于每近沙场猎，南望阴山哭始回。

卷 283_64【中桥北送穆质兄弟应制，戏赠萧二策】

李益

洛水桥边雁影疏，陆机兄弟驻行车。
欲陈汉帝登封草，犹待萧郎寄内书。

卷 283_65【九月十日雨中过张伯佳期柳镇未至以诗招之】

李益

柳吴兴近无消息，张长公贫苦寂寥。
唯有角巾沾雨至，手持残菊向西招。

卷 283_66 【汴河曲】

李益

汴水东流无限春，隋家宫阙已成尘。
行人莫上长堤望，风起杨花愁杀人。

卷 283_67 【塞下曲】

李益

蕃州部落能结束，朝暮驰猎黄河曲。
燕歌未断塞鸿飞，牧马群嘶边草绿。

秦筑长城城已摧，汉武北上单于台。
古来征战虏不尽，今日还复天兵来。

黄河东流流九折，沙场埋恨何时绝。
蔡琰没去造胡笳，苏武归来持汉节。

为报如今都护雄，匈奴且莫下云中。
请书塞北阴山石，愿比燕然车骑功。

卷 283_68 【夜上西城听梁州曲二首】

李益

行人夜上西城宿，听唱梁州双管逐。
此时秋月满关山，何处关山无此曲。

鸿雁新从北地来，闻声一半却飞回。
金河戍客肠应断，更在秋风百尺台。

卷 283_69【暖川（一作征人歌）】

李益

胡风冻合鹍鹄泉，牧马千群逐暖川。
塞外征行无尽日，年年移帐雪中天。

卷 283_70【过马嵬】

李益

汉将如云不直言，寇来翻罪绮罗恩。
托君休洗莲花血，留记千年妾泪痕。

卷 283_71【答许五端公马上口号】

李益

晚逐旌旗俱白首，少游京洛共缁尘。
不堪身外悲前事，强向杯中觅旧春。

卷 283_72 【牡丹（一作咏牡丹赠从兄正封）】

李益

紫蕊丛开未到家，却教游客赏繁华。
始知年少求名处，满眼空中别有花。

卷 283_73 【边思】

李益

腰悬锦带佩吴钩，走马曾防玉塞秋。
莫笑关西将家子，只将诗思入凉州。

卷 283_74 【奉和武相公春晓闻莺（一作蜀川闻莺）】

李益

蜀道山川心易惊，绿窗残梦晓闻莺。

分明似写文君恨，万怨千愁弦上声。

卷 283_75【送客还幽州】

李益

惆怅秦城送独归，蓟门云树远依依。
秋来莫射南飞雁，从遣乘春更北飞。

卷 283_76【柳杨送客（一作扬州万里送客）】

李益

青枫江畔白蘋洲，楚客伤离不待秋。
君见隋朝更何事，柳杨南渡水悠悠。

卷 283_77【从军北征】

李益

天山雪后海风寒，横笛偏吹行路难。
碛里征人三十万，一时回向月明看。

卷 283_78【听晓角】

李益

边霜昨夜堕关榆，吹角当城汉月孤。
无限塞鸿飞不度，秋风卷入小单于。

卷 283_79【宫怨】

李益

露湿晴花春殿香，月明歌吹在昭阳。
似将海水添宫漏，共滴长门一夜长。

卷 283_80【暮过回乐烽】

李益

烽火高飞百尺台，黄昏遥自碣西来。
昔时征战回应乐，今日从军乐未回。

卷 283_81【奉和武相公郊居寓目】

李益

黄扉晚下禁垣钟，归坐南闱山万重。
独有月中高兴尽，雪峰明处见寒松。

卷 283_82【诣红楼院寻广宣不遇留题】

李益

柿叶翻红霜景秋，碧天如水倚红楼。
隔窗爱竹有人问，遣向邻房觅户钩。

卷 283_83【回军行】

李益

关城榆叶早疏黄，日暮沙云古战场。
表请回军掩尘骨，莫教士卒哭龙荒。

卷 283_84【邠宁春日】

李益

桃李年年上国新，风沙日日塞垣人。

伤心更见庭前柳，忽有千条欲占春。

卷 283_85【古瑟怨】

李益

破瑟悲秋已减弦，湘灵沈怨不知年。
感君拂拭遗音在，更奏新声明月天。

卷 283_86【夜宴观石将军舞】

李益

微月东南上戍楼，琵琶起舞锦缠头。
更闻横笛关山远，白草胡沙西塞秋。

卷 283_87【春夜闻笛】

李益

寒山吹笛唤春归，迁客相看泪满衣。
洞庭一夜无穷雁，不待天明尽北飞。

卷 283_88 【扬州送客】

李益

南行直入鹧鸪群，万岁桥边一送君。
闻道望乡闻不得，梅花暗落岭头云。

卷 283_89 【统汉峰下（一作过降户至统漠烽）】

李益

统汉峰西降户营，黄河战骨拥长城。
只今已勒燕然石，北地无人空月明。

卷 283_90 【避暑女冠】

李益

雾袖烟裾云母冠，碧琉璃簪井冰寒。
焚香欲使三清鸟，静拂桐阴上玉坛。

卷 283_91 【行舟】

李益

柳花飞入正行舟，卧引菱花信碧流。
闻道风光满扬子，天晴共上望乡楼。

卷 283_92【隋宫燕】

李益

燕语如伤旧国春，宫花一落已成尘。
自从一闭风光后，几度飞来不见人。

卷 283_93【送人归岳阳】

李益

烟草连天枫树齐，岳阳归路子规啼。
春江万里巴陵戍，落日看沈碧水西。

卷 283_94【上汝州郡楼】

李益

黄昏鼓角似边州，三十年前上此楼。

今日山城对垂泪，伤心不独为悲秋。

卷 283_95【临滹沱见蕃使列名】

李益

漠南春色到滹沱，碧柳青青塞马多。
万里关山今不闭，汉家频许郅支和。

卷 283_96【写情】

李益

水纹珍簟思悠悠，千里佳期一夕休。
从此无心爱良夜，任他明月下西楼。

卷 283_97【夜上受降城闻笛】

李益

回乐峰前沙似雪，受降城下月如霜。
不知何处吹芦管，一夜征人尽望乡。

卷 283_98 【赴渭北宿石泉驿南望黄堆烽】

李益

边城已在虏城中，烽火南飞入汉宫。
汉庭议事先黄老，麟阁何人定战功。

卷 283_99 【逢归信偶寄】

李益

无事将心寄柳条，等闲书字满芭蕉。
乡关若有东流信，遣送扬州近驿桥。

卷 283_100 【赠毛仙翁】

李益

玉树溶溶仙气深，含光混俗似无心。
长愁忽作鹤飞去，一片孤云何处寻。

卷 283_101 【长干行】

李益

忆妾深闺里，烟尘不曾识。嫁与长干人，沙头候风色。
五月南风兴，思君下巴陵。八月西风起，想君发扬子。
去来悲如何，见少离别多。湘潭几日到，妾梦越风波。
昨夜狂风度，吹折江头树。渺渺暗无边，行人在何处。
好乘浮云骢，佳期兰渚东。鸳鸯绿浦上，翡翠锦屏中。
自怜十五馀，颜色桃花红。那作商人妇，愁水复愁风。

卷 283_102 【和丘员外题湛长史旧居】

李益

昔降英王顾，屏身幽岩曲。灵波结繁笳，爽籁赴鸣玉。
运转春华至，岁来山草绿。青松掩落晖，白云竟空谷。
伊人抚遗叹，恻恻芳又缙。云谁馥美香，分毫寄明牧。

卷 283_103 【送客归振武】

李益

骏马事轻车，军行万里沙。胡山通唝落，汉节绕浑邪。
桂满天西月，芦吹塞北笳。别离俱报主，路极不为赊。

卷 283_104 【府试古镜】

李益

旧是秦时镜，今藏古匣中。龙盘初挂月，凤舞欲生风。
石黛曾留殿，朱光适在宫。应祥知道泰，鉴物觉神通。
肝胆诚难隐，妍媸信易穷。幸居君子室，长愿免尘蒙。

卷 283_105 【赠宣大师】

李益

一国沙弥独解诗，人人道胜惠林师。先皇诏下征还日，
今上龙飞入内时。看月忆来松寺宿，寻花思作杏溪期。
因论佛地求心地，只说常吟是住持。

卷 283_106 【汉宫词（一作韩翃诗）】

李益

汉室长陵小市东，珠帘绣户对春风。
君王昨日移仙仗，玉辇将迎入汉中。

卷 283_107 【江南曲（一作韩翃诗）】

李益

长乐花枝雨点销，江城日暮好相邀。
春楼不闭葳蕤锁，绿水回连宛转桥。

卷 283_108 【宿石邑山中】

李益

浮云不共此山齐，山霭苍苍望转迷。
晓月暂飞高树里，秋河隔在数峰西。

卷 283_109 【寄赠衡州杨使君】

李益

湘竹斑斑湘水春，衡阳太守虎符新。
朝来笑向归鸿道，早晚南飞见主人。

卷 283_110 【途中寄李二（一作戎昱诗）】

李益

杨柳含烟灞岸春，年年攀折为行人。
好风若借低枝便，莫遣青丝扫路尘。

卷 283_111 【寄许炼师（一作戎昱诗）】

李益

扫石焚香礼碧空，露华偏湿蕊珠宫。
如何说得天坛上，万里无云月在中。

卷 283_112 【失题（此卢纶诗，题作赴虢州留别故人）】

李益

世故相逢各未闲，百年多在别离间。
昨夜秋风今夜雨，不知何处入空山。

卷 283_113 【塞下曲】

李益

伏波惟愿裹尸还，定远何须生入关。

莫遣只轮归海窟，仍留一箭射天山。

卷 283_114 【上黄堆烽】

李益

心期紫阁山中月，身过黄堆烽上云。
年发已从书剑老，戎衣更逐霍将军。

卷 283_115 【句】

李益

闲庭草色能留马，当路杨花不避人。（张为《主客图》）。

第二百八十四卷

卷 284_1【古别离二首】

李端

水国叶黄时，洞庭霜落夜。行舟闻商估，宿在枫林下。
此地送君还，茫茫似梦间。后期知几日，前路转多山。
巫峡通湘浦，迢迢隔云雨。天晴见海樯，月落闻津鼓。
人老自多愁，水深难急流。清宵歌一曲，白首对汀洲。

与君桂阳别，令君岳阳待。后事忽差池，前期日空在。
木落雁嗷嗷，洞庭波浪高。远山云似盖，极浦树如毫。
朝发能几里，暮来风又起。如何两处愁，皆在孤舟里。
昨夜天月明，长川寒且清。菊花开欲尽，茱萸泊来生。
下江帆势速，五两遥相逐。欲问去时人，知投何处宿。
空令猿啸时，泣对湘簟竹。

卷 284_2【折杨柳（一作折杨柳送别）】

李端

东城攀柳叶，柳叶低着草。少壮莫轻年，轻年有衰老。
柳发遍川冈，登高堪断肠。雨烟轻漠漠，何树近君乡。
赠君折杨柳，颜色岂能久。上客莫沾巾，佳人正回首。
新柳送君行，古柳伤君情。突兀临荒渡，婆娑出旧营。
隋家两岸尽，陶宅五株荣。日暮偏愁望，春山有鸟声。

卷 284_3 【留别柳中庸】

李端

惆怅流水时，萧条背城路。离人出古亭，嘶马入寒树。
江海正风波，相逢在何处。

卷 284_4 【野亭三韵送钱员外】

李端

野菊开欲稀，寒泉流渐浅。幽人步林后，叹此年华晚。
倚杖送行云，寻思故山远。

卷 284_5 【归山招王逵】

李端

日长原野静，杖策步幽巘。雉雉麦苗阴，蝶飞溪草晚。
我生好闲放，此去殊未返。自是君不来，非关故山远。

卷 284_6 【过谷口元赞善所居（一作赠池阳谷口）】

李端

入谷访君来，秋泉已堪涉。林间人独坐，月下山相接。
重露湿苍苔，明灯照黄叶。故交一不见，素发何稠叠。

卷 284_7 【旅次岐山得山友书却寄凤翔张尹】

李端

本与戴征君，同师竹上坐。偶为名利引，久废论真果。
昨日山信回，寄书来责我。

卷 284_8 【九日赠司空文明】

李端

我有惆怅词，待君醉时说。长来逢九日，难与菊花别。
摘却正开花，暂言花未发。

卷 284_9【芜城】

李端

昔人登此地，丘陇已前悲。今日又非昔，春风能几时。
风吹城上树，草没城边路。城里月明时，精灵自来去。

卷 284_10【送吉中孚拜官归楚州】

李端

才子神骨清，虚竦眉眼明。貌应同卫玠，鬓且异潘生。
初戴莓苔帻，来过丞相宅。满堂归道师，众口宗诗伯。
须臾里巷传，天子亦知贤。出诏升高士，驰声在少年。
自为才哲爱，日与侯王会。匡主一言中，荣亲千里外。
更闻仙士友，往往东回首。驱石不成羊，指丹空毙狗。
孤帆淮上归，商估夜相依。海雾寒将尽，天星晓欲稀。
潮头来始歇，浦口喧争发。乡树尚和云，邻船犹带月。
到洞必伤情，巡房见旧名。醺疏坛路涩，汲少井栏倾。
别我长安道，前期共须老。方随水向山，肯惜花辞岛。
怅望执君衣，今朝风景好。

卷 284_11【荆州泊】

李端

南楼西下时，月里闻来棹。桂水触舳回，荆州津济闹。
移帷望星汉，引带思容貌。今夜一江人，唯应妾身觉。

卷 284_12【春游乐】

李端

游童苏合弹，倡女蒲葵扇。初日映城时，相思忽相见。
褰裳蹋路草，理鬓回花面。薄暮不同归，留情此芳甸。

卷 284_13【千里思】

李端

凉州风月美，遥望居延路。泛泛下天云，青青缘塞树。
燕山苏武上，海岛田横住。更是草生时，行人出门去。

卷 284_14【白鹭咏】

李端

迴起来应近，高飞去自遥。映林同落雪，拂水状翻潮。

犹有幽人兴，相遇到碧霄。

卷 284_15【冬夜与故友聚送吉校书】

李端

途穷别则怨，何必天涯去。共作出门人，不见归乡路。
殷勤执杯酒，怅望送亲故。月色入闲轩，风声落高树。
云霄望且远，齿发行应暮。九日泣黄花，三秋悲白露。
君行过洛阳，莫向青山度。

卷 284_16【与苗员外山行】

李端

古人留路去，今日共君行。若待青山尽，应逢白发生。
谁知到兰若，流落一书名。

卷 284_17【早春同庾侍郎题青龙上方院】

李端

相见惜馀辉，齐行登古寺。风烟结远恨，山水含芳意。
车马莫前归，留看巢鹤至。

卷 284_18【送从叔赴洪州】

李端

荣家兼佐幕，叔父似还乡。王粲名虽重，郗超髯未长。
鸣桡过夏口，敛笏见浔阳。后夜相思处，中庭月一方。

卷 284_19【送路司谏侍从叔赴洪州】

李端

郗超本绝伦，得意在芳春。勋业耿家盛，风流荀氏均。
声名金作赋，白皙玉为身。敛笏辞天子，乘龟从丈人。
度关行且猎，鞍马何蹉跎。猿啸暮应愁，湖流春好涉。
浔阳水分送，于越山相接。梅雨细如丝，蒲帆轻似叶。
逢风燕不定，值石波先叠。楼见远公庐，船经徐稚业。
邑人多秉笔，州吏亦负笈。村女解收鱼，津童能用楫。
唯我有荆扉，无成未得归。见君兄弟出，今日自沾衣。

卷 284_20【病后游青龙寺】

李端

病来形貌秽，斋沐入东林。境静闻神远，身羸向道深。

芭蕉高自折，荷叶大先沈。

卷 284_21【夜寻司空文明逢深上人因寄晋侍御】

李端

鹤裘筇竹杖，语笑过林中。正是月明夜，陶家见远公。
自嫌山客务，不与汉官同。

卷 284_22【长安书事寄薛戴】

李端

朔雁去成行，哀蝉响如昨。时芳一憔悴，暮序何萧索。
笑语且无聊，逢迎多约略。三山不可见，百岁空挥霍。
故事尽为愁，新知无复乐。夫君又离别，而我加寂寞。
惠远纵相寻，陶潜只独酌。主人恩则厚，客子才自薄。
委曲见提携，因循成蹇剥。论边书未上，招隐诗还作。
贵者已朝餐，岂能敦宿诺。飞禽虽失树，流水长思壑。
千里寄琼枝，梦寐青山郭。

卷 284_23【鲜于少府宅看花】

李端

谢家能植药，万簇相萦倚。烂熳绿苔前，婵娟青草里。
垂栏复照户，映竹仍临水。骤雨发芳香，回风舒锦绮。
孤光杂新故，众色更重累。散碧出疏茎，分黄成细蕊。
游蜂高更下，惊蝶坐还起。玉貌对应惭，霞标方不似。
春阴怜弱蔓，夏日同短晷。回落报荣衰，交关斗红紫。
花时苟未赏，老至谁能止。上客屡移床，幽僧劳凭几。
初合虽薄劣，却得陪君子。敢问贤主人，何如种桃李。

卷 284_24 【慈恩寺怀旧】

李端

去者不可忆，旧游相见时。凌霄徒更发，非是看花期。
倚玉交文友，登龙年月久。东阁许联床，西郊亦携手。
彼苍何暧昧，薄劣翻居后。重入远师溪，谁尝陶令酒。
伊昔会禅宫，容辉在眼中。篮舆来问道，玉柄解谈空。
孔席亡颜子，僧堂失谢公。遗文一书壁，新竹再移丛。
始聚终成散，朝欢暮不同。春霞方照日，夜烛忽迎风。
蚁斗声犹在，鸱灾道已穷。问天应默默，归宅太匆匆。
凄其履还路，莽苍云林暮。九陌似无人，五陵空有雾。
缅怀山阳笛，永恨平原赋。错莫过门栏，分明识行路。
上智本全真，郗公况重臣。唯应抚灵运，暂是忆嘉宾。
存信松犹小，缄哀草尚新。鲤庭埋玉树，那忍见门人。

卷 284_25 【赠薛戴】

李端

晓雾忽为霜，寒蝉还罢响。行人在长道，日暮多归想。
射策本何功，名登绛帐中。遂矜丘室重，不料阮途穷。
交结惭时辈，龙钟似老翁。机非鄙夫正，懒是平生性。
欹枕鸿雁高，闭关花药盛。厨烟当雨绝，阶竹连窗暝。
欲赋苦饥行，无如消渴病。旧业历胡尘，荒原少四邻。
田园空有处，兄弟未成人。毛义心长苦，袁安家转贫。
今呈胸臆事，当为泪沾巾。

卷 284_26 【东门送客】

李端

绿杨新草路，白发故乡人。既壮还应老，游梁复滞秦。
逢花莫漫折，能有几多春。

卷 284_27 【送韩绅卿】

李端

春雨昨开花，秋霜忽沾草。荣枯催日夕，去住皆须老。
君望汉家原，高坟渐成道。

卷 284_28【襄阳曲】

李端

襄阳堤路长，草碧柳枝黄。谁家女儿临夜妆，
红罗帐里有灯光。雀钗翠羽动明珰，欲出不出脂粉香。
同居女伴正衣裳，中庭寒月白如霜。贾生十八称才子，
空得门前一断肠。

卷 284_29【胡腾儿】

李端

胡腾身是凉州儿，肌肤如玉鼻如锥。桐布轻衫前后卷，
葡萄长带一边垂。帐前跪作本音语，拾襟搅袖为君舞。
安西旧牧收泪看，洛下词人抄曲与。扬眉动目踏花毡，
红汗交流珠帽偏。醉却东倾又西倒，双靴柔弱满灯前。
环行急蹴皆应节，反手叉腰如却月。丝桐忽奏一曲终，
呜呜画角城头发。胡腾儿，胡腾儿，故乡路断知不知。

卷 284_30【赠康洽】

李端

黄须康兄酒泉客，平生出入王侯宅。今朝醉卧又明朝，
忽忆故乡头已白。流年恍惚瞻西日，陈事苍茫指南陌。
声名恒压鲍参军，班位不过扬执戟。迩来七十遂无机，
空是咸阳一布衣。后辈轻肥贱衰朽，五侯门馆许因依。
自言万物有移改，始信桑田变成海。同时献赋人皆尽，
共壁题诗君独在。步出东城风景和，青山满眼少年多。
汉家尚壮今则老，发短心长知奈何。华堂举杯白日晚，
龙钟相见谁能免。君今已反我正来。朱颜宜笑能几回。
借问朦胧花树下，谁家畚插筑高台。

卷 284_31【瘦马行】

李端

城傍牧马驱未过，一马徘徊起还卧。眼中有泪皮有疮，
骨毛焦瘦令人伤。朝朝放在儿童手，谁觉举头看故乡。
往时汉地相驰逐，如雨如风过平陆。岂意今朝驱不前，
蚊蚋满身泥上腹。路人识是名马儿，畴昔三军不得骑。
玉勒金鞍既已远，追奔获兽有谁知。终身枥上食君草，
遂与驽骀一时老。倘借长鸣陇上风，犹期一战安西道。

卷 284_32【杂歌呈郑锡司空文明】

李端

昨宵梦到亡何乡，忽见一人山之阳。高冠长剑立石堂，
鬓眉飒爽瞳子方。胡麻作饭琼作浆，素书一帙在柏床。
啖我还丹拍我背，令我延年在人代。乃书数字与我持，
小儿归去须读之。觉来知是虚无事，山中雪平云覆地。
东岭啼猿三四声，卷帘一望心堪碎。蓬莱有梯不可蹑，
向海回头泪盈睫。且闻童子是苍蝇，谁谓庄生异蝴蝶。
学仙去来辞故人，长安道路多风尘。

卷 284_33【杂歌】

李端

汉水至清泥则浊，松枝至坚萝则弱。十三女儿事他家，
颜色如花终索寞。兰生当门燕巢幕，兰芽未吐燕泥落。
为姑偏忌诸嫂良，作妇翻嫌婿家恶。人生照镜须自知，
无盐何用妒西施。秦庭野鹿忽为马，巧伪乱真君试思。
伯奇掇蜂贤父逐，曾参杀人慈母疑。酒沽千日人不醉，
琴弄一弦心已悲。常闻善交无尔汝，谗口甚甘良药苦。
山鸡锦翼岂凤凰，陇鸟人言止鹦鹉。向栩非才徒隐灶，
田文有命那关户。犀烛江行见鬼神，木人登席呈歌舞。
乐生东去终居赵，阳虎北辕翻适楚。世间反覆不易陈，
缄此贻君泪如雨。

卷 284_34【乌栖曲】

李端

白马逐朱车，黄昏入狭斜。狭斜柳树乌争宿，
争枝未得飞上屋。东房少妇婿从军，每听乌啼知夜分。

卷 284_35【送客东归】

李端

昨夜东风吹尽雪，两京路上梅花发。行人相见便东西，
日暮溪头饮马别。把君衫袖望垂杨，两行泪下思故乡。

卷 284_36【王敬伯歌】

李端

妾本舟中女，闻君江上琴。君初感妾意，妾亦感君心。
遂出合欢被，同为交颈禽。传杯唯畏浅，接膝犹嫌远。
侍婢奏箜篌，女郎歌宛转。宛转怨如何，中庭霜渐多。
霜多叶可惜，昨日非今夕。徒结万重欢，终成一宵客。
王敬伯，绿水青山从此隔。

卷 284_37【救生寺望春寄畅当】

李端

东西南北望，望远悲潜蓄。红黄绿紫花，花开看不足。
今年与子少相随，他年与子老相逐。

卷 284_38 【荆门歌送兄赴夔州】

李端

余兄佐郡经西楚，钱行因赋荆门雨。蓊蓊夔夔声渐繁，
浦里人家收市喧。重阴大点过欲尽，碎浪柔文相与翻。
云间怅望荆衡路，万里青山一时暮。琵琶寺里响空廊。
熨火陂前湿荒戍。沙尾长檣发渐稀，竹竿草屨涉流归。
夷陵已远半成烧，汉上游倡始濯衣。船门相对多商估，
葛服龙钟篷下语。自是湘州石燕飞，那关齐地商羊舞。
曾为江客念江行，肠断秋荷雨打声。摩天古木不可见，
住岳高僧空得名。今朝拜首临欲别，遥忆荆门雨中发。

卷 284_39 【妾薄命】

李端

忆妾初嫁君，花鬟如绿云，回灯入绮帐，转面脱罗裙。
折步教人学，偷香与客熏。容颜南国重，名字北方闻。
一从失恩意，转觉身憔悴。对镜不梳头，倚窗空落泪。

新人莫恃新，秋至会无春。从来闭在长门者，
必是宫中第一人。

第二百八十五卷

卷 285_1【关山月】

李端

露湿月苍苍，关头榆叶黄。回轮照海远，分彩上楼长。
水冻频移幕，兵疲数望乡。只应城影外，万里共胡霜。

卷 285_2【度关山】

李端

雁塞日初晴，狐关雪复平。危楼缘广漠，古塞傍长城。
拂剑金星出，弯弧玉羽鸣。谁知系虏者，贾谊是书生。

卷 285_3【巫山高（一作巫山高和皇甫拾遗）】

李端

巫山十二峰，皆在碧虚中。回合云藏月，霏微雨带风。

猿声寒过涧，树色暮连空。愁向高唐望，清秋见楚宫。

卷 285_4 【雨雪曲】

李端

天山一丈雪，杂雨夜霏霏。湿马胡歌乱，经烽汉火微。
丁零苏武别，疏勒范羌归。若看关头下，长榆叶定稀。

卷 285_5 【春游乐】

李端

柘弹连钱马，银钩妥堕鬟。摘桑春陌上，踏草夕阳间。
意合辞先露，心诚貌却闲。明朝若相忆，云雨出巫山。

卷 285_6 【山下泉】

李端

碧水映丹霞，溅溅度浅沙。暗通山下草，流出洞中花。
净色和云落，喧声绕石斜。明朝更寻去，应到阮郎家。

卷 285_7 【送客赴洪州（一作送郑侍御）】

李端

草色随骢马，悠悠共出秦。水传云梦晓，山接洞庭春。
帆影连三峡，猿声在四邻。青门一分手，难见杜陵人。

卷 285_8 【与郑锡游春】

李端

东门垂柳长，回首独心伤。日暖临芳草，天晴忆故乡。
映花莺上下，过水蝶飞扬。借问同行客，今朝泪几行。

卷 285_9 【送友人（一作送友人南游）】

李端

闻说湘川路，年年古木多。猿啼巫峡夜，月照洞庭波。
穷海人还去，孤城雁与过。青山不同赏，来往自蹉跎。

卷 285_10 【题从叔沆林园】

李端

阮宅闲园暮，窗中见树阴。樵歌依远草，僧语过长林。
鸟啭花间曲，人弹竹里琴。自嫌身未老，已有住山心。

卷 285_11【送少微上人入蜀】

李端

削发本求道，何方不是归。松风开法席，江月濯禅衣。
飞阁蝉鸣早，漫天客过稀。戴颙常执笔，不觉此身非。

卷 285_12【雨后游辋川】

李端

骤雨归山尽，颓阳入辋川。看虹登晚墅，踏石过青泉。
紫葛藏仙井，黄花出野田。自知无路去，回步就人烟。

卷 285_13【同皇甫侍御题惟一上人房】

李端

焚香居一室，尽日见空林。得道轻年暮，安禅爱夜深。

东西皆是梦，存没岂关心。唯羡诸童子，持经在竹阴。

卷 285_14【同苗员外宿荐福寺僧舍】

李端

潘安秋兴动，凉夜宿僧房。倚杖云离月，垂帘竹有霜。
回风生远径，落叶飒长廊。一与交亲会，空贻别后伤。

卷 285_15【送客往湘江】

李端

识君年已老，孤棹向潇湘。素发临高镜，清晨入远乡。
三山分夏口，五两映涔阳。更逐巴东客，南行泪几行。

卷 285_16【送友人游蜀】

李端

嘉陵天气好，百里见双流。帆影缘巴字，钟声出汉州。
绿原春草晚，青木暮猿愁。本是风流地，游人易白头。

卷 285_17【送友人游江东】

李端

江上花开尽，南行见杪春。鸟声悲古木，云影入通津。
返景斜连草，回潮暗动蘋。谢公今在郡，应喜得诗人。

卷 285_18【送乐平苗明府得家字】

李端

本自求彭泽，谁云道里赊。山从石壁断，江向弋阳斜。
暮色随枫树，阴云暗荻花。诸侯旧调鼎，应重宰臣家。

卷 285_19【过宋州】

李端

睢阳陷虏日，外绝救兵来。世乱忠臣死，时清明主哀。
荒郊春草遍，故垒野花开。欲为将军哭，东流水不回。

卷 285_20【茂陵山行陪韦金部（一作招金部韦员外）】

李端

宿雨朝来歇，空山秋气清。盘云双鹤下，隔水一蝉鸣。
古道黄花落，平芜赤烧生。茂陵虽有病，犹得伴君行。

卷 285_21【江上逢司空曙（一作岳阳逢司空文明，得关中书）】

李端

共尔髫年故，相逢万里馀。新春两行泪，故国一封书。
夏口帆初落，涔阳雁正疏。唯当执杯酒，暂食汉江鱼。

卷 285_22【逢王泌自东京至】

李端

逢君自乡至，雪涕问田园。几处生乔木，谁家在旧村。
山峰横二室，水色映千门。愁见游从处，如今花正繁。

卷 285_23【山中期吉中孚】

李端

行人路不同，花落到山中。水暗蒹葭雾，月明杨柳风。

年华惊已掷，志业飒然空。何必龙钟后，方期事远公。

卷 285_24 【酬前大理寺评事张芬】

李端

君家旧林壑，寄在乱峰西。近日春云满，相思路亦迷。
闻钟投野寺，待月过前溪。怅望成幽梦，依依识故蹊。

卷 285_25 【赋得山泉送房造】

李端

泉水山边去，高人月下看。润松秋色净，落涧夜声寒。
委曲穿深竹，潺湲过远滩。圣朝无隐者，早晚罢渔竿。

卷 285_26 【宿兴善寺后堂池】

李端

草堂高树下，月向后池生。野客如僧静，新荷共水平。
锦鳞沉不食，绣羽乱相鸣。即事思江海，谁能万里行。

卷 285_27 【忆皎然上人】

李端

未得从师去，人间万事劳。云门不可见，山木已应高。
向日开柴户，惊秋问敝袍。何由宿峰顶，窗里望波涛。

卷 285_28 【赠衡岳隐禅师】

李端

旧住衡州寺，随缘偶北来。夜禅山雪下，朝汲竹门开。
半偈传初尽，群生意未回。唯当与樵者，杖锡入天台。

卷 285_29 【云阳观寄袁稠（一作元阳观寄元称）】

李端

花洞晚阴阴，仙坛隔杏林。漱泉春谷冷，捣药夜窗深。
石上开仙酌，松间对玉琴。戴家溪北住，雪后去相寻。

卷 285_30 【晚游东田寄司空曙】

李端

暮来思远客，独立在东田。片雨无妨景，残虹不映天。
别愁逢夏果，归兴入秋蝉。莫作隳官意，陶潜未必贤。

卷 285_31【题崔端公园林】

李端

上士爱清辉，开门向翠微。抱琴看鹤去，枕石待云归。
野坐苔生席，高眠竹挂衣。旧山东望远，惆怅暮花飞。

卷 285_32【早春雪夜寄卢纶兼呈秘书元丞】

李端

闻君随谢朓，春夜宿前川。看竹云垂地，寻僧月满田。
熊寒方入树，鱼乐稍离船。独夜羁愁客，惟知惜故年。

卷 285_33【早春夜集耿拾遗宅】

李端

如何逋客会，忽在侍臣家。新草犹停雪，寒梅未放花。

衔杯鸡欲唱，逗月雁应斜。年齿俱憔悴，谁堪故国赊。

卷 285_34 【元丞宅送胡濬及第东归觐省】

李端

登龙兼折桂，归去当高车。旧楚枫犹在，前隋柳已疏。
月中逢海客，浪里得乡书。见说江边住，知君不厌鱼。

卷 285_35 【送魏广下第归扬州宁亲】

李端

游宦今空返，浮淮一雁秋。白云阴泽国，青草绕扬州。
调膳过花下，张筵到水头。昆山仍有玉，岁晏莫淹留。

卷 285_36 【归山与酒徒别】

李端

野客本无事，此来非有求。烦君徵乐饯，未免忆山愁。
红烛侵明月，青娥促白头。童心久已尽，岂为艳歌留。

卷 285_37【冬夜寄韩弇（一作秋夜寄司空文明）】

李端

独坐知霜下，开门见木衰。壮应随日去，老岂与人期。
废井虫鸣早，阴阶菊发迟。兴来空忆戴，不似剡溪时。

卷 285_38【闻吉道士还俗因而有赠】

李端

闻有华阳客，儒裳谒紫微。旧山连药卖，孤鹤带云归。
柳市名犹在，桃源梦已稀。还乡见鸥鸟，应愧背船飞。

卷 285_39【韦员外东斋看花】

李端

入花凡几步，此树独相留。发艳红枝合，垂烟绿水幽。
并开偏觉好，未落已成愁。一到芳菲下，空招两鬓秋。

卷 285_40【边头作】

李端

邠郊泉脉动，落日上城楼。羊马水草足，羌胡帐幕稠。
射雕过海岸，传箭怯边州。何事归朝将，今年又拜侯。

卷 285_41【宿深上人院听远泉】

李端

泉声宜远听，入夜对支公。断续来方尽，潺湲咽又通。
何年出石下，几里在山中。君问穷源处，禅心与此同。

卷 285_42【茂陵村行赠何兆】

李端

春天黄鸟啭，野径白云间。解带依芳草，支颐想故山。
人行九州路，树老五陵间。谁道临邛远，相如自忆还。

卷 285_43【送友人还洛】

李端

去国渡关河，蝉鸣古树多。平原正超忽，行子复蹉跎。

去事不可想，旧游难再过。何当嵩岳下，相见在烟萝。

卷 285_44 【送戴徵士还山】

李端

柔桑锦臆雉，相送到烟霞。独隐空山里，闲门几树花。
草生杨柳岸，鸟啭竹林家。不是谋生拙，无为末路赊。

卷 285_45 【秋日旅舍别司空文明】

李端

凉风飒穷巷，秋思满高云。吏隐俱不就，此心仍别君。
素怀宗淡泊，羁旅念功勋。转忆西林寺，江声月下闻。

卷 285_46 【旅舍对雪赠考功王员外】

李端

杨花惊满路，面市忽狂风。骤下摇兰叶，轻飞集竹丛。
欲将琼树比，不共玉人同。独望徽之棹，青山在雪中。

卷 285_47 【送丁少府往唐上】

李端

因君灞陵别，故国一回看。共食田文饭，先之梅福官。
江风转日暮，山月满潮寒。不得同舟望，淹留岁月阑。

卷 285_48 【赠李龟年】

李端

青春事汉主，白首入秦城。遍识才人字，多知旧曲名。
风流随故事，语笑合新声。独有垂杨树，偏伤日暮情。

卷 285_49 【送郭补阙归江阳】

李端

东门春尚浅，杨柳未成阴。雁影愁斜日，莺声怨故林。
隋宫江上远，梁苑雪中深。独有怀归客，难为欲别心。

卷 285_50 【早春会王逵主人得蓬字】

李端

今年华鬓色，半在故人中。欲写无穷恨，先期一醉同。
绿丛犹覆雪，红萼已凋风。莫负归山契，君看陌上蓬。

卷 285_51【宿山寺思归】

李端

僧房秋雨歇，愁卧夜更深。欹枕闻鸿雁，回灯见竹林。
归萤入草尽，落月映窗沉。拭泪无人觉，长谣向壁阴。

卷 285_52【送客赴江陵寄郢州郎士元】

李端

露下晚蝉愁，诗人旧怨秋。沅湘莫留滞，宛洛好遨游。
饮马逢黄菊，离家值白头。竟陵明月夜，为上庾公楼。

卷 285_53【送客赋得巴江夜猿】

李端

巴水天边路，啼猿伤客情。迟迟云外尽，杳杳树中生。

残月暗将落，空霜寒欲明。楚人皆掩泪，闻到第三声。

卷 285_54【秋日忆暕上人】

李端

一从持钵别，更未到人间。好静居贫寺，遗名弃近山。
雨前缝百衲，叶下闭重关。若便浔阳去，须将旧客还。

卷 285_55【寄上舍人叔】

李端

车马朝初下，看山忆独寻。会知逢水尽，且爱入云深。
残雨开斜日，新蝉发迥林。阮咸虽别巷，遥识此时心。

卷 285_56【送古之奇赴安西幕】

李端

畴昔十年兄，相逢五校营。今宵举杯酒，陇月见军城。
堠火经阴绝，边人接晓行。殷勤送书记，强虏几时平。

卷 285_57 【送张芬归江东兼寄柳中庸】

李端

久是天涯客，偏伤落木时。如何故国见，更欲异乡期。
鸟暮东西急，波寒上下迟。空将满眼泪，千里怨相思。

卷 285_58 【送丘丹归江东】

李端

故山霜落久，才子忆荆扉。旅舍寻人别，秋风逐雁归。
梦愁枫叶尽，醉惜菊花稀。肯学求名者，经年未拂衣。

卷 285_59 【卧病寄苗员外】

李端

故人初未贵，相见得淹留。一自朝天去，因成计日游。
月明应独醉，叶下肯同愁。因恨刘桢病，空园卧见秋。

卷 285_60 【送杨皋擢第归江东（一作送表丈杨皞）】

李端

隋堤望楚国，江上一归人。绿气千樯暮，青风万里春。
试才初得桂，泊渚肯伤蘋。拜手终凄怆，恭承中外亲。

卷 285_61【题郑少府林园】

李端

谢家今日晚，词客愿抽毫。枥马方回影，池鹅正理毛。
竹筒传水远，麈尾坐僧高。独有宗雷贱，过君著敝袍。

卷 285_62【送吉中孚拜官归业】

李端

南入华阳洞，无人古树寒。吟诗开旧帙，带绶上荒坛。
因病求归易，沾恩更隐难。孟宗应献鲋，家近守渔官。

卷 285_63【送杨少府赴阳翟（即舍人之弟）】

李端

冠带仁兄后，光辉寿母前。陆云还入洛，潘岳更张筵。

井邑嵩山对，园林颍水连。东人欲相送，旅舍已潸然。

卷 285_64【慈恩寺曠上人房招耿拾遗】

李端

悠然对惠远，共结故山期。汲井树阴下，闭门亭午时。
地闲花落厚，石浅水流迟。愿与神仙客，同来事本师。

卷 285_65【宿山寺雪夜寄吉中孚】

李端

独爱僧房竹，春来长到池。云遮皆晃朗，雪压半低垂。
不见侵山叶，空闻拂地枝。鄙夫今夜兴，唯有子猷知。

卷 285_66【赠赵神童】

李端

圣朝殊汉令，才子少登科。每见先鸣早，常惊后进多。
独居方寂寞，相对觉蹉跎。不是通家旧，频劳文举过。

卷 285_67 【宿云际寺赠深上人】

李端

暂别青蓝寺，今来发欲斑。独眠孤烛下，风雨在前山。
坏宅终须去，空门不易还。支公有方便，一愿启玄关。

卷 285_68 【送从兄赴洪州别驾兄善琴】

李端

援琴兼爱竹，遥夜在湘沅。鹤舞月将下，乌啼霜正繁。
乱流喧橘岸，飞雪暗荆门。佐郡无辞屈，其如相府恩。

卷 285_69 【山中期张芬不至】

李端

石堤春草碧，双燕向西飞。怅望云天暮，佳人何处归。
药栏虫网遍，苔井水痕稀。谁道嵇康懒，山中自掩扉。

卷 285_70 【寄畅当】

李端

麦秀草芊芊，幽人好昼眠。云霞生岭上，猿鸟下床前。
颜子方敦行，支郎久住禅。中林轻暂别，约略已经年。

卷 285_71【送义兴元少府】

李端

逢君惠连第，初命便光辉。已得群公祖，终妨太傅讥。
路长人反顾，草断燕回飞。本是江南客，还同衣锦归。

卷 285_72【卧病别郑锡】

李端

病来喜无事，多卧竹林间。此日一相见，明朝还掩关。
幽人爱芳草，志士惜颓颜。岁晏不我弃，期君在故山。

卷 285_73【书志赠畅当】

李端

少喜神仙术，未去已蹉跎。壮志一为累，浮生事渐多。

衰颜不相识，岁暮定相过。请问宗居士，君其奈老何。

卷 285_74【送诸暨裴少府（公先人，元相公判官）】

李端

山公访嵇绍，赵武见韩侯。事去恩犹在，名成泪却流。
一官同北去，千里赴南州。才子清风后，无贻相府忧。

卷 285_75【送郑宥入蜀迎覲】

李端

宁亲西陟险，君去异王阳。在世谁非客，还家即是乡。
剑门千转尽，巴水一支长。请语愁猿道，无烦促泪行。

卷 285_76【送耿拾遗漳使江南括图书】

李端

驱传草连天，回风满树蝉。将过夫子宅，前问孝廉船。
汉使收三箧，周诗采百篇。别来将有泪，不是怨流年。

卷 285_77 【送王少府游河南】

李端

马卿方失意，东去谒诸侯。过宋人应少，游梁客独愁。
鸟翻千室暮，蝉急两河秋。仆本无媒者，因君泪亦流。

卷 285_78 【送别驾赴晋陵即舍人叔之兄】

李端

诸宗称叔父，从子亦光辉。谢朓中书直，王祥别乘归。
江帆冲雨上，海树隔潮微。南阮贫无酒，唯将泪湿衣。

卷 285_79 【卧病寄阎案】

李端

病中贪好景，强步出幽居。紫葛垂山径，黄花绕野渠。
荒林飞老鹤，败堰过游鱼。纵忆同年友，无人可寄书。

卷 285_80 【晚夏闻蝉寄广文（一作郎士元诗）】

李端

昨日莺啼声，今朝蝉忽鸣。朱颜向华发，定是几年程。
故国白云远，闲居青草生。因垂数行泪，书报十年兄。

卷 285_81【归山居寄钱起】

李端

怅望青山下，回头泪满巾。故乡多古树，落日少行人。
发鬓将回色，簪纓未到身。谁知武陵路，亦有汉家臣。

卷 285_82【晓发瓜州】

李端

晓发悲行客，停桡独未前。寒江半有月，野戍渐无烟。
棹唱临高岸，鸿嘶发远田。谁知避徒御，对酒一潸然。

卷 285_83【江上喜逢司空文明】

李端

秦人江上见，握手泪沾巾。落日见秋草，暮年逢故人。

非夫长作客，多病浅谋身。台阁旧亲友，谁曾见苦辛。

卷 285_84【同苗发慈恩寺避暑】

李端

追凉寻宝刹，畏日望璇题。卧草同鸳侣，临池似虎溪。
树闲人迹外，山晚鸟行西。若问无心法，莲花隔淤泥。

卷 285_85【送潘述宏词下第归江外】

李端

唱高人不和，此去泪难收。上国经年住，长江满泪流。
弈棋知胜偶，射策请焚舟。应是田□□，玄成许尔游。

卷 285_86【送张少府赴夏县】

李端

虽为州县职，还欲抱琴过。树古闻风早，山枯见雪多。
鸡声连络市，马色傍黄河。太守新临郡，还逢五袴歌。

卷 285_87 【酬秘书元丞郊园卧疾见寄】

李端

闻说漳滨卧，题诗怨岁华。求医主高手，报疾到贫家。
撒枕销行蚁，移杯失画蛇。明朝九衢上，应见玉人车。

卷 285_88 【送成都韦丞还蜀】

李端

蜀门云树合，高栈有猿愁。驱传加新命，之官向旧游。
晨装逢酒雨，夜梦见刀州。远别长相忆，当年莫滞留。

卷 285_89 【晚秋旅舍寄苗员外】

李端

争途苦不前，贫病遂连牵。向暮同行客，当秋独长年。
晚花唯有菊，寒叶已无蝉。吏部逢今日，还应瓮下眠。

卷 285_90 【送惟良上人归润州】

李端

拟诗偏不类，又送上人归。寄世同高鹤，寻仙称坏衣。
雨行江草短，露坐海帆稀。正被空门缚，临歧乞解围。

卷 285_91【送何兆下第还蜀】

李端

重江不可涉，孤客莫晨装。高木莎城小，残星栈道长。
袅猿枫子落，过雨荔枝香。劝尔成都住，文翁有草堂。

卷 285_92【送友人宰湘阴】

李端

从宦舟行远，浮湘又入闽。蒹葭无朔雁，桎梏有蛮神。
传吏闲调象，山精暗讼人。唯须千树橘，暂救李衡贫。

卷 285_93【送元晟归江东旧居】

李端

泽国舟车接，关门雨雪乖。春天行故楚，夜月下清淮。

讲易居山寺，论诗到郡斋。蒋家人暂别，三路草连阶。

卷 285_94【送黎少府赴阳翟】

李端

诗礼称才子，神仙是丈人。玉山那惜醉，金谷已无春。
白马如风疾，青袍夺草新。不嫌鸣吠客，愿用百年身。

卷 285_95【送夏侯审游蜀】

李端

西望烟绵树，愁君上蜀时。同林息商客，隔栈见罍师。
石滑羊肠险，山空杜宇悲。琴心正幽怨，莫奏凤凰诗。

卷 285_96【单推官厅前双桐咏】

李端

封植因高兴，孤贞契素期。由来得地早，何事结花迟。
叶重凝烟后，条寒过雨时。还同李家树，争赋角弓诗。

卷 285_97【送宋校书赴宣州幕】

李端

浮舟压芳草，容裔逐江春。远避看书吏，行当入幕宾。
夜潮冲老树，晓雨破轻蘋。鸳鹭多伤别，桄榔德在人。

卷 285_98【送赵给事侄尉丹阳】

李端

太傅怜群从，门人亦贱回。入官先爱子，赐酒许同杯。
淮海春多雨，蒹葭夜有雷。遥知拜庆后，梅尉称仙才。

卷 285_99【宿瓜洲寄柳中庸】

李端

怀人同不寐，清夜起论文。月魄正出海，雁行斜上云。
寒潮来滟滟，秋叶下纷纷。便送江东去，徘徊只待君。

卷 285_100【夜宴虢县张明府宅逢宇文评事】

李端

虢田留古宅，入夜足秋风。月影来窗里，灯光落水中。
征诗逢谢客，饮酒得陶公。更爱疏篱下，繁霜湿菊丛。

卷 285_101 【冬夜集张尹后阁】

李端

乘龟兼戴豸，白面映朱衣。安石还须起，泉明不得归。
应门常吏在，登席旧寮稀。远客长先醉，那知亚相威。

卷 285_102 【将之泽潞留别王郎中】

李端

弱年知己少，前路主人稀。贫病期相惜，艰难又忆归。
事成应未卜，身贱又无机。幸到龙门下，须因羽翼飞。

卷 285_103 【晚次巴陵】

李端

雪后柳条新，巴陵城下人。烹鱼邀水客，载酒奠山神。

云去低斑竹，波回动白蘋。不堪逢楚老，日暮正江春。

卷 285_104 【送荀道士归庐山】

李端

先生归有处，欲别笑无言。绿水到山口，青林连洞门。
月明寻石路，云雾望花源。早晚还乘鹤，悲歌向故园。

卷 285_105 【送张淑归覲叔父】

李端

日惨长亭暮，天高大泽闲。风中闻草木，雪里见江山。
马向塞云去，人随古道还。阮家今夜乐，应在竹林间。

卷 285_106 【送郭参军赴绛州】

李端

登车君莫望，故绛柳条春。蒲泽逢胡雁，桃源见晋人。
佐军髯尚短，掷地思还新。小谢常携手，因之醉路尘。

卷 285_107 【送袁稠游江南】

李端

江南衰草遍，十里见长亭。客去逢摇落，鸿飞入杳冥。
空城寒雨细，深院晓灯青。欲去行人起，徘徊恨酒醒。

卷 285_108 【送夏中丞赴宁国任】

李端

楚县入青枫，长江一派通。板桥寻谢客，古邑事陶公。
片雨收山外，连云上汉东。陆机犹滞洛，念子望南鸿。

卷 285_109 【送卫雄下第归同州】

李端

不才先上第，词客却空还。边地行人少，平芜尽日闲。
一蝉陂树里，众火陇云间。羡汝归茅屋，书窗见远山。

卷 285_110 【送单少府赴扶风】

李端

少年趋盛府，颜色比花枝。范句非童子，杨修岂小儿。
叨陪丈人行，常恐阿戎欺。此去云霄近，看君逸足驰。

卷 285_111【题山中别业】

李端

旧宅在山中，闲门与寺通。往来黄叶路，交结白头翁。
晚笋难成竹，秋花不满丛。生涯只粗粝，吾岂讳言穷。

卷 285_112【送司空文明归江上旧居】

李端

野菊有黄花，送君千里还。鸿来燕又去，离别惜容颜。
流水通归梦，行云失故关。江风正摇落，宋玉莫登山。

卷 285_113【送新城戴叔伦明府】

李端

遥想隋堤路，春天楚国情。白云当海断，青草隔淮生。

雁起斜还直，潮回远复平。莱芜不可到，一醉送君行。

卷 285_114 【送雍丘任少府】

李端

丛车饯才子，路走许东偏。远水同春色，繁花胜雪天。
鸟行侵楚邑，树影向殷田。莫学生乡思，梅真正少年。

卷 285_115 【送雍郢州】

李端

厌郎思出守，遂领汉东军。望月逢殷浩，缘江送范云。
城闲烟草遍，浦迥雪林分。谁伴楼中宿，吟诗估客闻。

卷 285_116 【寄王密卿】

李端

酒乐今年少，僧期近日频。买山多为竹，卜宅不缘贫。
志业归初地，文章寄此身。嵇康虽有病，犹得见情人。

卷 285_117【与萧远上人游少华山寄皇甫侍御】

李端

寻危兼采药，渡水又登山。独与高僧去，逍遥落日间。
渐看闾里远，自觉性情闲。回首知音在，因令怅望还。

卷 285_118【代村中老人答】

李端

京洛风尘后，村乡烟火稀。少年曾失所，衰暮欲何依。
夜静临江哭，天寒踏雪归。时清应不见，言罢泪盈衣。

卷 285_119【赠故将军】

李端

平生在边日，鞍马若星流。独出间千里，相知满九州。
恃功凌主将，作气见王侯。谁道廉颇老，犹能报远讎。

卷 285_120【送陆郎中归田司空幕】

李端

汉家分列宿，东土佐诸侯。结束还军府，光辉过御沟。
农桑连紫陌，分野入青州。覆被恩难报，西看成白头。

卷 285_121 【酬晋侍御见寄】

李端

野客蒙诗赠，殊恩欲报难。本求文举识，不在子真官。
细雨双林暮，重阳九日寒。贫斋一丛菊，愿与上宾看。

卷 285_122 【送铜泽王归城】

李端

昔闻公族出，其从亦高车。为善唯求乐，分贫必及疏。
身承汉枝叶，手习鲁诗书。尚说无功德，三年在石渠。

卷 285_123 【江上别柳中庸】

李端

秦人江上见，握手便沾衣。近日相知少，往年亲故稀。

远游何处去，旧业几时归。更向巴陵宿，堪闻雁北飞。

卷 285_124 【喜皇甫郎中拜谕德兼集贤学士】

李端

为郎三载后，宠命一朝新。望苑迁词客，儒林拜丈人。
莺飞绮阁曙，柳拂画堂春。几日调金鼎，诸君欲望尘。

卷 285_125 【送黎兵曹往陕府结婚】

李端

东方发车骑，君是上头人。奠雁逢良日，行媒及仲春。
时称渡河妇，宜配坦床宾。安得同门吏，扬鞭入后尘。

卷 285_126 【送窦兵曹】

李端

梨花开上苑，游女著罗衣。闻道情人怨，应须走马归。
御桥迟日暖，官渡早莺稀。莫遣佳期过，看看蝴蝶飞。

卷 285_127 【留别故人（一作李颀诗）】

李端

此别不可道，此心当语谁。春风灞水上，饮马桃花时。
误作好文士，只应游宦迟。留书下朝客，我有故山期。

卷 285_128 【奉送宋中丞使河源】

李端

东周遣戍役，才子欲离群。部领河源去，悠悠陇水分。
笳声悲塞草，马首渡关云。辛苦逢炎热，何时及汉军。

卷 285_129 【都亭驿送郭判官之幽州幕府】

李端

幕府参戎事，承明伏奏归。都亭使者出，杯酒故人违。
细雨沾官骑，轻风拂客衣。还从大夫后，吾党亦光辉。

卷 285_130 【送王羽林往秦州】

李端

秦州贵公子，汉日羽林郎。事主来中禁，荣亲上北堂。
輶车花拥路，宝剑雪生光。直扫三边靖，承恩向建章。

卷 285_131【送友入关】

李端

闻君帝城去，西望一沾巾。落日见秋草，暮年逢故人。
非才长作客，有命懒谋身。近更婴衰疾，空思老汉滨。

卷 285_132【代宗挽歌】

李端

祖庭三献罢，严卫百灵朝。警蹕移前殿，宫车上渭桥。
寒霜凝羽葆，野吹咽笳箫。已向新京兆，谁云天路遥。

卷 285_133【张左丞挽歌二首】

李端

素旆低寒水，清笳出晓风。鸟来伤贾傅，马立葬滕公。

松柏青山上，城池白日中。一朝今古隔，唯有月明同。

祸集钩方失，灾生剑忽飞。无由就日拜，空忆自天归。
门吏看还葬，宫官识赐衣。东堂哀赠毕，从此故臣稀。

卷 285_134 【奉和王元二相避暑怀杜太尉】

李端

艰难尝共理，海晏更相悲。况复登堂处，分明避暑时。
绿槐千穗绽，丹药一番迟。蓬荜今何幸，先朝大雅诗。

卷 285_135 【青龙寺题故昙上人房】

李端

远公留故院，一径雪中微。童子逢皆老，门人问亦稀。
翻经徒有处，携履遂无归。空念寻巢鹤，时来傍影飞。

卷 285_136 【早春夜望】

李端

旧雪逐泥沙，新雷发草芽。晓霜应傍鬓，夜雨莫催花。

行矣前途晚，归与故国赊。不劳报春尽，从此惜年华。

卷 285_137 【宴伊东岸】

李端

晴洲无远近，一树一潭春。芳草留归骑，朱樱掷舞人。
空花对酒落，小翠隔林新。竟日皆携手，何由遇此辰。

卷 285_138 【云际中峰居喜见苗发（一作祖咏诗）】

李端

自得中峰住，深林亦闭关。经秋无客到，入夜有僧还。
暗涧泉声小，荒村树影闲。高窗不可望，星月满空山。

卷 285_139 【宿洞庭】

李端

白水连天暮，洪波带日流。风高云梦夕，月满洞庭秋。
沙上渔人火，烟中贾客舟。西园与南浦，万里共悠悠。

卷 285_140 【江上赛神】

李端

疏鼓应繁丝，送神归九疑。苍龙随赤凤，帝子上天时。
骤雨归山疾，长江下日迟。独怜游宦子，今夜泊天涯。

卷 285_141 【奉和元丞侍从游南城别业】

李端

垂朱领孙子，从宴在池塘。献寿回龟顾，和羹跃鲤香。
高松先草晚，平石助泉凉。馀橘期相及，门生有陆郎。

卷 285_142 【送从舅成都丞广南归蜀（一作卢纶诗）】

李端

巴字天边水，秦人去是归。栈长山雨响，溪乱火田稀。
俗富行应乐，官雄禄岂微。魏舒终有泪，还湿宁家衣。

第二百八十六卷

卷 286_1【赠郭驸马（郭令公子暧尚升平公主令于席上成此诗）】

李端

青春都尉最风流，二十功成便拜侯。金距斗鸡过上苑，
玉鞭骑马出长楸。熏香荀令偏怜少，傅粉何郎不解愁。
日暮吹箫杨柳陌，路人遥指凤凰楼。

方塘似镜草芊芊，初月如钩未上弦。新开金埒看调马，
旧赐铜山许铸钱。杨柳入楼吹玉笛，芙蓉出水妒花钿。
今朝都尉如相顾，原脱长裾学少年。

卷 286_2【宿淮浦忆司空文明】

李端

愁心一倍长离忧，夜思千重恋旧游。秦地故人成远梦，
楚天凉雨在孤舟。诸溪近海潮皆应，独树边淮叶尽流。
别恨转深何处写，前程唯有一登楼。

卷 286_3【送濮阳录事赴忠州】

李端

成名不遂双旌远，主印还为一郡雄。赤叶黄花随野岸，
青山白水映江枫。巴人夜语孤舟里，越鸟春啼万壑中。
闻说古书多未校，肯令才子久西东。

卷 286_4【送马尊师（一作送侯道士）】

李端

南入商山松路深，石床溪水昼阴阴。云中采药随青节，
洞里耕田映绿林。直上烟霞空举手，回经丘垄自伤心。
武陵花木应长在，愿与渔人更一寻。

卷 286_5【题元注园林】

李端

谢家门馆似山林，碧石青苔满树阴。乳鹊晒巢花巷静，
鸣鸠鼓翼竹园深。桔槔转水兼通药，方丈留僧共听琴。
独有野人箕踞惯，过君始得一长吟。

卷 286_6 【野寺病居喜卢纶见访】

李端

青青麦垄白云阴，古寺无人新草深。乳燕拾泥依古井，
鸣鸠拂羽历花林。千年驳藓明山履，万尺垂萝入水心。
一卧漳滨今欲老，谁知才子忽相寻。

卷 286_7 【送皎然上人归山】

李端

适来世上岂缘名，适去人间岂为情。古寺山中几日到，
高松月下一僧行。云阴鸟道苔方合，雪映龙潭水更清。
法主欲归须有说，门人流泪厌浮生。

卷 286_8 【赠道士】

李端

姓氏不书高士传，形神自得逸人风。已传花洞将秦接，
更指茅山与蜀通。懒说岁年齐绌老，甘为乡曲号涪翁。
终朝卖卜无人识，敝服徒行入市中。

卷 286_9【题云际寺准上人房】

李端

高僧居处似天台，锡仗铜瓶对绿苔。竹巷雨晴春鸟啭，
山房日午老人来。园中鹿过椒枝动，潭底龙游水沫开。
独夜焚香礼遗像，空林月出始应回。

卷 286_10【山中寄苗员外】

李端

鸟鸣花发空山里，衡岳幽人藉草时。既近浅流安笔砚，
还因平石布蓍龟。千寻楚水横琴望。万里秦城带酒思。
闻说潘安方寓直，与君相见渐难期。

卷 286_11【忆故山赠司空曙】

李端

汉主金门正召才，马卿多病自迟回。旧山暂别老将至，
芳草欲阑归去来。云在高天风会起，年如流水日长催。
知君素有栖禅意，岁晏蓬门迟尔开。

卷 286_12【闲园即事赠考功王员外】

李端

南陌晴云稍变霞，东风动柳水纹斜。园林带雪潜生草，
桃李虽春未有花。幸接上宾登郑驿，羞为长女似黄家。
今朝一望还成暮，欲别芳菲恋岁华。

卷 286_13【寄庐山真上人】

李端

高僧无迹本难寻，更得禅行去转深。青草湖中看五老，
白云山上宿双林。月明潭色澄空性，夜静猿声证道心。
更说谢公南座好，烟萝到地几重阴。

卷 286_14【题觉公新兰若】

李端

头白禅师何处还，独开兰若树林间。鬼因巫祝传移社，
神见天人请施山。猛虎听经金磬动，猕猴献蜜雪窗闲。
新斋结誓如相许，愿与雷宗永闭关。

卷 286_15 【赠道者】

李端

窗中忽有鹤飞声，方士因知道欲成。
来取图书安枕里，便驱鸡犬向山行。
花开深洞仙门小，路过悬桥羽节轻。
送客自伤身易老，不知何处待先生。

卷 286_16 【代弃妇答贾客（一作妾薄命）】

李端

玉垒城边争走马，铜鞮市里共乘舟。
鸣环动珮恩无尽，掩袖低巾泪不流。
畴昔将歌邀客醉，如今欲舞对君羞。
忍怀贱妾平生曲，独上襄阳旧酒楼。

卷 286_17 【和李舍人直中书对月见寄】

李端

名卿步月正淹留，上客裁诗怨别游。
素魄近成班女扇，清光远似庾公楼。
婵娟更称凭高望，皎洁能传自古愁。
盈手入怀皆不见，阳春曲丽转难酬。

卷 286_18 【卧病闻吉中孚拜官寄元秘书昆季】

李端

汉家采使不求声，自慰文章道欲行。毛遂登门虽异赏，
韩非入传滥齐名。云归暂爱青山出，客去还愁白发生。
年少奉亲皆愿达，敢将心事向玄成。

卷 286_19 【江上逢柳中庸】

李端

旧住衡山曾夜归，见君江客忆荆扉。星沉岭上人行早，
月过湖西鹤唳稀。弱竹万株频碍帙，新泉数步一褰衣。
今来唯有禅心在，乡路翻成向翠微。

卷 286_20 【戏赠韩判官绅卿】

李端

少寻道士居嵩岭，晚事高僧住沃洲。齿发未知何处老，
身名且被外人愁。欲随山水居茅洞，已有田园在虎丘。
独怪子猷缘掌马，雪时不肯更乘舟。

卷 286_21 【送周长史】

李端

青枫树里宣城郡，独佐诸侯上板桥。江客亦能传好信，
山僧多解说南朝。云阴出浦看帆小，草色连天见雁遥。
别有空园落桃杏，知将丝组系兰桡。

卷 286_22 【题故将军庄】

李端

曾将数骑过桑干，遥对单于飨马鞍。塞北征儿谙用剑，
关西宿将许登坛。田园芜没归耕晚，弓箭开离出猎难。
唯有老身如刻画，犹期圣主解衣看。

卷 286_23 【夜投丰德寺谒海上人（一作卢纶诗）】

李端

半夜中峰有磬声，偶寻樵者问山名。上方月晓闻僧语，
下界林疏见客行。野鹤巢边松最老，毒龙潜处水偏清。
愿得远山知姓字，焚香洗钵过馀生。

卷 286_24【塞上（一作卢纶诗，题作从军行）】

李端

二十在边城，军中得勇名。卷旗收败马，占碛拥残兵。
覆阵鸟鸢起，烧山草木明。塞闲思远猎，师老厌分营。
雪岭无人迹，冰河足雁声。李陵甘此没，惆怅汉公卿。

卷 286_25【送彭将军云中觐兄】

李端

闻说苍鹰守，今朝欲下鞲。因令白马将，兼道觅封侯。
略地关山冷，防河雨雪稠。翻弓骋猿臂，承箭惜貂裘。
设伏军谋密，坑降塞邑愁。报恩唯有死，莫使汉家羞。

卷 286_26【奉赠苗员外】

李端

朱户敞高扉，青槐碍落晖。八龙承庆重，三虎递朝归。
坐竹人声绝，横琴鸟语稀。花惭潘岳貌，年称老莱衣。
叶暗新樱熟，丝长粉蝶飞。应怜鲁儒贱，空与故山违。

卷 286_27 【酬丘拱外甥览余旧文见寄】

李端

丘迟本才子，始冠即周旋。舅乏郗鉴爱，君如卫玠贤。
礼将金友等，情向玉人偏。鄙俗那劳似，龙钟却要怜。
投砖聊取笑，赠绮一何妍。野坐临黄菊，溪行踏绿钱。
岩高云反下，洞黑水潜穿。僻岭猿偷栗，枯池雁唼莲。
身居霞外寺，思发月明田。犹恨萦尘网，昏昏过岁年。

卷 286_28 【赠岐山姜明府】

李端

昨夜闻山雨，归心便似迟。几回惊叶落，即到白头时。
雁影将魂去，虫声与泪期。马卿兼病老，宋玉对秋悲。
谢客才为别，陶公已见思。非关口腹累，自是雪霜姿。
酿酒栽黄菊，炊粳折绿葵。山河方入望，风日正宜诗。
牧竖寒骑马，边烽晚立旗。兰凋犹有气，柳脆不成丝。
别后如相问，高僧知所之。

卷 286_29 【下第上薛侍郎】

李端

蓬荜春风起，开帘却自悲。如何飘梗处，又到采兰时。
明镜方重照，微诚寄一辞。家贫求禄早，身贱报恩迟。
幸得皮存矣，须劳翼长之。铭肌非厚答，肉骨是前期。
纵觉新人好，宁忘旧主疑。终惭太丘道，不为小生私。

卷 286_30 【奉和秘书元丞杪秋忆终南旧居】

李端

高门有才子，能履古人踪。白社陶元亮，青云阮仲容。
田园忽归去，车马杳难逢。废巷临秋水，支颐向暮峰。
行鱼避杨柳，惊鸭触芙蓉。石窦红泉细，山桥紫菜重。
凤雏终食竹，鹤侣暂巢松。愿接烟霞赏，羁离计不从。

卷 286_31 【送归中丞使新罗（一作李益诗）】

李端

东望扶桑日，何年是到时。片帆通雨露，积水隔华夷。
浩淼风来远，虚冥鸟去迟。长波静云月，孤岛宿旌旗。
别叶传秋意，回潮动客思。沧溟无旧路，何处问前期。

卷 286_32 【暮春寻终南柳处士】

李端

庞眉一居士，鹑服隐尧时。种豆初成亩，还丹旧日师。
入溪花径远，向岭鸟行迟。紫葛垂苔壁，青菰映柳丝。
偶来尘外事，暂与素心期。终恨游春客，同为岁月悲。

卷 286_33【雪夜寻太白道士】

李端

雪路夜朦胧，寻师杏树东。石坛连竹静，醯火照山红。
再拜开金篆，焚香使玉童。蓬瀛三岛至，天地一壶通。
别客曾留药，逢舟或借风。出游居鹤上，避祸入羊中。
过洞偏回首，登门未发蒙。桑田如可见，沧海几时空。

卷 286_34【得山中道友书寄苗钱二员外】

李端

有谋皆轹轳，非病亦迟回。壮志年年减，驰晖日日催。
还山不及伴，到阙又无媒。高卧成长策，微官称下才。
诗人识何谢，居士别宗雷。迹向尘中隐，书从谷口来。
药栏遭鹿践，涧户被猿开。野鹤巢云窦，游龟上水苔。
新欢追易失，故思渺难裁。自有归期在，劳君示劫灰。

卷 286_35 【酬前驾部员外郎苗发】

李端

马融方值校，阅简复持铅。素业高风继，青春壮思全。
论文多在夜，宿寺不虚年。自署区中职，同荒郭外田。
山邻三径绝，野意八行传。煮玉矜新法，留符识旧仙。
涵苔溪溜浅，摇浪竹桥悬。复洞潜栖燕，疏杨半翳蝉。
咏歌虽有和，云锦独成妍。应以冯唐老，相讥示此篇。

卷 286_36 【宿荐福寺东池有怀故园因寄元校书】

李端

暮雨风吹尽，东池一夜凉。伏流回弱苒，明月入垂杨。
石竹闲开碧，蔷薇暗吐黄。倚琴看鹤舞，摇扇引桐香。
旧笋方辞箨，新莲未满房。林幽花晚发，地远草先长。
抚枕愁华鬓，凭栏想故乡。露馀清汉直，云卷白榆行。
惊鹊仍依树，游鱼不过梁。系舟偏忆戴，炊黍愿期张。
末路还思借，前恩讵敢忘。从来叔夜懒，非是接舆狂。
众病婴公干，群忧集孝璋。惭将多误曲，今日献周郎。

卷 286_37 【送王副使还并州】

李端

并州近胡地，此去事风沙。铁马垂金络，貂裘犯雪花。
曾持两郡印，多比五侯家。继世新恩厚，从军旧国赊。
戍烟千里直，边雁一行斜。想到清油幕，长谋出左车。

卷 286_38 【晚春过夏侯校书值其沉醉戏赠】

李端

欹冠枕如意，独寝落花前。姚馥清时醉，边韶白日眠。
曝褊还当屋，张幕便成天。谒客唯题凤，偷儿欲觊毡。
失杯犹离席，坠履反登筵。本是墙东隐，今为瓮下仙。
卧龙髯乍磔，栖蝶腹何便。阮籍供琴韵，陶潜馥秫田。
人逢穀阳望，春似永和年。顾我非工饮，期君行见怜。
尝知渴羌好，亦觉醉胡贤。炙熟樽方竭，车回辖且全。
暝风仍作雨，洒地即成泉。自鄙新丰过，迟回惜十年。

卷 286_39 【哭张南史因寄南史侄叔宗】

李端

争路忽摧车，沈钩未得鱼。结交唯我少，丧旧自君初。
谏草文难似，围棋智不如。仲宣新有赋，叔夜近无书。
地闭滕公宅，山荒谢客庐。歼良从此恨，福善竟成虚。

酿酒多同醉，烹鸡或取馀。阮咸虽永别，岂共仲容疏。

卷 286_40【长安感事呈卢纶】

李端

十五事文翰，大儿轻孔融。长裾游邸第，笑傲五侯中。
谏猎一朝寝，论边素未工。蹉跎潘鬓至，蹭蹬阮途穷。
贷布怜宁与，无金命未通。王陵固似戇，郭最遂非雄。
敛板辞群彦，回车访老农。咏诗怀洛下，送客忆山东。
沈病魂神浊，清斋思虑空。羸将卫玠比，冷共邺侯同。
草舍才遮雨，荆窗不碍风。梨教通子守，酒是远师供。
扞虱欣时泰，迎猫达岁丰。原门唯有席，井饮但加葱。
少壮矜齐德，高年觉宋聋。寓书先论懒，读易反求蒙。
昔慕能鸣雁，今怜半死桐。秉心犹似矢，搔首忽如蓬。
赤叶翻藤架，黄花盖菊丛。聊将呈匠伯，今已学愚公。

卷 286_41【游终南山因寄苏奉礼士尊师苗员外】

李端

半岭逢仙驾，清晨独采芝。壶中开白日，雾里卷朱旂。
猿鸟知归路，松萝见会时。鸡声传洞远，鹤语报家迟。
童子闲驱石，樵夫乐看棋。依稀醉后拜，恍惚梦中辞。
海上终难接，人间益自疑。风尘甘独老，山水但相思。

愿得烧丹诀，流沙永待师。

卷 286_42【长安书事寄卢纶】

李端

弱冠家庐岳，从师岁月深。翻同老夫见，殊寡少年心。
及此时方晏，因之名亦沈。趋途非要路，避事乐空林。
素业在山下，青泉当树阴。交游有凋丧，离别代追寻。
向秀初闻笛，钟期久罢琴。残愁犹满貌，馀泪可沾襟。
勿以朱颜好，而忘白发侵。终期入灵洞，相与炼黄金。

卷 286_43【送郭良辅下第东归】

李端

献策不得意，驰车东出秦。暮年千里客，落日万家春。

卷 286_44【妾薄命】

李端

自从君弃妾，憔悴不羞人。唯馀坏粉泪，未免映衫匀。

卷 286_45 【送暕上人游春】

李端

独将支遁去，欲往戴颙家。晴野人临水，春山树发花。

卷 286_46 【晦日同苗员外游曲江】

李端

晦日同携手，临流一望春。可怜杨柳陌，愁杀故乡人。

卷 286_47 【溪行逢雨与柳中庸】

李端

日落众山昏，萧萧暮雨繁。那堪两处宿，共听一声猿。

卷 286_48 【和张尹忆东篱菊】

李端

传书报刘尹，何事忆陶家。若为篱边菊，山中有此花。

卷 286_49 【幽居作】

李端

山舍千年树，江亭万里云。回潮迎伍相，骤雨送湘君。

卷 286_50 【题云际寺暕上人故院】

李端

白发匆匆色，青山草草心。远公仍下世，从此别东林。

卷 286_51 【观邻老栽松】

李端

虽过老人宅，不解老人心。何事残阳里，栽松欲待阴。

卷 286_52 【赠胡居士】

李端

孔融过五十，海内故人稀。相府恩犹在，知君未拂衣。

卷 286_53【荐福寺送元伟】

李端

送客攀花后，寻僧坐竹时。明朝莫回望，青草马行迟。

卷 286_54【哭苗垂（一作过故友墓）】

李端

旧友无由见，孤坟草欲长。月斜邻笛尽，车马出山阳。

卷 286_55【客行赠冯著】

李端

旅行虽别路，日暮各思归。欲下今朝泪，知君亦湿衣。

卷 286_56【芜城（一作芜城怀古）】

李端

风吹城上树，草没城边路。城里月明时，精灵自来去。

卷 286_57【赠山中老人】

李端

白首独一身，青山为四邻。虽行故乡陌，不见故乡人。

卷 286_58【拜新月（一作耿漳诗）】

李端

开帘见新月，便即下阶拜。细语人不闻，北风吹裙带。

卷 286_59【听筝】

李端

鸣筝金粟柱，素手玉房前。欲得周郎顾，时时误拂弦。

卷 286_60【赠何兆】

李端

文章似扬马，风骨又清羸。江汉君犹在，英灵信未衰。

卷 286_61【同司空文明过坚上人故院（一作过坚上人影堂逢司空曙）】

李端

我与雷居士，平生事远公。无人知是旧，共到影堂中。

卷 286_62【杂诗】

李端

主第辞高饮，石家赴宵会。金谷走车来，玉人骑马待。

卷 286_63【感兴】

李端

香炉最高顶，中有高人住。日暮下山来，月明上山去。

卷 286_64【问张山人疾】

李端

先生沈病意何如，蓬艾门前客转疏。
不见领徒过绛帐，唯闻与婢削丹书。

卷 286_65 【江上送客】

李端

故人南去汉江阴，秋雨萧萧云梦深。
江上见人应下泪，由来远客易伤心。

卷 286_66 【闺情】

李端

月落星稀天欲明，孤灯未灭梦难成。
披衣更向门前望，不忿朝来鹊喜声。

卷 286_67 【送刘侍郎】

李端

几人同去谢宣城，未及酬恩隔死生。
唯有夜猿知客恨，峰阳溪路第三声。

卷 286_68 【重送郑宥归蜀因寄何兆】

李端

黄花西上路何如，青壁连天雁亦疏。
为报长卿休涤器，汉家思见茂陵书。

卷 286_69 【宿石涧店闻妇人哭】

李端

山店门前一妇人，哀哀夜哭向秋云。
自说夫因征战死，朝来逢著旧将军。

卷 286_70 【与道者别】

李端

闻说沧溟今已浅，何当白鹤更归来。
旧师唯有先生在，忍见门人掩泪回。

卷 286_71 【长门怨（一作长信宫）】

李端

金壶漏尽禁门开，飞燕昭阳侍寝回。
随分独眠秋殿里，遥闻语笑自天来。

卷 286_72【忆友怀野寺旧居（一作答司空文明怀野寺旧居）】

李端

自嫌野性共人疏，忆向西林更结庐。
寄谢山阴许都讲，昨来频得远公书。

卷 286_73【听夜雨寄卢纶】

李端

暮雨萧条过凤城，霏霏飒飒重还轻。
闻君此夜东林宿，听得荷池几番声。

卷 286_74【昭君词】

李端

李陵初送子卿回，汉月明时惆怅来。

忆著长安旧游处，千门万户玉楼台。

卷 286_75 【春晚游鹤林寺寄使府诸公】

李端

野寺寻春花已迟，背岩惟有两三枝。
明朝携酒犹堪醉，为报春风且莫吹。

第二百八十七卷

卷 287_1【南充谢郡客游澧州留赠宇文中丞】

畅当

仆本濩落人，辱当州郡使。量力颇及早，谢归今即已。
萧萧若凌虚，襟带顿销靡。车服率然来，涔阳作游子。
郁郁寡开颜，默默独行李。忽逢平生友，一笑方在此。
秋情宁风日，楚思浩云水。为语弋林者，冥冥鸿远矣。

卷 287_2【宿报恩寺精舍】

畅当

钟梵送沈景，星多露渐光。风中兰靡靡，月下树苍苍。
夜殿若山横，深松如涧凉。羸然虎溪子，迟我一虚床。
杳杳空寂舍，濛濛莲桂香。拥褐依西壁，纱灯霭中央。

卷 287_3【自平阳馆赴郡】

畅当

晨兴平阳馆，见月沈江水。溶溶山雾披，肃肃沙鹭起。
奉恩谬符竹，伏轼省顽鄙。何当施教化，愧迎小郡吏。
寥落火耕俗，征途青冥里。德绥及吾民，不德将鹿矣。
擒奸非性能，多愍会衰齿。恭承共理诏，恒惧坠诸地。

卷 287_4【天柱隐所重答江州应物】

畅当

寂寞一帐望，秋风山景清。此中惟草色，翻意见人行。
荒径饶松子，深萝绝鸟声。阳崖全带日，宽嶂偶通耕。
拙昧难容世，贫寒别有情。烦君琼玖赠，幽懒百无成。

卷 287_5【山居酬韦苏州见寄】

畅当

孤柴泄烟处，此中山叟居。观云宁有事，耽酒讵知馀。
水定鹤翻去，松歌峰俨如。犹烦使君问，更欲结深庐。

卷 287_6【春日过奉诚园（一作曲江，一作玉林园）】

畅当

帝里阳和日，游人到御园。暖催新景气，春认旧兰荪。
咏德先臣没，成蹊大树存。见桐犹近井，看柳尚依门。
献地非更宅，遗忠永奉恩。又期攀桂后，来赏百花繁。

卷 287_7 【军中醉饮寄沈八刘叟（一作杜甫诗）】

畅当

酒渴爱江清，馀酣漱晚汀。软莎欹坐稳，冷石醉眠醒。
野膳随行帐，华音发从伶。数杯君不见，都已遣沈冥。

卷 287_8 【偶宴西蜀摩诃池】

畅当

珍木郁清池，风荷左右披。浅觴宁及醉，慢舸不知移。
荫簟流光冷，凝簪照影欹。胡为独羁者，雪涕向涟漪。

卷 287_9 【奉送杜中丞赴洪州】

畅当

诏出凤凰宫，新恩连帅雄。江湖经战阵，草木待仁风。
豪右贪威爱，纡繁德简通。多惭君子顾，攀饯路尘中。

卷 287_10【九日陪皇甫使君泛江宴赤岸亭】

畅当

羁旅逢佳节，逍遥忽见招。同倾菊花酒，缓棹木兰桡。
平楚堪愁思，长江去寂寥。猿啼不离峡，滩沸镇如潮。
举目关山异，伤心乡国遥。徒言欢满座，谁觉客魂消。

卷 287_11【蒲中道中二首】

畅当

苍苍中条山，厥形极奇瑰。我欲涉其崖，濯足黄河水。
古刹栖柿林，绿阴覆苍瓦。岁晏来品题，拾叶总堪写。

卷 287_12【登鹳雀楼】

畅当

迥临飞鸟上，高出世尘间。天势围平野，河流入断山。

卷 287_13【宿潭上二首】

畅当

夜潭有仙舸，与月当水中。嘉宾爱明月，游子惊秋风。

青蒲野陂水，白露明月天。中夜秋风起，心事坐潸然。

卷 287_14【别卢纶】

畅当

故交君独在，又欲与君离。我有新秋泪，非关宋玉悲。

卷 287_15【题沈八斋】

畅当

江斋一入何亭亭，因寄沦涟心杳冥。

绿绮琴弹白雪引，乌丝绢勒黄庭经。

卷 287_16【早春】

畅诸

献岁春犹浅，园林未尽开。雪和新雨落，风带旧寒来。
听鸟闻归雁，看花识早梅。生涯知几日，更被一年催。

第二百八十八卷

卷 288_1【晓过南宫闻太常清乐】

陆贄

南宫闻古乐，拂曙听初惊。烟霭遥迷处，丝桐暗辨名。
节随新律改，声带绪风轻。合雅将移俗，同和自感情。
远音兼晓漏，馀响过春城。九奏明初日，寥寥天地清。

卷 288_2【禁中春松】

陆贄

阴阴清禁里，苍翠满春松。雨露恩偏近，阳和色更浓。
高枝分晓日，虚吹杂宵钟。香助炉烟远，形疑盖影重。
愿符千载寿，不羨五株封。倘得回天眷，全胜老碧峰。

卷 288_3【赋得御园芳草】

陆贄

阴阴御园里，瑶草日光长。霾靡含烟雾，依稀带夕阳。
雨馀黄更密，风暖蕙初香。拥杖缘驰道，乘舆入建章。
湿烟摇不散，细影乱无行。恒恐韶光晚，何人辨早芳。

卷 288_4 【句】

陆贽

绕阶流泚泚，来砌树阴阴。（任江淮尉题厅，《语林》）

卷 288_5 【晓过南宫闻太常清乐】

张濛

玉珂经礼寺，金奏过南宫。雅调乘清晓，飞声向远空。
慢随飘去雪，轻逐度来风。迥出重城里，傍闻九陌中。
应将肆夏比，更与五英同。一听南薰曲，因知大舜功。

卷 288_6 【禁中春松】

常沂

映殿松偏好，森森列禁中。攒柯沾圣泽，疏盖引皇风。
晚色连秦苑，春香满汉宫。操将金石固，材与直臣同。

翠影宜青琐，苍枝秀碧空。还知沐天眷，千载更葱茏。

卷 288_7 【禁中春松】

周存

几岁含贞节，青青紫禁中。日华留偃盖，雉尾转春风。
不为繁霜改，那将众木同。千条攒翠色，百尺澹晴空。
影密金茎近，花明凤沼通。安知幽涧侧，独与散樗丛。

卷 288_8 【西戎献马】

周存

天马从东道，皇威被远戎。来参八骏列，不假贰师功。
影别流沙路，嘶流上苑风。望云时蹀足，向月每争雄。
稟异才难状，标奇志岂同。驱驰如见许，千里一朝通。

卷 288_9 【小苑春望宫池柳色】

黎逢

上林新柳变，小苑暮天晴。始望和烟密，遥怜拂水轻。
色承阳气暖，阴带御沟清。不厌随风弱，仍宜向日明。

垂丝遍阁榭，飞絮触帘旌。渐到依依处，思闻出谷莺。

卷 288_10【夏首犹清和（一作张聿诗）】

黎逢

早夏宜初景，和光起禁城。祝融将御节，炎帝启朱明。
日送残花晚，风过御苑清。郊原浮麦气，池沼发荷英。
树影临山动，禽飞入汉轻。幸逢尧禹化，全胜谷中情。

卷 288_11【小苑春望宫池柳色】

张昔

小苑春初至，皇衢日更清。遥分万条柳，回出九重城。
隐映龙池润，参差凤阙明。影宜宫雪曙，色带禁烟晴。
深浅残阳变，高低晓吹轻。年光正堪折，欲寄一枝荣。

卷 288_12【小苑春望宫池柳色】

丁位

小苑宜春望，宫池柳色轻。低昂含晓景，萦转带新晴。
似盖芳初合，如丝荫渐成。依依连水暗，袅袅出墙明。

虽以阳和发，能令旅思生。他时花满路，从此接迁莺。

卷 288_13【小苑春望宫池柳色】

元友直

柳色新池遍，春光御苑晴。叶依青阁密，条向碧流倾。
路暗阴初重，波摇影转清。风从垂处度，烟就望中生。
断续游蜂聚，飘飘戏蝶轻。怡然变芳节，愿及一枝荣。

卷 288_14【小苑春望宫池柳色】

杨系

胜游从小苑，宫柳望春晴。拂地青丝嫩，萦风绿带轻。
光含烟色远，影透水文清。玉笛吟何得，金闺画岂成。
皇风吹欲断，圣日映逾明。愿驻高枝上，还同出谷莺。

卷 288_15【小苑春望宫池柳色】

崔绩

帝京春气早，御柳已先荣。嫩叶随风散，浮光向日明。
悠扬生别意，断续引芳声。积翠连驰道，飘花出禁城。

柔条依水弱，远色带烟轻。南望龙池畔，斜光照晚晴。

卷 288_16【小苑春望宫池柳色】

张季略

韶光归汉苑，柳色发春城。半见离宫出，才分远水明。
青葱当淑景，隐映媚新晴。积翠烟初合，微黄叶未生。
迎春看尚嫩，照日见先荣。倘得辞幽谷，高枝寄一名。

卷 288_17【小苑春望宫池柳色】

裴达

胜游经小苑，闲望上春城。御路韶光发，宫池柳色轻。
乍浓含雨润，微澹带云晴。幂历残烟敛，摇扬落照明。
几条垂广殿，数树影高旌。独有风尘客，思同雨露荣。

卷 288_18【南至日太史登台书云物】

裴逵

圆丘才展礼，佳气近初分。太史新簪笔，高台纪彩云。
烟空和缥缈，晓色共氛氲。道泰资贤辅，年丰荷圣君。

恭惟司国瑞，兼用察人文。应念怀铅客，终朝望碧雰。

卷 288_19【小苑春望宫池柳色】

沈回

今来游上苑，春染柳条轻。濯濯方含色，依依若有情。
分行临曲沼，先发媚重城。拂水枝偏弱，摇风丝已生。
变黄随淑景，吐翠逐新晴。伫立徒延首，裴回欲寄诚。

第二百八十九卷

卷 289_1【长安春夜宿开元观】

杨凭

霓裳下晚烟，留客杏花前。遍问人寰事，新从洞府天。
长松皆扫月，老鹤不知年。为说蓬瀛路，云涛几处连。

卷 289_2【晚泊江戍】

杨凭

旅棹依遥戍，清湘急晚流。若为南浦宿，逢此北风秋。
云月孤鸿晚，关山几路愁。年年不得意，零落对沧洲。

卷 289_3【巴江雨夜】

杨凭

五岭天无雁，三巴客问津。纷纷轻汉暮，漠漠暗江春。

青草连湖岸，繁花忆楚人。芳菲无限路，几夜月明新。

卷 289_4【边塞行】

杨凭

九原临得水，双足是重城。独许为儒老，相怜从骑行。
细丛榆塞迥，高点雁山晴。圣主嗤炎汉，无心自勒兵。

卷 289_5【乐游园望月】

杨凭

炎灵全盛地，明月半秋时。今古人同望，盈亏节暗移。
彩凝双月迥，轮度八川迟。共惜鸣珂去，金波送酒卮。

卷 289_6【千叶桃花】

杨凭

千叶桃花胜百花，孤荣春晚驻年华。
若教避俗秦人见，知向河源旧侣夸。

卷 289_7 【春中泛舟】

杨凭

仙郎归奏过湘东，正值三湘二月中。
惆怅满川桃杏醉，醉看还与曲江同。

卷 289_8 【雨中怨秋】

杨凭

辞家远客怆秋风，千里寒云与断蓬。
日暮隔山投古寺，钟声何处雨濛濛。

卷 289_9 【秋日独游曲江】

杨凭

信马闲过忆所亲，秋山行尽路无尘。
主人莫惜松阴醉，还有千钱沽酒人。

卷 289_10 【寄别】

杨凭

晚烟洲雾并苍苍，河雁惊飞不作行。
回旆转舟行数里，歌声犹自逐清湘。

卷 289_11 【边情】

杨凭

新种如今屡请和，玉关边上幸无他。
欲知北海苦辛处，看取节毛馀几多。

卷 289_12 【早发湘中】

杨凭

按节鸣笳中贵催，红旗白旆满船开。
迎愁湓浦登城望，西见荆门积水来。

卷 289_13 【海榴】

杨凭

海榴殷色透帘栊，看盛看衰意欲同。
若许三英随五马，便将浓艳斗繁红。

卷 289_14 【春情】

杨凭

暮雨朝云几日归，如丝如雾湿人衣。
三湘二月春光早，莫逐狂风缭乱飞。

卷 289_15 【送客往荆州】

杨凭

巴丘过日又登城，云水湘东一日平。
若爱春秋繁露学，正逢元凯镇南荆。

卷 289_16 【赠马炼师】

杨凭

心嫌碧落更何从，月帔花冠冰雪容。
行雨若迷归处路，近南惟见祝融峰。

卷 289_17 【湘江泛舟】

杨凭

湘川洛浦三千里，地角天涯南北遥。
除却同倾百壶外，不愁谁奈两魂销。

卷 289_18【送别】

杨凭

江岸梅花雪不如，看君驿驭向南徐。
相闻不必因来雁，云里飞鞚落素书。

卷 289_19【赠窦牟（一作窦洛阳牟见简篇章，偶赠绝句）】

杨凭

直用天才众却瞋，应欺李杜久为尘。
南荒不死中华老，别玉翻同西国人。

第二百九十卷

卷 290_1【送别】

杨凝

樽酒邮亭暮，云帆驿使归。野鸥寒不起，川雨冻难飞。
吴会家移遍，轩辕梦去稀。姓杨皆足泪，非是强沾衣。

卷 290_2【送客东归】

杨凝

君向古营州，边风战地愁。草青纒别路，柳亚拂孤楼。
人意伤难醉，莺啼咽不流。芳菲只合乐，离思返如秋。

卷 290_3【送客归湖南】

杨凝

湖南树色尽，了了辨潭州。雨散今为别，云飞何处游。

情来偏似醉，泪迸不成流。那向萧条路，缘湘篁竹愁。

卷 290_4【送客归淮南】

杨凝

画舫照河堤，暄风百草齐。行丝直网蝶，去燕旋遗泥。
郡向高天近，人从别路迷。非关御沟上，今日各东西。

卷 290_5【春情】

杨凝

旧宅洛川阳，曾游游侠场。水添杨柳色，花绊绮罗香。
赵瑟多愁曲，秦家足艳妆。江潭远相忆，春梦不胜长。

卷 290_6【秋夜听捣衣】

杨凝

砧杵闻秋夜，裁缝寄远方。声微渐湿露，响细未经霜。
兰牖唯遮树，风帘不碍凉。云中望何处，听此断人肠。

卷 290_7 【从军行】

杨凝

都尉出居延，强兵集五千。还将张博望，直救范祁连。
汉卒悲箫鼓，胡姬湿采旃。如今意气尽，流泪挹流泉。

卷 290_8 【和直禁省】

杨凝

宵直丹宫近，风传碧树凉。漏稀银箭滴，月度网轩光。
凤诏裁多暇，兰灯梦更长。此时颜范贵，十步旧连行。

卷 290_9 【留别】

杨凝

玉节随东阁，金闺别旧僚。若为花满寺，跃马上河桥。

卷 290_10 【送客往洞庭】

杨凝

九江归路远，万里客舟还。若过巴江水，湘东满碧烟。

卷 290_11 【别友人】

杨凝

倦客惊危路，伤禽绕树枝。非逢暴公子，不敢涕流离。

卷 290_12 【初渡淮彼岸】

杨凝

别梦虽难觉，悲魂最易销。殷勤淮彼岸，乡近去家遥。

卷 290_13 【咏雨】

杨凝

尘浥多人路，泥归足燕家。可怜缭乱点，湿尽满宫花。

卷 290_14 【柳絮】

杨凝

河畔多杨柳，追游尽狭斜。春风一回送，乱入莫愁家。

卷 290_15【花枕】

杨凝

席上沈香枕，楼中荡子妻。那堪一夜里，长湿两行啼。

卷 290_16【送客往鄜州】

杨凝

新参将相事营平，锦带骍弓结束轻。晓上关城吟画角，
暗驰羌马发支兵。回中地近风常急，鄜畤年多草自生。
近喜扶阳系戎相，从来卫霍笑长缨。

卷 290_17【送客往夏州】

杨凝

怜君此去过居延，古塞黄云共渺然。沙阔独行寻马迹，
路迷遥指戍楼烟。夜投孤店愁吹笛，朝望行尘避控弦。

闻有故交今从骑，何须著论更言钱。

卷 290_18【春霁晚望】

杨凝

细雨晴深小苑东，春云开气逐光风。雄儿走马神光上，
静女看花佛寺中。书剑学多心欲懒，田园荒废望频空。
南归路极天连海，惟有相思明月同。

卷 290_19【唐昌观玉蕊花】

杨凝

瑶华琼蕊种何年，萧史秦嬴向紫烟。
时控彩鸾过旧邸，摘花持献玉皇前。

卷 290_20【别李协】

杨凝

江边日暮不胜愁，送客沾衣江上楼。
明月峡添明月照，蛾眉峰似两眉愁。

卷 290_21 【初次巴陵】

杨凝

西江浪接洞庭波，积水遥连天上河。
乡信为凭谁寄去，汀洲燕雁渐来多。

卷 290_22 【上巳】

杨凝

帝京元巳足繁华，细管清弦七贵家。
此日风光谁不共，纷纷皆是掖垣花。

卷 290_23 【春怨】

杨凝

花满帘栊欲度春，此时夫婿在咸秦。
绿窗孤寝难成寐，紫燕双飞似弄人。

卷 290_24 【送客归常州】

杨凝

行到河边从此辞，寒天日远暮帆迟。
可怜芳草成衰草，公子归时过绿时。

卷 290_25【送别】

杨凝

春愁不尽别愁来，旧泪犹长新泪催。
相思倘寄相思字，君到扬州扬子回。

卷 290_26【送客入蜀】

杨凝

剑阁迢迢梦想间，行人归路绕梁山。
明朝骑马摇鞭去，秋雨槐花子午关。

卷 290_27【送别】

杨凝

仙花笑尽石门中，石室重重掩绿空。

暂下云峰能几日，却回烟驾驭春风。

卷 290_28【残花】

杨凝

五马踟蹰在路岐，南来只为看花枝。
莺衔蝶弄红芳尽，此日深闺那得知。

卷 290_29【戏赠友人】

杨凝

湘阴直与地阴连，此日相逢忆醉年。
美酒非如平乐贵，十升不用一千钱。

卷 290_30【赠同游】

杨凝

此□风雨后，已觉减年华。若待皆无事，应难更有花。
管弦临夜急，榆柳向江斜。且莫看归路，同须醉酒家。

卷 290_31 【送人出塞】

杨凝

北风吹雨雪，举目已凄凄。战鬼秋频哭，征鸿夜不栖。
沙平关路直，碛广郡楼低。此去非东鲁，人多事鼓鼙。

卷 290_32 【寻僧元皎因病】

杨凝

此僧迷有著，因病得寻师。话尽山中事，归当月上时。
高松连寺影，亚竹入窗枝。闲忆草堂路，相逢非素期。

卷 290_33 【夜泊渭津】

杨凝

飘飘东去客，一宿渭城边。远处星垂岸，中流月满船。
凉归夜深簟，秋入雨馀天。渐觉家山小，残程尚几年。

卷 290_34 【晚夏逢友人】

杨凝

一别同袍友，相思已十年。长安多在客，久病忽闻蝉。
骤雨才沾地，阴云不遍天。微凉堪话旧，移榻晚风前。

卷 290_35【别谪者】

杨凝

此地闻犹恶，人言是所之。一家书绝久，孤驿梦成迟。
八月三湘道，闻猿冒雨时。不须祠楚相，臣节转堪疑。

卷 290_36【行思】

杨凝

千里岂云去，欲归如路穷。人间无暇日，马上又秋风。
破月衔高岳，流星拂晓空。此时皆在梦，行色独匆匆。

卷 290_37【感怀题从舅宅】

杨凝

郤家庭树下，几度醉春风。今日花还发，当时事不同。

流言应未息，直道竟难通。徒遣相思者，悲歌向暮空。

卷 290_38【与友人会】

杨凝

蝉吟槐蕊落，的的是愁端。病觉离家远，贫知处事难。
真交无所隐，深语有馀欢。未必闻歌吹，羁心得暂宽。

卷 290_39【下第后蒙侍郎示意指于新先辈宣恩感谢】

杨凝

才薄命如此，自嗟兼自疑。遭逢好交日，黜落至公时。
倚玉甘无路，穿杨却未期。更惭君侍坐，问许可言诗。

第二百九十一卷

卷 291_1 【奉酬韦滁州寄示】

杨凌

淮扬为郡暇，坐惜流芳歇。散怀累榭风，清暑澄潭月。
陪燕辞三楚，戒途绵百越。非当远别离，雅奏何由发。

卷 291_2 【梅里旅夕】

杨凌

沧洲东望路，旅棹怆羁游。枫浦蝉随岸，沙汀鸥转流。
露天星上月，水国夜生秋。谁忍持相忆，南归一叶舟。

卷 291_3 【钟陵雪夜酬友人】

杨凌

穷腊催年急，阳春怯和歌。残灯闪壁尽，夜雪透窗多。

归路山川险，游人梦寐过。龙洲不可泊，岁晚足惊波。知

卷 291_4 【润州水楼】

杨凌

归心不可留，雪桂一丛秋。叶雨空江月，萤飞白露洲。
野蝉依独树，水郭带孤楼。遥望山川路，相思万里游。

卷 291_5 【江上秋月】

杨凌

陇雁送乡心，羁情属岁阴。惊秋黄叶遍，愁暮碧云深。
月色吴江上，风声楚木林。交亲几重别，归梦并愁侵。

卷 291_6 【阁前双槿】

杨凌

群玉开双槿，丹荣对绛纱。含烟疑出火，隔雨怪舒霞。
向晚争辞蕊，迎朝斗发花。非关后桃李，为欲继年华。

卷 291_7 【小苑春望宫池柳色】

杨凌

上苑闲游早，东风柳色轻。储胥遥掩映，池水隔微明。
春至条偏弱，寒馀叶未成。和烟变浓淡，转日异阴晴。
不独芳菲好，还因雨露荣。行人望攀折，远翠暮愁生。

卷 291_8 【送客往睦州】

杨凌

水阔尽南天，孤舟去渺然。惊秋路傍客，日暮数声蝉。

卷 291_9 【送客之蜀】

杨凌

西蜀三千里，巴南水一方。晓云天际断，夜月峡中长。

卷 291_10 【剡溪看花】

杨凌

花落千回舞，莺声百啭歌。还同异方乐，不奈客愁多。

卷 291_11【江中风】

杨凌

白浪暗江中，南泠路不通。高樯帆自满，出浦莫呼风。

卷 291_12【咏破扇】

杨凌

粉落空床弃，尘生故箠留。先来无一半，情断不胜愁。

卷 291_13【贾客愁】

杨凌

山水路悠悠，逢滩即滞留。西江风未便，何日到荆州。

卷 291_14【即事寄人】

杨凌

中禁鸣钟日欲高，北窗欹枕望频搔。
相思寂寞青苔合，唯有春风啼伯劳。

卷 291_15【早春雪中】

杨凌

新年雨雪少晴时，屡失寻梅看柳期。
乡信忆随回雁早，江春寒带故阴迟。

卷 291_16【北行留别】

杨凌

日日山川烽火频，山河重起旧烟尘。
一生孤负龙泉剑，羞把诗书问故人。

卷 291_17【秋原野望】

杨凌

客雁秋来次第逢，家书频寄两三封。

夕阳天外云归尽，乱见青山无数峰。

卷 291_18【春霁花萼楼南闻宫莺】

杨凌

祥烟瑞气晓来轻，柳变花开共作晴。
黄鸟远啼鵙鹊观，春风流出凤凰城。

卷 291_19【明妃怨】

杨凌

汉国明妃去不还，马驮弦管向阴山。
匣中纵有菱花镜，羞对单于照旧颜。

卷 291_20【句】

杨凌

南园桃李花落尽，春风寂寞摇空枝。（《诗式》）

第二百九十二卷

卷 292_1【题玉真观公主山池院】

司空曙

香殿留遗影，春朝玉户开。羽衣重素几，珠网俨轻埃。
石自蓬山得，泉经太液来。柳丝遮绿浪，花粉落青苔。
镜掩鸾空在，霞消凤不回。唯馀古桃树，传是上仙栽。

卷 292_2【送永阳崔明府】

司空曙

古国群舒地，前当桐柏关。连绵江上雨，稠叠楚南山。
沙馆行帆息，枫洲候吏还。乘篮若有暇，精舍在林间。

卷 292_3【送曹三同猗游山寺】

司空曙

山蹑青芜尽，凉秋古寺深。何时得连策，此夜更闻琴。
穷水云同穴，过僧虎共林。殷勤如念我，遗尔挂冠心。

卷 292_4 【送崔校书赴梓幕】

司空曙

碧峰天柱下，鼓角镇南军。管记催飞檄，蓬莱辍校文。
栈霜朝似雪，江雾晚成云。想出褒中望，巴庸方路分。

卷 292_5 【送夔州班使君】

司空曙

鱼国巴庸路，麾幢汉守过。晓檣争市隘，夜鼓祭神多。
云白当山雨，风清满峡波。夷陵旧人吏，犹诵两岐歌。知

卷 292_6 【送菊潭王明府】

司空曙

业成洙泗客，皓发著儒衣。一与游人别，仍闻带印归。
林多宛地古，云尽汉山稀。莫爱浔阳隐，嫌官计亦非。

卷 292_7【送太易上人赴东洛】

司空曙

遥见登山处，青芜雪后春。云深岳庙火，寺宿洛阳人。
饵药将斋折，唯诗与道亲。凡经几回别，麈尾不离身。

卷 292_8【和王卿立秋即事】

司空曙

秋宜何处看，试问白云官。暗入蝉鸣树，微侵蝶绕兰。
向风凉稍动，近日暑犹残。九陌浮埃减，千峰爽气攒。
换衣防竹暮，沈果讶泉寒。宫响传花杵，天清出露盘。
高禽当侧弁，游鲋对凭栏。一奏招商曲，空令继唱难。

卷 292_9【和李员外与舍人咏玫瑰花寄徐侍郎】

司空曙

仙吏紫薇郎，奇花共玩芳。攒星排绿蒂，照眼发红光。
暗妒翻阶药，遥连直署香。游枝蜂绕易，碍刺鸟衔妨。
露湿凝衣粉，风吹散蕊黄。蒙茏珠树合，灿烂锦屏张。
留客胜看竹，思人比爱棠。如传采蘋咏，远思满潇湘。知

卷 292_10 【冬夜耿拾遗王秀才就宿因伤故人】

司空曙

旧时闻笛泪，今夜重沾衣。方恨同人少，何堪相见稀。
竹烟凝涧壑，林雪似芳菲。多谢劳车马，应怜独掩扉。

卷 292_11 【早春游慈恩南池】

司空曙

山寺临池水，春愁望远生。蹋桥逢鹤起，寻竹值泉横。
新柳丝犹短，轻蘋叶未成。还如虎溪上，日暮伴僧行。

卷 292_12 【雨夜见投之作】

司空曙

出户繁星尽，池塘暗不开。动衣凉气度，遶树远声来。
灯外初行电，城隅偶隐雷。因知谢文学，晓望比尘埃。

卷 292_13 【龙池寺望月寄韦使君阎别驾】

司空曙

清光此夜中，万古望应同。当野山沈雾，低城树有风。
花宫纷共邃，水府皓相空。遥想高楼上，唯君对庾公。知

卷 292_14【秋夜忆兴善院寄苗发】

司空曙

右军多住寺，此夜后池秋。自与山僧伴，那因洛客愁。
卷帘霜霭霭，满目水悠悠。若有诗相赠，期君忆惠休。

卷 292_15【病中寄郑十六兄】

司空曙

倦枕欲徐行，开帘秋月明。手便筇杖冷，头喜葛巾轻。
绿草前侵水，黄花半上城。虚消此尘景，不见十年兄。

卷 292_16【卫明府寄枇杷叶以诗答】

司空曙

倾筐呈绿叶，重叠色何鲜。讵是秋风里，犹如晓露前。
仙方当见重，消疾本应便。全胜甘蕉赠，空投谢氏篇。

卷 292_17【过庆宝寺（一作耿漳诗，题作废宝光寺）】

司空曙

黄叶前朝寺，无僧寒殿开。池晴龟出曝，松暮鹤飞回。
古井碑横草，阴廊画杂苔。禅宫亦销歇，尘世转堪哀。知

卷 292_18【奉和张大夫酬高山人】

司空曙

野客居铃阁，重门将校稀。豸冠亲谷弁，龟印识荷衣。
座右寒飙爽，谈馀暮角微。苍生须太傅，山在岂容归。

卷 292_19【送严使君游山】

司空曙

家楚依三户，辞州选一钱。酒杯同寄世，客棹任销年。
赤烧兼山远，青芜与浪连。青春明月夜，知上鄂君船。

卷 292_20 【送柳震归蜀】

司空曙

白日双流静，西看蜀国春。桐花能乳鸟，竹节竞祠神。
蹇步徒相望，先鞭不可亲。知从江仆射，登榻更何人。

卷 292_21 【送乐平苗明府】

司空曙

天际山多处，东安古邑深。绿田通竹里，白浪隔枫林。
诗有江僧和，门唯越客寻。应将放鱼化，一境表吾心。知

卷 292_22 【赠送郑钱二郎中】

司空曙

梅含柳已动，昨日起东风。惆怅心徒壮，无如鬓作翁。
百年飘若水，万绪尽归空。何可宗禅客，迟回岐路中。

卷 292_23 【酬郑十四望驿不得同宿见赠因寄张参军】

司空曙

逢君喜成泪，暂似故乡中。谪宦犹多惧，清宵不得终。
月烟高有鹤，宿草净无虫。明日鄱超会，应思下客同。

卷 292_24 【暮春野望寄钱起（一作耿漳诗）】

司空曙

草长花落树，羸病强寻春。无复少年意，空馀华发新。
青原高见水，白社静逢人。寄谢南宫客，轩车不可亲。

卷 292_25 【送王使君小子孝廉登科归省】

司空曙

年少通经学，登科尚佩觿。张冯本名士，蔡廓是佳儿。
鞍马临岐路，龙钟对别离。寄书胡太守，请与故人知。知

卷 292_26 【云阳寺石竹花】

司空曙

一自幽山别，相逢此寺中。高低俱出叶，深浅不分丛。
野蝶难争白，庭榴暗让红。谁怜芳最久，春露到秋风。

卷 292_27 【送高胜重谒曹王】

司空曙

江上青枫岸，阴阴万里春。朝辞郢城酒，暮见洞庭人。
兴比乘舟访，恩怀倒屣亲。想君登旧榭，重喜扫芳尘。

卷 292_28 【闲园书事招畅当】

司空曙

闻蝉昼眠后，欹枕对蓬蒿。羸病懒寻戴，田园方咏陶。
傍檐虫挂静，出树蝶飞高。惆怅临清镜，思君见鬓毛。

卷 292_29 【过钱员外】

司空曙

为郎头已白，迹向市朝稀。移病居荒宅，安贫著败衣。
野园随客醉，雪寺伴僧归。自说东峰下，松萝满故扉。知

卷 292_30 【赠庾侍御】

司空曙

年少身无累，相逢忆此时。雪过云寺宿，酒向竹园期。
白发今催老，清琴但起悲。唯应逐宗炳，内学愿为师。

卷 292_31 【赠李端】

司空曙

共忆南浮日，登高望若何。楚田湖草远，江寺海榴多。
载酒寻山宿，思人带雪过。东西几回别，此会各蹉跎。

卷 292_32 【送流人】

司空曙

闻说南中事，悲君重窜身。山村枫子鬼，江庙石郎神。
童稚留荒宅，图书托故人。青门好风景，为尔一沾巾。

卷 292_33 【过胡居士睹王右丞遗文】

司空曙

旧日相知尽，深居独一身。闭门空有雪，看竹永无人。
每许前山隐，曾怜陋巷贫。题诗今尚在，暂为拂流尘。

卷 292_34 【送郎使君赴郢州】

司空曙

使君持节去，云水满前程。楚寺多连竹，江樯远映城。
登楼向月望，赛庙傍山行。若动思乡咏，应贻谢步兵。

卷 292_35 【贼平后送人北归】

司空曙

世乱同南去，时清独北还。他乡生白发，旧国见青山。
晓月过残垒，繁星宿故关。寒禽与衰草，处处伴愁颜。

卷 292_36 【观猎骑（一作公子行）】

司空曙

缠臂绣纶巾，貂裘窄称身。射禽风助箭，走马雪翻尘。

金埒争开道，香车为驻轮。翩翩不知处，传是霍家亲。

卷 292_37 【同苗员外宿荐福常师房（一作秋喜卢纶同宿寺）】

司空曙

浮生共多故，聚宿喜君同。人息时闻磬，灯摇乍有风。
霜阶疑水际，夜木似山中。一愿持如意，长来事远公。知

卷 292_38 【送乔广下第归淮南】

司空曙

遥想长淮尽，荒堤楚路斜。戍旌标白浪，罟网入青葭。
啼鸟仍临水，愁人更见花。东堂一枝在，为子惜年华。

卷 292_39 【风筝】

司空曙

高风吹玉柱，万籁忽齐飘。飒树迟难度，萦空细渐销。
松泉鹿门夜，笙鹤洛滨朝。坐与真僧听，支颐向寂寥。

卷 292_40 【闲居寄苗发】

司空曙

渐向浮生老，前期竟若何。独身居处静，永夜坐时多。
厌逐青林客，休吟白雪歌。支公有遗寺，重与谢安过。

卷 292_41 【送王先生归南山】

司空曙

儒中年最老，独有济南生。爱子方传业，无官自耦耕。
竹通山舍远，云接雪田平。愿作门人去，相随隐姓名。知

卷 292_42 【寄天台秀师】

司空曙

天台瀑布寺，传有白头师。幻迹示羸病，空门无住持。
雪晴看鹤去，海夜与龙期。永愿亲瓶屨，呈功得问疑。

卷 292_43 【送夏侯审赴宁国】

司空曙

青圻连白浪，晓日渡南津。山叠陵阳树，舟多建业人。
烟霞高占寺，枫竹暗停神。如接玄晖集，江丞独见亲。

卷 292_44 【云阳馆与韩绅（一作韩升卿）宿别】

司空曙

故人江海别，几度隔山川。乍见翻疑梦，相悲各问年。
孤灯寒照雨，湿竹暗浮烟。更有明朝恨，离杯惜共传。

卷 292_45 【送卢使君赴夔州】

司空曙

铙管随旌旆，高秋远上巴。白波连雾雨，青壁断蒹葭。
凭几双童静，登楼万井斜。政成知变俗，当应画轮车。

卷 292_46 【夜闻回雁】

司空曙

雁响天边过，高高望不分。飏飏传细雨，嘹唳隔长云。

散向谁家尽，归来几客闻。还将今夜意，西海话苏君。

卷 292_47【赋得的的帆向浦】

司空曙

向浦参差去，随波远近还。初移芳草里，正在夕阳间。
隐映回孤驿，微明出乱山。向空看不尽，归思满江关。

卷 292_48【秋思呈尹植裴说（一本题下有郑洞二字）】

司空曙

静向懒相偶，年将衰共催。前途欢不集，往事恨空来。
昼景委红叶，月华销绿苔。沈思竟何有，坐结玉琴哀。

卷 292_49【闲园即事寄暕公】

司空曙

欲就东林寄一身，尚怜儿女未成人。柴门客去残阳在，
药圃虫喧秋雨频。近水方同梅市隐，曝衣多笑阮家贫。
深山兰若何时到，羨与闲云作四邻。

卷 292_50【题欸上人院】

司空曙

闭门不出自焚香，拥褐看山岁月长。雨后绿苔生石井，
秋来黄叶遍绳床。身闲何处无真性，年老曾言隐故乡。
更说本师同学处，几时携手见衡阳。

卷 292_51【长安晓望寄程补阙（一作包何诗）】

司空曙

迢递山河拥帝京，参差宫殿接云平。风吹晓漏经长乐，
柳带晴烟出禁城。天净笙歌临路发，日高车马隔尘行。
独有浅才甘未达，多惭名在鲁诸生。

卷 292_52【下第日书情寄上叔父】

司空曙

微才空觉滞京师，末学曾为叔父知。雪里题诗偏见赏，
林间饮酒独令随。游客尽伤春色老，贫居还惜暮阴移。
欲归江海寻山去，愿报何人得桂枝。

卷 292_53【南原望汉宫】

司空曙

荒原空有汉宫名，衰草茫茫雉堞平。连雁下时秋水在，
行人过尽暮烟生。西陵歌吹何年绝，南陌登临此日情。
故事悠悠不可问，寒禽野水自纵横。

卷 292_54【早夏寄元校书】

司空曙

独游野径送芳菲，高竹林居接翠微。绿岸草深虫入遍，
青丛花尽蝶来稀。珠荷荐果香寒簟，玉柄摇风满夏衣。
蓬荜永无车马到，更当斋夜忆玄晖。

卷 292_55【赠衡岳隐禅师】

司空曙

拥褐安居南岳头，白云高寺见衡州。石窗湖水摇寒月，
枫树猿声报夜秋。讲席旧逢山鸟至，梵经初向竺僧求。
垂垂身老将传法，因下人间遂北游。

卷 292_56【题凌云寺】

司空曙

春山古寺绕沧波，石磴盘空鸟道过。百丈金身开翠壁，
万龕灯焰隔烟萝。云生客到侵衣湿，花落僧禅覆地多。
不与方袍同结社，下归尘世竟如何。

卷 292_57【晦日益州北池陪宴】

司空曙

临泛从公日，仙舟翠幕张。七桥通碧沼，双树接花塘。
玉烛收寒气，金波隐夕光。野闻歌管思，水静绮罗香。
游骑萦林远，飞桡截岸长。郊原怀灞浐，陂溇写江潢。
常侍传花诏，偏裨问羽觞。岂令南岷首，千载播馀芳。

卷 292_58【送曲山人之衡州】

司空曙

白石先生眉发光，已分甜雪饮红浆。衣巾半染烟霞气，
语笑兼和药草香。茅洞玉声流暗水，衡山碧色映朝阳。
千年城郭如相问，华表峨峨有夜霜。

卷 292_59【立秋日】

司空曙

律变新秋至，萧条自此初。花酣莲报谢，叶在柳呈疏。
澹日非云映，清风似雨馀。卷帘凉暗度，迎扇暑先除。
草静多翻燕，波澄乍露鱼。今朝散骑省，作赋兴何如。

卷 292_60【咏古寺花】

司空曙

共爱芳菲此树中，千跗万萼裹枝红。
迟迟欲去犹回望，覆地无人满寺风。

卷 292_61【酬张芬有赦后见赠（一作司空图诗）】

司空曙

紫凤朝衔五色书，阳春忽布网罗除。已将心变寒灰后，
岂料光生腐草馀。建水风烟收客泪，杜陵花竹梦郊居。
劳君故有诗相赠，欲报琼瑶恨不如。

卷 292_62 【哭苗员外呈张参军（苗公即参军舅氏）】

司空曙

思君宁家宅，久接竹林期。尝值偷琴处，亲闻比玉时。
高人不易合，弱冠早相知。试艺临诸友，能文即我师。
凌寒松未老，先暮槿何衰。季子生前别，羊昙醉后悲。
寿堂乖一恸，奠席阻长辞。因沥殊方泪，遥成墓下诗。

卷 292_63 【金陵怀古】

司空曙

辇路江枫暗，宫庭野草春。伤心庾开府，老作北朝臣。

卷 292_64 【发渝州却寄韦判官】

司空曙

红烛津亭夜见君，繁弦急管两纷纷。
平明分手空江转，唯有猿声满水云。

卷 292_65 【送卢彻之太原谒马尚书】

司空曙

榆落雕飞关塞秋，黄云画角见并州。
翩翩羽骑双旌后，上客亲随郭细侯。

卷 292_66【峡口送友人】

司空曙

峡口花飞欲尽春，天涯去住泪沾巾。
来时万里同为客，今日翻成送故人。

卷 292_67【故郭婉仪挽歌】

司空曙

一日辞秦镜，千秋别汉宫。岂唯泉路掩，长使月轮空。
苦色凝朝露，悲声切暝风。婉仪馀旧德，仍载礼经中。

卷 292_68【送翰林张学士岭南勒圣碑】

司空曙

汉恩天外洽，周颂日边称。文独司空美，书兼太尉能。

出关逢北雁，度岭逐南鹏。使者翰林客，馀春归灞陵。

卷 292_69【送吉校书东归】

司空曙

少年芸阁吏，罢直暂归休。独与亲知别，行逢江海秋。
听猿看楚岫，随雁到吴洲。处处园林好，何人待子猷。

卷 292_70【早春游望】

司空曙

东风春未足，试望秦城曲。青草状寒芜，黄花似秋菊。
壮将欢共去，老与悲相逐。独作游社人，暮过威辇宿。

卷 292_71【秋日趋府上张大夫】

司空曙

重城洞启肃秋烟，共说羊公在镇年。鞞鼓暗惊林叶落，
旌旗遥拂雁行偏。石过桥下书曾受，星降人间梦已传。
谪吏何能沐风化，空将歌颂拜车前。

卷 292_72 【竹里径】

司空曙

幽径行迹稀，清阴苔色古。萧萧风欲来，乍似蓬山雨。

卷 292_73 【黄子陂】

司空曙

岸芳春色晓，水影夕阳微。寂寂深烟里，渔舟夜不归。

卷 292_74 【田鹤】

司空曙

散下渚田中，隐见菰蒲里。哀鸣自相应，欲作凌风起。

卷 292_75 【药园】

司空曙

春园芳已遍，绿蔓杂红英。独有深山客，时来辨药名。

卷 292_76【石井】

司空曙

苔色遍春石，桐阴入寒井。幽人独汲时，先乐残阳影。

卷 292_77【板桥】

司空曙

横遮野水石，前带荒村道。来往见愁人，清风柳阴好。

卷 292_78【石莲花】

司空曙

今逢石上生，本自波中有。红艳秋风里，谁怜众芳后。

卷 292_79【远寺钟】

司空曙

杳杳疏钟发，因风清复引。中宵独听之，似与东林近。

卷 292_80 【松下雪】

司空曙

不随晴野尽，独向深松积。落照入寒光，偏能伴幽寂。

卷 292_81 【新柳】

司空曙

全欺芳蕙晚，似妒寒梅疾。撩乱发青条，春风来几日。

卷 292_82 【唐昌公主院看花】

司空曙

遗殿空长闭，乘鸾自不回。至今荒草上，寥落旧花开。

卷 292_83 【别张讚】

司空曙

今日山晴后，残蝉菊发时。登楼见秋色，何处最相思。

卷 292_84 【晚思】

司空曙

蛩馀窗下月，草湿阶前露。晚景凄我衣，秋风入庭树。

卷 292_85 【留卢秦卿（一作郎士元诗）】

司空曙

知有前期在，难分此夜中。无将故人酒，不及石尤风。

卷 292_86 【登岷亭】

司空曙

岷山回首望秦关，南向荆州几日还。
今日登临唯有泪，不知风景在何山。

卷 292_87 【哭麴山人（一作耿漳诗）】

司空曙

忆昔秋风起，君曾叹逐臣。何言芳草日，自作九泉人。

卷 292_88【过坚上人故院与李端同赋】

司空曙

旧依支遁宿，曾与戴颙来。今日空林下，唯知见绿苔。

卷 292_89【病中嫁女妓】

司空曙

万事伤心在目前，一身垂泪对花筵。
黄金用尽教歌舞，留与他人乐少年。

卷 292_90【江村即事】

司空曙

钓罢归来不系船，江村月落正堪眠。
纵然一夜风吹去，只在芦花浅水边。

第二百九十三卷

卷 293_1【送郑明府贬岭南】

司空曙

青枫江色晚，楚客独伤春。共对一尊酒，相看万里人。
猜嫌成谪宦，正直不防身。莫畏炎方久，年年雨露新。

卷 293_2【寄卫明府常见短靴褐裘，又务持诵是以有末句之赠】

司空曙

柴桑官舍近东林，儿稚初髻即道心。侧寄绳床嫌凭几，
斜安苔帟懒穿簪。高僧静望山僮逐，走吏喧来水鸭沈。
翠竹黄花皆佛性，莫教尘境误相侵。

卷 293_3【酬李端校书见赠】

司空曙

绿槐垂穗乳乌飞，忽忆山中独未归。青镜流年看发变，
白云芳草与心违。乍逢酒客春游惯，久别林僧夜坐稀。
昨日闻君到城阙，莫将簪弁胜荷衣。

卷 293_4【过卢秦卿旧居】

司空曙

五柳茅茨楚国贤，桔槔蔬圃水涓涓。黄花寒后难逢蝶。
红叶晴来忽有蝉。韩康助采君臣药，支遁同看内外篇。
为问潜夫空著论，如何侍从赋甘泉。

卷 293_5【秋园】

司空曙

伤秋不是惜年华，别忆春风碧玉家。
强向衰丛见芳意，茱萸红实似繁花。

卷 293_6【送王使君赴太原拜节度副使】

司空曙

新从刘太尉，结束向并州。络脑青丝骑，盘囊锦带钩。

出关逢将校，下岭拥戈矛。匣闭黄云冷，山传画角秋。
剑锋将破虏，函道罢登楼。岂作书生老，当封万户侯。

卷 293_7 【拟百劳歌】

司空曙

朱丝纽弦金点杂，双蒂芙蓉共开合。谁家稚女著罗裳，
红粉青眉娇暮妆。木难作床牙作席，云母屏风光照壁。
玉颜年几新上头，回身敛笑多自羞。红销月落不复见，
可惜当时谁拂面。

卷 293_8 【迎神】

司空曙

吉日兮临水，沐青兰兮白芷。假山鬼兮请东皇，
托灵均兮邀帝子。吹参差兮正苦。舞婆娑兮未已。
鸾旌圆盖望欲来，山雨霏霏江浪起。神既降兮我独知，
目成再拜为陈词。

卷 293_9 【送神】

司空曙

神之去，回风袅袅云容与。桂尊瑶席不复陈，
苍山绿水暮愁人。

卷 293_10【残莺百啭歌同王员外耿拾遗吉中孚李端游慈
恩各赋一物】

司空曙

残莺一何怨，百啭相寻续。始辨下将高，稍分长复促。
绵蛮巧状语，机节终如曲。野客赏应迟，幽僧闻讵足。
禅斋深树夏阴清，零落空馀三两声。金谷箏中传不似，
山阳笛里写难成。忆昨乱啼无远近，晴宫晓色偏相引。
送暖初随柳色来，辞芳暗逐花枝尽。歌残莺，歌残莺，
悠然万感生。谢朓羁怀方一听，何郎闲吟本多情。
乃知众鸟非侔比，暮噪晨鸣倦人耳。共爱奇音那可亲，
年年出谷待新春。此时断绝为君惜，明日玄蝉催发白。

卷 293_11【过终南柳处士】

司空曙

云起山苍苍，林居萝薜荒。幽人老深境，素发与青裳。
雨涤莓苔绿，风摇松桂香。洞泉分溜浅，岩笋出丛长。
败屣安松砌，馀棋在石床。书名一为别，还路已堪伤。

卷 293_12 【春送郭大之官】

司空曙

明府之官官舍春，春风辞我两三人。
可怜江县闲无事，手板支颐独咏贫。

卷 293_13 【送郑锡（曙曾事此公季父）】

司空曙

汉阳云树清无极，蜀国风烟思不堪。
莫怪别君偏有泪，十年曾事晋征南。

卷 293_14 【同张参军喜李尚书寄新琴】

司空曙

新琴传凤凰，晴景称高张。白玉连徽净，朱丝系爪长。
轻埃随拂拭，杂籁满铿锵。暗想山泉合，如亲兰蕙芳。
正声消郑卫，古状掩笙簧。远识贤人意，清风愿激扬。

卷 293_15 【苦热】

司空曙

暑气发炎州，焦烟远未收。啸风兼炽焰，挥汗讶成流。
鹳鹊投林尽，龟鱼拥石稠。漱泉齐饮酎，衣葛剧兼裘，
长簟贪欹枕，轻巾懒挂头。招商如有曲，一为取新秋。

卷 293_16【送人归黔府】

司空曙

伏波箫鼓水云中，长戟如霜大旆红。
油幕晓开飞鸟绝，翩翩上将独趋风。

卷 293_17【杂兴】

司空曙

月没辽城暗出师，双龙金角晓天悲。
黄尘满目随风散，不认将军燕尾旗。

卷 293_18【岁暮怀崔峒耿漳】

司空曙

腊月江天见春色，白花青柳疑寒食。
洛阳旧社各东西，楚国游人不相识。

卷 293_19 【观妓】

司空曙

翠蛾红脸不胜情，管绝弦馀发一声。
银烛摇摇尘暗下，却愁红粉泪痕生。

卷 293_20 【过长林湖西酒家】

司空曙

湖草青青三两家，门前桃杏一般花。
迁人到处唯求醉，闻说渔翁有酒赊。

卷 293_21 【过阎采病居】

司空曙

每逢佳节何曾坐，唯有今年不得游。
张邴卧来休送客，菊花枫叶向谁秋。

卷 293_22 【送程秀才】

司空曙

悠悠多路岐，相见又别离。东风催节换，焰焰春阳散。
楚草渐烟绵，江云亦芜漫。送子恨何穷，故关如梦中。
游人尽还北，旅雁辞南国。枫树几回青，逐臣归不得。

卷 293_23 【长林令卫象饬丝结歌】

司空曙

主人雕盘盘素丝，寒女眷眷墨子悲。乃言假使饬为之，
八珍重沓失颜色。手援玉箸不敢持，始状芙蓉新出水。
仰坼重衣倾万蕊，又如合欢交乱枝，红茸向暮花参差。
吴蚕络茧抽尚绝，细缕纤毫看欲灭。雪发羞垂倭堕鬟，
绣囊畏并茱萸结。我爱此丝巧，妙绝世间无，
为君作歌陈座隅。

卷 293_24 【酬崔峒见寄（一作江湖秋思）】

司空曙

趋陪禁掖雁行随，迁放江潭鹤发垂。素浪遥疑太液水，

青枫忽似万年枝。嵩南春遍愁魂梦。壶口云深隔路岐。
共望汉朝多沛泽，苍蝇早晚得先知。

卷 293_25 【闻春雷】

司空曙

水国春雷早，闐闐若众车。自怜迁逐者，犹滞蛰藏馀。

卷 293_26 【晚秋西省寄上李韩二舍人】

司空曙

昼漏传清唱，天恩禁旅秋。雁亲承露掌，砧隔曝衣楼。
赐膳中人送，馀香侍女收。仍闻劳上直，晚步凤池头。

卷 293_27 【下武昌江行望涔阳】

司空曙

悠悠次楚乡，楚口下涔阳。雪隐洲渚暗，沙高芦荻黄。
渔人共留滞，水鸟自喧翔。怀土年空尽，春风又淼茫。

卷 293_28 【送史申之峡州】

司空曙

峡口巴江外，无风浪亦翻。蒹葭新有雁，云雨不离猿。
行客思乡远，愁人赖酒昏。檀郎好联句，共滞谢家门。

卷 293_29 【送王闰】

司空曙

相送临寒水，苍然望故关。江芜连梦泽，楚雪入商山。
话我他年旧，看君此日还。因将自悲泪，一洒别离间。

卷 293_30 【江园书事寄卢纶】

司空曙

种柳南江边，闭门三四年。艳花那胜竹，凡鸟不如蝉。
嗜酒渐婴渴，读书多欲眠。平生故交在，白首远相怜。

卷 293_31 【送郑况往淮南】

司空曙

西楚见南关，苍苍落日间。云离大雷树，潮入秣陵山。
登戍因高望，停桡放溜闲。陈公有贤榻，君去岂空还。

卷 293_32 【题江陵临沙驿楼】

司空曙

江天清更愁，风柳入江楼。雁惜楚山晚，蝉知秦树秋。
凄凉多独醉，零落半同游。岂复平生意，苍然兰杜洲。

卷 293_33 【新蝉（一作耿漳诗）】

司空曙

今朝蝉忽鸣，迁客若为情。便觉一年老，能令万感生。
微风方满树，落日稍沉城。为问同怀者，凄凉听几声。

卷 293_34 【送张弋】

司空曙

拥棹江天旷，苍然下郢城。冰霜葭菼变，云泽鹧鸪鸣。

酒倦临流醉，人逢置榻迎。尝闻藉东观，不独鲁诸生。

卷 293_35 【送僧无言归山】

司空曙

袈裟出尘外，山径几盘缘。人到白云树，鹤沉青草田。
龕泉朝请盥，松籁夜和禅。自昔闻多学，逍遥注一篇。

卷 293_36 【和卢校书文若早入使院书事】

司空曙

解带独裴回，秋风如水来。轩墀湿繁露，琴几拂轻埃。
晨鸟犹在叶，夕虫馀□苔。苍然发高兴，相仰坐难陪。

卷 293_37 【送史泽之长沙】

司空曙

谢朓怀西府，单车触火云。野蕉依戍客，庙竹映湘君。
梦渚巴山断，长沙楚路分。一杯从别后，风月不相闻。

卷 293_38 【田家】

司空曙

田家喜雨足，邻老相招携。泉溢沟塍坏，麦高桑柘低。
呼儿催放犊，宿客待烹鸡。搔首蓬门下，如将轩冕齐。

卷 293_39 【送卢堪】

司空曙

羁贫不易去，此日始西东。旅舍秋霖叶，行人寒草风。
酒醒馀恨在，野饯暂游同。莫使祢生刺，空留怀袖中。

卷 293_40 【送柳震入蜀】

司空曙

粉堞连青气，喧喧杂万家。夷人祠竹节，蜀鸟乳桐花。
酒报新丰景，琴迎抵峡斜。多闻滞游客，不似在天涯。

卷 293_41 【送李嘉祐正字括图书兼往扬州覲省】

司空曙

不事兰台贵，全多韦带风。儒官比刘向，使者得陈农。
晚烧平芜外，朝阳叠浪东。归来喜调膳，寒笋出林中。

卷 293_42【送刘侍御】

司空曙

狱成收夜烛，整豸出登车。黄叶辞荆楚，青山背汉初。
早朝新羽卫，晚下步徒胥。应念长沙谪，思乡不食鱼。

卷 293_43【送庞判官赴黔中】

司空曙

天远风烟异，西南见一方。乱山来蜀道，诸水出辰阳。
堆案青油暮，看棋画角长。论文谁可制，记室有何郎。

卷 293_44【送人游岭南】

司空曙

万里南游客，交州见柳条。逢迎人易合，时日酒能消。

浪晓浮青雀，风温解黑貂。囊金如未足，莫恨故乡遥。

卷 293_45【送曹同椅】

司空曙

青春三十馀，众艺尽无如。中散诗传画，将军扇续书。
楚田晴下雁，江日暖游鱼。惆怅空相送，欢游自此疏。

卷 293_46【送鄂州张别驾襄阳覲省】

司空曙

苍苍岷亭路，腊月汉阳春。带雪半山寺，行沙隔水人。
王祥因就宦，莱子不违亲。正恨殊乡别，千条楚柳新。

卷 293_47【送魏季羔游长沙覲兄】

司空曙

芦荻湘江水，萧萧万里秋。鹤高看迥野，蝉远入中流。
访友多成滞，携家不厌游。惠连仍有作，知得从兄酬。

卷 293_48【杂言】

司空曙

伏馀西景移，风雨洒轻絺。燕拂青芜地，蝉鸣红叶枝。

卷 293_49【玩花与卫象同醉】

司空曙

衰鬓千茎雪，他乡一树花。今朝与君醉，忘却在长沙。

卷 293_50【送王尊师归湖州】

司空曙

烟芜满洞青山绕，幢节飘空紫凤飞。金阙乍看迎日丽，
玉箫遥听隔花微。多开石髓供调膳，时御霓裳奉易衣。
莫学辽东华表上，千年始欲一回归。

卷 293_51【九日洛东亭】

司空曙

风息斜阳尽，游人曲落间。采花因覆酒，行草转看山。
柳散新霜下，天晴早雁还。伤秋非骑省，玄发白成斑。

卷 293_52【九日送人】

司空曙

送人冠獬豸，值节佩茱萸。均赋征三壤，登车出五湖。
水风凄落日，岸叶飒衰芜。自恨尘中使，何因在路隅。

卷 293_53【哭王注】

司空曙

已叹漳滨卧，何言驻隙难。异才伤促短，诸友哭门阑。
古道松声暮，荒阡草色寒。延陵今葬子，空使鲁人观。

卷 293_54【遇谷口道士】

司空曙

一见林中客，闲知州县劳。白云秋色远，苍岭夕阳高。
自说名因石，谁逢手种桃。丹经倘相授，何用恋青袍。

卷 293_55【喜外弟卢纶见宿】

司空曙

静夜四无邻，荒居旧业贫。雨中黄叶树，灯下白头人。
以我独沈久，愧君相见频。平生自有分，况是蔡家亲。

卷 293_56【深上人见访忆李端】

司空曙

雁稀秋色尽，落日对寒山。避事多称疾，留僧独闭关。
心归尘俗外，道胜有无间。仍忆东林友，相期久不还。

卷 293_57【宿青龙寺故昙上人院】

司空曙

年深宫院在，旧客自相逢。闭户临寒竹，无人有夜钟。
降龙今已去，巢鹤竟何从。坐见繁星晓，凄凉识旧峰。

卷 293_58【送张炼师还峨嵋山】

司空曙

太一天坛天柱西，垂萝为幌石为梯。前登灵境青霄绝，
下视人间白日低。松籁万声和管磬，丹光五色杂虹霓。
春山一入寻无路，鸟响烟深水满溪。

卷 293_59 【逢江客问南中故人因以诗寄】

司空曙

南客何时去，相逢问故人。望乡空泪落，嗜酒转家贫。
疏懒辞微禄，东西任老身。上楼多看月，临水共伤春。
五柳终期隐，双鸥自可亲。应怜折腰吏，冉冉在风尘。

卷 293_60 【送皋法师】

司空曙

江草知寒柳半衰，行吟怨别独迟迟。
何人讲席投如意，唯有东林远法师。

卷 293_61 【送郑佖归洛阳】

司空曙

苍苍楚色水云间，一醉春风送尔还。
何处乡心最堪羨，汝南初见洛阳山。

卷 293_62【分流水】

司空曙

古时愁别泪，滴作分流水。日夜东西流，分流几千里。
通塞两不见，波澜各自起。与君相背飞，去去心如此。

卷 293_63【和耿拾遗元日观早朝】

司空曙

元日争朝阙，奔流若会溟。路尘和薄雾，骑火接低星。
门响双鱼钥，车喧百子铃。冕旒当翠殿，幢戟满彤庭。
积岁方编瑞，乘春即省刑。大官陈禹玉，司历献尧蓂。
寿酒三觴退，箫韶九奏停。太阳开物象，霁泽及生灵。
南陌高山碧，东方晓气青。自怜扬子贱，归草太玄经。

卷 293_64【塞下曲】

司空曙

寒柳接胡桑，军门向大荒。幕营随月魄，兵气长星芒。
横吹催春酒，重裘隔夜霜。冰开不防虏，青草满辽阳。

卷 293_65 【关山月】

司空曙

苍茫明月上，夜久光如积。野幕冷胡霜，关楼宿边客。
陇头秋露暗，碛外寒沙白。唯有故乡人，沾裳此闻笛。

卷 293_66 【御制雨后出城观览，敕朝臣已下属和】

司空曙

上上开鹑野，师师出凤城。因知圣主念，得遂老农情。
陇麦垂秋合，郊尘得雨清。时新荐玄祖，岁足富苍生。
却马川原静，闻鸡水土平。薰弦歌舜德，和鼎致尧名。
览物欣多稼，垂衣御大明。史官何所录，称瑞满天京。

卷 293_67 【奉和常舍人晚秋集贤院即事寄徐薛二侍郎】

司空曙

蔼蔼凤凰宫，兰台玉署通。夜霜凝树羽，朝日照相风。

官附三台贵，儒开百氏宗。司言陈禹命，侍讲发尧聪。
香卷青编内，铅分绿字中。缀签从太史，锵珮揖群公。
池接天泉碧，林交御果红。寒龟登故叶，秋蝶恋疏丛。
颜谢征文并，钟裴直事同。离群惊海鹤，属思怨江枫。
地远姑苏外，山长越绝东。惭当哲匠后，下曲本难工。

卷 293_68【题鲜于秋林园】

司空曙

雨后园林好，幽行迥野通。远山芳草外，流水落花中。
客醉悠悠惯，莺啼处处同。夕阳自一望，日暮杜陵东。

卷 293_69【登秦岭】

司空曙

南登秦岭头，回首始堪忧。汉阙青门远，商山蓝水流。
三湘迁客去，九陌故人游。从此思乡泪，双垂不复收。

卷 293_70【独游寄卫长林】

司空曙

草绿春阳动，迟迟泽畔游。恋花同野蝶，爱水剧江鸥。
身外唯须醉，人间尽是愁。那知鸣玉者，不羨卖瓜侯。

卷 293_71【望水】

司空曙

高楼晴见水，楚色霭相和。野极空如练，天遥不辨波。
永无人迹到，时有鸟行过。况是苍茫外，残阳照最多。

卷 293_72【望商山路】

司空曙

南见青山道，依然去国时。已甘长避地，谁料有还期。
雨霁残阳薄，人愁独望迟。空残华发在，前事不堪思。

卷 293_73【题落叶】

司空曙

霜景催危叶，今朝半树空。萧条故国异，零落旅人同。
飒岸浮寒水，依阶拥夜虫。随风偏可羨，得到洛阳宫。

卷 293_74 【寄准上人】

司空曙

昨闻归旧寺，暂别欲经年。樵客应同步，邻僧定伴禅。
后峰秋有雪，远涧夜鸣泉。偶与支公论，人间自共传。

卷 293_75 【送况上人还荆州，因寄卫侍御象】

司空曙

惠持游蜀久，策杖欲西还。共别此宵月，独归何处山。
对鸥沙草畔，洗足野云间。知有玄晖会，斋心受八关。

卷 293_76 【别卢纶（一作纶别曙诗）】

司空曙

有月多同赏，无秋不共悲。如何与君别，又是菊黄时。

卷 293_77 【雪二首】

司空曙

乐游春苑望鹅毛，宫殿如星树似毫。
漫漫一川横渭水，太阳初出五陵高。

王屋南崖见洛城，石龛松寺上方平。
半山榭叶当窗下，一夜曾闻雪打声。

卷 293_78【酬卫长林岁日见呈】

司空曙

地暖雪花摧，天春斗柄回。朱泥一丸药，柏叶万年杯。
旅雁辞人去，繁霜满镜来。今朝彩盘上，神燕不须雷。

卷 293_79【杜鹃行（一作杜甫诗）】

司空曙

古时杜宇称望帝，魂作杜鹃何微细。跳枝窜叶树木中，
抢翔瞥捩雌随雄。毛衣惨黑自憔悴，众鸟安肯相尊崇。
隳形不敢栖华屋，短翮唯愿巢深丛。穿皮啄朽觜欲秃，
苦饥始得食一虫。谁言养雏不自哺，此语亦足为愚蒙。
声音咽啞若有谓，号啼略与婴儿同。口干垂血转迫促，
似欲上诉于苍穹。蜀人闻之皆起立，至今相效传遗风。
乃知变化不可穷，岂知昔日居深宫，嫔妃左右如花红。

卷 293_80【寄胡居士】

司空曙

日暖风微南陌头，青田红树起春愁。伯劳相逐行人别，
岐路空归野水流。遍地寻僧同看雪，谁期载酒共登楼。
为言惆怅嵩阳寺，明月高松应独游。

卷 293_81【寒塘】

司空曙

晓发梳临水，寒塘坐见秋。乡心正无限，一雁度南楼。

卷 293_82【为李魏公赋谢汧公】

司空曙

白雪高吟际，青霄远望中。谁言路遐旷，宫徵暗相通。

卷 293_83【梁城老人怨（一作陈羽诗）】

司空曙

· 全唐诗 ·

朝为耕种人，暮作刀枪鬼。相看父子血，共染城壕水。

.

第二百九十四卷

卷 294_1【扬州选蒙相公赏判雪后呈上】

崔峒

自得山公许，休耕海上田。惭看长史传，欲弃钓鱼船。
穷巷殷忧日，芜城雨雪天。此时瞻相府，心事比旌悬。

卷 294_2【客舍书情寄赵中丞】

崔峒

东楚复西秦，浮云类此身。关山劳策蹇，僮仆惯投人。
孤客来千里，全家托四邻。生涯难自料，中夜问情亲。

卷 294_3【客舍有怀因呈诸在事】

崔峒

读书常苦节，待诏岂辞贫。暮雪犹驱马，晡餐又寄人。

愁来占吉梦，老去惜良辰。延首平津阁，家山日已春。

卷 294_4 【书怀寄杨郭李王判官】

崔峒

惯作云林客，因成懒漫人。吏欺从政拙，妻笑理家贫。
李郭应时望，王杨入幕频。从容丞相阁，知忆故园春。

卷 294_5 【奉和给事寓直】

崔峒

桂枝家共折，鸡树代相传。忝向鸾台下，仍看雁影连。
夜闲方步月，漏尽欲朝天。知去丹墀近，明王许荐贤。

卷 294_6 【初入集贤院赠李献仁（曾于常山联官）】

崔峒

燕代官初罢，江湖路便分。九迁从命薄，四十幸人闻。
迹愧趋丹禁，身曾系白云。何由返沧海，昨日谒明君。

卷 294_7 【酬李补阙雨中寄赠】

崔峒

十年随马宿，几度受人恩。白发还乡井，微官有子孙。
竹窗寒雨滴，苦砌夜虫喧。独愧东垣友，新诗慰旅魂。

卷 294_8 【初除拾遗酬丘二十二见寄（一作初拜命酬丘丹见赠）】

崔峒

江海久垂纶，朝衣忽挂身。丹墀初谒帝，白发免羞人。
才愧文章士，名当谏诤臣。空馀荐贤分，不敢负交亲。

卷 294_9 【刘展下判官相招以诗答之】

崔峒

国有非常宠，家承异姓勋。背恩惭皎日，不义若浮云。
但使忠贞在，甘从玉石焚。窜身如有地，梦寐见明君。

卷 294_10 【送侯山人赴会稽】

崔峒

仙客辞萝月，东来就一官。且归沧海住，犹向白云看。
猿叫江天暮，虫声野浦寒。时游镜湖里，为我把鱼竿。

卷 294_11【宿禅智寺上方演大师院】

崔峒

石林高几许，金刹在中峰。白日空山梵，清霜后夜钟。
竹窗回翠壁，苔径入寒松。幸接无生法，疑心怯所从。

卷 294_12【题空山人石室】

崔峒

早晚悟无生，头陀不到城。云山知夏腊，猿鸟见修行。
地僻无溪路，人寻逐水声。年年深谷里，谁识远公名。

卷 294_13【登蒋山开善寺（一作李嘉祐诗）】

崔峒

山殿秋云里，香烟出翠微。客寻朝磬至，僧背夕阳归。

下界千门见，前朝万事非。看心兼送目，葭莢暮依依。

卷 294_14 【题崇福寺禅院】

崔峒

僧家竟何事，扫地与焚香。清磬度山翠，闲云来竹房。
身心尘外远，岁月坐中长。向晚禅堂掩，无人空夕阳。

卷 294_15 【秋晚送丹徒许明府赴上国，因寄江南故人】

崔峒

秋暮之彭泽，篱花远近逢。君书前日至，别后此时重。
寒夜江边月，晴天海上峰。还知南地客，招引住新丰。

卷 294_16 【送薛仲方归扬州】

崔峒

佳句应无敌，贞心不有猜。惭为丈人行，怯见后生才。
泛舸贪斜月，浮桡值早梅。绿杨新过雨，芳草待君来。

卷 294_17 【送韦员外还京】

崔峒

十年离乱后，此去若为情。春晚香山绿，人稀豫水清。
野陂看独树，关路逐残莺。前殿朝明主，应怜白发生。

卷 294_18 【润州送友人】

崔峒

见君还此地，洒泪向江边。国士劳相问，家书无处传。
荒城胡马迹，塞木戍人烟。一路堪愁思，孤舟何渺然。

卷 294_19 【送张芬东归】

崔峒

喧喧五衢上，鞍马自驱驰。落日临阡陌，贫交欲别离。
早知时事异，堪与世人随。握手将何赠，君心我独知。

卷 294_20 【送苏修游上饶】

崔峒

爱尔无羁束，云山恣意过。一身随远岫，孤棹任轻波。
世事关情少，渔家寄宿多。芦花浅淡处，江月奈人何。

卷 294_21【送陆明府之盱眙】

崔峒

陶令之官去，穷愁惨别魂。白烟横海戍，红叶下淮村。
澹浪摇山郭，平芜到县门。政成堪吏隐，免负府公恩。

卷 294_22【江南回逢赵曜，因送任十一赴交城主簿】

崔峒

江上长相忆，因高北望看。不知携老幼，何处度艰难。
屈指同人尽，伤心故里残。遥怜驱匹马，白首到微官。

卷 294_23【送薛良史往越州谒从叔】

崔峒

辞家年已久，与子分偏深。易得相思泪，难为欲别心。

孤云随浦口，几日到山阴。遥想兰亭下，清风满竹林。

卷 294_24【送丘二十二之苏州】

崔峒

积水与寒烟，嘉禾路几千。孤猿啼海岛，群雁起湖田。
曾见长洲苑，尝闻大雅篇。却将封事去，知尔爱闲眠。

卷 294_25【登润州芙蓉楼】

崔峒

上古人何在，东流水不归。往来潮有信，朝暮事成非。
烟树临沙静，云帆入海稀。郡楼多逸兴，良牧谢玄晖。

卷 294_26【江上书怀】

崔峒

骨肉天涯别，江山日落时。泪流襟上血，发变镜中丝。
胡越书难到，存亡梦岂知。登高回首罢，形影自相随。

卷 294_27 【春日忆姚氏外甥】

崔峒

离乱人相失，春秋雁自飞。只缘行路远，未必寄书稀。
二月花无数，频年意有违。落晖看过后，独坐泪沾衣。

卷 294_28 【送真上人还兰若】

崔峒

得道云林久，年深暂一归。出山逢世乱，乞食觉人稀。
半偈初传法，中峰又掩扉。爱憎应不染，尘俗自依依。

卷 294_29 【润州送师弟自江夏往台州】

崔峒

远客乘流去，孤帆向夜开。春风江上使，前日汉阳来。
别路犹千里，离心重一杯。剡溪木未落，羡尔过天台。

卷 294_30 【送李道士归山】

崔峒

秋城临古路，城上望君还。旷野入寒草，独行随远山。
授人鸿宝内，将犬白云间。早晚烧丹罢，遥知冰雪寒。

卷 294_31 【宿江西窦主簿厅（与此公亡兄联官）】

崔峒

广庭方缓步，星汉话中移。月满关山道，乌啼霜树枝。
时艰难会合，年长重亲知。前事成金石，凄然泪欲垂。

卷 294_32 【喜逢妻弟郑损因送入京】

崔峒

乱后自江城，相逢喜复惊。为经多载别，欲问小时名。
对酒悲前事，论文畏后生。遥知盈卷轴，纸贵在江城。

卷 294_33 【咏门下画小松上元王杜三相公（一作钱起诗）】

崔峒

昔闻生涧底，今见起毫端。众草此时没，何人知岁寒。

岂能裨栋宇，且贵出门阑。只在丹青意，凌云也不难。

卷 294_34 【寄上礼部李侍郎】

崔峒

吴楚相逢处，江湖共泛时。任风舟去远，待月酒行迟。
白发常同叹，青云本要期。贵来君却少，秋至老偏悲。
玉佩明朝盛，苍苔陋巷滋。追寻恨无路，唯有梦相思。

卷 294_35 【书情寄上苏州韦使君兼呈吴县李明府】

崔峒

数年湖上谢浮名，竹杖纱巾遂性情。云外有时逢寺宿，
日西无事傍江行。陶潜县里看花发，庾亮楼中对月明。
谁念献书来万里，君王深在九重城。

卷 294_36 【题桐庐李明府官舍（一作赠同官李明府）】

崔峒

讼堂寂寂对烟霞，五柳门前聚晓鸦。流水声中视公事，
寒山影里见人家。观风竞美新为政，计日还知旧触邪。

可惜陶潜无限酒，不逢篱菊正开花。

卷 294_37 【赠窦十九（时公车待诏长安）】

崔峒

灵台暮宿意多违，木落花开羨客归。江海几时传锦字，
风尘不觉化缁衣。山阳会里同人少，灞曲农时故老稀。
幸得汉皇容直谏，怜君未遇觉人非。

卷 294_38 【虔州见郑表新诗因以寄赠】

崔峒

梅花岭里见新诗，感激情深过楚词。平子四愁今莫比，
休文八咏自同时。萍乡露冕真堪惜，凤沼鸣珂已讶迟。
才子风流定难见，湖南春草但相思。

卷 294_39 【赠元秘书】

崔峒

旧书稍稍出风尘，孤客逢秋感此身。秦地谬为门下客，
淮阴徒笑市中人。也闻阮籍寻常醉，见说陈平不久贫。

幸有故人茅屋在，更将心事问情亲。

卷 294_40【送韦八少府判官归东京】

崔峒

玄成世业紫真官，文似相如貌胜潘。鸿雁南飞人独去，
云山一别岁将阑。清淮水急桑林晚，古驿霜多柿叶寒。
琼树相思何日见，银钩数字莫为难。

卷 294_41【送冯八将军奏事毕归滑台幕府】

崔峒

王门别后到沧洲，帝里相逢俱白头。自叹马卿常带疾，
还嗟李广不封侯。棠梨宫里瞻龙袞，细柳营中著虎裘。
想到滑台桑叶落，黄河东注杏园秋。

卷 294_42【送王侍御佐婺州（作郎士元：盖少府新除江南尉问风俗）】

崔峒

闻君作尉向江潭。吴越风烟到自谙。客路寻常经竹径，

人家大底傍山岚。缘溪花木偏宜远，避地衣冠尽向南。
惟有夜猿啼海树，思乡望北意难堪。

卷 294_43【越中送王使君赴江华】

崔峒

皂盖春风自越溪，独寻芳树桂阳西。远水浮云随马去，
空山弱筱向云低。遥知异政荆门北，旧许新诗康乐齐。
万里相思在何处，九疑残雪白猿啼。

卷 294_44【送皇甫冉往白田】

崔峒

江边尽日雉鸣飞，君向白田何日归。楚地蒹葭连海迥，
隋朝杨柳映堤稀。津楼故市无行客，山馆空庭闭落晖。
试问疲人与征战，使君双泪定沾衣。

卷 294_45【题兰若】

崔峒

绝顶茅庵老此生，寒云孤木独经行。

世人那得知幽径，遥向青峰礼磬声。

卷 294_46【送贺兰广赴选】

崔峒

而今用武尔攻文，流辈干时独卧云。
白发青袍趋会府，定应衡镜却惭君。

卷 294_47【清江曲内一绝（折腰体）】

崔峒

八月长江去浪平，片帆一道带风轻。
极目不分天水色，南山南是岳阳城。

卷 294_48【武康郭外望许纬先生山居】

崔峒

湖上千峰带落晖，白云开处见柴扉。
松门一径仍生草，应是仙人向郭稀。

第二百九十五卷

卷 295_1【送司空曙之苏州】

苗发

盘门吴旧地，蝉尽草秋时。归国人皆久，移家君独迟。
广陵经水宿，建邺有僧期。若到西霞寺，应看江总碑。

卷 295_2【送孙德谕罢官往黔州（孙父曾牧此州，因寄家也）】

苗发

中岁分符典石城，两朝趋陛谒承明。阙下昨承归老疏，
天南今切去乡情。亲知握手三秋别，几杖扶身万里行。
伯道暮年无嗣子，欲将家事托门生。

卷 295_3【送归中丞使新罗册立吊祭】

吉中孚

官称汉独坐，身是鲁诸生。绝域通王制，穷天向水程。
岛中分万象，日处转双旌。气积鱼龙窟，涛翻水浪声。
路长经岁去，海尽向山行。复道殊方礼，人瞻汉使荣。

卷 295_4 【咏被中绣鞋】

夏侯审

云里蟾钩落凤窝，玉郎沈醉也摩挲。
陈王当日风流减，只向波间见袜罗。

卷 295_5 【行路难】

王烈

行客满长路，路长良足哀。白日持角弓，射人而取财。
千金谁家子，纷纷死黄埃。见者不敢言，言者不得回。
家人各望归，岂知长不来。

卷 295_6 【雪】

王烈

雪飞当梦蝶，风度几惊人。半夜一窗晓，平明千树春。

花园应失路，白屋忽为邻。散入仙厨里，还如云母尘。

卷 295_7 【酬崔峒】

王烈

徇世甘长往，逢时忝一官。欲朝青琐去，羞向白云看。
荣宠无心易，艰危抗节难。思君写怀抱，非敢和幽兰。

卷 295_8 【塞上曲二首】

王烈

红颜岁岁老金微，砂碛年年卧铁衣。
白草城中春不入，黄花戍上雁长飞。

孤城夕对戍楼闲，回合青冥万仞山。
明镜不须生白发，风沙自解老红颜。

卷 295_9 【伤李端】

卫象

才子浮生促，泉台此路赊。官卑杨执戟，年少贾长沙。

人去门栖鵬，灾成酒误蛇。唯馀封禅草，留在茂陵家。

卷 295_10【古词】

卫象

鹊血雕弓湿未干，鸛鹑新淬剑光寒。
辽东老将鬓成雪，犹向旄头夜夜看。

卷 295_11【晴江秋望】

崔秀卿

八月长江万里晴，千帆一道带风轻。
尽日不分天水色，洞庭南是岳阳城。

卷 295_12【赠兄】

何兆

洛阳纸价因兄贵，蜀地红笺为弟贫。
南北东西九千里，除兄与弟更无人。

卷 295_13【玉蕊花（一作严休复诗）】

何兆

羽车潜下玉龟山，尘世何缘睹舜颜。
惟有多情天上雪，好风吹上绿云鬟。

卷 295_14【句】

何兆？

芙蓉十二池心漏，薝卜三千灌顶香。（见《焦氏笔乘》）

卷 295_15【严陵滩下寄常建】

奚贾

日入溪水静，寻真此亦难。乃知沧洲人，道成仍钓竿。
漾楫乘微月，振衣生早寒。纷吾成独往，自速耽考槃。
已息汉阴诮，且同濠上观。旷然心无涯，谁问容膝安。

卷 295_16【谒李尊师】

奚贾

万物返常性，惟道贵自然。先生容其微，隐几为列仙。
炼魄闭琼户，养毛飞洞天。将知道遥久，得道无岁年。

卷 295_17【寻许山人亭子】

奚贾

桃源若远近，渔子棹轻舟。川路行难尽，人家到渐幽。
山禽拂席起，溪水入庭流。君是何年隐，如今成白头。

卷 295_18【句】

奚贾

眠涧花自落，步林鸟不飞。

谿谷何萧条，日入人独行。

落日下平楚，孤烟生洞庭。（见《诗式》）

第二百九十六卷

卷 296_1【富阳南楼望浙江风起】

张南史

南楼渚风起，树杪见沧波。稍觉征帆上，萧萧暮雨多。
沙洲殊未极，云水更相和。欲问任公子，垂纶意若何。

卷 296_2【奉酬李舍人秋日寓直见寄】

张南史

秋日金华直，遥知玉佩清。九重门更肃，五色诏初成。
槐落宫中影，鸿高苑外声。翻从魏阙下，江海寄幽情。

卷 296_3【同韩侍郎秋朝使院】

张南史

重门启曙关，一叶报秋还。露井桐柯湿，风庭鹤翅闲。

忘情簪白笔，假梦入青山。惆怅只应此，难裁语默间。

卷 296_4 【送朱大游塞（一作送朱大北游）】

张南史

岁暮一为别，江湖聊自宽。且无人事处，谁谓客行难。
郢曲怜公子，吴州忆伯鸾。苍苍远山际，松柏独宜寒。

卷 296_5 【送郑录事赴太原】

张南史

叹息不相见，红颜今白头。重为西候别，方起北风愁。
六月胡天冷，双城汾水流。卢谿即故吏，还复向并州。

卷 296_6 【送余赞善使还赴薛尚书幕】

张南史

音书不可论，河塞雪纷纷。雁足期苏武，狐裘见薛君。
城池通紫陌，鞍马入黄云。远棹漳渠水，平流几处分。

卷 296_7 【送李侍御入茅山采药】

张南史

苦县家风在，茅山道录传。聊听骢马使，却就紫阳仙。
江海生岐路，云霞入洞天。莫令千岁鹤，飞到草堂前。

卷 296_8 【寄中书李舍人】

张南史

昨宵凄断处，对月与临风。鹤病三江上，兰衰百草中。
题诗随谢客，饮酒寄黄翁。早岁心相待，还因贵贱同。

卷 296_9 【和崔中丞中秋月】

张南史

秋夜月偏明，西楼独有情。千家看露湿，万里觉天清。
映水金波动，衔山桂树生。不知飞鹤意，何用此时惊。

卷 296_10 【西陵怀灵一上人兼寄朱放】

张南史

淮海风涛起，江关忧思长。同悲鹊绕树，独坐雁随阳。
山晚云藏雪，汀寒月照霜。由来濯缨处，渔父爱沧浪。

卷 296_11【寄静虚上人云门】

张南史

寒日白云里，法侣自提携。竹径通城下，松门隔水西。
方同沃洲去，不自武陵迷。仿佛心疑处，高峰是会稽。

卷 296_12【送司空十四北游宋州】

张南史

九拒危城下，萧条送尔归。寒风吹画角，暮雪犯征衣。
道里犹成间，亲朋重与违。白云愁欲断，看入大梁飞。

卷 296_13【殷卿宅夜宴】

张南史

日暗城乌宿，天寒枥马嘶。词人留上客，妓女出中闺。

积雪连灯照，回廊映竹迷。太常今夜宴，谁不醉如泥。

卷 296_14 【宣城雪后还望郡中寄孟侍御(立春后开元观送强文学还京)】

张南史

腊后年华变，关西驿骑遥。塞鸿连暮雪，江柳动寒条。
山水还鄣郡，图书入汉朝。高楼非别处，故使百忧销。

卷 296_15 【独孤常州北亭】

张南史

北洫敞高明，凭轩见野情。朝回五马迹，更胜百花名。
海树凝烟远，湖田见鹤清。云光侵素壁，水影荡闲楹。
俗赖褰帷谒，人欢倒屣迎。始能崇结构，独有谢宣城。

卷 296_16 【早春书事奉寄中书李舍人】

张南史

儒服山东士，衡门洛下居。风尘游上路，简册委空庐。
戎马生郊日，贤人避地初。窜身初浩荡，投迹岂踌躇。

翠羽怜穷鸟，琼枝顾散樗。还令亲道术，倒欲混樵渔。
敝缁袍多补，飞蓬鬓少梳。诵诗陪贾谊，酌酒伴应璩。
鹤膝兵家备，鳧茨俭岁储。泊舟依野水，开径接园蔬。
暂阅新山泽，长怀故里闾。思贤乘朗月，览古到荒墟。
在竹惭充箭，为兰幸免锄。那堪闻相府，更遣诣公车。
蹇足终难进，颦眉竟未舒。事从因病止，生寄负恩馀。
不见神仙久，无由鄙吝祛。帝庭张礼乐，天阁绣簪裾。
日色浮青琐，香烟近玉除。神清王子敬，气逐马相如。
铜漏时常静，金门步转徐。唯看五字表，不记八行书。
宿昔投知己，周旋谢起予。只应高位隔，讵是故情疏。
为报周多士，须怜楚子虚。一身从弃置，四节苦居诸。
柳发三条陌，花飞六辅渠。灵盘浸沆瀣，龙首映储胥。
北海樽留客，西江水救鱼。长安同日远，不敢咏归欤。

卷 296_17【陆胜宅秋暮雨中探韵同作】

张南史

同人永日自相将，深竹闲园偶辟疆。已被秋风教忆鲙，
更闻寒雨劝飞觞。归心莫问三江水，旅服徒沾九日霜。
醉里欲寻骑马路，萧条几处有垂杨。

卷 296_18【春日道中寄孟侍御】

张南史

春来游子傍归路，时有白云遮独行。水流乱赴石潭响，
花开不知山树名。谁家鱼网求鲜食，几处人烟事火耕。
昨日已尝村酒熟，一杯思与孟嘉倾。

卷 296_19【江北春望赠皇甫补阙】

张南史

闲园柳绿井桃红，野径荒墟左右通。清迥独连江水北，
芳菲更似洛城东。时看雨歇人归岫，每觉潮来树起风。
闻道金门堪避世，何须身与海鸥同。

卷 296_20【酬张二仓曹杨子闲居见寄兼呈韩郎中左补阙皇甫冉】

张南史

孤云独鹤自悠悠，别后经年尚泊舟。渔父致词相借问，
仙郎能赋许依投。折芳远计三春草，乘兴闲看万里流。
莫怪杜门频乞假，不堪扶病拜龙楼。

卷 296_21【秋夜闻雁寄南十五兼呈空和尚（一作和空上人）】

张南史

晚节闻君道趣深，结茅栽树近东林。禅师几度曾摩顶，
高士何年更发心。北渚三更闻过雁，西城万木动寒砧。
不见支公与玄度，相思拥膝坐长吟。

卷 296_22【雪】

张南史

雪，雪。花片，玉屑。结阴风，凝暮节。高岭虚晶，
平原广洁。初从云外飘，还向空中噎。千门万户皆静，
兽炭皮裘自热。此时双舞洛阳人，谁悟郢中歌断绝。

卷 296_23【月】

张南史

月，月。暂盈，还缺。上虚空，生溟渤。散彩无际，
移轮不歇。桂殿入西秦，菱歌映南越。正看云雾秋卷，
莫待关山晓没。天涯地角不可寻，清光永夜何超忽。

卷 296_24【泉】

张南史

泉，泉。色净，苔鲜。石上激，云中悬。津流竹树，
脉乱山川。扣玉千声应，含风百道连。太液并归池上，
云阳旧出宫边。北陵井深凿不到，我欲添泪作潺湲。

卷 296_25【竹】

张南史

竹，竹。披山，连谷。出东南，殊草木。叶细枝劲，
霜停露宿。成林处处云，抽笋年年玉。天风乍起争韵，
池水相涵更绿。却寻庾信小园中，闲对数竿心自足。

卷 296_26【花】

张南史？

花，花。深浅，芬葩。凝为雪，错为霞。莺和蝶到，
苑占宫遮。已迷金谷路，频驻玉人车。芳草欲陵芳树，
东家半落西家。愿得春风相伴去，一攀一折向天涯。

卷 296_27【草】

张南史

草，草。折宜，看好。满地生，催人老。金殿玉砌，
荒城古道。青青千里遥，怅怅三春早。每逢南北离别，
乍逐东西倾倒。一身本是山中人，聊与王孙慰怀抱。

第二百九十七卷

卷 297_1【送人】

王建

白日向西没，黄河复东流。人生足著地，宁免四方游。
我行无返顾，祝子勿回头。当须向前去，何用起离忧。
但恐无广路，平地作山丘。令我车与马，欲疾反停留。
蜀客多积货，边人易封侯。男儿恋家乡，欢乐为仇雠。
丁宁相劝勉，苦口幸无尤。对面无相成，不如豺虎俦。
彼远不寄书，此寒莫寄裘。与君俱绝迹，两念无因由。

卷 297_2【主人故亭】

王建

主人昔专城，城南起高亭。贵与宾客游，工者夜不宁。
酒食宴圃人，栽接望早成。经年使家僮，远道求异英。
郡中暂闲暇，绕树引诸生。开泉浴山禽，为爱山中声。
世间事难保，一日各徂征。死生不相及，花落实方荣。
我来至此中，守吏非本名。重君昔为主，相与下马行。

旧岛日日摧，池水不复清。岂无后人赏，所贵手自营。
浇酒向所思，风起如有灵。此去不重来，重来伤我形。

卷 297_3【古从军】

王建

汉家逐单于，日没处河曲。浮云道旁起，行子车下宿。
枪城围鼓角，毡帐依山谷。马上悬壶浆，刀头分颊肉。
来时高堂上，父母亲结束。回面不见家，风吹破衣服。
金疮在肢节，相与拔箭镞。闻道西凉州，家家妇女哭。

卷 297_4【邯郸主人】

王建

远客无主人，夜投邯郸市。飞蛾绕残烛，半夜人醉起。
垆边酒家女，遗我绡绮被。合成双凤花，宛转不相离。
纵令颜色改，勿遣合欢异。一念始为难，万金谁足贵。
门前长安道，去者如流水。晨风群鸟翔，裴回别离此。

卷 297_5【泛水曲】

王建

载酒入烟浦，方舟泛绿波。子酌我复饮，子饮我还歌。
莲深微路通，峰曲幽气多。阅芳无留瞬，弄桂不停柯。
水上秋日鲜，西山碧峨峨。兹欢良可贵，谁复更来过。

卷 297_6【江南杂体二首】

王建

江上风飏飏，竹间湘水流。日夜桂花落，行人去悠悠。
复见离别处，虫声阴雨秋。

处处江草绿，行人发潇湘。潇湘回雁多，日夜思故乡。
春梦不知数，空山兰蕙芳。

卷 297_7【远征归】

王建

万里发辽阳，处处问家乡。回车不淹辙，雨雪满衣裳。
行见日月疾，坐思道路长。但令不征戍，暗镜生重光。

卷 297_8【思远人】

王建

妾思常悬悬，君行复绵绵。征途向何处，碧海与青天。
岁久自有念，谁令长在边。少年若不归，兰室如黄泉。

卷 297_9 【伤近者不见】

王建

离人隔中庭，幸不为远征。雕梁下有壁，闻语亦闻行。
天涯尚寄信，此处不传情。君能并照水，形影自分明。

卷 297_10 【元日早朝】

王建

大国礼乐备，万邦朝元正。东方色未动，冠剑门已盈。
帝居在蓬莱，肃肃钟漏清。将军领羽林，持戟巡宫城。
翠华皆宿陈，雪仗罗天兵。庭燎远煌煌，旗上日月明。
圣人龙火衣，寝殿开璇扃。龙楼横紫烟，宫女天中行。
六蕃倍位次，衣服各异形。举头看玉牌，不识宫殿名。
左右雉扇开，蹈舞分满庭。朝服带金玉，珊珊相触声。
泰阶备雅乐，九奏鸾凤鸣。裴回庆云中，竽磬寒铮铮。
三公再献寿，上帝锡永贞。天明告四方，群后保太平。

卷 297_11 【闻故人自征戍回】

王建

昔闻著征戍，三年一还乡。今来不换兵，须死在战场。
念子无气力，徒学事戎行。少年得生还，有同堕穹苍。
自去报尔家，再行上高堂。尔弟修废枿，尔母缝新裳。
恍恍恐不真，犹未苦承望。每日空出城，畏渴携壶浆。
安得缩地经，忽使在我傍。亦知远行劳，人悴马玄黄。
慎莫多停留，苦我居者肠。

卷 297_12【七泉寺上方】

王建

长年好名山，本性今得从。回看尘迹遥，稍见麋鹿踪。
老僧云中居，石门青重重。阴泉养成龟，古壁飞却龙。
扫石礼新经，悬幡上高峰。日夕猿鸟合，觅食听山钟。
将火寻远泉，煮茶傍寒松。晚随收药人，便宿南涧中。
晨起冲露行，湿花枝茸茸。归依向禅师，愿作香火翁。

卷 297_13【从元太守夏宴西楼】

王建

六月晨亦热，卑居多烦昏。五马游西城，几杖随朱轮。
西楼临方塘，嘉木当华轩。鳧鹭满中流，有酒复盈尊。

山东地无山，平视大海垠。高风凉气来，灏景沈清源。
青衿俨坐傍，礼容益敦敦。愿为颜氏徒，歌咏夫子门。

卷 297_14 【酬柏侍御闻与韦处士同游灵台寺见寄】

王建

西域传中说，灵台属雍州。有泉皆圣迹，有石皆佛头。
所出薝卜香，外国俗来求。毒蛇护其下，樵者不可偷。
古碑在云巅，备载置寺由。魏家移下来，后人始增修。
近与韦处士，爱此山之幽。各自具所需，竹笼盛茶瓯。
牵马过危栈，褰衣涉奔流。草开平路尽，林下大石稠。
过郭转经峰，忽见东西楼。瀑布当寺门，迸落衣裳秋。
石苔铺紫花，溪叶裁碧油。松根载殿高，飘飘仙山浮。
县中贤大夫，一月前此游。赛神贺得雨，岂暇多停留。
二十韵新诗，远寄寻山俦。清泠玉涧泣，冷切石磬愁。
君名高难闲，余身愚终休。相将长无因，从今生离忧。

卷 297_15 【荆南赠别李肇著作转韵诗】

王建

辉天复耀地，再为歌咏始。素传学道徒，清门有君子。
文润泻潺潺，德峰来垒垒。两京二十年，投食公卿间。
封章既不下，故旧多惭颜。卖马市耕牛，却归湘浦山。

麦收蚕上簇，衣食应丰足。碧涧伴僧禅，秋山对雨宿。
且欢身体适，幸免纓组束。上宰镇荆州，敬重同岁游。
欢逢通世友，简授画戎筹。迟迟就公食，怆怆别野裘。
主人开宴席，礼数无形迹。醉笑或颠吟，发谈皆损益。
临觞理芳鲜，升堂引宾客。早岁慕嘉名，远思今始平。
孔门忝同辙，潘馆幸诸甥。自知再婚娶，岂望为亲情。
欣欣还切切，又二千里别。楚笔防寄书，蜀茶忧远热。
关山足重叠，会合何时节。莫叹各从军，且愁岐路分。
美人停玉指，离瑟不中闻。争向巴山夜，猿声满碧云。

卷 297_16【早发金堤驿】

王建

虫声四野合，月色满城白。家家闭户眠，行人发孤驿。
离家尚苦热，衣服唯轻绌。时节忽复迁，秋风彻经脉。
人睡落堑辙，马惊入芦荻。慰远时问程，惊昏忽摇策。
从军岂云乐，忧患常萦积。唯愿在贫家，团圆过朝夕。

卷 297_17【和裴相公道中赠别张相公】

王建

云间双凤鸣，一去一归城。鞍马朝天色，封章恋阙情。
日临宫树高，烟盖沙草平。会当戎事息，联影绕池行。

卷 297_18【和钱舍人水植诗】

王建

盆里盛野泉，晚鲜幽更好。初活草根浮，重生荷叶小。
多时水马出，尽日蜻蜓绕。朝早独来看，冷星沈碧晓。

卷 297_19【题寿安南馆】

王建

明蒙竹间亭，天暖幽桂碧。云生四面山，水接当阶石。
湿树浴鸟痕，破苔卧鹿迹。不缘尘驾触，堪作商皓宅。

卷 297_20【送张籍归江东】

王建

清泉浣尘缁，灵药释昏狂。君诗发大雅，正气回我肠。
复令五彩姿，洁白归天常。昔岁同讲道，青襟在师傍。
出处两相因，如彼衣与裳。行行成此归，离我适咸阳。
失意未还家，马蹄尽四方。访余咏新文，不倦道路长。
僮仆怀昔念，亦如还故乡。相亲惜昼夜，寝息不异床。
犹将在远道，忽忽起思量。黄金未为壘，无以挹酒浆。

所念俱贫贱，安得相发扬。回车远归省，旧宅江南厢。
归乡非得意，但贵情义彰。五月天气热，波涛毒于汤。
慎勿多饮酒，药膳愿自强。

卷 297_21【励学】

王建？

买地不肥实，其繁系耕凿。良田少锄理，兰焦香亦薄。
勿以听者迷，故使宫徵错。谁言三岁童，还能分善恶。
孜孜日求益，犹恐业未博。况我性顽蒙，复不勤修学。
有如朝暮食，暂亏忧陨获。若使无六经，贤愚何所托。

卷 297_22【山中寄及第故人】

王建

长长南山松，短短北涧杨。俱承日月照，幸免斤斧伤。
去年与子别，诚言暂还乡。如何弃我去，天路忽腾骧。
谁谓有双目，识貌不识肠。岂知心内乖，著我薜萝裳。
寻君向前事，不叹今异翔。往往空室中，寤寐说珪璋。
十年居此溪，松桂日苍苍。自从无佳人，山中不辉光。
尽弃所留药，亦焚旧草堂。还君誓已书，归我学仙方。
既为参与辰，各愿不相望。始终名利途，慎勿罹咎殃。

卷 297_23【求友】

王建

鉴形须明镜，疗疾须良医。若无傍人见，形疾安自知。
世路薄言行，学成弃其师。每怀一饭恩，不重劝勉词。
敦学既不诚，朋友道日亏。遂作名利交，四海争奔驰。
常慕正直人，生死不相离。苟能成我身，甘与僮仆随。
我言彼当信，彼道我无疑。针药及病源，以石投深池。
终朝举善道，敬爱当行之。纵令误所见，亦贵本相规。
不求立名声，所贵去瑕疵。各愿贻子孙，永为后世资。

卷 297_24【寄李益少监兼送张实游幽州】

王建

大雅废已久，人伦失其常。天若不生君，谁复为文纲。
迷者得道路，溺者遇舟航。国风人已变，山泽增辉光。
星辰有其位，岂合离帝傍。贤人既遐征，凤鸟安来翔。
少小慕高名，所念隔山冈。集卷新纸封，每读常焚香。
古来难自达，取鉴在贤良。未为知音故，徒恨名不彰。
谅无金石坚，性命岂能长。常恐一世中，不上君子堂。
伟哉清河子，少年志坚强。筐中有素文，千里求发扬。
自顾音韵乖，无因合宫商。幸君达精诚，为我求回章。

卷 297_25【寄崔列中丞】

王建

火山无冷地，浊流无清源。人生在艰世，何处避谗言。
诸侯镇九州，天子开四门。尚有忠义士，不得申其冤。
嘉木移远植，为我当行轩。君子居要途，易失主人恩。
我爱古人道，师君直且温。贪泉誓不饮，邪路誓不奔。
如何非冈坂，故使车轮翻。妓妾随他人，家事幸获存。
当时门前客，默默空冤烦。从今遇明代，善恶亦须论。
莫以曾见疑，直道遂不敦。

卷 297_26【喻时】

王建

去者如弊帷，来者如新衣。鲜华非久长，色落还弃遗。
讵知行者天，岂悟壮者衰。区区未死间，回面相是非。
好闻苦不乐，好视忽生疵。乃明万物情，皆逐人心移。
古今尽如此，达士将何为。

卷 297_27【赠王侍御】

王建

愚者昧邪正，贵将平道行。君子抱仁义，不惧天地倾。
三受主人辟，方出咸阳城。迟疑匪自崇，将显求贤名。
自来掌军书，无不尽臣诚。何必操白刃，始致海内平。
恭事四海人，甚于敬公卿。有恶如己辱，闻善如己荣。
或人居饥寒，进退陈中情。彻晏听苦辛，坐卧身不宁。
以心应所求，尽家犹为轻。衣食有亲疏，但恐逾礼经。
我今愿求益，讵敢为友生。幸君扬素风，永作来者程。

卷 297_28【宋氏五女（若芬五女：若华、若昭、若伦、若宪、若茵）】

王建

五女誓终养，贞孝内自持。兔丝自萦纆，不上青松枝。
晨昏在亲傍，闲则读书诗。自得圣人心，不因儒者知。
少年绝音华，贵绝父母词。素钗垂两髦，短窄古时衣。
行成闻四方，征诏环珮随。同时入皇宫，联影步玉墀。
乡中尚其风，重为修茅茨。圣朝有良史，将此为女师。

卷 297_29【送于丹移家洛州】

王建

忆昔门馆前，君当童子年。今来见成长，俱过远所传。
诗礼不外学，兄弟相攻研。如彼贩海翁，岂种溪中田。

四方尚尔文，独我敬尔贤。但爱金玉声，不贵金玉坚。
孤遗一室中，寝食不相捐。饱如肠胃同，疾苦肤体连。
耕者求沃土，沤者求深源。彼邦君子居，一日可徂迁。
念此居处近，各为衣食牵。从今不见面，犹胜异山川。
既乖欢会期，郁郁两难宣。素琴苦无徽，安得宫商全。
他皆缓别日，我愿促行轩。送人莫长歌，长歌离恨延。
羸马不知去，过门常盘旋。会当为尔邻，有地容一泉。

卷 297_30 【留别舍弟】

王建

孤贱相长育，未曾为远游。谁不重欢爱，晨昏阙珍羞。
出门念衣单，草木当穷秋。非疾有忧叹，实为人子尤。
世情本难合，对面隔山丘。况复干戈地，懦夫何所投。
与尔俱长成，尚为沟壑忧。岂非轻岁月，少小不勤修。
从今解思量，勉力谋善猷。但得成尔身，衣食宁我求。
固合受此训，堕慢为身羞。岁暮当归来，慎莫怀远游。

卷 297_31 【坏屋】

王建

官家有坏屋，居者愿离得。苟或幸其迁，回循任倾侧。
若当君子住，一日还修饰。必使换榱桷，先须木端直。

永令雀与鼠，无处求栖息。坚固传后人，从今勉劳力。
以兹喻臣下，亦可成邦国。虽曰愚者词，将来幸无惑。

卷 297_32【送薛蔓应举】

王建

四海重贡献，珠赆称至珍。圣朝开礼闱，所贵集嘉宾。
若生在世间，此路出常伦。一士登甲科，九族光彩新。
憧憧车马徒，争路长安尘。万目视高天，升者得苦辛。
况子当少年，丈人在咸秦。出门见宫阙，献赋侍朱轮。
有贤大国丰，无子一家贫。男儿富邦家，岂为荣其身。
煌煌文明代，俱幸生此辰。自顾非国风，难以合圣人。
子去东堂上，我归南涧滨。愿君勤作书，与我山中邻。

卷?????【将归故山留别杜侍御】?

王建

有川不得涉，有路不得行。沈沈百忧中，一日如一生。
错来干诸侯，石田废春耕。虎戟卫重门，何因达中诚。
日月俱照辉，山川异阴晴。如何百里间，开目不见明。
我今归故山，誓与草木并。愿君去丘坂，长使道路平。

卷 297_34【送韦处士老舅】

王建

忆昨痴小年，不知有经籍。常随童子游，多向外家剧。
偷花入邻里，弄笔书墙壁。照水学梳头，应门未穿帻。
人前赏文性，梨果蒙不惜。赋字咏新泉，探题得幽石。
自从出关辅，三十年作客。风雨一飘飏，亲情多阻隔。
如何二千里，尘土驱蹇瘠。良久陈苦辛，从头叹衰白。
既来今又去，暂笑还成戚。落日动征车，春风卷离席。
云台观西路，华岳祠前柏。会得过帝乡，重寻旧行迹。

卷 297_35【送同学故人】

王建

各为四方人，此地同事师。业成有先后，不得长相随。
出林多道路，缘冈复绕陂。念君辛苦行，令我形体疲。
黄叶堕车前，四散当此时。亭上夜萧索，山风水离离。

卷 297_36【幽州送申稷评事归平卢】

王建

行子绕天北，山高塞复深。升堂展客礼，临水濯缨襟。
驱驰戎地马，聚散林间禽。一杯泻东流，各愿无异心。
蓟亭虽苦寒，春夕勿重衾。从军任白头，莫卖故山岑。

卷 297_37 【温门山】

王建

早入温门山，群峰乱如戟。崩崖欲相触，呀豁断行迹。
脱屣寻浅流，定足畏欹石。路尽十里溪，地多千岁柏。
洞门昼阴黑，深处惟石壁。似见丹砂光，亦闻钟乳滴。
灵池出山底，沸水冲地脉。暖气成湿烟，濛濛窗中白。
随僧入古寺，便是云外客。月出天气凉，夜钟山寂寂。

卷 297_38 【代故人新姬侍疾】

王建

双毂不回辙，子疾已在旁。侍坐长摇扇，迎医渐下床。
新施箱中幔，未洗来时妆。奉君缠绵意，幸愿莫相忘。

卷 297_39 【采桑】

王建

鸟鸣桑叶间，绿条复柔柔。攀看去手近，放下长长钩。
黄花盖野田，白马少年游。所念岂回顾，良人在高楼。

卷 297_40 【晓思】

王建

晓气生绿水，春条露霏霏。林间栖鸟散，远念征人起。
幽花宿含彩，早蝶寒弄翅。君行非晨风，讵能从门至。

卷 297_41 【早起】

王建

回灯正衣裳，出户星未稀。堂前候姑起，环珮生晨辉。
暗池光晷历，密树花葳蕤。九城钟漏绝，遥听直郎归。

卷 297_42 【酬张十八病中寄诗】

王建

本性慵远行，绵绵病自生。见君绸缪思，慰我寂寞情。
风幌夜不掩，秋灯照雨明。彼愁此又忆，一夕两盈盈。

第二百九十八卷

卷 298_1【凉州行】

王建

凉州四边沙皓皓，汉家无人开旧道。边头州县尽胡兵，
将军别筑防秋城。万里人家皆已没，年年旌节发西京。
多来中国收妇女，一半生男为汉语。蕃人旧日不耕犁，
相学如今种禾黍。驱羊亦著锦为衣，为惜毡裘防斗时。
养蚕缲茧成匹帛，那堪绕帐作旌旗。城头山鸡鸣角角，
洛阳家家学胡乐。

卷 298_2【寒食行】

王建

寒食家家出古城，老人看屋少年行。丘垄年年无旧道，
车徒散行入衰草。牧儿驱牛下冢头，畏有家人来洒扫。
远人无坟水头祭，还引妇姑望乡拜。三日无火烧纸钱，
纸钱那得到黄泉。但看垄上无新土，此中白骨应无主。

卷 298_3 【促刺词（一作促促行）】

王建

促刺复促刺，水中无鱼山无石。少年虽嫁不得归，
头白犹著父母衣。田边旧宅非所有，我身不及逐鸡飞。
出门若有归死处，猛虎当衢向前去。百年不遣踏君门，
在家谁唤为新妇。岂不见他邻舍娘，嫁来常在舅姑傍。

卷 298_4 【垄头水】

王建

垄水何年垄头别，不在山中亦呜咽。征人塞耳马不行，
未到垄头闻水声。谓是西流入蒲海，还闻北去绕龙城。
垄东垄西多屈曲，野麋饮水长簇簇。胡兵夜回水旁住，
忆著来时磨剑处。向前无井复无泉，放马回看垄头树。

卷 298_5 【北邙行（一作北邙山）】

王建

北邙山头少闲土，尽是洛阳人旧墓。旧墓人家归葬多，
堆著黄金无买处。天涯悠悠葬日促，冈坂崎岖不停轂。

高张素幕绕铭旌，夜唱挽歌山下宿。洛阳城北复城东，
魂车祖马长相逢。车辙广若长安路，蒿草少于松柏树。
涧底盘陀石渐稀，尽向坟前作羊虎。谁家石碑文字灭，
后人重取书年月。朝朝车马送葬回，还起大宅与高台。

卷 298_6 【温泉宫行】

王建

十月一日天子来，青绳御路无尘埃。宫前内里汤各别，
每个白玉芙蓉开。朝元阁向山上起，城绕青山龙暖水。
夜开金殿看星河，宫女知更月明里。武皇得仙王母去，
山鸡昼鸣宫中树。温泉泱泱出宫流，宫使年年修玉楼。
禁兵去尽无射猎，日西麋鹿登城头。梨园弟子偷曲谱，
头白人间教歌舞。

卷 298_7 【春词】

王建

红烟满户日照梁，天丝软弱虫飞扬。菱花霍霍绕帷光，
美人对镜著衣裳。庭中并种相思树，夜夜还栖双凤凰。

卷 298_8 【辽东行】

王建

辽东万里辽水曲，古戍无城复无屋。黄云盖地雪作山，
不惜黄金买衣服。战回各自收弓箭，正西回面家乡远。
年年郡县送征人，将与辽东作丘坂。宁为草木乡中生，
有身不向辽东行。

卷 298_9【塞上梅】

王建

天山路傍一株梅，年年花发黄云下。昭君已歿汉使回，
前后征人惟系马。日夜风吹满陇头，还随陇水东西流。
此花若近长安路，九衢年少无攀处。

卷 298_10【戴胜词】

王建

戴胜谁与尔为名，木中作窠墙上鸣。声声催我急种谷，
人家向田不归宿。紫冠采采褐羽斑，衔得蜻蜓飞过屋。
可怜白鹭满绿池，不如戴胜知天时。

卷 298_11【秋千词】

王建

长长丝绳紫复碧，袅袅横枝高百尺。少年儿女重秋千，
盘巾结带分两边。身轻裙薄易生力，双手向空如鸟翼。
下来立定重系衣，复畏斜风高不得。傍人送上那足贵，
终赌鸣珰斗自起。回回若与高树齐，头上宝钗从堕地。
眼前争胜难为休，足踏平地看始愁。

卷 298_12【开池得古钗】

王建

美人开池北堂下，拾得宝钗金未化。凤凰半在双股齐，
钿花落处生黄泥。当时堕地觅不得，暗想窗中还夜啼。
可知将来对夫婿，镜前学梳古时髻。莫言至死亦不遗，
还似前人初得时。

卷 298_13【赛神曲】

王建

男抱琵琶女作舞，主人再拜听神语。新妇上酒勿辞勤，
使尔舅姑无所苦。椒浆湛湛桂座新，一双长箭系红巾。
但愿牛羊满家宅，十月报赛南山神。青天无风水复碧，
龙马上鞍牛服轭。纷纷醉舞蹈衣裳，把酒路旁劝行客。

卷 298_14 【田家留客】

王建

人家少能留我屋，客有新浆马有粟。远行僮仆应苦饥，
新妇厨中炊欲熟。不嫌田家破门户，蚕房新泥无风土。
行人但饮莫畏贫。明府上来何苦辛。丁宁回语屋中妻，
有客勿令儿夜啼。双冢直西有县路，我教丁男送君去。

卷 298_15 【精卫词】

王建

精卫谁教尔填海，海边石子青磊磊。但得海水作枯池，
海中鱼龙何所为。口穿岂为空衔石，山中草木无全枝。
朝在树头暮海里，飞多羽折时堕水。高山未尽海未平，
愿我身死子还生。

卷 298_16 【老妇叹镜】

王建

嫁时明镜老犹在，黄金镂画双凤背。忆昔咸阳初买来，
灯前自绣芙蓉带。十年不开一片铁，长向暗中梳白发。

今日后床重照看，生死终当此长别。

卷 298_17【望夫石】

王建

望夫处，江悠悠。化为石，不回头。
上头日日风复雨，行人归来石应语。

卷 298_18【别鹤曲】

王建

主人一去池水绝，池鹤散飞不相别。青天漫漫碧水重，
知向何山风雪中。万里虽然音影在，两心终是死生同。
池边巢破松树死，树头年年乌生子。

卷 298_19【乌栖曲】

王建

章华宫人夜上楼，君王望月西山头。
夜深宫殿门不锁，白露满山山叶堕。

卷 298_20 【雉将雏】

王建

雉咿喔，雏出𪔐。毛斑斑，觜啄啄。学飞未得一尺高，
还逐母行旋母脚。麦垄浅浅难蔽身，远去恋雏低怕人。
时时土中鼓两翅，引雏拾虫不相离。

卷 298_21 【白紵歌二首】

王建

天河漫漫北斗璨，宫中乌啼知夜半。新缝白紵舞衣成，
来迟邀得吴王迎。低鬟转面掩双袖。玉钗浮动秋风生。
酒多夜长夜未晓，月明灯光两相照。后庭歌声更窈窕。

馆娃宫中春日暮，荔枝木瓜花满树。城头乌栖休击鼓，
青娥弹瑟白紵舞。夜天曈曈不见星，宫中火照西江明。
美人醉起无次第，堕钗遗珮满中庭。此时但愿可君意，
回昼为宵亦不寐。年年奉君君莫弃。

卷 298_22 【短歌行】

王建

人初生，日初出。上山迟，下山疾。百年三万六千朝，
夜里分将强半日。有歌有舞须早为，昨日健于今日时。
人家见生男女好，不知男女催人老。短歌行，无乐声。

卷 298_23【饮马长城窟】

王建

长城窟，长城窟边多马骨。古来此地无井泉，
赖得秦家筑城卒。征人饮马愁不回，长城变作望乡堆。
蹄踪未干人去近，续后马来泥污尽。枕弓睡著待水生，
不见阴山在前阵。马蹄足脱装马头，健儿战死谁封侯。

卷 298_24【乌夜啼】

王建

庭树乌，尔何不向别处栖，夜夜夜半当户啼。
家人把烛出洞户，惊栖失群飞落树。一飞直欲飞上天。
回回不离旧栖处。未明重绕主人屋，欲下空中黑相触。
风飘雨湿亦不移，君家树头多好枝。

卷 298_25【簇蚕辞】

王建

蚕欲老，箔头作茧丝皓皓。场宽地高风日多，
不向中庭燃蒿草。神蚕急作莫悠扬，年来为尔祭神桑。
但得青天不下雨，上无苍蝇下无鼠。新妇拜簇愿茧稠，
女洒桃浆男打鼓。三日开箔雪团团，先将新茧送县官。
已闻乡里催织作，去与谁人身上著。

卷 298_9【渡辽水】

王建

渡辽水，此去咸阳五千里。来时父母知隔生，
重著衣裳如送死。亦有白骨归咸阳，营家各与题本乡。
身在应无回渡日，驻马相看辽水傍。

卷 298_10【空城雀】

王建

空城雀，何不飞来人家住，空城无人种禾黍。
土间生子草间长，满地蓬蒿幸无主。近村虽有高树枝，
雨中无食长苦饥。八月小儿挟弓箭，家家畏向田头飞。
但能不出空城里，秋时百草皆有子。报言黄口莫啾啾，
长尔得成无横死。

卷 298_11【水运行】

王建

西江运船立红帜，万棹千帆绕江水。去年六月无稻苗，
已说水乡人饿死。县官部船日算程，暴风恶雨亦不停。
在生有乐当有苦，三年作官一年行。坏舟畏鼠复畏漏，
恐向太仓折升斗。辛勤耕种非毒药，看著不入农夫口。
用尽百金不为费，但得一金即为利。远征海稻供边食，
岂如多种边头地。

卷 298_12【当窗织】

王建

叹息复叹息，园中有枣行人食。贫家女为富家织。
翁母隔墙不得力。水寒手涩丝脆断，续来续去心肠烂。
草虫促促机下啼，两日催成一匹半。输官上顶有零落，
姑未得衣身不著。当窗却羡青楼倡，十指不动衣盈箱。

卷 298_13【失钗怨】

王建

贫女铜钗惜于玉，失却来寻一日哭。嫁时女伴与作妆，
头戴此钗如凤凰。双杯行酒六亲喜，我家新妇宜拜堂。
镜中乍无失髻样，初起犹疑在床上。高楼翠钿飘舞尘，
明日从头一遍新。

卷 298_14【春燕词】

王建

新燕新燕何不定，东家绿池西家井。飞鸣当户影悠扬，
一绕檐头一绕梁。黄姑说向新妇女，去年堕子污衣箱。
已能辞山复过海，幸我堂前故巢在。求食慎勿爱高飞，
空中饥鸢为尔害。辛勤作窠在画梁，愿得年年主人富。

卷 298_15【主人故池】

王建

高池高阁上连起，荷叶团团盖秋水。
主人已远凉风生，旧客不来芙蓉死。

卷 298_16【古宫怨】

王建

乳乌哑哑飞复啼，城头晨夕宫中栖。
吴王别殿绕江水，后宫不开美人死。

卷 298_17 【关山月】

王建

关山月，营开道白前军发。冻轮当碛光悠悠，
照见三堆两堆骨。边风割面天欲明，金沙岭西看看没。

卷 298_18 【赠离曲】

王建

合欢叶堕梧桐秋，鸳鸯背飞水分流。少年使我忽相弃。
雌号雄鸣夜悠悠。夜长月没虫切切，冷风入房灯焰灭。
若知中路各西东，彼此不忘同心结。收取头边蛟龙枕，
留著箱中双雉裳。我今焚却旧房物，免使他人登尔床。

卷 298_19 【宛转词】

王建

宛宛转转胜上纱，红红绿绿苑中花。

纷纷泊泊夜飞鸦，寂寂寞寞离人家。

卷 298_20【水夫谣】

王建

苦哉生长当驿边，官家使我牵驿船。辛苦日多乐日少，
水宿沙行如海鸟。逆风上水万斛重，前驿迢迢后淼淼。
半夜缘堤雪和雨，受他驱遣还复去。衣寒衣湿披短蓑，
臆穿足裂忍痛何。到明辛苦无处说，齐声腾踏牵船出。
一间茆屋何所直，父母之乡去不得。我愿此水作平田，
长使水夫不怨天。

卷 298_21【田家行】

王建

男声欣欣女颜悦，人家不怨言语别。五月虽热麦风清，
檐头索索缲车鸣。野蚕作茧人不取，叶间扑扑秋蛾生。
麦收上场绢在轴，的知输得官家足。不望入口复上身，
且免向城卖黄犊。回家衣食无厚薄，不见县门身即乐。

卷 298_22【去妇】

王建

新妇去年胼手足，衣不暇缝蚕废簇。白头使我忧家事，
还如夜里烧残烛。当初为取傍人语，岂道如今自辛苦。
在时纵嫌织绢迟，有丝不上邻家机。

卷 298_23 【神树词】

王建

我家家西老棠树，须晴即晴雨即雨。四时八节上杯盘，
愿神莫离神处所。男不着丁女在舍，官事上下无言语。
老身长健树婆娑，万岁千年作神主。

卷 298_24 【祝鹄】

王建

神鹄神鹄好言语，行人早回多利赂。
我今庭中栽好树，与汝作巢当报汝。

卷 298_25 【古谣】

王建

一东一西垄头水，一聚一散天边霞。
一来一去道上客，一颠一倒池中麻。

卷 298_26 【公无渡河】

王建

渡头恶天两岸远，波涛塞川如叠坂。幸无白刃驱向前，
何用将身自弃捐。蛟龙啖骨鱼食血，黄泥直下无青天。
男儿纵轻妇人语，惜君性命还须取。妇人无力挽断衣，
舟沈身死悔难追。公无渡河，公须自为。

卷 298_27 【海人谣】

王建

海人无家海里住，采珠役象为岁赋。
恶波横天山寨路，未央宫中常满库。

卷 298_28 【行见月】

王建

月初生，居人见月一月行。行行一年十二月，

强半马上看盈缺。百年欢乐能几何，在家见少行见多。
不缘衣食相驱遣，此身谁愿长奔波。筐中有帛仓有粟，
岂向天涯走碌碌。家人见月望我归，正是道上思家时。

卷 298_29【七夕曲】

王建

河边独自看星宿，夜织天丝难接续。抛梭振镊动明珰，
为有秋期眠不足。遥愁今夜河水隔，龙驾车辕鹊填石。
流苏翠帐星渚间，环珮无声灯寂寂。两情缠绵忽如故。
复畏秋风生晓路。幸回郎意且斯须，一年中别今始初。
明星未出少停车。

卷 298_30【两头纤纤】

王建

两头纤纤青玉玦，半白半黑头上发。
逼逼仆仆春冰裂，磊磊落落桃花结。

卷 298_31【独漉歌】

王建

独独漉漉，鼠食猫肉。乌日中，鹤露宿。黄河水直人心曲。

卷 298_32【寄远曲】

王建？

美人别来无处所，巫山月明湘江雨。千回相见不分明，
井底看星梦中语。两心相对尚难知，何况万里不相疑。

卷 298_33【伤韦令孔雀词】

王建

可怜孔雀初得时，美人为尔别开池。池边凤凰作伴侣，
羌声鹦鹉无言语。雕笼玉架嫌不栖，夜夜思归向南舞。
如今憔悴人见恶，万里更求新孔雀。热眠雨水饥拾虫，
翠尾盘泥金彩落。多时人养不解飞，海山风黑何处归。

卷 298_34【伤邻家鹦鹉词】

王建

东家小女不惜钱，买得鹦鹉独自怜。自从死却家中女，
无人更共鹦鹉语。十日不饮一滴浆，泪渍绿毛头似鼠。

舌关哑咽畜哀怨，开笼放飞离人眼。短声亦绝翠臆翻，
新墓崔嵬旧巢远。此禽有志女有灵，定为连理相并生。

卷 298_35【春来曲】

王建

春欲来，每日望春门早开。黄衫白马带尘土，
逢著探春人却回。御堤内园晓过急，九衢大宅家家入。
青帝少女染桃花，露妆初出红犹湿。光风噉噉蝶宛宛，
绕树气匝枝柯软。可怜寒食街中郎，早起著得单衣裳。
少年即见春好处，似我白头无好树。

卷 298_36【春去曲】

王建

春已去，花亦不知春去处。缘冈绕涧却归来，
百回看著无花树。就中一夜东风恶，收红拾紫无遗落。
老夫不比少年儿，不中数与春别离。

卷 298_37【东征行】

王建

桐柏水西贼星落，梟雏夜飞林木恶。相国刻日波涛清，
当朝自请东南征。舍人为宾侍郎副，晓觉蓬莱欠珮声。
玉阶舞蹈谢旌节，生死向前山可穴。同时赐马并赐衣，
御楼看带弓刀发。马前猛士三百人，金书左右红旗新。
司庖常膳皆得对，好事将军封尔身。男儿生杀在手里，
营门老将皆忧死。曈曈白日当南山，不立功名终不还。

卷 298_38 【荆门行】

王建

江边行人暮悠悠，山头殊未见荆州。岷亭西南路多曲，
栎林深深石镵镵。看炊红米煮白鱼，夜向鸡鸣店家宿。
南中三月蚊蚋生，黄昏不闻人语声。生纱帷疏薄如雾，
隔衣嚙肤耳边鸣。欲明不待灯火起，唤得官船过蛮水。
女儿停客茆屋新，开门扫地桐花里。犬声扑扑寒溪烟，
人家烧竹种山田。巴云欲雨薰石热，麋鹿度江虫出穴。
大蛇过处一山腥，野牛惊跳双角折。斜分汉水横千山，
山青水绿荆门关。向前问个长沙路，旧是屈原沈溺处。
谁家丹旌已南来，逢著流人从此去。月明山鸟多不栖，
下枝飞上高枝啼。主人念远心不悵，罗衫卧对章台夕。
红烛交横各自归，酒醒还是他乡客。壮年留滞尚思家，
况复白头在天涯。

卷 298_39 【镜听词】

王建

重重摩挲嫁时镜，夫婿远行凭镜听。回身不遣别人知，
人意丁宁镜神圣。怀中收拾双锦带，恐畏街头见惊怪。
嗟嗟穠穠下堂阶，独自灶前来跪拜。出门愿不闻悲哀，
郎在任郎回未回。月明地上人过尽，好语多同皆道来。
卷帷上床喜不定。与郎裁衣失翻正。可中三日得相见，
重绣锦囊磨镜面。

卷 298_40【行宫词】

王建

上阳宫到蓬莱殿，行宫岩岩遥相见。向前天子行幸多，
马蹄车辙山川遍。当时州县每年修，皆留内人看玉案。
禁兵夺得明堂后，长闭桃源与绮绣。开元歌舞古草头，
梁州乐人世嫌旧。官家乏人作宫户，不泥宫墙斫宫树。
两边仗屋半崩摧，夜火入林烧殿柱。休封中岳六十年，
行宫不见人眼穿。

卷 298_41【羽林行】

王建

长安恶少出名字，楼下劫商楼上醉。天明下直明光宫，

散入五陵松柏中。百回杀人身合死，赦书尚有收城功。
九衢一日消息定，乡吏籍中重改姓。出来依旧属羽林，
立在殿前射飞禽。

卷 298_42【射虎行】

王建

自去射虎得虎归，官差射虎得虎迟。独行以死当虎命，
两人因疑终不定。朝朝暮暮空手回，山下绿苗成道径。
远立不敢污箭镞，闻死还来分虎肉。惜留猛虎著深山，
射杀恐畏终身闲。

卷 298_43【远将归】

王建

远将归，胜未别离时。在家相见熟，新归欢不足。
去愿车轮迟，回思马蹄速。但令在舍相对贫，
不向天涯金绕身。

卷 298_44【寻橦歌】

王建

人间百戏皆可学，寻橦不比诸馀乐。重梳短髻下金钿，
红帽青巾各一边。身轻足捷胜男子，绕竿四面争先缘。
习多倚附欹竿滑，上下踟蹰皆著袜。翻身垂颈欲落地，
却住把腰初似歇。大竿百夫擎不起，袅袅半在青云里。
纤腰女儿不动容，戴行直舞一曲终。回头但觉人眼见，
矜难恐畏天无风。险中更险何曾失，山鼠悬头猿挂膝。
小垂一手当舞盘，斜惨双蛾看落日。斯须改变曲解新，
贵欲欢他平地人。散时满面生颜色，行步依前无气力。

卷 298_45【铜雀台】

王建

娇爱更何日，高台空数层。含啼映双袖，不忍看西陵。
漳水东流无复来，百花辇路为苍苔。青楼月夜长寂寞，
碧云日暮空裴回。君不见邺中万事非昔时，
古人不在今人悲。春风不逐君王去，草色年年旧宫路。
宫中歌舞已浮云，空指行人往来处。

卷 298_46【鸡鸣曲】

王建

鸡初鸣，明星照东屋；鸡再鸣，红霞生海腹。
百官待漏双阙前，圣人亦挂山龙服。宝钗命妇灯下起，

环珮玲珑晓光里。直内初烧玉案香，司更尚滴铜壶水。
金吾卫里直郎妻，到明不睡听晨鸡。天头日月相送迎，
夜栖旦鸣人不迷。

卷 298_47【送衣曲】

王建

去秋送衣渡黄河，今秋送衣上陇坂。妇人不知道径处，
但问新移军近远。半年著道经雨湿，开笼见风衣领急。
旧来十月初点衣，与郎著向营中集。絮时厚厚绵纂纂，
贵欲征人身上暖。愿身莫著裹尸归，愿妾不死长送衣。

卷 298_48【斜路行】

王建

世间娶容非娶妇，中庭牡丹胜松树。九衢大道人不行，
走马奔车逐斜路。斜路行熟直路荒，东西岂是横太行。
南楼弹弦北户舞，行人到此多回徨。头白如丝面如茧，
亦学少年行不返。纵令自解思故乡，轮折蹄穿白日晚。
谁将古曲换斜音，回取行人斜路心。

卷 298_49【织锦曲】

王建

大女身为织锦户，名在县家供进簿。长头起样呈作官，
闻道官家中苦难。回花侧叶与人别，唯恐秋天丝线干。
红缕葳蕤紫茸软，蝶飞参差花宛转。一梭声尽重一梭，
玉腕不停罗袖卷。窗中夜久睡髻偏，横钗欲堕垂著肩。
合衣卧时参没后，停灯起在鸡鸣前。一匹千金亦不卖，
限日未成宫里怪。锦江水涸贡转多，宫中尽著单丝罗。
莫言山积无尽日，百尺高楼一曲歌。

卷 298_50【捣衣曲（一作送衣曲）】

王建

月明中庭捣衣石，掩帷下堂来捣帛。妇姑相对神力生，
双揎白腕调杵声。高楼敲玉节会成，家家不睡皆起听。
秋天丁丁复冻冻，玉钗低昂衣带动。夜深月落冷如刀，
湿著一双纤手痛。回编易裂看生熟，鸳鸯纹成水波曲。
重烧熨斗帖两头，与郎裁作迎寒裘。

卷 298_51【秋夜曲二首】

王建

天清漏长霜泊泊，兰绿收荣桂膏涸。高楼云鬟弄婵娟，

古瑟暗断秋风弦。玉关遥隔万里道，金刀不剪双泪泉。
香囊火死香气少，向帷合眼何时晓。城乌作营啼野月，
秦州少妇生离别。

秋灯向壁掩洞房，良人此夜直明光。
天河悠悠漏水长，南楼北斗两相当。

卷 298_52 【题台州隐静寺】

王建

隐静灵仙寺天凿，杯度飞来建岩壑。五峰直上插银河，
一涧当空泻寥廓。崆峒黯淡碧琉璃，白云吞吐红莲阁。
不知势压天几重，钟声常闻月中落。

第二百九十九卷

卷 299_1【送人游塞】

王建

初晴天堕丝，晚色上春枝。城下路分处，边头人去时。
停车数行日，劝酒问回期。亦是茫茫客，还从此别离。

卷 299_2【塞上逢故人】

王建

百战一身在，相逢白发生。何时得乡信，每日算归程。
走马登寒垄，驱羊入废城。羌笳三两曲，人醉海西营。

卷 299_3【南中】

王建

天南多鸟声，州县半无城。野市依蛮姓，山村逐水名。

瘴烟沙上起，阴火雨中生。独有求珠客，年年入海行。

卷 299_4【汴路水驿】

王建

晚泊水边驿，柳塘初起风。蛙鸣蒲叶下，鱼入稻花中。
去舍已云远，问程犹向东。近来多怨别，不与少年同。

卷 299_5【淮南使回留别窦侍御】

王建

恋恋春恨结，绵绵淮草深。病身愁至夜，远道畏逢阴。
忽逐酒杯会，暂同风景心。从今一分散，还是晓枝禽。

卷 299_6【汴路即事】

王建

千里河烟直，青槐夹岸长。天涯同此路，人语各殊方。
草市迎江货，津桥税海商。回看故宫柳，憔悴不成行。

卷 299_7 【山居】

王建

屋在瀑泉西，茅檐下有溪。闭门留野鹿，分食养山鸡。
桂熟长收子，兰生不作畦。初开洞中路，深处转松梯。

卷 299_8 【醉后忆山中故人（一作故人山中）】

王建

花开草复秋，云水自悠悠。因醉暂无事，在山难免愁。
遇晴须看月，斗健且登楼。暗想山中伴，如今尽白头。

卷 299_9 【送流人】

王建

见说长沙去，无亲亦共愁。阴云鬼门夜，寒雨瘴江秋。
水国山魈引，蛮乡洞主留。渐看归处远，垂白住炎州。

卷 299_10 【贫居】

王建

眼底贫家计，多时总莫嫌。蠹生腾药纸，字暗换书签。
避雨拾黄叶，遮风下黑帘。近来身不健，时就六壬占。

卷 299_11【过赵居士拟置草堂处所】

王建

休师竹林北，空可两三间。虽爱独居好，终来相伴闲。
犹嫌近前树，为碍看南山。的有深耕处，春初须早还。

卷 299_12【新开望山处】

王建

新开望山处，今朝减病眠。应移千里道，犹自数峰偏。
故欲遮春巷，还来绕暮天。老夫行步弱，免到寺门前。

卷 299_13【题东华观】

王建

路尽烟水外，院门题上清。鹤雏灵解语，琼叶软无声。

白发道心熟，黄衣仙骨轻。寂寥虚境里，何处觅长生。

卷 299_14 【饭僧】

王建

别屋炊香饭，薰辛不入家。温泉调葛面，净手摘藤花。
蒲鲊除青叶，芹齏带紫芽。愿师常伴食，消气有姜茶。

卷 299_15 【照镜】

王建

忽自见憔悴，壮年人亦疑。发缘多病落，力为不行衰。
暖手揉双目，看图引四肢。老来真爱道，所恨觉还迟。

卷 299_16 【归昭应留别城中】

王建

喜得近京城，官卑意亦荣。并床欢未定，离室思还生。
计拙偷闲住，经过买日行。如无自来分，一驿是遥程。

卷 299_17【答寄芙蓉冠子】

王建

一学芙蓉叶，初开映水幽。虽经小儿手，不称老夫头。
枕上眠常戴，风前醉恐柔。明年有闺阁，此样必难求。

卷 299_18【长安春游】

王建

骑马傍闲坊，新衣著雨香。桃花红粉醉，柳树白云狂。
不觉愁春去，何曾得日长。牡丹相次发，城里又须忙。

卷 299_19【冬夜感怀】

王建

晚年恩爱少，耳目静于僧。竟夜不闻语，空房唯有灯。
气噓寒被湿，霜入破窗凝。断得人间事，长如此亦能。

卷 299_20【初到昭应呈同僚】

王建

白发初为吏，有惭年少郎。自知身上拙，不称世间忙。
秋雨悬墙绿，暮山宫树黄。同官若容许，长借老僧房。

卷 299_21【县丞厅即事】

王建

宫殿半山上，人家高下居。古厅眠受魇，老吏语多虚。
雨水洗荒竹，溪沙填废渠。圣朝收外府，皆自九天除。

卷 299_22【闲居即事】

王建

老病贪光景，寻常不下帘。妻愁耽酒僻，人怪考诗严。
小婢偷红纸，娇儿弄白髭。有时看旧卷，未免意中嫌。

卷 299_23【林居】

王建

荒林四面通，门在野田中。顽仆长如客，贫居未胜蓬。

旧绵衣不暖，新草屋多风。唯去山南近，闲亲贩药翁。

卷 299_24 【原上新居十三首】

王建

新占原头地，本无山可归。荒藤生叶晚，老杏著花稀。
厨舍近泥灶，家人初饱薇。弟兄今四散，何日更相依。

一家榆柳新，四面远无邻。人少愁闻病，庄孤幸得贫。
耕牛长愿饱，樵仆每怜勤。终日忧衣食，何由脱此身。

长安无旧识，百里是天涯。寂寞思逢客，荒凉喜见花。
访僧求贱药，将马中豪家。乍得新蔬菜，朝盘忽觉奢。

鸡鸣村舍遥，花发亦萧条。野竹初生笋，溪田未得苗。
家贫僮仆瘦，春冷菜蔬焦。甘分长如此，无名在圣朝。

春来梨枣尽，啼哭小儿饥。邻富鸡常去，庄贫客渐稀。
借牛耕地晚，卖树纳钱迟。墙下当官路，依山补竹篱。

自扫一间房，唯铺独卧床。野羹溪菜滑，山纸水苔香。
陈药初和白，新经未入黄。近来心力少，休读养生方。

拟作读经人，空房置净巾。锁茶藤篋密，曝药竹床新。
老病应随业，因缘不离身。焚香向居士，无计出诸尘。

移家近住村，贫苦自安存。细问梨果植，远求花药根。
倩人开废井，趁犊入新园。长爱当山立，黄昏不闭门。

和暖绕林行，新贫足喜声。扫渠忧竹旱，浇地引兰生。
山客凭栽树，家僮使入城。门前粉壁上，书著县官名。

住处钟鼓外，免争当路桥。身闲时却困，儿病可来娇。
鸡睡日阳暖，蜂狂花艳烧。长安足门户，叠叠看登朝。

近来年纪到，世事总无心。古碣凭人拓，闲诗任客吟。
送经还野苑，移石入幽林。谷口春风恶，梨花盖地深。

懒更学诸馀，林中扫地居。腻衣穿不洗，白发短慵梳。
苦相常多泪，劳生自悟虚。闲行人事绝，亲故亦无书。

住处去山近，傍园麋鹿行。野桑穿井长，荒竹过墙生。
新识邻里面，未谙村社情。石田无力及，贱赁与人耕。

卷 299_25 【送李评事使蜀】

王建

劝酒不依巡，明朝万里人。转江云栈细，近驿板桥新。
石冷啼猿影，松昏戏鹿尘。少年为客好，况是益州春。

卷 299_26 【新修道居】

王建

世间无所入，学道处新成。两面有山色，六时闻磬声。
闲加经遍数，老爱字分明。若得离烦恼，焚香过一生。

卷 299_27 【赠洪誓师】

王建

老僧真古画，闲坐语中听。识病方书圣，谙山草木灵。
人来多施药，愿满不持经。相伴寻溪竹，秋苔袜履青。

卷 299_28 【题法云禅院僧】

王建

不剃头多日，禅来白发长。合村迎住寺，同学乞修房。
觉少持经力，忧无养病粮。上山犹得在，自解衲衣裳。

卷 299_29 【赠溪翁】

王建

溪田借四邻，不省解忧身。看日和仙药，书符救病人。
伴僧斋过夏，中酒卧经旬。应得丹砂力，春来黑发新。

卷 299_30【谢李续主簿】

王建

馆舍幸相近，因风及病身。一官虽隔水，四韵是同人。
衰卧朦胧晓，贫居冷落春。少年无不好，莫恨满头尘。

卷 299_31【寒食（一作张籍诗）】

王建

田舍清明日，家家出火迟。白衫眠古巷，红索搭高枝。
纱带生难结，铜钗重欲垂。斩新衣踏尽，还似去年时。

卷 299_32【贻小尼师】

王建

新剃青头发，生来未扫眉。身轻礼拜稳，心慢记经迟。

唤起犹侵晓，催斋已过时。春晴阶下立，私地弄花枝。

卷 299_33【惜欢】

王建

当欢须且欢，过后买应难。岁去停灯守，花开把火看。
狂来欺酒浅，愁尽觉天宽。次第头皆白，齐年人已残。

卷 299_34【山中惜花】

王建

忽看花渐稀，罪过酒醒时。寻觅风来处，惊张夜落时。
游丝缠故蕊，宿夜守空枝。开取当轩地，年年树底期。

卷 299_35【和武门下伤韦令孔雀】

王建

孤号秋阁阴，韦令在时禽。觅伴海山黑，思乡橘柚深。
举头闻旧曲，顾尾惜残金。憔悴不飞去，重君池上心。

卷 299_36 【题所赁宅牡丹花】

王建

赁宅得花饶，初开恐是妖。粉光深紫膩，肉色退红娇。
且愿风留著，惟愁日炙焦。可怜零落蕊，收取作香烧。

卷 299_37 【隐者居】

王建

山人住处高，看日上蟠桃。雪缕青山脉，云生白鹤毛。
朱书护身咒，水噉断邪刀。何物中长食，胡麻慢火熬。

卷 299_38 【昭应官舍】

王建

绕厅春草合，知道县家闲。行见雨遮院，卧看人上山。
避风新浴后，请假未醒间。朝客轻卑吏，从他不往还。

卷 299_39 【送严大夫赴桂州】

王建

岭头分界候，一半属湘潭。水驿门旗出，山恋洞主参。
辟邪犀角重，解酒荔枝甘。莫叹京华远，安南更有南。

卷 299_40【望行人】

王建

自从江树秋，日日望江楼。梦见离珠浦，书来在桂州。
不同鱼比目，终恨水分流。久不开明镜，多应是白头。

卷 299_41【塞上】

王建

漫漫复凄凄，黄沙暮渐迷。人当故乡立，马过旧营嘶。
断雁逢冰碛，回军占雪溪。夜来山下哭，应是送降奚。

卷 299_42【杜中丞书院新移小竹】

王建

此地本无竹，远从山寺移。经年求养法，隔日记浇时。

嫩绿卷新叶，残黄收故枝。色经寒不动，声与静相宜。
爱护出常数，稀稠看自知。贫来缘未有，客散独行迟。

卷 299_43【同于汝锡赏白牡丹】

王建

晓日花初吐，春寒白未凝。月光裁不得，苏合点难胜。
柔腻于云叶，新鲜掩鹤膺。统心黄倒晕，侧茎紫重棱。
乍敛看如睡，初开问欲应。并香幽蕙死，比艳美人憎。
价数千金贵，形相两眼疼。自知颜色好，愁被彩光凌。

卷 299_44【送吴郎中赴忠州】

王建

西台复南省，清白上天知。家每因穷散，官多为直移。
遥边过驿近，买药出城迟。朝野凭人别，亲情伴酒悲。
故园愁去后，白发想回时。何处忠州界，山头卓望旗。

卷 299_45【照镜】

王建

终日自缠绕，此身无适缘。万愁生旅夜，百病凑衰年。
少睡憎明屋，慵行待暖天。痒头梳有虱，风耳炙闻蝉。
摇白方多错，回金法不全。家贫何所恋，时在老僧边。

卷 299_46【秋日送杜虔州】

王建

忆得宿新宅，别来馀蕙香。初闻守郡远，一日卧空床。
野驿烟火湿，路人消息狂。山楼添鼓角，村栅立旗枪。
晚渚露荷败，早衙风桂凉。谢家章句出，江月少辉光。

卷 299_47【送郑权尚书南海】

王建

七郡双旌贵，人皆不忆回。戍头龙脑铺，关口象牙堆。
敕设薰炉出，蛮辞咒节开。市喧山贼破，金贱海船来。
白氎家家织，红蕉处处栽。已将身报国，莫起望乡台。

卷 299_48【题别遗爱草堂兼呈李十使君（李十亦尝隐庐山白鹿洞）】

王建

曾住炉峰下，书堂对药台。斩新萝径合，依旧竹窗开。
砌水亲看决，池荷手自栽。五年方暂至，一宿又须回。
纵未长归得，犹胜不到来。君家白鹿洞，闻道亦生苔。

卷 299_49【赏牡丹】

王建

此花名价别，开艳益皇都。香遍苓菱死，红烧踯躅枯。
软光笼细脉，妖色暖鲜肤。满蕊攒黄粉，含棱缕绛苏。
好和薰御服，堪画入宫图。晚态愁新妇，残妆望病夫。
教人知个数，留客赏斯须。一夜轻风起，千金买亦无。

第三百卷

卷 300_1【赠王枢密】

王建

三朝行坐镇相随，今上春宫见小时。脱下御衣先赐著，
进来龙马每教骑。长承密旨归家少，独奏边机出殿迟。
自是姓同亲向说，九重争得外人知。

卷 300_2【早秋过龙武李将军书斋】

王建

高树蝉声秋巷里，朱门冷静似闲居。重装墨画数茎竹，
长著香薰一架书。语笑侍儿知礼数，吟哦野客任狂疏。
就中爱读英雄传，欲立功勋恐不如。

卷 300_3【江陵即事】

王建

瘴云梅雨不成泥，十里津楼压大堤。蜀女下沙迎水客，
巴童傍驿卖山鸡。寺多红药烧人眼，地足青苔染马蹄。
夜半独眠愁在远，北看归路隔蛮溪。

卷 300_4【题花子赠渭州陈判官】

王建

膩如云母轻如粉，艳胜香黄薄胜蝉。点绿斜蒿新叶嫩，
添红石竹晚花鲜。鸳鸯比翼人初帖，蛱蝶重飞样未传。
况复萧郎有情思，可怜春日镜台前。

卷 300_5【送从侄拟赴江陵少尹】

王建

江陵少尹好闲官，亲故皆来劝自宽。无事日长贫不易，
有才年少屈终难。沙头欲买红螺盏，渡口多呈白角盘。
应向章华台下醉，莫冲云雨夜深寒。

卷 300_6【华清宫感旧】

王建

尘到朝元边使急，千官夜发六龙回。辇前月照罗衫泪，
马上风吹蜡烛灰。公主妆楼金锁涩，贵妃汤殿玉莲开。
有时云外闻天乐，知是先皇沐浴来。

卷 300_7【九仙公主旧庄】

王建

仙居五里外门西，石路亲回御马蹄。天使来栽宫里树，
罗衣自买院前溪。野牛行傍浇花井，本主分将灌药畦。
楼上凤凰飞去后，白云红叶属山鸡。

卷 300_8【郭家溪亭】

王建

高亭望见长安树，春草冈西旧院斜。光动绿烟遮岸竹，
粉开红艳塞溪花。野泉闻洗亲王马，古柳曾停贵主车。
妆阁书楼倾侧尽，云山新卖与官家。

卷 300_9【题金家竹溪】

王建

少年因病离天仗，乞得归家自养身。买断竹溪无别主，
散分泉水与新邻。山头鹿下长惊犬，池面鱼行不怕人。
乡使到来常款语，还闻世上有功臣。

卷 300_10【题应圣观（观即李林甫旧宅）】

王建

精思堂上画三身，回作仙宫度美人。赐额御书金字贵，
行香天乐羽衣新。空廊鸟啄花砖缝，小殿虫缘玉像尘。
头白女冠犹说得，蔷薇不似已前春。

卷 300_11【同于汝锡游降圣观】

王建

秦时桃树满山坡，骑鹿先生降大罗。路尽溪头逢地少，
门连内里见天多。荒泉坏简朱砂暗，古塔残经篆字讹。
闻说开元斋醮日，晓移行漏帝亲过。

卷 300_12【逍遥翁溪亭】

王建

逍遥翁在此裴回，帝改溪名起石台。车马到春常借问，
子孙因选暂归来，稀疏野竹人移折，零落蕉花雨打开。
无主青山何所直，卖供官税不如灰。

卷 300_13【寻李山人不遇】

王建

山客长须少在时，溪中放鹤洞中棋。生金有气寻还远，
仙药成窠见即移。莫为无家陪寺食，应缘将米寄人炊。
从头石上留名去，独向南峰问老师。

卷 300_14【题石瓮寺】

王建

青崖白石夹城东，泉脉钟声内里通。地压龙蛇山色别，
屋连宫殿匠名同。檐灯经夏纱笼黑，溪叶先秋腊树红。
天子亲题诗总在，画扉长锁碧龕中。

卷 300_15【早登西禅寺阁】

王建

上方台殿第三层，朝壁红窗日气凝。烟雾开时分远寺，
山川晴处见崇陵。沙湾漾水图新粉，绿野荒阡晕色缁。
莫说城南月灯阁，自诸楼看总难胜。

卷 300_16【题江寺兼求药子】

王建

隋朝旧寺楚江头，深谢师僧引客游。空赏野花无过夜，
若看琪树即须秋。红珠落地求谁与，青角垂阶自不收。
愿乞野人三两粒，归家将助小庭幽。

卷 300_17【题诜法师院】

王建

三年说戒龙宫里，巡礼还来向水行。多爱贫穷人远请，
长修破落寺先成。秋天盆底新荷色，夜地房前小竹声。
僧院不求诸处好，转经唯有一窗明。

卷 300_18【酬于汝锡晓雪见寄】

王建

欲明天色白漫漫，打叶穿帘雪未干。薄落阶前人踏尽，
差池树里鸟衔残。旋销迎暖沾墙少，斜舞遮春到地难。
劳动更裁新样绮，红灯一夜剪刀寒。

卷 300_19【从军后寄山中友人】

王建

爱仙无药住溪贫，脱却山衣事汉臣。夜半听鸡梳白发，
天明走马入红尘。村童近去嫌腥食，野鹤高飞避俗人。
劳动先生远相示，别来弓箭不离身。

卷 300_20【寄汴州令狐相公】

王建

三军江口拥双旌，虎帐长开自教兵。机锁恶徒狂寇尽，
恩驱老将壮心生。水门向晚茶商闹，桥市通宵酒客行。
秋日梁王池阁好，新歌散入管弦声。

卷 300_21【别李赞侍御】

王建

同受艰难骠骑营，半年中听揭枪声。草头送酒驱村乐，
贼里看花著探兵。讲易工夫寻已圣，说诗门户别来情。
荐书自入无消息，卖尽寒衣却出城。

卷 300_22【和蒋学士新授章服】

王建

五色箱中绛服春，笏花成就白鱼新。看宣赐处惊回眼，
著谢恩时便称身。瑞草唯承天上露，红鸾不受世间尘。
翰林同贺文章出，惊动茫茫下界人。

卷 300_23【岁晚自感】

王建

人皆欲得长年少，无那排门白发催。一向破除愁不尽，
百方回避老须来。草堂未办终须置，松树难成亦且栽。
沥酒愿从今日后，更逢二十度花开。

卷 300_24【昭应官舍】

王建

痴顽终日美人闲，却喜因官得近山。斜对寺楼分寂寂，
远从溪路借潺潺。眇身多病唯亲药，空院无钱不要关。
文案把来看未会，虽书一字甚惭颜。

卷 300_25【寄旧山僧】

王建

因依老宿发心初，半学修心半读书。雪后每常同席卧，
花时未省两山居。猎人箭底求伤雁，钓户竿头乞活鱼。
一向风尘取烦恼，不知衰病日难除。

卷 300_26【武陵春日】

王建

寻春何事却悲凉，春到他乡忆故乡。秦女洞桃欹涧碧，
楚王堤柳舞烟黄。波涛入梦家山远，名利关身客路长。
不似冥心叩尘寂，玉编金轴有仙方。

卷 300_27【寄分司张郎中】

王建

一别京华年岁久，卷中多见岭南诗。声名已压众人上，
愁思未平双鬓知。江郡迁移犹远地，仙官荣宠是分司。
青天白日当头上，会有求闲不得时。

卷 300_28【上武元衡相公】

王建

旌旗坐镇蜀江雄，帝命重开旧閤崇。褒贬唐书天历上，
捧持尧日庆云中。孤情迥出鸾皇远，健思潜搜海岳空。
长得萧何为国相，自西流水尽朝宗。

卷 300_29【上张弘靖相公】

王建

传封三世尽河东，家占中条第一峰。旱岁天教作霖雨，
明时帝用补山龙。草开旧路沙痕在，日照新池凤迹重。
卑散自知霄汉隔，若为门下赐从容。

卷 300_30【上裴度舍人】

王建

小松双对凤池开，履迹衣香逼上台。天意皆从彩毫出，
宸心尽向紫烟来。非时玉案呈宣旨，每日金阶谢赐回。
仙侣何因记名姓，县丞头白走尘埃。

卷 300_31【上杜元颖相公】

王建

学士金銮殿后居，天中行坐侍龙舆。承恩不许离床谢，
密诏常教倚案书。马上唤遮红觜鸭，船头看钓赤鳞鱼。
闲曹散吏无相识，犹记荆州拜谒初。

卷 300_32【赠卢汀谏议】

王建

青蛾不得在床前，空室焚香独自眠。功证诗篇离景象，
药成官位属神仙。闲过寺观长冲夜，立送封章直上天。
近见兰台诸吏说，御诗新集未教传。

卷 300_33【贺杨巨源博士拜虞部员外】

王建

合归兰署已多时，上得金梯亦未迟。两省郎官开道路，
九州山泽属曹司。诸生拜别收书卷，旧客看来读制词。
残著几丸仙药在，分张还遣病夫知。

卷 300_34【赠郭将军】

王建

承恩新拜上将军，当直巡更近五云。天下表章经院过，
宫中语笑隔墙闻。密封计策非时奏，别赐衣裳到处薰。
向晚临阶看号簿，眼前风景任支分。

卷 300_35【赠田将军】

王建

初从学院别先生，便领偏师得战名。大小独当三百阵，
纵横只用五千兵。回残匹帛归天库，分好旌旗入禁营。
自执金吾长上直，蓬莱宫里夜巡更。

卷 300_36【赠胡证将军】

王建

书生难得是金吾，近日登科记总无。半夜进雉当玉殿，
未明排仗到铜壶。朱牌面上分官契，黄纸头边押敕符。
恐要蕃中新道路，指挥重画五城图。

卷 300_37 【留别田尚书】

王建

拟报平生未杀身，难离门馆起居频。不看匣里钗头古，
犹恋机中锦样新。一旦甘为漳岸老，全家却作杜陵人。
朝天路在骊山下，专望红旗拜旧尘。

卷 300_38 【送唐大夫罢节归山】

王建

年少平戎老学仙，表求骸骨乞生全。不堪腰下悬金印，
已向云西寄玉田。旄节抱归官路上，公卿送到国门前。
人间鸡犬同时去，遥听笙歌隔水烟。

卷 300_39 【送司空神童】

王建

杏花坛上授书时，不废中庭趁蝶飞。暗写五经收部秩，
初年七岁著衫衣。秋堂白发先生别，古巷青襟旧伴归。
独向凤城持荐表，万人丛里有光辉。

卷 300_40【送振武张尚书】

王建

回天转地是将军，扶助春宫上五云。抚背恩虽同骨肉，
拥旄名未敌功勋。尽收壮勇填兵数，不向蕃浑夺马群。
闲即单于台下猎，威声直到海西闻。

卷 300_41【送吴谏议上饶州】

王建

鄱阳太守是真人，琴在床头箴在身。曾向先皇边谏事，
还应上帝处称臣。养生自有年支药，税户应停月进银。
净扫水堂无侍女，下街唯共鹤殷勤。

卷 300_42【赠阎少保】

王建

髭须虽白体轻健，九十三来却少年。问事爱知天宝里，
识人皆是武皇前。玉装剑佩身长带，绢写方书子不传。
侍女常时教合药，亦闻私地学求仙。

卷 300_43【送魏州李相公】

王建

百代功勋一日成，三年五度换双旌。闲来不对人论战，
难处长先自请行。旗下可闻诛败将，阵头多是用降兵。
当朝面受新恩去，算料妖星不敢生。

卷 300_44【赠索暹将军】

王建

浑身著箭瘢犹在，万槊千刀总过来。轮剑直冲生马队，
抽旗旋踏死人堆。闻休斗战心还痒，见说烟尘眼即开。
泪滴先皇阶下土，南衙班里趁朝回。

卷 300_45【赠王屋道士赴诏】

王建

玉皇符诏下天坛，玳瑁头簪白角冠。鹤遣院中童子养，
鹿凭山下老人看。法成不怕刀枪利，体实常欺石榻寒。
能断世间腥血味，长生只要一丸丹。

卷 300_46【赠王处士】

王建

松树当轩雪满池，青山掩障碧纱幮。鼠来案上常偷水，
鹤在床前亦看棋。道士写将行气法，家童授与步虚词。
世间有似君应少，便乞从今作我师。

卷 300_47【洛中张籍新居】

王建

最是城中闲静处，更回门向寺前开。云山且喜重重见，
亲故应须得得来。借倩学生排药合，留连处士乞松栽。
自君移到无多日，墙上人名满绿苔。

卷 300_48【题裴处士碧虚溪居】

王建

鸟声真似深山里，平地人间自不同。春圃紫芹长卓卓，
暖泉青草一丛丛。松台前后花皆别，竹崦高低水尽通。
细问来时从近远，溪名载入县图中。

卷 300_49【送阿史那将军安西迎旧使灵柩（一作送史将军）】

王建

汉家都护边头没，旧将麻衣万里迎。阴地背行山下火，
风天错到碛西城。单于送葬还垂泪，部曲招魂亦道名。
却入杜陵秋巷里，路人来去读铭旌。

卷 300_50【赠崔礼驸马】

王建

凤凰楼阁连宫树，天子崔郎自爱贫。金埒减添栽药地，
玉鞭平与卖书人。家中弦管听常少，分外诗篇看即新。
一月一回陪内宴，马蹄犹厌踏香尘。

卷 300_51【赠太清卢道士】

王建

上清道士未升天，南岳中华作散仙。书卖八分通字学，
丹烧九转定人年。修行近日形如鹤，导引多时骨似绵。
想向诸山寻礼遍，却回还守老君前。

卷 300_52【送宫人入道】

王建

休梳丛鬓洗红妆，头戴芙蓉出未央。弟子抄将歌遍叠，
宫人分散舞衣裳。问师初得经中字，入静犹烧内里香。
发愿蓬莱见王母，却归人世施仙方。

卷 300_53【上李吉甫相公】

王建

圣朝齐贺说逢殷，霄汉无云日月真。金鼎调和天膳美，
瑶池沐浴赐衣新。两河开地山川正，四海休兵造化仁。
曾向山东为散吏，当今奚宪是贤臣。

卷 300_54【上李益庶子】

王建

紫烟楼阁碧纱亭，上界诗仙独自行。奇险驱回还寂寞，
云山经用始鲜明。藕绡纹缕裁来滑，镜水波涛滤得清。
昏思愿因秋露洗，幸容阶下礼先生。

卷 300_55【题元郎中新宅】

王建

近移松树初栽药，经帙书签一切新。铺设暖房迎道士，
支分闲院著医人。买来高石虽然贵，入得朱门未免贫。
惟有好诗名字出，倍教年少损心神。

卷 300_56【初授太府丞言怀】

王建

除书亦下属微班，唤作官曹便不闲。检案事多关市井，
听人言志在云山。病童唤著唯行慢，老马鞭多转放顽。
此去仙宫无一里，遥看松树众家攀。

卷 300_57【赠李愬仆射】

王建

唐州将士死生同，尽逐双旌旧镇空。独破淮西功业大，
新除陇右世家雄。知时每笑论兵法，识势还轻立战功。
次第各分茅土贵，殊勋并在一门中。

卷 300_58【书赠旧浑二曹长】

王建

二年同在华清下，入县门中最近邻。替饮觥筹知户小，
助成书屋见家贫。夜棋临散停分客，朝浴先回各送人。
僮仆使来传语熟，至今行酒校殷勤。

卷 300_59【上崔相公】

王建

枯桂衰兰一遍春，唯将道德定君臣。施行圣泽山川润，
图画天文彩色新。开阁覆看祥瑞历，封名直进薜萝人。
应怜老病无知己，自别溪中满鬓尘。

卷 300_60【寄杨十二秘书】

王建

初移古寺正南方，静是浮山远是庄。人定犹行背街鼓，
月高还去打僧房。新诗欲写中朝满，旧卷常抄外国将。
闲出天门醉骑马，可怜蓬阁秘书郎。

卷 300_61【谢田赞善见寄】

王建

五侯三任未相称，头白如丝作县丞。错判符曹群吏笑，
乱书岩石一山憎。自知酒病衰肠怯，遥怕春残百鸟凌。
年少力生犹不敌，况加憔悴闷腾腾。

卷 300_62【晚秋病中】

王建

万事风吹过耳轮，贫儿活计亦曾闻。偶逢新语书红叶，
难得闲人话白云。霜下野花浑著地，寒来溪鸟不成群。
病多体痛无心力，更被头边药气熏。

卷 300_63【薛二十池亭】

王建

每个树边消一日，绕池行匝又须行。异花多是非时有，
好竹皆当要处生。斜竖小桥看岛势，远移山石作泉声。
浮萍著岸风吹歇，水面无尘晚更清。

卷 300_64【故梁国公主池亭】

王建

平阳池馆枕秦川，门锁南山一朵烟。素柰花开西子面，
绿榆枝散沈郎钱。装檐玳瑁随风落，傍岸鸂鶒逐暖眠。
寂寞空馀歌舞地，玉箫声绝凤归天。

卷 300_65【题柱国寺】

王建

皇帝施钱修此院，半居天上半人间。丹梯暗出三重阁，
古像斜开一面山。松柏自穿空地少，川原不税小僧闲。
行香天使长相续，早起离城日午还。

卷 300_66【昭应官舍书事】

王建

县在华清宫北面，晓看楼殿正相当。庆云出处依时报，
御果呈来每度尝。腊月近汤泉不冻，夏天临渭屋多凉。
两衙早被官拘束，登阁巡溪亦属忙。

卷 300_67【昭应李郎中见贻佳作次韵奉酬】

王建

窗户风凉四面开，陶公爱晚上高台。中庭不热青山入，
野水初晴白鸟来。精思道心缘境熟，粗疏文字见诗回。
诸生围绕新篇读，玉阙仙官少此才。

卷 300_68【闲说】

王建

桃花百叶不成春，鹤寿千年也未神。秦陇州缘鹦鹉贵，
王侯家为牡丹贫。歌头舞遍回回别，鬓样眉心日日新。
鼓动六街骑马出，相逢总是学狂人。

卷 300_69【自伤】

王建

衰门海内几多人，满眼公卿总不亲。
四授官资元七品，再经婚娶尚单身。
图书亦为频移尽，兄弟还因数散贫。
独自在家长似客，黄昏哭向野田春。

卷 300_70【田侍中宴席】

王建

香熏罗幕暖成烟，火照中庭烛满筵。
整顿舞衣呈玉腕，动摇歌扇露金钿。
青蛾侧座调双管，彩凤斜飞入五弦。
虽是沂公门下客，争将肉眼看云天。

卷 300_71【寒食日看花】

王建

早入公门到夜归，不因寒食少闲时。
颠狂绕树猿离锁，跳踯缘冈马断羁。
酒污衣裳从客笑，醉饶言语觅花知。
老来自喜身无事，仰面西园得咏诗。

卷 300_72【和少府崔卿微雪早朝】

王建

蓬莱春雪晓犹残，点地成花绕百官。已傍祥鸾迷殿角，
还穿瑞草入袍襕。无多白玉阶前湿，积渐青松叶上干。
粉画南山棱郭出，初晴一半隔云看。

卷 300_73【和胡将军寓直】

王建

宫鸦栖定禁枪攒，楼殿深严月色寒。进状直穿金戟槊，
探更先傍玉钩栏。漏传五点班初合，鼓动三声仗已端。
遥见正南宣不坐，新栽松树唤人看。

卷 300_74【春日五门西望】

王建

百官朝下五门西。尘起春风过玉堤。黄帕盖鞍呈了马，
红罗系项斗回鸡。馆松枝重墙头出，御柳条长水面齐。
唯有教坊南草绿，古苔阴地冷凄凄。

卷 300_75【长安早春】

王建

霏霏漠漠绕皇州，销雪欺寒不自由。先向红妆添晓梦，
争来白发送新愁。暖催衣上缝罗胜，晴报窗中点彩球。
每度暗来还暗去，今年须遣蝶迟留。

卷 300_76【早春病中】

王建

日日春风阶下起，不吹光彩上寒株。师教绛服襞衰月，
妻许青衣侍病夫。健羨人家多力子，祈求道士有神符。
世间方法从谁问，卧处还看药草图。

卷 300_77【上阳宫】

王建

上阳花木不曾秋，洛水穿宫处处流。画阁红楼宫女笑，
玉箫金管路人愁。幔城入涧橙花发，玉辇登山桂叶稠。
曾读列仙王母传，九天未胜此中游。

卷 300_78【李处士故居】

王建

露浓烟重草萋萋，树映阑干柳拂堤。一院落花无客醉，
半窗残月有莺啼。芳筵想像情难尽，故榭荒凉路欲迷。
风景宛然人自改，却经门外马频嘶。

卷 300_79【寄贾岛（一作张籍赠项斯诗）】

王建

尽日吟诗坐忍饥，万人中觅似君稀。僮眠冷榻朝犹卧。
驴放秋田夜不归。傍暖旋收红落叶，觉寒犹著旧生衣。
曲江池畔时时到，为爱鸬鹚雨后飞。

卷 300_80【村居即事】

王建

休看小字大书名，向日持经眼却明。时过无心求富贵，
身闲不梦见公卿。因寻寺里薰辛断，自别城中礼数生。
斜月照房新睡觉，西峰半夜鹤来声。

卷 300_81【维扬冬末寄幕中二从事】

王建

江上数株桑枣树，自从离乱更荒凉。那堪旅馆经残腊，
只把空书寄故乡。典尽客衣三尺雪，炼精诗句一头霜。
故人多在芙蓉幕，应笑孜孜道未光。

卷 300_82【寄杜侍御】

王建

何须服药觅升天，粉阁为郎即是仙。买宅但幽从索价，
栽松取活不争钱。退朝寺里寻荒塔，经宿城南看野泉。
道气清凝分晓爽，诗情冷瘦滴秋鲜。学通儒释三千卷，
身拥旌旗二十年。春巷偶过同户饮，暖窗时与对床眠。
破除心力缘书癖，伤瘦花枝为酒颠。今日总来归圣代，
丈人先达幸相怜。

卷 300_83【寄上韩愈侍郎】

王建

重登大学领儒流，学浪词锋压九州。不以雄名疏野贱，
唯将直气折王侯。咏伤松桂青山瘦，取尽珠玑碧海愁。
叙述异篇经总别，鞭驱险句最先投。碑文合遣贞魂谢，
史笔应令谄骨羞。清俸探将还酒债，黄金旋得起书楼。
参来拟设官人礼，朝退多逢月阁游。见说云泉求住处，
若无知荐一生休。

卷 300_84 【赠华州郑大夫】

王建

此官出入凤池头，通化门前第一州。少华山云当驿起，
小敷溪水入城流。空闲地内人初满，词讼牌前草渐稠。
报状拆开知足雨，赦书宣过喜无囚。自来不说双旌贵，
恐替长教百姓愁。公退晚凉无一事，步行携客上南楼。

卷 300_85 【寄贺田侍中东平功成】

王建

使回高品满城传，亲见沂公在阵前。百里旗幡冲即断，
两重衣甲射皆穿。探知点检兵应怯，算得新移栅未坚。
营被数惊乘势破，将经频败遂生全。密招残寇防人觉，
遥斩元凶恐自专。首让诸军无敢近，功归部曲不争先。
开通州县斜连海，交割山河直到燕。战马散驱还逐草，
肉牛齐散却耕田。府中独拜将军贵，门下兼分宰相权。
唐史上头功第一，春风双节好朝天。

卷 300_86 【送裴相公上太原】

王建

还携堂印向并州，将相兼权是武侯。时难独当天下事，
功成却进手中筹。再三陈乞垆烟里，前后封章玉案头。
朱架早朝立剑戟，绿槐残雨看张油。遥知塞雁从今好，
直得渔阳已北愁。边铺警巡旗尽换，山城候馆壁重修。
千群白刃兵迎节，十对红妆妓打球。圣主分明交暂去，
不须高起见京楼。